

# دُعَاءُ عَبْدِ الرَّحْمَنِ

\*\*\*  
رواية

تصميم الغلاف : محمد جمال حسين

اغترصاب  
ولكن تحت سقف واحد

(لا تندم على احساس صادق قد بذلته فالطيور لا تأخذ مقابلًا على تغريدها )

اغتناب ولكن تحت سقف واحد

دعاء عبد الرحمن

مشاعر غالية

## الفصل الأول

أعتدل جاسر فى جلسته فى اهتمام وهو يتفحص ملامح ابنه الأصغر ثم يقول فى هدوء:

- بتقول أيه يا علي .. كرر كلامك تانى كده عاوز اتأكد!

علي بتلعثم :

- بقول يا بابا بعد أذن حضرتك يعنى عاوز أتجوز أحلام بنت خالتى

ظهرت ملامح خيبة الأمل على وجه جاسر وهو يقول بدهشة :

- أحلام بنت سميحة؟!!

جفف علي عرقاً وهمياً براحته اليمنى وهو يومىء مؤكداً:

- أيوه يا بابا .. بنت خالتى سميحة

وقف جاسر بغضب وانفعال هاتفاً:

- وهى دى بقى الزوجة الصالحة اللى انت بتتمناها؟

أجاب علي بارتباك:

- يا بابا والله أحلام بنت كويسة.. وخالتى سميحة اتغيرت خالص

هتف جاسر بعنف:

- بأماره أيه بقى .. بأماره أمك اللى قطعت اختها بسبب تصرفاتها وموصيائى قبل ما تموت

أن محدش منكم يفكر فى بنتها مجرد تفكير

أبتلع علي غصته وقلبه يخفق بقوة وهو يرى انفعال والده ونظراته الغاضبة الموجهة نحوه

وقال مدافعاً:

- يا بابا والله احلفك ده كان زمان .. خالتى بقت حاجة تانية.. دى حتى عملت عمرة السنة  
الى فانت وأحلام بنت مؤدبة جدا

لم يستطع جاسر كتمان ثورة الغضب التى نشبت فى صدره أكثر من هذا ، أمسك الهاتف  
وضغط على عدة أرقام ثم وضع سماعة الهاتف على أذنه وتكلم إلى ولده الأكبر وكأنه  
يصرخ :

- ايوه يا حسين .. تعالى عندى هنا حالاً وهات معاك أخوك ابراهيم ..مش عاجز أسئلة ..  
تكونوا عندى هنا فى لمح البصر

أغلق الهاتف فى حدة وكأنه قبض قلب ابنه علي فى يديه عوضاً عن سماعة الهاتف ، فبدأ  
جبينه يتصبب عرقاً وأحمر وجهه وتمنى لو أنه لم يكن أعرب عن رغبته فى الزواج، تركه  
جاسر واقفاً متصلباً مكانه وخرج فى انفعال وسرعة إلى بهو المنزل الواسع ووقف ينتظر  
ولديه الأكبر . لم يمر وقت طويل حتى حضرا مسرعين وأقبل حسين الأبْن الأكبر على والده  
فى سرعة وأخيه إبراهيم فى أثره وهو يقول لاهثاً :

- فى أيه يا بابا ..أيه اللي حصل؟

أشار جاسر إليهما أن يلحقا به للداخل حيث ينتظرهم علي أخيه الأصغر وهما ينظران إليه  
بتساؤل وهو متوتراً فى انتظار تحديد مصيره . وقف جاسر بشموخ بين أبنائه الثلاثة وتوجه  
بالحديث الى ولده حسين قائلاً:

- شوفت يا حسين أخوك الصغير عاجز يتجوز مين؟

نظر حسين نحو علي نظرة عتاب ثم أعاد النظر إلى والده مرة أخرى ولم يتكلم، أستطاع  
جاسر قراءة نظرات ولده وما خلفها وفهم منها بأنه كان على علم بما يحدث من قبل فتكلم  
غاضباً:

- عارف ومخبى عليا يا حسين.. ما تتكلم

قال حسين فى ارتباك:

- يا بابا والله انا حاولت معاه كتير.. لكن واضح انه متمسك بيها ..هعمله أيه طيب

توجه جاسر بالحديث إلى إبراهيم ابنه الأوسط وهو يقول منفعلًا :

- وانت كمان كنت عارف!

أطرق إبراهيم برأسه قائلاً بخفوت :

- أيوا يا بابا

صاح جاسر بغضب هادر:

- و أنا آخر من يعلم يا ولاد جاسر؟

تدافع حسين وإبراهيم فى الكلام وأخيراً صمت إبراهيم وترك لأخيه المجال كما يفعل دائماً وسمعه يقول:

- يا بابا انت عارف علي لما بيحط حاجة فى دماغه.. وبعدين انا قلت نسيبه يمكن يطلعها من دماغه .. مكناش فاكيرين انه مصمم عليها أوى كده

زفر علي متأنفاً وهو يشعر بهم يضيقون الخناق حول رغبته وقال بعناد وتصميم :

- يا بابا بصراحة كده اللى بيحصل ده مالوش لازمة.. أنا بحب أحلام وھتجوزھا

ضرب جاسر كفاً بكف وهو يقترب منه ويقول بسخرية مريرة :

- والله؟!.. وحبتهأ أمتى بقى .. وهى بترقص فى فرح اخوك و عيون الرجالة بتاكل فى جسمها أكل وهى ولا هاممها ؟

قاطعه علي بعصبية :

- لو سمحت يا بابا كفاية .. قولتلك أنهم اتغيروا .. وبصراحة كده انا بحبھا ومش ھتجوز غيرها.. جيت آخذ موافقتك علشان مبقاش عملت حاجة من وراك

أنهى عبارته الأخيرة واستدار مغادراً بنزق وغضب، هوى جاسر فوق الأريكة بيأس وقال بحزن شديد :

- هاتسيبوه يعمل اللى فى دماغه .. هاتسيبوا اخوكم يتجوزھا

جلس بجواره ولديه عن يمينه وعن شماله وحاول إبراهيم أن يهدىء الموقف وهو يقول :

- ما يمكن يا بابا زى ما بيقول كده أنهم اتغيروا.. محدش عارف

التفت إليه جاسر وهو يقول فى وهن شديد:

- أمتى يا بنى .. أمتى اتغيروا ؟ .. هو انت مش لسه فرحك مكملش السنتين.. وكلنا شوفنا البت وامها شاكلهم كان عامل ازاي.. حضروا من غير دعوة وعملوا فيها اصحاب الفرح .. وشوفنا كلنا هدومهم وكانوا عاملين ايه فى روحهم .. والبت طلعت وقعدت ترقص ولا همها حد ولا همها كسفتنا قدام الناس ولا نظر الرجالة ليها وكأنها رقاصة جايه تحيى الفرح  
وضع حسين كفه برقة على كتف والده قائلاً :

- يا بابا احنا خايفين عليك.. أنت عارف علي هو الصغير وطول عمره مدلع وراسه ناشفة ..  
وطالما قال عاوزها يبقى هيتجوزها حتى لو احنا رفضنا ... خلاص نخليها بجميلة بقى  
ونوافق .. واهو يبقى تحت عنينا بدل ما يخرج عن طوعك ويبقى خسر الدنيا والآخرة

•••••

## - حسین... حسین

**أنتبه حسين من ذكرياته على صوت زوجته عفاف قائلاً بشروء:**

## - هه ... بتقولی حاجة یا عفاف؟

**أبتسمت عفاف بدهشة وقالت :**

- بقول حاجة ؟!! .. ده انا بقالى ساعة بنده عليك وانت ولا انت هنا.. أيه كل ده سرحان؟

**أرسل حسين تهديداً طويلاً حاراً وهو يعتدل في مجلسه ويقول محدثاً أياها :**

- أفكرت ابويا الله يرحمه .. لما اتصل بينا وجابنا على ملا وشنا لما علي قاله أنه هيتجوز أحلام

**أرتفع حاجبها بتعجب وقالت بشجن :**

- يا ااه.. ده انت روحك لبعيد اوى.. فوق العشرين سنة

**ثم شردت وهي تتابع بحنان :**

**- كان ساعتها معنا عبد الرحمن ويوسف.. ومكنش ساعتها لسه ربنا رزقنا البت فرحة**

### تتهد حسين بقوة للذكرى ثم قال :

- فاکره یا عفاف .. کان نفسی أوی یبقی عندی بنت واسمیها فرحة

ابتسمت عفاف بسعادة وهى تقول :

- و ربنا كرمنا بيها بعد يوسف بكام سنة.. اللهم لك الحمد والشكر يارب

ظل حسين يستعيد ذكرياته وهو يتابع قائلاً :

- كان ساعتها ابراهيم لسه متجوز بقاله سنتين .. وكان وليد ابنه يدوب عنده سنة.. وكانت لسه وفاء اخته فى علم الغيب

استندت عفاف إلى راحة يدها وهى تتنهد وتقول:

- سبحان الله.. كأن الكلام ده كان لسه من كام يوم مش من سنين طويلة

عندما انتهت كلمتها الأخيرة لمحت دمعة فى عينيه تقاوم لتخرج ولكنه كبج جماحها فى صبر فقالت:

- ادعيله بالرحمة يا حسين

قال فى حزن:

- الله يرحمه .. مش لو كان سمع كلامنا من الأول كان زمانه...

قالت عفاف مقاطعة:

- استغفر ربك يا حسين ده قدر ونصيب .. ربنا كتب له يتجوزها ويخلف منها ثلاث عيال

لمعت عينينه فى عزيمة وأصرار وهو يقول:

- هلاقيهم يا عفاف لازم الآقيهم .. علي الله يرحمه وصانى ادور عليهم واجبهم هنا وسطنا فى بيت العيلة .. ومن ساعتها وانا بدور عليهم وان شاء الله هلاقيهم قريب .. انا خلاص قربت اوصلهم.

## الفصل الثانى

وقف عبد الرحمن أمام مكتب والده وطرق الباب بخفة ثم دخل وأغلق الباب خلفه، نظر إليه والده قائلاً :

- تعالى يا عبد الرحمن

دخل وجلس فى مواجهته وقال:

- خير يا حاج حسين بعثلى ليه؟

تسائل حسين ببساطة وهو يقلب الأوراق بين يديه :

- مروحتش المطار النهاردة ليه؟

أجاب عبد الرحمن فى ضجر:

- يا بابا .. يا بابا حرام كده بقالى سنين بروح المطار وأطلع على كشوفات القدوم والمغادرة من مصر لما صاحبى زهق منى وقالى أنت بتجيبى مع القبض كل شهر ولا أياه

قال حسين بعصبية :

- يعنى ايه زهق ...هو يعنى بيوريهالك ببلاش .. وبعدين مالك مضايق كده..مبقتش عاوز تدور على ولاد عمك ولا أياه ..أروح انا بنفسى ؟

أطرق عبد الرحمن متملماً فى مقعده وهو يقول:

- العفو يا بابا ..بس كفاية كده .. لو كانوا هينزلوا مصر كانوا نزلوا من زمان لكن طالما بقالهم سنين يبقوا استقروا خلاص

ضرب حسين المكتب أمامه بقبضة يده وهو يهتف فى ولده بضيق :

- انت ملكش دعوة .. أعمل اللى بقولك عليه ..تروح تطلع على الكشوفات بنفسك أنا مبعثش فى صاحبك ده

حاول عبد الرحمن تهدئة الموقف قليلاً وهو يقول :

- حاضر يا بابا حاضر .. هروح بكره الصبح على طول ..



ثم نهض واقفاً فى سرعة وهو يقول :

- بعد أذن حضرتك لازم اروح مكتبى علشان عندى شغل ضرورى

خرج عبد الرحمن فى ضيق من مكتب والده وهو يزفر بشدة، ألقى نظرة على هند التى تختلس النظر إليه من خلف شاشة الحاسوب ثم تعود وتكمل عملها مرة أخرى، وقف فى مواجهتها وابتكأ على مكتبها وهو يقول:

- مش نخالينا فى شغلنا ولا أیه؟

نظرت إليه قائلة بتفكه:

- خالك فى حالك

أبتسم وقال:

- طب هتتغدى معايا النهاردة؟

ضيق بين حاجبيها قائلة :

- لاء..

ثم تابعت هامسة :

- ماما عامله محشى النهارده يجنن جببتك معايا

نظر عبد الرحمن حوله وقال:

- محشى !! ينهار ابيض ده احنا ممكن نتقفش بيه ونروح فى داهية .. بصى لما ابويا ينزل رنى عليا اجيلك صاروخ استفرض بالمحشى ده لوحدى

قالت بدلال :

- يعنى هتاكل لوحك

قال بخفوت :

- لا طبعا ..

ثم غمز لها وتابع:

- هبقى أديكى واحدة

أحمرت وجنتيها وقالت:

- عيب كده يا عبد الرحمن أحنا لسه مخطوبين

قال بخبت:

- أنتِ فهمتى أيه .. أنا قصدى أديكى واحدة محشى يعنى .. نيتك وحشة على فكرة

نظرت له بغيظ فضحك وانصرف إلى مكتبه على الفور، عندما دلف للداخل وجد يوسف جالس ينتظره وبمجرد أن رآه قال سريعاً :

- أيه يا عم كنت فين بقالى ساعة مستنيك

قال عبد الرحمن ساخراً وهو يجلس خلف مكتبه:

- ساعة أيه أنت هتفشر ده أنا مكلمتش ربع ساعة... لخص عاوز أيه سايب مكتبك وجاى ترمى بلاك عليا ليه

تصنع يوسف الحزن وهو يقول :

- كده يا عبده.. ده انا أخوك برضة

زفر عبد الرحمن وهو يهتف به :

- ااه شكلنا مش هنخلص النهاردة ..عاوز ايه يابنى خلص بدل فيلم الحرمان ده

سأله يوسف بفضول :

- أبوك كان عاوزك ليه؟

نظر إليه فى دهشة قائلاً:

- هو مفيش حاجة بتستخبى فى الشركة دى أبدا.. يا سيدى بيسألنى مروحتش المطار ليه الشهر ده

هتف يوسف بحنق :

- يووووه هو لسه حاطط أمل فى الحكاية دى

حرك عبد الرحمن رأسه مؤكداً بسخط :

- مش أمل وبس.. دى أمل وعمر كمان

أبتسم يوسف وهو يغمز قائلاً :

- وطبعاً انت مصدقت تروحله لما طلبك علشان تشوف هند

هتف عبد الرحمن على الفور:

- بطلوا قربقى .. مش احسن ماقعد فردانى زيك كده

قال يوسف بتهكم :

- فردانى ..سنجل .. اهو احسن من الحريم وخلص

أخرج عبد الرحمن بعض الملفات من درج مكتبه وفتحها واحداً منها وهو يقول :

- هتفضل طول عمرك معقد.. اللى يشوفك كده يقول انك كنت بتحب وخذت بومبة

يوسف:

- حب أية انا ماليش فى الكلام ده .. انا ماليش خلق على الستات أساساً

أوما عبد الرحمن برأسه وهو يرفع عينيه عن الأوراق متابعاً :

- انت ملكش خلق على أى حاجة مؤنثة أصلاً ... المهم انت كنت جاي ليه ؟

يوسف:

- ولا حاجة وليد ابن عمك كلمنى وعاوزنا نخرج شوية

عاد عبد الرحمن يقلب أوراقه مجدداً وهو يقول:

- أخرج انت يا عم .. انت فاضى انا عندى شغل كتير النهاردة

ثم أردف وهو يحرك رأسه متعجباً وهو يقول :

- والله انا مش عارف انت مصاحب وليد ازاي.. ده انت من سكه وهو من سكه..هو ييموت

فى الستات وانت بتكرهم عمى

قال يوسف مداعباً:

- أیه هو من سكه وأنا من سكه دى هو طالب أیدی ولا أیه

قال كلمته وهوينهض ويهم بالأنصراف قائلا:

- يالا سلام .. أشوفك بالليل فى البيت

تنهد عبد الرحمن وهو يتناول قلمه قائلا:

- سلام يا رايق

\*\*\*

جاءت ساعة الراحة وانصرف العمال والموظفين للغداء، خرج الحاج حسين من مكتبه وهو يقول لـ هند:

- ساعة وراجع يا هند

هند وهى تقف باحترام:

- مع السلامة يا حاج

كاد يهم بالأنصراف ولكنه استدار فجأة وهو يقول:

- وانت يا بنتى مش هتروحي تتغدى ولا أیه .. لو وراكى شغل سيبيه لحد ما تتغدى وابقى كمليه بعدين

قالت هند بحرج:

- لا أنا هتغدى بس.. بس خمس دقائق كده

أبتسم الحاج حسين وقد شعر بحرجها وقال :

- طيب يا بنتى ..السلام عليكم

- و عليكم السلام

أخرجت هاتفها وهاتفت عبد الرحمن وأخبرته أن يأتي للغذاء معها فى الحال ،حضر عبد الرحمن فى سرعة فوجدها جالسة أمام الطاولة الموضوعه أمام مكتبها و عليها علبة متوسطة الحجم وتنتظره ، نظر عبد الرحمن إليها بشهية قائلا:

- الله الله من قبل ما أكل تسلم أيدك يا قمر

أشارت له بأن يجلس وهى تقول :

- يالا بسرعة زمانه برد

جلس أمامها مباشرة وأخذ يأكل فى نهم شديد وهى تنظر إليه ، أنتبه عبد الرحمن إليها وأبتسم قائلا:

- وأنا أقول ليه كل مرة تعزمينى على الأكل بطنى توجعنى أتاريكى عينك فيه

قالت هند بتبرم :

- يعنى ولا قتلنى كلى يا حبيبتى ولا حاجة خالص شفت المحشى نسيت الدنيا

قال عبد الرحمن وهو يأكل بشهية :

- هنعزموكى فى بيتك يا شابة.. كلى كلى

نظرت إليه للحظات ثم قالت بدلال :

- طب مش هتأكلنى بأيدك

أطلق عبد الرحمن ضحكة عالية وهو يقول داعباً:

- طب وانا آكل بأيه

نظرت له فى حلق وهى تقول :

- أنت مش رومانسى على فكرة

توقف عن الضحك ونظر إليها باهتمام قائلاً:

- ليه بس يا حبيبتى

تابعت هند حديثها وهى حائرة :

- مش عارفة يا عبد الرحمن.. أنا بحس أنك مش مهتم بيا خالص .. يعنى مثلاً أحنا لوحدنا دلوقتي المفروض تستغل الفرصة وتقولى كلام حلو... لكن أنت نازل أكل كائى مش موجودة ربت عبد الرحمن على معدته وكأنه لم يسمعها وهو يقول :

- الحمد لله ..والله الواحد كان جعان أوى

قامت هند فى عصبية قائلة:

- وكمان مش معبرنى

تنهد عبد الرحمن وتوجه إليها وقال هامسا:

- متزعلش يا حبيبتي والله ما قصدى حاجة.. كل الحكاية بس أنى بحترم أنى موجود فى مكتب أبويا مش أكثر من كده

أستدارت هند وهى تقول متبرمة:

- يا سلام هو انا طلبت منك حاجة وحشة

مط شفتيه بعدم رضا وهو يقول شارحاً:

- لاء.. بس أنا لو قلتك الكلام اللى أنت عايزاه وأحنا لوحدنا كده.. الموضوع ممكن يتطور

نظرت له بطرف عينيها وقالت بدلال :

- وأنت بقى خايف على نفسك ولا ايه

تعجب عبد الرحمن بشدة من عبارتها الأخيرة ولم تكن تعنى بالنسبة له إلا معنًى واحداً .. أنها لا تمنع!!!

\*\*\*\*

- فرحة .. يا فرحة..

انتبهت فرحة لنداء والدتها فأغلقت الحاسوب وذهبت إليها مسرعة وهى تهتف بطفولية:

- نعم يا مامتى .. بتنادى ؟

عفاف:

- بتعلمى ايه لوحدك كل ده

فرحة :

- أبدا يا حبيبتي كنت بتشغل على الكمبيوتر شوية

زفرت عفاف بقوة ثم قالت :

- يادى الكمبيوتر .. هو أنتِ يا بنتى مفيش فى حياتك غير الرسم .. يأما على الورق يا أما على الكمبيوتر

أطلقت فرحة تنهيدة ناعمة وهى تقول :

- طب أعمل ايه بس يا ماما.. منا ماليش أصحاب كتير ومش بحب أخرج عمال على بطل وبعدين زهقت من الجنية لسه كنت تحت الصبح وكمان أنا بلاقى نفسى فى الرسم أوى

تابعت عفاف طهيها وهى تقلب الصحن المعدنى بعزيمة و تقول:

- طب مينفعش تلاقى نفسك فى المطبخ شوية بدل ما انتِ سايبانى محتاسة كده

أقبلت فرحة وهى تقبل والدتها على خديها وقالت:

- يا حبيبتي انتِ تؤمرينى عاوزانى اعمل ايه؟ تحبى اسخن السلطة؟

نظرت لها أمها بتعجب وقالت :

- نعم .. تسخنى السلطة ! ..الله يكون فى عونہ

قالت فرحة متسائلة:

- هو مين يا مامتى ؟

ضحكت عفاف مجيبة:

- اللى امه داعيه عليه ..

أشاحت فرحة بوجهها بضيق فأردفت عفاف قائلة :

- طب متلویش بوزك كده.. تعالى ساعدینى أبوكى واخواتك زمانهم جايين من الشركة

لوحث فرحة بيديها فى ضجر وهى تقول:

- ماهى لو جات على بابا حبيبى وأخواتى كنا قلنا ماشى لكن انت يا ماما عزمة معاهم عمى  
ابراهيم ومراته وولاده

قالت عفاف بنفاد صبر:

- أشتغلى وأنت ساكتة

ثم أستطردت قائلة:

- وبعدين فيها أیه لما اعزمهم .. أبوكى بيبقى مبسوط والعيلة كلها حوالیه

قالت فرحة وهى تقطع الخضار:

- ایوا يا ماما بس طنط فاطمة دى كل ما تشوفنى تقعد تدخل فى خصوصياتى بطريقة غريبة  
عفاف:

- معلىش يا فرحة دى مرات عمك برضة استحملیها وبعدين ده طبع يا بنتى هنعمل ایه

تابعت فرحة حديثها بحلق وهى تقول:

- انا عارفة لیه كلنا ساكنين فى بيت واحد كده ...أحنا فى دور وعمنا فى دور لا وكمان  
سايبين الدور اللى فوقینا فاضى علشان ولاد عمى علي اللى لسه منعرفلهمش طريق أصلا  
وبختها عفاف لتتوقف عن تزمريها قائلة بتهديد :

- كملی كملی ..لو أبوكى سمعك هيزعل منك أوى ...انت عارفة ابوكى وعارفة ازای يحب  
العيله كلها تبقى تحت عنیه .. وبعدين دى وصية جدك الله یرحمه أومال هو بنى العمارة دى  
كلها لیه مش علشان نتلم فيها كلنا وتتجوزوا فيها كمان

قالت فرحة بنزق وهى تستكمل عملها:

- عارفة والله.. انا سمعت الكلام ده كتير

قالت عفاف بنفاد صبر :



- طب لما عارفة كل شوية تكلمى ليه يا لمضة يالا خلصى اللى ف أيدك بسرعة

\*\*\*\*\*

التف الجميع حول الطاولة بعد أن انتهت عفاف وفاطمة وفرحة ووفاء من وضع الطعام عليها ، عندها قال الحاج حسين وهو ينظر الى الجميع فى بهجة:

- ربنا يجمعنا دايما يارب كده ونفضل طول عمرنا مع بعض

نظر إليه إبراهيم أخيه فى حنان وهو يقول:

- طول عمرك بتحب اللمة يا حسين.. الود ودك تجيب ابونا الله يرحمه تقعه معانا على السفرة

ابتسمت فاطمة زوجة إبراهيم وهى تقول:

- اه والله اللمة دى مش ناقصها غير الحاج جاسر الله يرحمه

نظر لها الحاج حسين معاتبا وقال :

- ونسيتى أخويا علي الله يرحمه يا أم وليد

تنحنت بخرج وقالت:

- الله يرحم الجميع

تابع حسين حديثه وهو يتنقل بنظراته بين الجميع وهو يقول:

- وولاده

ربت إبراهيم على كتفه بحنان وقال:

- بكره نلاقيهم يا حسين الصبر طيب

انحنى وليد قليلاً إلى أمه فاطمة وعلى وجهه علامات السخرية وقال هامساً:

- قال ولاد عمى قال وأحنا نضمن منين انهم ولاده أصلا

لكزه يوسف الذى كان يجلس عن يساره فى جنبه حتى لا يسمعه أبيه وشرع الجميع فى الأكل بصمت ، قطعه حسين بعد أن انتهى من طعامه وقال وهو ينهض من مكانه :

- متنساش بكره الصبح يا عبد الرحمن تروح المطار

ينهض عبد الرحمن هو الآخر وهو يقول بأدب :

- حاضر يا بابا اللى تؤمر بيه

تكلمت وفاء لأول مرة متسائلة:

- انتوا لسه بتدروا فى كشوف المسافرين والعائدين برضة

ردت عليها فرحة قائلة :

- أيوا يا وفاء ربنا يعطرنا فيهم يارب

كان الحاج حسين فى طريقه إلى غرفة الصالون هو وإبراهيم وعبد الرحمن عندما سمع تعليق وفاء وهى تقول :

- طب أنتوا ليه مفكرتوش أنهم يكونوا فى مصر أصلا

توقف حسين واستدار إليها وهو يقول ببطء :

- قصدك أيه يا وفاء ؟

تابعت وفاء بحماس:

- يعنى ممكن يكونوا مسافروش أصلا

ظل واقفاً فى مكانه وهو يقول بتفكير :

- يعنى أيه الكلام ده ؟ أحنأ متأكدين انهم سافروا ..

ثم تابع فى شرود:

- البواب ساعتها قالنا انه سمع أحلام بتقول للتاكسى اطلع على المطار

قالت وفاء بشغف بعد أن نظر الجميع إليها :

- ممكن تكون حركة تمويه زى ما بنشوف فى الأفلام

ضربها أخيها وليد على رأسها بخفة وهو يقول:

- بطلى هبل يا بت أنتِ وخاليكى فى الأفلام بتاعتك

نظر حسين الى أخيه إبراهيم وقال بانتباه :

- أحنا ازاي مفكرناش فى الاحتمال ده

قال إبراهيم موضحاً:

- ايوه يا حسين يا خويا بس احنا لما سألنا وقتها عرفنا انها فعلا حجت تذاكر على الكويت

تابع حسين وهو يرى الماضى يمر اما ناظريه وكأنه شريط سينمائي:

- ولما روحنا السفارة ومحدث أدانا عقاد نافع ..سفرنا هناك ومعرفناش نلاقهم يعنى ممكن وفاء يكون عندها حق

قال إبراهيم بتركيز:

- لو كانوا فى مصر كانوا اكيد لما يكبروا هيدوروا علينا وأحنا أسمنا مش شوية .. يعنى بسهولة هيوصلوا

نظر حسين إلى أولاده وكأنه يتخذ قراراً مصيرياً ثم قال ببطء وقد لمعت عينيه بالأمل :

- من هنا ورايح مش هندور فى الكشوفات بس..احنا هندور عليهم فى مصر كلها

تبادل عبد الرحمن ويوسف النظرات الساخطة المتخفية وأوماً كل منهما بالإيجاب لأبيهما بينما قال إبراهيم موجهاً حديثه لإبنه وليد :

- وانت كمان يا وليد هتدور معاهم ..

نظر له وليد متفاجأ ثم قال:

- ها..... اه.. اه ..طبعا يا بابا...

\*\*\*

دخل عبد الرحمن غرفته ، بدل ملابسه وتدثر فى فراشه وشرع فى النوم وهو تبدو عليه علامات الإرهاق الشديد ، كاد أن يستغرق فى النوم ولكنه فتح عينيه على صوت هاتفه ، نظر إليه فوجد اسم هند تضىء به شاشته فأجابها سريعاً بقلق:

- الو .. ايوه يا هند فى حاجة ولا ايه

اجابته هامسة بنعومة:

- وحشتنى .. معرفتش انام غير لما اكلمك واسمع صوتك

تثاءب عبد الرحمن ثم قال :

- ما احنا لسه كنا مع بعض فى الشركة وبعدين انا يدوب كنت هروح فى النوم

- يعنى مفيش حتى وحشتينى يا حبيبتى

تثاءب مجدداً وهو يقول:

- طبعا وحشتينى مفيش كلام ..بس مش ملاحظة ان الوقت متأخر على الكلام ده

هند وهى تنظر لأختها علا التى أشارت لها أن تستمر :

- هو الحب ليه وقت يا عبده..

لم تسمع اجابة منه فنادته قائلة:

- عبد الرحمن؟

عبد الرحمن:

- خخخخخخخخ

أُسعت عينيها بعد أن تأكدت أنه ذهب فى نوم عميق وهى تحدثه ونادته هاتفه :

- عبد الرحمن—————ن

فُزع عبد الرحمن وفتح عينيه بصعوبة وهو يصيح:

- ها ..مين ..فيين .. ازاي

صاحت هند بغضب :

- انت نمت وانا بكلمك ؟

عبد الرحمن وهو يفرك عينيه:

- لا ابدأ يا حبيبتي معاكى ها وبعدين

- معايا ! انت نمت وانا بكلمك .. هو انا هفضل اشحت منك الكلام الحلو فى المكتب وفى التليفون كمان

قال عبد الرحمن محاولاً إنهاء المكالمه :

- بصى يا هند يا حبيبتي أوعدك بكره الصبح هقولك كل اللى انت عايزاه .. دلوقتى مش قادر أفتح عينى يا جبارة .. أمشى يا بت عايز انام

وألقى الهاتف على الفراش وغطى وجهه مغمماً قبل أن يذهب فى نوم عميق :

- البت انحرقت وعاوزه تاخذنى معاها للرذيلة !.

\*\*\*

### الفصل الثالث

ألقت هند الهاتف وهى تزفر بشدة قائلة:

- قفل السكة فى وشى

ثم نظرت لأختها علا بعتاب وتابعت:

- عجبك كده منظرى دلوقتى بقى ايه قدامه؟ ياريتنى ما سمعت كلامك .. أنا كان مخى فى

بس

نظرت لها علا متسائلة وهى تقول :

- ليه بس؟

ضمت هند ركبتيها إلى صدرها وهى على فراشها و تقول حانقة:

- شكلى بقى وحش أوى بعد الحركة دى ..

ابتسمت علا بمكر ثم قالت:

- ولا وحش ولا حاجة.. بكره يتعود

حدقت هند بها وقالت بانفعال:

- يتعود على آيه أنت فاكراى آيه.. أنا مقدرش أعمل اللى أنت عايزاه ده ..أنا كبيرى أوى أدلع عليه

نظرت لها علا بطرف عينيها باستخفاف قائلة:

- يابت متبقيش هبله لو معملتيش كده الخطوبة هتطول .. وده واحد ابن ناس وألف واحدة حاطة عينيها عليه ونفسها يبصلها .. ويمكن يلاقى واحدة أحلى منك ويشبك معاها ويرميكي .. لازم تعلقيه بيكى على قد ما تقدرى علشان يعجل بالجواز ويقولك يالا نتجوز بكره ..الوقت مش فى صالحك يا هند

أشاحت هند بوجهها وهى تهتف باستنكار:

- لا بس أنا اعرف عبد الرحمن كويس .. مالوش فى البنات أوى يعنى وبعدين معندوش وقت ليهم كمان وأنا متأكده أنه بيحبنى ومش هيسيبنى و خايفة أسمع كلامك يفكر أنى واحدة مش كويسة ويفسخ الخطوبة

علا:

- هو أنا قلتلك اعملى حاجه وحشه لا سمح الله ...أنا بقولك علقه بيكى بس... ده شكله بارد ونفسه طويل وبعدين تقدرى تقوليلى اللى زى ده والفلوس على قلبه هو وعيلته كلها وجاى يعمل خطوبة ليه؟ .. آيه عاوز وقت يجيب الشقة ولا يعمل جمعية علشان العفش

- لا علشان نقرب من بعض ونعرف بعض كويس

أجابت علا بثقة :

- يا سلام ما أنتِ معاهم بقالك سنة دلوقتى .. كل ده لسه ميعرفكيش .. أسمعى كلامى هو مين اللى خاله يحبك ويخطبك .. مش هى نصايحي دى اللى مش عاجباكى دلوقتى !!...!

\*\*\*

عادت وفاء من الجامعة وكانت فى طريقها الى بوابة المنزل الداخلية ولكنها لمحت فرحة تجلس فى الحديقة وترسم منهمكة فى لوحاتها ، غيرت اتجاهها وذهبت إليها بابتسامة مرحة قائلة:

- السلام عليكم .. بتعملى أيه بترسمى برضة

أجابتها فرحة بمشاكسة :

- أو مال شايفانى بطبخ يعنى..أيه اللى جابك بدرى خلصتى محاضرات؟

جلست وفاء على أحد المقاعد الصغيرة بجوارها وهى تقول:

- لا يا ستى كان عندنا محاضرة جنائى وأتلغت

زفرت فرحة ثم قالت متعجبة:

- والله أنا مش عارفة أيه حبك فى دراستك دى هتطلعى أيه يعنى وكيل نيابة ولا قاضى

وفاء:

- ولا ده ولا ده أنا نفسى أبقى محامية وياسلام بقى لو أتخصص فى قضايا القتل يا بنت عمى

ألتفتت إليها فرحة فى دهشه هاتفة:

- يخربيت الأفلام الأكشن اللى بتتفرجى عليها دى ..أيه هتعملى فيها شارلوك هولمز ولا ايه

نظرت لها وفاء وقالت باستنكار :

- محدش بيقدر الجميل ابدأ..ماهو يا ست علبة ألوان أنتِ لو مكنش شارلوك هولمز ده

مكنش أبوكى وأبويا اكتشفوا أنهم بيدروا على سراب من سنين ولا ناسية أنى أنا اللى

نبهتهم أن ولاد عمى ممكن يكونوا فى مصر أساسا ومسافروش

نظرت إليها فرحة فى تفكير وقالت بشرود :

- تفتكرى يا وفاء لو هم فى مصر ليه مدورش علينا

وفاء :

- الله أعلم .. أنا لحد دلوقتى منعرفش أصلا هى مرات عمى على خدتهم ومشيت ليه...طب  
لو قلنا علشان أطلقوا ..طب وأيه يعنى هى كل واحدة تطلق تاخذ عيالها وتهرب ....لالالا  
الموضوع فيه سر!!

\*\*\*

نظر عبد الرحمن فى الكشوفات للمرة الثانية وهو غير مصدق متمماً "معقول " !!

قال صديقه متسائلاً :

- أيه الأسم فيه حاجة غلط ؟

قال عبد الرحمن وهو مازال محملاً فى الكشوفات :

- لا ده صح جدا ..جدا...

ثم نظر إلى صديقه بنظرات لامعة وكأنه عثر على كنز لتوه وقال:

- هات ورقة وقلم بسرعة

نقل عبد الرحمن بعض البيانات فى ورقة خاصة وترك صديقه وأنطلق إلى سيارته فى  
سرعة عائداً إلى الشركة بلهفة وهو يتخيل سعادة والده بالخبر الذى يحمله إليه، وصل إلى  
مقر الشركة وصعد إلى أبيه فى سرعة ودلف إلى مكتب هند وهو يقول فى عجلة من أمره

- هند بابا جوه مش كده

وقفت وعلى وجهها علامات الاستنكار من أسلوبه فهو لم يلقى حتى عليها السلام وقبل أن  
تتفوه بكلمة تركها وتوجه للمكتب وطرق ودخل

كان يتوقع أن يجد أبيه بمفرده ولكنه وجد عمه إبراهيم وولده وليد وشاهد أخيه يوسف يقف  
بجوار أبيه الذى نظر إليه وقال :

- كويس أنك جيت يا عبد الرحمن تعالى



قال عبد الرحمن بشغف:

- أنا لسه واصل من المطار حالا يا بابا ومش هتصدق عندى ليك مفاجأة بمليون جنية  
عقب يوسف ساخراً:

- أحنا اللي عندنا مفاجأة بعشرة مليون مش مليون واحدة

نظر له عبد الرحمن بتساعل فشاهد والده يتناول خطاب مفتوح أمامه ومد يده به وهو يقول:  
- مرات عمك علي بعثتلنا جواب

أخذ عبد الرحمن الظرف ونظر إليه بتمعن وقال:

- ده مفيش عنوان ولا ختم ولا حاجة ..الجواب ده وصل هنا ازاي  
قال حسين شارحاً:

- هند جبتهولى مع البوسطة وقالتلى أنها لقيته فى صندوق البريد اللي فى مدخل الشركة  
وطبعاً بما أنه مكتوب عليه خاص وأسمى فمحدث فتحه غيرى  
صمت عبد الرحمن وقال بتفكير :

- يبقى أكيد هى اللي حطت الجواب فى الصندوق

قال إبراهيم متسائلاً:

- يعنى أيه يابنى الكلام ده

قال عبد الرحمن على الفور:

- ماهى دى المفاجأة بتاعتى .. أنا لقيت اسمها فى الكشوف .. جات أول امبارح ومشيت  
امبارح بالليل .. يعنى باتت ليلة واحدة .. وأكيد هى أو حد تبعها اللي حط الجواب ده فى  
الصندوق

ألتفت الحاج حسين إليه قائلاً بنفاد صبر:

- يعنى مقرتش الجواب يا عبد الرحمن !

أنتبه عبد الرحمن وفتح الخطاب وقرأ ما فيه بصوت مسموع قليلاً:

"أزيك يا حسين .. أنا أحلام مرات أخوك علي الله يرحمه .. قصدى طليقتة .. أنا عارفة انك هتستغرب وعارفة انك مكنتش متوقع انى ابعتلك بعد السنين دى كلها.. ومعرفش اذا كنت هتفرح بالجواب ده ولا هتقطعه وترميه فى الزبالة .. أنا مش هفتح فى القديم يا ابو عبد الرحمن انا بعثتك الجواب ده مخصوص علشان ولاد أخوك .. إيمان وإيهاب ومريم.. يا ترى فاكركم ولا لا.. بلاش تخلى القديم يقف بينك وبين ولاد أخوك اللى من لحكمكم ودمكم

ماهو مش معقول تبقوا انتوا عايشين فى العز وولاد أخوك بيشتغلوا علشان يعرفوا يأكلوا نفسهم علشان مش عايزين جوز امهم يصرف عليهم.. الولاد فى مصر ومبقاش فى داعى انى اخبيهم تانى هما خلاص كبروا ويقدرُوا يحددوا هما عاوزين ايه ... انا هديك عنوانهم وانا متأكدة انك لما تروح وتشوفهم عايشين ازاي ضميرك مش هيسمحلك تتخلى عنهم"

.....

رفع عبد الرحمن نظره من الخطاب متعجباً وهو يقول:

- فى السيدة زينب !! .. ولاد عمى فى السيدة زينب السنين دى كلها واحنا منعرفش قال وليد بسرعة:

- يا جماعه مش عاوزين نتسرع لازم نتأكد الأول ان الجواب ده مش لعبة من حد .. ولازم نتأكد هما فعلا هما دول ولاد عمنا ولا نصبه ما يمكن حد بيشتغلنا ..

نظر إليه والده معاتباً:

- تفتكر يابنى بعد الكلام اللى مكتوب ده هنقدر نصبر

وليد:

- يا بابا ماهو اى حد يقدر يكتب اى كلام علشان يصعب علينا ..مش اى حد كده نصدقه

عبد الرحمن وكأنه لم يسمع شيئاً توجه بالحديث إلى أبيه قائلاً:

- ها يا بابا تحب نعمل ايه

كان الحاج حسين واضعاً رأسه بين كفيه غارقاً فى ذكرياته عائداً بها للخلف سنوات وسنوات

"ياريتنى سمعت كلام ابويا الله يرحمه .. الشك مالى قلبى يا حسين مش عارف اعمل ايه

حسين:

- أهدى يا علي بس وصلى على النبي كده

علي بصوت اقرب للبكاء:

- عليه الصلاة والسلام .. انا عارف انى استاهل اكثر من كده كمان لانى عصيت ابويا ومات وهو غضبان عليا

حسين :

- متقولش كده يا علي يا اخويا ابوك عمره ما غضب عليك بالعكس ده كان بيدعيلك ليل نهار ووصانى عليك قبل ما يموت وقالى افضل جنبك ومسيبكش لحظة

قال علي فى لوعة:

- الله يرحمك يا يا ابويا كنت حاسس باللى هيحصلنى ونبهتنى وانا كنت اعمى القلب

ربت حسين على كتفه فى حنان وقال:

- على فكره بقى الوسوس دى وسوس شيطان مراتك ست كويسة وبتحبك

على فى حسرة:

- شوف انت بتقول عليها ايه وهى بتقول عليك ايه ..وانا من غبائى سمعت كلامها وخدت منك ورثى من ابويا كله وعملت المشاريع الفاشلة اللى كانت عايزاها وخسرت كل حاجة ..خلاص خلاص بقيت عاليه عليكوا يا حسين انت وابراهيم

حسين :

- متقولش كده يا علي فلوسنا هى فلوسك اهدى بس متعملش فى نفسك كده ده انت صاحب مرض وعيالك محتاجينك يا اخويا"

""""""""

أفاق حسين من شروده وعاد من ذكرياته على صوت ولده يوسف وهو يهتف به ويهزه برفق :

- بابا .. بابا أنت كويس

رفع حسين رأسه إليهم مرة أخرى وقال بشروا:

- ايوا يا يوسف يا بنى انا كويس متقلقش

يوسف فى قلق:

- اصلك مردتش على عبد الرحمن يعنى .. بيقولك هنعمل ايه .. هنروح؟

\*\*\*\*

- الله الله .. بتلبسى كده ورايحة على فين .. مش قلتى عندك أجازة النهاردة

كانت مريم تلف حجابها أمام المرآه وهى تجيب أختها إيمان :

- خلصتى صلاة ؟ حرماً ..

ثم تابعت مردفة:

- أنا خارجة مع سلمى صاحبتى هنتمشى شويه يا إيمان مخنوقة أوى من قاعدة البيت

قالت إيمان وهى تبتسم:

- اه خلصت صلاة.. وقتلتك مية مرة قبل كده اسمها تقبل الله .. حرما دى ملهاش اصل فى السنة ..

وتابعت حديثها قائلة :

- أخوكى جاى بدرى النهاردة .. أستنى نتغدى مع بعض

ضحكت مريم وقالت بمرح :

- أتعدوا انتوا بقى انتوا مشايخ زى بعض .. انا هتغدى مع سلمى بره

زفرت إيمان بضيق ثم قالت متسائلة :

- رايعين فين ؟ ... انا مبحبش صاحبتك دى ابدأ مش بستريلها خالص

قالت مريم وهى تثبت حجابها:

- وايه الجديد ... على طول بتقولى كده

قالت إيمان بقلق:

- من ساعة ما عرفتى البنت دى وانتِ طريقة لبسك اتغيرت حتى طريقة كلامك مبقتش زى زمان

قالت مريم بغرور مصطنع :

- غلطانة يا إيمان .. مش سلمى هى السبب انتِ ناسيه انا فى كلية سياحه وفنادق يعنى لازم لبسى يبقى شيك زى صحباتى هناك وإلا هيقولوا عليا معقدة.. وبعدين انا مش أى حد انا مريم علي جاسر عارفة عيلة جاسر ولا مبتسمعيش عنهم

رفعت إيمان حاجبيها متعجبة وهى تقول :

- من أمتى النعمة دى.. واحنا من أمتى بنقول احنا من عيلة جاسر؟ .. خدنا منها ايه يعنى غير الغربة فى بلدنا

أخذت مريم حقيبتها واتجهت لباب الشقة وهى تقول :

- بكره هناخد وهناخد كتير وهتقولى مريم قالت

أستوقفتها إيمان بأشارة من يدها قائلة :

- تقصدى ايه يا مريم ؟

تحركت مريم تجاه الباب وهى تقول :

- ولا حاجة يالا سلام

وأرسلت لها قبلة فى الهواء وقالت:

- بوسيلى إيهاب متنسيش

خرجت مريم وتركت إيمان مندهشة من طريقة حديثها عن عائلة أبيها ، بعد دقائق طرق الباب فظنت إيمان أن مريم قد عادت مرة أخرى ، فتحت الباب وهى تقول :

- نسيتى أيا—

وتوقفت فجأه عن الكلام وبترت عبارتها متسائلة بتوجس :

- مين حضرتك؟

\*\*\*

## الفصل الرابع

توقفت إيمان عن الكلام وبترت عبارتها وهى تنظر إلى ذلك الرجل الذى يبدو عليه علامات الوقار وتعلو وجهه ابتسامة حانية وأخيراً خرجت من صمتها وقالت متسائلة :

- مين حضرتك؟

كان يتفرس فى ملامحها بحنان ثم قال بهدوء:

- أنتِ إيمان مش كده؟

أومأت براسها وهى تقول:

- ايوا .. مين حضرتك؟

أرتمت على وجهه ابتسامة كبيرة ولمعت عيناه وقال:

- انا عمك يابنتى

نظرت له بذهول ودهشة وقالت:

- عمى مين؟

قال فى حنان :

- عمك حسين يابنتى ..حسين جاسر

وجدها تنظر إليه صامتة تكسوها علامات الدهشة والوجوم فقال:

- ايه مش هتقوليلى اتفضل يا عمى

أشارت إليه بصمت وأفسحت له الطريق وهى مازالت واجمة ، دخل وأغلق الباب خلفه وجال بنظره فى أنحاء الشقة ، كانت شقة بسيطة ومتواضعة جدا حتى عاد بنظره إليها عندما قالت بعتاب :

- عجبك شقتنا يا عمى

ابتسم لها وقال:

- أى حاجة تخصكم ومن ريحتكم تبقى حلوه يا بنتى .. كفاية كلمة عمى دى اللى كان نفسى أسمعها منكم من زمان

ثم فتح ذراعيه قائلا:

- تعالى فى حضنى يابنت الغالى

توترت إيمان بشدة وترددت كثيرا ولكنها أكتفت بأن تمد يدها بالمصافحة فقط فهو بالنسبة لها رجل غريب لا تذكره وليس لديه ذكريات فى عقلها، كل ما كانت تحمله له هو حديث أمها عنه، أستطاع أن يستوعب مشاعرها ويفهم ما يدور بخلدتها فاحتضنها بعينيه ومد يده يصافحها وهى تقول:

- اهلا وسهلا يا عمى اتفضل اقعد حضرتك تشرب ايه

قال بحنان وهو يتفرس فيها :

- انا مش عايز اشرب حاجة يا ستى .. كفاية انى شوفتك اومال فىن اخواتك هما مش هنا ولا ايه

قالت بتردد :

- ايهاب فى الشغل ومريم لسه نازلة من شوية

قال حسين بابتسامة:

- ماشاء الله .. وهيرجعوا على أمتى كده بالسلامة

- إيهاب زمانه جاى يتغدى.. بس مريم يمكن تتأخر

رآها متوترة وتعامله كالأغراب وهو أيضا كان متوتر فهو لا يعلم ماذا يعرفون عنه وماذا حكى لهم أمهم عنه وعن أخيه إبراهيم فحاول أن يخفف من وقع الموقف فقال بمرح :

- طب وأنا ينفع أتغدى معاكوا ولا انتوا بخلا

حاولت إيمان رسم ابتسامة على شفتيها وقالت:

- تنورنا يا عمى ده يشرفنا

سمعت إيمان صوت مفتاح المنزل يدور فى الباب ، فتح الباب ودخل شاب فى منتصف العقد الثانى من عمره يحمل نفس ملامح أباه ووسامته مع فارق العمر ، وقف إيهاب ينظر إلى الرجل الغريب الذى وجدته فى منزله فى دهشة وقبل ان يتكلم وقف الحاج حسين ولمعت عيناه بالدموع وهو يتقدم نحو إيهاب فاتح له ذراعيه ويقول:

- إيهاب

أحتضنه فى حنان وهو يقول :

- ماشاء الله.. كبرت يابنى وبقيت نسخة من ابوك الله يرحمه

نظر إيهاب لأخته التى ما لبثت ان قالت:

- عمى حسين يا إيهاب

زادت دهشته وهو يمعن النظر فى حسين وقال مرددا:

- عمى حسين!!

حسين :

- ايوا يابنى انا عمكم حسين

ثم تابع :

- بقالى سنين بدور عليكم وادينى لقيتكم الحمد لله

أغلق إيهاب الباب وقال باستنكار:

- ليه ؟حضرتك كنت بتدور علينا فى بلد تانية ولا ايه؟

أشارت له أخته أن يهدأ وقبل أن يشرع فى الكلام بانفعال مرة أخرى قاطعه حسين قائلا:

- ايوا يابنى كنت بدور عليكم فى بلد تانية انت مغلطش

قال إيهاب بضيق وهو يشيخ بوجهه بعيدا :

- مش فاهم حضرتك



ربت حسين على كتف إيهاب وأشار إلى إيمان وقال:

- تعالوا اقعدوا وانا هحلكم كل حاجة

\*\*\*\*

- شايف عميل عمى يا بابا.. أول ما عرف مكانهم جرى عليهم من غير حتى ما يتأكد  
ومرضيش ياخذ حد من ولاده معاه

- عيب كده يا وليد لما تتكلم عن عمك اتكلم بأدب

صاح وليد بانفعال :

- أدب ايه بقى يا بابا ..

وضرب جبينه براحة يده وهو يقول بعصبية:

- أنا عارف عمى كويس .. حنين زيادة عن اللزوم وطبعا هيجيبهم معاه ويقعدهم وسطينا  
ومش بعيد يجبههم الشركة هنا وتبقى هيصة بقى

قطب إبراهيم حاجبيه بضيق قائلا:

- اه يعنى انت بقى كل اللى هامك الشركة .. قولتلى

- يا بابا مش مسألة الشركة وبس .. عمى هيدخلهم فى عبنا .. والله أعلم هما ناويين على  
أيه .. ماهى حاجة بالعقل كده.. أيه اللى يخلى امهم تقول على مكانهم فجأه كده أكيد  
بيخططوا للحاجة

هتف إبراهيم بعصبية:

- أسمع يا وليد انا عارفك كويس وعارف انت عاوز ايه وعارف أمك بتحط فى دماغك ايه  
...لكن لازم تعرف ان دول ولاد اخويا علي اللى اتحرمننا منه وهو لسه فى عز شبابه ومش  
هنفرط فى ولاده أنت فاهمنى ولا لاء

قال وليد بسخرية :

- مش لما تتأكدوا أنهم ولادوا فعلا مش ولاد راجل تانى

قام والده فى انفعال وقد احمر وجهه غاضباً وصاح في وجهه:

- والله لو كررتها تانى لقطعك لسانك ..أنت فاهم ولا لاء ..أنت مين يابنى اللى دخل فى مخك الكلام الفارغ ده

أطرق وليد برأسه بينما اتجه إبراهيم إلى الإريكة ليجلس عليها محاولاً تهدئة الموقف ثم قال بثقة :

- قالتك انت وبس ولا قالت لاختك كمان الكلام الفارغ ده ؟

وقف وليد مدافعا وقال فى سرعة:

- لا يا بابا ماما مالهاش دعوة بالموضوع

ابتسم إبراهيم وهو يقول بهدوء:

- هو أنا جبت سيرة أمك دلوقتى ..

جلس وليد بعصبية فلقد استطاع والده أن يعرف منه كل شىء بدون مجهود وشعر بيد والده توضع على كتفه قائلا له بتفهم :

- أسمع يا وليد يابنى مالوش داعى كل اللى بتعمله ده .. اللى انت خايف منه مالوش اساس من الصحة ، وجلس خلف مكتبه وهو يتابع حديثه قائلا:

- عمك علي الله يرحمه أخذ ورثه من جدك كله وخرج من الشركة ومضى ورق على كده يعنى الشركة والمشاريع بتاعتنا دى بينى وبين عمك حسين بس .. ريح نفسك وطمئن أمك .. ده اللى ليك تعرفه لكن تجيب سيرة عمك علي وولاده بالشكل ده تانى مش هسكتلك .. فاهم

\*\*\*

خرج وليد حانقا من مكتب والده وخرج من الشركة متوجها إلى سيارته ولكنه تصادم مع يوسف ابن عمه الذى قال:

- ايه يابنى واخد فى وشك كده ليه .. رايح فين دلوقتى

هتف وليد بعصبية :

- سبنى فى حالى يا يوسف انا مش طابق نفسى

ضحك يوسف وقال:

- شكلك واخد دش بارد

أشاح وليد بوجهه وهو يفتح باب سيارته :

- أيوا أتسلى عليا بقى لا يا حبيبى مش هديلك الفرصة دى عن أذنك ..

ركب سيارته ولكن يوسف فتح الباب الآخر وركب بجواره وأغلق الباب وقال:

- ايه يابنى بس روق كده وقولى مالك

- ولا حاجة مخنوق شوية ورايح اتمشى بالعربية

يوسف :

- طب انا جاى معاك

أنطلق وليد بالسيارة حتى وصل إلى طريق كورنيش النيل ومنه دخلا إلى إحدى السفن العائمة الكبيرة ، سارع يوسف إلى إحدى الطاولات وهو يقول بفكاهة:

- انا حجزت ده الأول .. بحب اقعد جنب الشباك

لم يستطع وليد أن يتمالك نفسه من طريقة ابن عمه الطفولية وضحك بصوت مرتفع وهو يقول :

- هتفضل طول عمرك عيل يابنى كلها على بعضها شباك منك لربنا على طول

ضحكا سويا بشكل طفولى ، ألتفتت لهما فتاة فى أوائل العشرينيات وتفحصتهما قليلا ثم التفتت إلى صديقتهما التى تجلس معها على نفس الطاولة وقالت :

- شايفة ولاد العز شكلهم أيه يا مريم

قالت مريم بصوت هامس:

- بصى قدامك يا سلمى كده هياخدوا بالهم انك باصة عليهم ميصحش كده

همست سلمى بميوعة:

- طب ماهو ده اللى أنا عايزاه ..حد لاقى يابنتى

قالت مريم بتوتر:

- انا מבحبش أخرج معاكى علشان كده.. علشان طريقتك دى

- ولما انت ياختى مبتحببش طريقتى بتخرجى معايا ليه .. أقولك انا ليه .. علشان انا اللى  
بظبطك وبوديكى الأماكن النضيفة دى

هتفت مريم معترضة:

- ياسلام هو انا يعنى معرفش آجى هنا من غيرك

قالت سلمى بثقة :

- لا تعرفى بس معنديش الجرأة ..أنتِ كده على طول عين فى الشرق وعين فى الغرب تبقى  
عينك هتطلع على الحاجة وعاوزة اللى يجبهالك لحد عندك لكن انتِ متتحركيش ناحيتها أبدا

همست مريم بحق:

- ماشاء الله وحللتينى نفسياً كمان

هزت سلمى رأسها موافقة وقالت :

- اه حللتك وعارفاكى..حتى الحجاب اللى انتِ لابساه ده مصره تلبسيه علشان اخواتك بس  
ميز علوش منك لكن انتِ نفسك فى اللى يقلعهولك

وقفت مريم بعصبية وقالت بحق:

- كده يا سلمى طب انا غلطانة انى خرجت معاكى أصلا.. انا ماشية

وأخذك حقيبتها وانصرفت ، كانت سلمى ستتركها ولكنها فى لحظة لمعت فكرة فى عقلها  
ووجدتها فرصة لا تعوض حتى تلفت نظر الشابين إليها، نهضت على الفور ولحقت بمريم  
وتكلمت بصوت مرتفع قليلاً :

- تعالى بس يا مريم متبقيش عيله بقى عيب كده هنخسر بعض علشان ايه يعنى

ألتفتت إليها مريم بدهشة وقالت :

- وطفى صوتك يا سلمى الناس بتبص علينا

نجحت سلمى فى لفت انتباه وليد ويوسف لهما ولمحت وليد ينظر إليها ويتفحصها بنظرة تعرفها جيدا ولكنها تجاهلت ذلك وقالت لمريم:

- تعالى بس يا مريم استهدى بالله تعالى يا ستى انا آسفة

جذبتها وعادت بها إلى الطاولة مرة أخرى ، جلست سلمى وهى مازالت ممسكة بيد مريم قائلة :

- خلاص بقى متبقيش حماقية.. ها تشربى ايه انا عازماكى

أجابتها مريم بضيق :

- مش عاوزة حاجة

- لا والله لازم تشربى هجبك ليمون يروق دمك

مازال وليد ينظر إلى سلمى ويتابع حركتها الملفته للأنظار وهو يوجه حديثه ليوسف قائلا:

- شايف يا يوسف يابن عمى الطلقتين دول

ثم تابع بنظرات شيطانية :

- بس فيهم بصراحة طلقة أرض جو

ألقي يوسف إليهما نظرة عابرة والتفت فى الاتجاه الآخر ناظرا لمياه النيل وهو يبتسم بسخرية ويقول:

- مفيش فايذة فيك .. متعصب ومضايق وفى لحظة قلبت وبص الطلقتين دول .. قولى صحيح يا وليد هو انت ابن عمى بجد ولا ابن عمى لحد ما تفرج بس

أطلق وليد ضحكة عالية التفتت لها سلمى ونظرت له بدلال ثم عادت ونظرت إلى مريم مرة أخرى وأكملت حديثها معها، ولكن مريم لاحظت ما تقوم به سلمى من نظرات متوالية فقالت:

- سلمى لو ملمتيش نفسك همشى و اسيبك

زفرت سلمى فى ضيق :

- خلاص يا ست خضرة الشريفة خلاص .. أشربى وانت ساكتة

تناول وليد قهوته ومازال يرمق سلمى بنظرات جريئة وهى تختلس النظر إليه من وقت لآخر  
وكأنها ترأسله فقال ليوسف :

- شكلى دخلت دماغها يا يوسف

مط يوسف شفته بازدرء قائلاً :

- يابنى انصف بقى.. انت عمرك ما تبص لواحدة نضيفة أبدا

ضحك وليد وقال:

- ماهى لو نضيفة مش هبصلها يا عم يوسف ولا ايه؟

أوماً يوسف برأسه موافقا وقال:

- البنات زمان كان لما واحد يبصلها تتكسف وتدور وشها دلوقتى بقى البنت هى اللى بتعمل  
فيلم زى اللى اتعمل من شوية ده علشان نبصلها

قال وليد بخبث:

- ما انت واعى اهو وعرفت انه فيلم أومال عامل قطة مغمضة ليه

تنهد يوسف بقوة وهو يقول:

- البنات المحترمة بقت تتعد على الصواب

داعبه وليد بمرح:

- حتى الصواب دى هقليها فى الزيت واعملها صواب زينب واكلها

وضع يوسف حساب مشروباتهم على الطاولة وهو يقول :

- والله أنت مسخرة .. يالا بينا نشوف ورانا ايه يا دنجوان عصرك

قال وليد بتصميم وهو ينظر لسلمى:

- لا مش همشى إلا لما آخذ نمرتها .. حرام عليك عنها هتطلع عليا شكلها حبتنى زى اخوها  
أوعى تفهمها صح يا يوسف

نهض يوسف وهو يدفعه من كتفه قائلاً :

- قوم يا بنى انت حرمت عليك عشتك قوم .. والله عال مش ناقص غير الأشكال دى كمان  
قال وليد بأسف وهو يأخذ مفاتيح سيارته:

- لالا بس البت اللى معاها حطه حجاب على شعرها وشكلها كده يدى على واحد كانه نفسها  
تبقى محترمه بس قفلوا عليها الفرن بدرى شوية  
ألقى عليها يوسف نظرة سريعة قبل أن يغادر وقد احتلت وجهه علامات الازدراء والتقرز.

\*\*\*

- فى آيه يا جماعة مالكو قاعدين مبلمين كده ليه ؟  
نظر لها إيهاب بعصبية وقال:

- أتأخرتى ليه يا مريم .. أعملى حسابك مفيش خروج تانى انتِ فاهمه ولا لاء؟  
هتفت بحقنق :

- إيه يا إيهاب بتزعقلى ليه .. ده هما ساعتين  
تدخلت إيمان محاولة تهدئته قائلة:

- لوسمحت أهدى يا إيهاب مش كده .. هى مالهاش ذنب  
صاح بانفعال :

- سبونى لوحدى دلوقتى

لمعت عيني مريم بالدموع وأسرعت إلى غرفتها ، لحقت بها إيمان وقالت مهدئة إياها:

- معلىش يا مريم أخوكى متعصب شوية وجات فيكى  
قالت مريم وهى تبكى بشدة :

- أول مره يزعقلى كده.. وكمان معلىتش حاجة  
ربتت إيمان على ذراعها وهى تقول:

- معلى يا حبىبى أنتِ عارفه إىهاب بىحبك قد أىه بس اعذرىه غصب عنه

جفت مرىم دموعها وهى تتسائل :

- يعنى أىه غصب عنه.. فى حاجة حصلت؟

قالت إىمان بارتباك:

- عمك حسىن جالنا النهاردة

تسرعت مرىم قائلة:

- طب وفيها أىه؟

نظرت إىها إىمان بشك متسائلة:

- ومالك كده كأنك كنتى متوقعة الخبر؟

نظرت لها مرىم بتماسك وهى تقول بتلعثم :

- عادى يعنى مش ده عمنا برضة

أمسكتها إىمان من ذراعىها وقالت بغضب مكتوم:

- تعرفى أىه يا مرىم ومخبياها عنى .. أنتِ كنتى عارفة أنه جاي مش كده؟

همست مرىم برجاء :

- هقولك بس متقوليش لإىهاب

رمقتها إىمان بنظرات ثاقبة وقالت :

- قولى

أبتلعت مرىم ريقها وقالت:

- ماما لما جات من السفر وباتت معانا هنا قالتلى انها هتبع لعمى حسىن جواب وتعرفه

مكانا وقالتلى انه احتمال كبير يجيلنا هنا

ضىقت إىمان حدقتها بتفكير ثم قالت:



- والجواب ده بعته قبل ما تنزل مصر ؟

هزت مريم رأسها نفياً وهى تقول :

- لا من مصر

قالت إيمان بدهشة:

- أمتى؟! دى جات باتت معنا ومشيت الصبح وإيهاب وصلها المطار

نظرت إليها مريم وقالت بتردد:

- لا أصلها مش زى ما فهمتكو كده انها لسه وصله المغرب لا.. دى كانت وصلت من بعد

الظهر وبعثت الجواب ده لعمى قبل ما تجيئنا هنا البيت وتبات معنا

نظرت لها إيمان بعدم تصديق وقالت :

- ازاي الكلام ده .. عمى قال فى كلامه ان الصندوق كان فاضى امبارح وهما نازلين من

الشركة بالليل و انه لقي الجواب فى صندوق البريد بتاع الشركة النهاردة الصبح ..

قالت مريم بضجر :

- معرفش بقى هى قالتلى انها اتصرفت وشافت حد تثق فيه

نظرت لها إيمان محذرة وقالت :

- مريم

هتفت مريم مدافعة عن نفسها :

- والله ما اعرف اكثر من اللى قلته.. ومش انا اللى بعث الجواب والدليل على كده انى كنت

معاكى فى البيت الصبح ومخرجتش غير بعد الظهر

تنهدت إيمان بقوة أخرجت فيها ما يعتمل فى صدرها من قلق وتوتر ثم قالت :

- خلاص مش مهم مين اللى بعث الجواب مش دى القضية دلوقتى.. المهم دلوقتى لازم نقعد

نفكر فى الكلام اللى عمى قاله وفى العرض اللى عرضه علينا.

\*\*\*

## الفصل الخامس

جمع حسين عائلته وعائلة أخيه إبراهيم وقص عليهم ما حدث فى مقابلته مع أولاد أخيه علي ، إيهاب وإيمان ، ورد فعلهما تجاه عرضه الذى عرضهم عليهما وبمجرد أن انتهى من حديثه قال عبد الرحمن:

- ورفضوا ليه يا بابا؟

- والله يابنى ده شىء طبيعى بعد الفكرة الغلط اللى كانوا واخدينها عنا

قال عبد الرحمن باهتمام:

- أيوه بس المفروض أنك حكّلتهم الحقيقة

أجابته والدته عفاف قائلة:

- الحقيقة دى من وجهة نظرنا احنا.. لكن أكيد هما مش هيكذبوا أمهم ويصدقونا .. خصوصا أنهم متربوش وسطينا وميعرفوناش أصلا

تنهد الحاج إبراهيم قائلا:

- طب ووصلتوا لأيه فى الآخر

قال حسين وهو يحرك برأسه بوقار:

- بعد محاولات كتيرة أوى قالوا عاوزين فرصة نفكر ونستخير ربنا

نظر وليد إلى أمه فاطمة التى بادلتها النظرات الساخرة وهى تمصمص شفتها بتبرم مما يحدث ، بينما تكلمت وفاء قائلة:

- طب أيه رأيك يا عمى نروحلهم أنا وفرحة ونتعرف عليهم ونتقرب منهم قاطعها وليد بسخط :

- تروحي فين وفيه راجل معاهم فى البيت

قال الحاج حسين وقد استحسن الفكرة:

- بسيطة ياخدوا معاهم يوسف أو عبد الرحمن أو انت تروح معاهم قال وليد باستنكار:

- أنا...لالا انا مش فاضى يا عمى معلش

نظر حسين لى ولديه قائلاً:

- خلاص حد فيكم يروح معاهم

نهض إبراهيم قائلاً بهدوء:

- أنا هروح معاهم يا حسين.. نفسى أشوف ولاد أخويا

\*\*\*

وفى اليوم التالى مساءً، كانت أحلام تتكلم مع أولادها فى الهاتف بانفعال شديد:

- يعنى أيه مش عاوزين تروحوا تقعدوا هناك .. أيه لعب العيال ده.. شوية عيال زيكوا هيمشوا كلامهم عليا ولا ايه

زفر إيهاب بنفاد صبر وقال:

- يا ماما أهدى شوية مش كده.. أنتِ حتى مش عاوزة تسمعينا

صاحت بغضب :

- أنا سمعت كثير وياريتنى ما سمعت ..أسمع يا واد منك ليها .. هتروحوا يعنى هتروحوا ومش عاوزة كلمة تانية

رد إيهاب بانفعال أكبر:

- ولو قلنا لا ؟

شعرت أحلام أنها لو انفلتت مرة أخرى ستفقد تأييد أولادها لها فقررت تغير طريقة معاملتها معهم ، بدلت نبرة صوتها ونسجتها بالشجن والحزن وقالت:

- وأنا اللي قلت أنكم بتحبونى وبتسمعوا كلامى وأكيد مش هترفضولى طلب يا إيهاب .. وبعدين يابنى دول عمامكم برضة.. يعنى مش هتقعدوا عند حد غريب .. يابنى انتوا ليكوا حق عندهم يعنى مش هتقعدوا عاله عليهم ..ده كله من خير أبوك .. يعنى هتعيشوا فى ملككم زيهم بالظبط

هدأ إيهاب قليلاً ثم قال :

- أيوا يا ماما بس حقنا ده محدش هيعترف بيه أبدا.. يعنى هنفضل فى نظرهم عاله قالت بهدوء شديد:

- لا يا حبيبى أنا متأكدة ان عمك أتغير.. ولو مكنش اتغير مكنش جالكم بعد ما قرا الجواب وطلب تعيشوا معاه .. وطالما اتغير يبقى لما تعيشوا معاه ويعرفكم كويس ويحبكم ضميره هيصحى وهيرجعلكم فلوس ابوكم الله يرحمه ..

قالت كلمتها الأخيرة وهى تغلفها ببكاء مصطنع مما جعل حنقه يتراجع وهو يسألها:

- أنا نفسى أعرف يا ماما أيه اللي خلاكى تبعى الجواب ده بعد السنين دى كلها.. ليه فجأة كده عاوزانا نرجعهم.. مش انتِ اللي كنتى بتنبهى علينا ان محدش منهم يعرف طريقنا واننا نبعد عن أى حاجة اسمهم عليها حتى

قالت ببعض الحماس :

- ده كان زمان يابنى .. اه كنت خايفة عليكم من أذاهم احسن يطلعوا زى ما طالنى لما كنت عايشه وسطهم.. لكن من فترة كده سمعت انهم رجعوا لربنا وبقوا يعملوا خير كبير وبقيت اسمع عن أعمالهم الخيرية .. قلت يبقى خيرا عرفهم طريق ولاد اخوهم يمكن ضميرهم يصحى ويرجعوا مال اليتيمه اللي نهبوه زمان ... وأهو برضة نبقى خدنا ثواب صلة الرحم

لم يشعر إيهاب بالصدق فى حديث والدته ولكنه لم يتجرأ على القول بهذا، نظر إلى أخته إيمان ومريم التى كانت تتابع الحديث بشغف ثم ألقى سماعة الهاتف إلى إيمان قائلاً:

- خدى كلميها

أعادت أحلام عليها نفس الكلام بشجن أكبر حتى قالت إيمان :

- خلاص يا ماما هنستخير ربنا ونرد عليكى

أشاحت أحلام بوجهها بعيداً عن سماعة الهاتف حتى لا تسمع إيمان صوت زفرتها التى زفرتها فى ضيق ثم رسمت ابتسامة على شفثيها لتخرج كلمات مناسبة من بينهما وقالت :

- طبعاً يا حبيبتي لازم نستخير ربنا قبل أى حاجة وإن شاء الله ربنا هيدلكوا على الخير

أعطت السماعة لمريم التى اكتفت بالسلام والتحية فقط ، وقبل أن تغلق الخط قالت لها أمها:

- مش هو صيكي بقى يا مريم .. ماشى

قالت مريم بتوتر:

- ربنا يسهل يا ماما

جلس الثلاثة فى حلقة نقاش وتشاور حول الأمر حتى سمعوا طرق على باب الشقة، أرتدت إيمان أسدال الصلاة وتوجه إيهاب ليرى من الطارق، كانت مفاجأة أخرى له ولأخته عندما علموا أن الزائر هو عمهم إبراهيم وفى صحبته عبد الرحمن وفرحة ووفاء. أخذ الحاج إبراهيم إيهاب بين ذراعيه وربت على كتفه وهو يقول:

- ماشاء الله اللى يشوفك يقول عليك أبوك وهو صغير الله يرحمه

تراجع إيهاب ليفسح المجال لـ إيمان ومريم ثم أبتسم لـ عبد الرحمن وصافحه، أستدارت إيمان بعد مصافحة عمها والسلام على فرحة ووفاء وفوجدت بعبد الرحمن يمد يده إليها بالسلام وهو يقول مبتسماً :

- أنتِ إيمان توأم إيهاب مش كده

أبتسمت أبتسامة خفيفة وقالت:

- أيوا انا

ثم نظرت إلى يده الممدودة وقالت بنفس الأبتسامة الخفيفة :

- آسفه مبسلمش

كانت تتوقع منه رد فعل متوتر أو غاضب ولكنها وجدته يبتسم ويهز رأسه متفهما وقال:

- ولا يهمك

ثم ألقى التحية إلى مريم ولم يمد يده بالسلام فلقد توقع نفس الرد، أدخلهم إيهاب للصالون المتواضع القابع في إحدى الغرف الصغيرة وقدمت لهم إيمان الشاي وحاولت وفاء بشخصيتها الاجتماعية كسر الحواجز المرتفعة بينهم فقالت :

- وأنتِ بقي يا إيمان خريجة ايه

أجابتها إيمان بصوت منخفض :

- كلية شريعة

نظر إليها عمها إبراهيم مبتسما وقال بفخر:

- ماشاء الله يابنتى ربنا يزيدك

قال إيهاب مؤكدا :

- إيمان أصلها من صغرها وهى مدارس أزهرى .. طول عمرها حابة الطريق ده

أبتسم الحاج إبراهيم مجددا لثناء إيهاب على أخته وشعر بمدى الترابط بينهما وقال :

- وأكد بقي إيهاب كان معاكى ما أنتوا توأم

تكلم إيهاب قائلا:

- لا يا عمى أنا مهندس ديكور

اتسعت ابتسامة إبراهيم وهو ينر له بإعجاب وهو يشير إلى مريم قائلا بحماس :

- ومريم كلية سياحة وفنادق

قالت وفاء بمرح :

- انا بقى حقوق

وأشارت الى فرحة وقالت :

- وفرحة فنون جميلة

أبتسمت فرحة بخجل فطرى وقالت لمريم :

- أحنا من سن بعض تقريبا ياريت نبقى أصحاب

ردت مريم بنفس الأبتسامة :

- طبعاً يا فرحة

بعد ساعة تقريبا انتهت الجلسة العائلية الدافئة وانصرف الجميع على وعد باللقاء مرة أخرى ، جلست مريم وقالت بتسائل:

- ها نويتم على أيه

نظرت أيمان إلى إيهاب وقالت:

- رأيك ايه يا إيهاب

تدخلت مريم بالكلام:

- هي دى محتاجة رأى.. الناس باين عليهم محترمين ومستوى .. ولو رحنا نعيش معاهم هنتنقل لمستوى تانى خالص

قاطعها إيهاب :

- هي كل حاجة مظاهر عندك يا مريم ..مستوى ايه بس

ثم نظر إلى إيمان وقال:

- انتِ ارتحتلهم يا ايمان ؟

إيمان:

- بصراحه معاملتهم معانا محيرانى جدا .. شكلهم ناس كويسه وطريقتهم محترمه مش زى الفكره اللى كنا واخذناها عنهم خالص .. بس الموضوع محتاج تأنى مش لازم نحكم بسرعه كده

ايهاب موافقا:

- صح .. خلاص يومين كده نكون استخرنا ربنا

\*\*\*\*

جلست فرحة بجوار أمها وقالت بشغف وهي تنظر إلى والدها :

- أنا حبيتهم أوى يا بابا.. شكلهم محترمين ودمهم خفيف كمان

ثم ضحكت بمشاكسة وهي تنظر إلى عبد الرحمن وقالت:

- أسكت يا بابا أما عبد الرحمن أخرج بشكل مش معقول

قال والدها بابتسامة متسائلة:

- ازاي ؟

- عبد الرحمن مد أيده يسلم على إيمان .. قالتله مبسلمش بالأيد

مد عبد الرحمن يده وعبث بشعرها وهو يقول :

- هاهاها محدش قالك ان دمك خفيف قبل كده

قال بزهو مصطنع:

- كتير قالولى كده

- ضحكوا عليكى صدقيني

\*\*\*

مر ثلاثة أيام لم تنقطع فيهم اتصالات الحاج حسين بأبناء أخيه واستمرت أيضا اتصالات من فرحة ووفاء لـ مريم وإيمان لوصل حلقات الود بينهم، وزاد إعجاب عبد الرحمن بإيهاب وهو يتعرف عليه أكثر وأكثر ويراه رجل يعتمد عليه، ولم لا وهو يراعى أختيه ويحرص عليهما قدر المستطاع، كانت مشاعر إيهاب وإيمان متوترة بعض الشيء فهما مقدمان على



شئ مجهول لا يعرفونه ، سيعيشون فى كنف أسرة لم يألّفوها ولا يعرفوا عنها الكثير، نعم ستكون لهم خصوصية ولهم طابق بمفردهم ولكن سيكون هناك احتكاك كبير ومعيشة، ليس هذا فقط ، ولكنهم أيضا متخبطون بين ما يعرفون من أهم عن هذه العائلة وبين ما رأوه من ألفه واهتمام وود وحرص وطيبة تظهر بتلقائية فى عيون عمهما حسين و إبراهيم، لا يعرفون الحقيقة ويشعرون أن هناك حلقة مفقودة لا يستطيعون أن يجدوها إلا بالموافقة على الانتقال للعيش معهم. أما مشاعر مريم لم تكن تختلف كثيرا ولكن مع كثير من النشوة لانتقالها للمستوى التى كانت ترنوا إليه منذ زمن ولم يكن له سبيل ، أخيرا سيتحقق حلمها ولكن .

بمراجعة بسيطة كيف سيتحقق هذا الحلم؟ نعم سينتقلون لمنزل آل جاسر ولكن بدون حقوق لن تمتلك سيارة، لن تتجراً على طلب شراء الملابس التى تحبها، إذن سيكون الانتقال ماهو إلا تغير العنوان فقط، ولكن مهلاً هناك سبيل آخر إنه والدتها وما حاولت أقناعها به، إن فعلت هذا سيكون لها نصيب كبير فى هذه العائلة ، بل وتستطيع أن تعيد أملاك والدها مرة أخرى، وقفت أمام المرآه و شردت فى كلام أمها:

- صدقيني يا مريم هى دى الطريقة الوحيدة اللى هنقدر نرجع بيها أملاك أبوكى اللى أخذوها منه بالنصب والاحتيال.. النصب ميرجعش غير بالنصب يا بنتى .. وأنا لو كنت مالية أيدي من أختك كنت هقولها كده برضة .. بس أنت عارفة إيمان هتقعد تقولى حرام وحلال .. علشان كده أنا معتمدو عليكى أنت يا مريم ..أنت اللى هترجعنا جزء من حقنا .. واسمعى سيبك من ولاد عمك إبراهيم ركزى على ولاد عمك حسين هو الكل فى الكل وأكيد ولاده برضه هيبقوا الكل فى الكل وده اللى أحنا عايزينه .. وبما أن عبد الرحمن طلع خاطب يبقى مفيش غير يوسف .. أنا جببتك كل المعلومات اللى هتحتاجيها .. الكلام ده ميطلعش برانا أحنا الاتنين فاهمانى يا مريم.

\*\*\*

وفى اليوم التالى مباشرة أتصل إيهاب على عمه حسين وأخبره أنهم موافقون على عرضه بالانتقال للعيش معهم لتبدأ حياة جديدة وعلاقات جديدة ومعاملات لم تكن فى الحسبان.

\*\*\*\*\*

## الفصل السادس

أصرت عفاف على أستقبالهم بنفسها عند بوابة المنزل الداخلية ورأتهم وهم يخطون أول خطواتهم فى حديقة المنزل الكبير ، رحبت عفاف بهم أشد ترحيب واحتضنت مريم وإيمان فى حنان بالغ بينما اكتفت فاطمة بلقاء بارد وتحية مصطنعة.

كانت دهشة الأخوة الثلاثة بالغة حينما شاهدوا الطابق الخاص بهم و ما أعده لهم أعمامهم فيه ، لا ينقصه شىء على الإطلاق ، الشقق بها جميع الكماليات والأثاث الفاخر مما زاد انبهار مريم بصفة خاصة، كانت الفتيات تتعامل ببهجة وهم يضعون الملابس فى خزاناتهم الخاصة ويجهزون كل شىء ، وكانت أم عبد الرحمن تعد الطعام فى شقتها وعلى وجهها علامات السرور فلقد أحببتهم كثيرا وشعرت أنهم أبناءها التى لم تنجبهم وكانت تساعدوا أم وليد التى ما لبثت أن قالت فى ضيق:

- البت الصغيرة دى شكلها مش مريحنى أبدا.. شبه أمها كده

قالت عفاف وهى تعد الطعام بنشاط :

- بقولك أيه يا أم وليد دول مش جايين يومين وماشين.. لا دول جايين يعيشوا هنا يعنى أنسى بقى أنك بتكرهى أمهم الله يسامحها أفكرى بس انهم يبقوا ولاد علي الله يرحمه ابتسمت فاطمة بسخرية وقالت:

- أنا عارفة انك علانياتك يا عفاف .. حتى لو أحنا نسينا أمهم ... هما مش هينسوا والله اعلم ناوين على أيه وأبقى أفكرى كلامى ده كويس

دخلت فرحة مقاطعة حديثهما:

- ماما خلصنا خلاص كله تمام

قالت فاطمة بحنق:

- واحنا كمان خلصنا روحى نادى وفاء علشان نجهز السفرة

وفى غرفة المكتب كان يوسف يداعب إيهاب قائلا:

- بما أنك بقى مهندس ديكور عاوز اعرف ينفع اعمل شقتى كلها مرايات؟

ضحك الجميع وقال إيهاب :

- اه طبعا ينفع أهو بالنهار تبقى شقة وبالليل ممكن نقلبها ملاهى

ضحك عبد الرحمن وقال:

- أصل يوسف تقريبا كان ناوى يحط كاميرات مراقبة لمراته لما يتجوز .. شكله كده غير رأييه وقال المرايات أرخص

كان وليد متجهما بعض الشىء فلم يشاركهم داعباتهم بينما نظر الحاج إبراهيم لأخيه وقال:

- شكلنا كده مش هنخلص منهم يا حسين أنا جعت أيه مفيش أكل النهاردة ولا ايه؟

قال حسين موجهها حديثه لـ يوسف :

- لو سمحت يا يوسف روح شوف جهزوا السفرة ولا لسه

خرج يوسف متجها إلى المطبخ وكانت فرحة آتية بصحبة إيمان ومريم

نادت فرحه على يوسف قائلة:

- يوسف .. تعالى انت لسه مشوفتش إيمان ومريم ولاد عمى

وأشارت إلى إيمان وقالت :

- دى إيمان الكبيرة أما دى بقى مريم

تلاقت نظرات يوسف بمريم ، عرفها وعرفته فقال باقتضاب :

- أهلا وسهلا وحمد الله على السلامة

ثم التفت إلى أخته وقال بجمود:

- لو سمحتى يا فرحة جهزوا الأكل بسرعة

اجابته فرحة ببهجة:

- خلاص الأكل جاهز .. خمس دقائق وتلاقوا السفرة بقت تمام

عاد يوسف أدراجه إلى المكتب مصدوما ومتعجبا، كيف تكون هذه أخت إيهاب الذى أعجب

برجولته الواضحة فى أقواله وتصرفاته منذ لحظات، بعد عشرة دقائق خرج الرجال إلى

حجرة الطعام، لم تقل صدمة وليد عن صدمة يوسف حينما رأى مريم وتعرف إليها وتعرفت

إليه هي الأخرى ، وجلس الجميع حول المائدة، حيث نظر الحاج حسين إلى الجميع فى سعادة وقال:

- انا كده بقى مش محتاج حاجة خالص من الدنيا

رد إبراهيم مؤكدا:

- أى والله يا حسين صدقت

أبتسم الجميع برغم مما يعانيه كل منهم مشاعر مختلطة متضاربة بداخلهم ، مختلفة ما بين سعادة ونشوة وحذر وخجل ... وبُغض !

لم تحتلم أم وليد أن تكمل هذه الجلسة بخير فقالت موجهة كلامها نحو إيمان :

- بس انا مستغربة يا إيمان.. أراى أمك دخلتك مدارس أزهرى مع أن أحلام مالهاش فى الحاجات دى خالص

نظر لها إبراهيم بصرامة محذراً فقالت بتوتر:

- أنا مقصدش حاجة .. أنا قصدى يعنى ان اخوتها كلهم تعليم عادى يعنى

وهنا تدخل إيهاب قائلاً:

- وأحنا فى الروضة كانت دايم مدرسة القرآن تقول إيمان ليها مستقبل فى العلم الشرعى لأنها كانت متفوقة فى الحفظ جدا.. وكانت دايم تقولها أنت لازم تدخلى أزهرى .. لدرجة أن إيمان كانت بتحلم بالمدرسة من قبل ما تبدأ

نظرت لها إيمان وقد فهمت ما تقصده من كلام عن والدتها فقالت:

- وماما مكنش عندها مانع أبدا يا طنط بالعكس

فى نهاية اليوم توجهوا إلى طابقم الخاص حيث شقتهم الجديدة ، ذهب إيهاب للنوم ليستسقط لعمله صباحا وجلست إيمان ومريم فى الشرفة يحتسيان الشاي ويتحدثان ، كان عبد الرحمن فى شرفة غرفته يتحدث فى الهاتف بانفعال شديد مع هند هاتفاً:

- بقولك مكنش ينفع آجى النهاردة.. هفضل أكررها كتير يا هند

- خلاص مبقتش فاضيلى يا عبد الرحمن شفت بنات عمك نسيتنى

زفر عبد الرحمن بضيق ثم قال:

- أستغفر الله العظيم هنبداً بقى الكلام الفارغ ..

تنفس قليلاً ليهدأ ثم قال:

- يا حبيبتي أنا عارف أنى مقصر معاكى بس عاوزك تعذرينى أنا الكبير ولازم أبقى جنب أبويا دايما

- كويس أنك أعترفت أنك مقصر معايا علشان تعرف بس أنى مستحمله

حاول أن يسترضيها قائلاً بمزاح:

- هو حد قال حاجة تانية يا قمر .. بصى ليكى عندى حنة تعويض بكرة هيعجبك أوى..  
هنتغدى مع بعض فى المكان اللى تختاريه

أبتسمت وقالت:

- موافقة

قال بخفوت :

- بحبك

كانت مريم تتابع بشغف وتستمع لبعض الكلمات الأولى فى الحديث ثم التفتت نحو إيمان قائلة :

- تعرفى أنه خاطب السكرتيرة بتاعتهم

قالت إيمان بلا مبالاة وهى تحتسى الشاى:

- وفيها ايه

قالت مريم بغرور:

- أراى واحد زى ده يتجوز السكرتيرة بتاعته .. وأراى عمى يوافق على كده أصلا

قالت إيمان بابتسامة:

- اهلا يا مريم .. أنت لسه ما كملتيش يوم وليلة هنا .. هتبدأى تتكبرى على الناس من أولها

وبعدين الإنسان مش بفلوسه الإنسان بدينه وأخلاقه

تابعت مريم وكأنها لم تسمعها:

- تعرفى أنكم لايقين على بعض أوى يا إيمان

نظرت لها إيمان بدهشة وقالت متسائلة:

- مين؟

قالت مريم ببساطة:

- أنتِ وعبد الرحمن

ضحكت إيمان قائلة :

- أنتِ بتهزرى ولا أیه؟ .. يا مريم أنا مش هتجوز إلا راجل ملتزم ولا يمكن أرضى بديلا يا أمورة

أبتسمت لها مريم مداعبة :

- طول عمرك فقرية يا إيمان ربنا يكملك بعقلك يامجنونة !

\*\*\*

فى الصباح كانت مريم تقف أمام البوابة الخارجية بجوار سيارة يوسف وتتحدث فى الهاتف ، خرج يوسف ليركب سيارته فوجدها تتحدث بعصبية ناعمة :

- يعنى أیه مش هتيجى تاخدينى.. أروح أنا الكلية أزاى دلوقتى.. المكان هنا غريب عليا  
ولسه مش عارفه المواصلات .. خلاص خلاص أنا هتصرف

أستدارت وهى تضع الهاتف بحقيبتها فوجدته يقف خلفها فقالت بحرج:

- أنا آسفه عطلتك ولا حاجة

قال بتجهم:

- لا ابدا ..

ثم تنحنح بحرج وقال باقتضاب:

- أنا آسف مكنتش أقصد أسمعك وأنت بتتكلمى بس صوتك كان عالى شوية .. على فكرة أنا ممكن أوصلك

تصنعت مريم الحرج وقالت بخفوت :

- لالا مفيش داعى أنا هتصرف .. هشوف أى مواصلات هنا

قال بعملية وهو يخرج هاتفه:

- لا طبعا ميصحش بس ثوانى ..

ثم وضع الهاتف على أذنه قائلاً:

- أنت مش رايحة الكلية يا فرحة؟ .. طيب انا مستنيكى تحت علشان اوصلك انتِ ومريم

أستقلت مريم السيارة بجوار فرحة وهى تشعر بالهزيمة من أول جولة، توقف يوسف بالسيارة أمام كلية مريم ، عندما شاهدتهم سلمى صدمت وهى ترى مريم تهبط من سيارة يوسف فهى لم تنسى ملامحه الجذابة منذ يوم السفينة العائمة ، أقبلت سلمى عليها قائلة:

- يابنت اللذين .. أتلمتى على الواد ده ازاي

قالت مريم بزهو:

- هو اللى عرض عليا يوصلنى.. وبعدين ده شىء طبيعى مش ابن عمى

وضعت سلمى يدها فى خصرها وقالت باستنكار:

- نعم ياختى .. بقى ده ابن عمك انتِ؟

قالت مريم بغرور وهى تخطو وتترك سلمى خلفها:

- أنتِ ناسيه انا من عيلة مين ولا أیه؟ .. وعلى فكرة مش هو لوحده.. اللى كان قاعد معاه كمان ابن عمى إبراهيم

جلست مريم فى الكافتريا مع سلمى وقصت عليها ما حدث وأنهم قد انتقلوا للعيش مع أعمامهم، كانت سلمى تستمع لها باهتمام ثم قالت بمكر:

- أنا شكلى كده هبقى ازورك كتير يا مريم

\*\*\*\*

دخل يوسف مكتب والده الذى نظر له متسائلاً:

- تأخرت ليه؟

- كنت بوصل فرحة ومريم لكليتهم

قال حسين بتلقائية :

- طب خدت رقم مريم علشان تبقى تعرف هتخلص أمتى وتروح تجيبها؟

نظر له يوسف بدهشة واستنكار قائلاً:

- ايه يا بابا هو انا هشتغل موصلاتى على آخر الزمن .. مترجع البيت بتاكسى ايه المشكلة

أبتسم حسين وهو يقول بابتسامة مغيظة:

- طب ومتعصب ليه كده؟

زفريوسف وهو يجلس قائلاً:

- بعد أذنك يا بابا حضرتك أنا اتبرعت بس النهاردة كده جدعنة .. لكن بعد كده حضرتك

ممكن تبعت معاهم السواق للمكان اللى عاوزينه

قال حسين بابتسامة أخرى:

- معلش يا يوسف علشان خاطرى.. هاتهم النهاردة ومن بكرة السواق يوصلهم .. كلم فرحة

أكيد خدت رقم بنت عمها خاليها تكلمها وتشوفها هتروح أمتى

\*\*\*

خرجت مريم بصحبة سلمى من الكلية فوجدت يوسف ينتظرها مع فرحة داخل السيارة على

حسب اتفاقها مع فرحة سابقا ، أتجهت إليهما بينما القت سلمى التحية على يوسف وفرحة

التى قالت بشغف:

- أنت صاحبة مريم الأنتيم مش كده؟

قالت سلمى وهى مصوبة نظرها إلى يوسف :

- جدا يا فرحة .. أنا ومريم أخوات من زمان



أشاح يوسف بوجهه بعيدا عنها بتقزز وهو يزفر بقوة ، وفى الطريق كانت مريم تجلس فى الخلف وتنظر من الحين لآخر نظره خاطفه لـ يوسف الذى تكلم بدون سابق أنذار قائلا:

- هى صاحبتك من زمان؟

قالت مريم بانتباه :

- لا مش من زمان أوى .. من ساعة ما دخلت الكلية بس

هز يوسف رأسه فى صمت فقالت مريم :

- ليه فى حاجة

قال بلا مبالاة :

- لا أبدا.. مجرد سؤال

\*\*\*\*

- ها يا ستى خلاص صافى يا لبن ؟

نظرت له هند بحب وقالت :

- خلاص سماح المرة دى

رفع يديه للسماء هاتفا بمزاح :

- اللهم لك الحمد

نظرت له وكأنها تدرسه وقالت ببطء:

- أنت بتحبنى بجد يا عبد الرحمن؟

- تانى يا هند .. أرحمىنى بقى.. قلتك بحبك والله بحبك ولو مش بحبك خطبتك ليه..

كنت فاضى ومش لاقى حاجة اعملها قلت أخطب شوية ولا أيه ؟

مطت شفيتها بغذوبة متسائلة :

- طب ليه مش عاوز تحدد معاد كتب الكتاب؟

قال بنفاد صبر:

- قلتك أصبرى شوية لما موضوع ولاد عمى ده يستقر كده.. وبعدين هفاتح بابا فى الموضوع

نظرت إليه نظرة جريئة كما تعلمتها من أختها علا وقالت:

- لا يبقى أنا بقى موحشتكش

صرف نظره عنها وأكمل طعامه فى صمت وكأنه لم يسمعها مما استفزها فقالت:

- يبقى أنا فعلا موحشتكش ولا هوحشك

ألقي عبد الرحمن المعلقة على المائدة بعصبية وقال:

- هند.. أنتِ كده هتخلينى أغير رأى فىك .. أنتِ أيه اللى حصلك ؟! .. بقيتى تعملى حركات غريبة كده .. أنتِ مكنتيش كده يا هند !

قالت مدافعة بحراج :

- أنا كان قصدى يعنى أنك تهتم بيا شوية مش أكثر

قال عبد الرحمن دون أن ينظر إليها :

- كللى يا هند خالينا نرجع الشركة

\*\*\*\*\*

فى المساء التف الجميع للعشاء حول المائدة الكبيرة ونظرت عفاف إلى زوجها قائلة:

- عارف يا حاج حسين.. إيمان صممت تنزل شغلها النهاردة

نظر حسين إلى إيمان قائلا بتساؤل :

- أنتِ بتشتغلى يا إيمان ؟

أومأت إيمان برأسها وقالت :

- أيوا يا عمى بشتغل فى مدرسة قريبة من شقتنا القديمة

رفع حاجبيه بتعجب قائلا:

- روحتى المشوار ده كله ورجعتى لوحدك

قالت إيمان بابتسامة:

- وفيها أیه یا عمی أنا بركب مواصلات عامة متقلقش عليا

- أظن يابنتی خلاص مفیش داعی للشغل بعد كده

ابتسمت مجدداً وهى تقول بثقة وهدوء :

- يا عمی أنا مش بشتغل علشان الفلوس مع أن ده سبب من أسباب الشغل لكن الأساس انى بحب مهنة التدريس للبنات أوى وبحس أنى بعمل حاجة مفيدة .. מבحبش ابقى قاعدة كده

تابع حسين تناول طعامه بعد أن قال :

- عاوز أتکلم معاكى شوية يا إيمان ابقى تعاليلي أوضة المكتب بعد العشا

وبعد العشاء دخلت إيمان خلف عمها وأغلقت الباب، أشار لها أن تجلس بالمقعد المقابل لمكتبه فقالت:

- خير يا عمی

أستند إلى سطح مكتبه وقال بهدوء :

- إيمان.. أنت دلوقتی بقيتی زى فرحة بالظبط عندي.. أنا عاوزك تكلميني زى أبوكى متكسفيش من حاجة

أومأت إيمان برأسها وانتظرتة يتحدث فقال:

- أنت ليه مصمة على الشغل يابنتی

رفعت كتفيها واخفضتهما وهى تقول ببساطة:

- زى ما قلتلك يا عمی انا بحب شغلى

- بس انا متأكد أن ده مش السبب الرئيسى

صمتت إيمان فاستكمل حديثه قائلاً:

- أم عبد الرحمن قالتلى انك صممتى تتغدى فى شقتك فوق ليه كده يابنتی

أجابته بخجل قائلة:

- بصراحة يا عمى انا מבחש أتقل على حد .. ده طبعى وبعدين يا عمى بعد أذك أحنا وافقنا نعيش هنا لكن هفضل نشتغل وتبقى لينا مصاريفنا الخاصة زى ما كنا نظر لها بتركيز وقال:

- للدرجة دى شايفانى غريب عنكوا يابنتى

- مش قصدى والله يا عمى لكن معلى سبنا على راحتنا

هز رأسه متفهماً وقال:

- وطبعاً ده رأى إيهاب كمان.. علشان كده رفض يجى يشتغل معاى فى الشركة

صمتت إيمان فقال متابعاً:

- عموماً يابنتى أنا مش عاوز اضغط عليكم فى حاجة .. بس أنا مش مستريح كده ولو على

الشغل وأنت عاوزة تحسى أنك بتعملى حاجة تعالى اشتغلى معانا

استشعرت حنانه ودفء حديثه فقالت بتفهم :

- يا عمى اشتغل معاكوا أيه بس .. انا مليش فى شغلکوا خالص وبعدين انا بحب شغلى ومش

ناوية اسيبه

أنهت كلمتها ونهضت واقفة تستأذنه فى الإنصراف ، سمح لها بالمغادرة وجلس شارد فى

غرفة مكتبه يبحث عن مخرج مناسب.

\*\*\*\*

فى صباح اليوم التالى دخلت هند مكتب الحاج حسين وعرضت عليه ملف أحدى الموظفات

فى الشركة وهى مديرة مكتب يوسف ، نظر الحاج حسين إلى الملف وقال لهند:

- عملت أيه الموظفة دى؟

قالت هند بحق :

- ضيعت ملف مهم جداً يا فندم.. والأستاذ يوسف اضايق أوى وبيستأذن حضرتك فى نقلها

مكان تانى

أمسك قلمه الخاص وذيل الملف بتوقيعه ليتم نقلها مكان آخر ثم وضع القلم قائلاً:

- فى حد هيمسك مكانها

- انا هقوم بشغلها لحد ما نعمل إعلان

- تقومى بشغلها از اى ده هيبقى مجهود كبير أوى.. كده مش هتبقى مركزة كفاية فى شغلك هنا

قالت هند باستسلام:

- مفيش حل تانى يا فندم ..

ثم استدركت ببطء قائلة :

- ياريتنى كنت اعرف حد ثقة كانت هتوفر علينا الإعلان والوقت الطويل اللى هيضيع ده كله

نظر إليها حسين فى تفكير فلقد وجدها الفرصة المناسبة التى كان يبحث عنها ثم قال:

- طيب سيبى الإعلان ده لحد بكرة

وفى المساء جلس إلى إيمان ومريم فى شرفة شقتهم وعرض الأمر على إيمان فرفضت قائلة:

- ما انا قلت لحضرتك قبل كده يا عمى انا ماليش فى شغلكم

ردت مريم بسرعة قائلة :

- ينفع انا يا عمى؟

نظر لها بدهشة وقال:

- بس انت لسه بتدرسى يا مريم هتوفقى از اى بين الشغل والدراسة

قالت مريم بشغف:

- أنا هعرف اوفق يا عمى سبنى اجرب علشان خاطرى

هز كتفيه قائلا باستسلام :

- خلاص زى ما تحبى .. تحبى تبدأى من بكره ؟

هتفت بسعادة :

- أتفقتنا

\*\*\*\*

## الفصل السابع

دلف إيهاب من بوابة الحديقة عائداً إلى المنزل بعد صلاة الفجر وأثناء سيره شاهد فرحة أعدت أدوات الرسم الخاصة بها وبدأت فى رسم منظر شروق الشمس

أخذت فرحة موقعا مميزاً وهى تضع لماستها الفنية لأشعة الشمس وهى تنتشر وتتخلل بين أغصان الشجر وبين أحواض الزهور وبتناغم بين الألوان وباستخدام دقيق لدرجاتها جسدت خيوط الضوء وهى تتسلل غير مبالية من خلف خيوط الظلام لتتكون لوحة فنية رائعة تشعر معها بالدفء

لم يشعر إيهاب بنفسه إلا وهو واقف يتأمل هذه اللوحة المعبرة قائلاً:  
- الله

تفاجأت فرحة بوجوده فى هذا الوقت واستدارت فى سرعة كادت أن توقعها هى وأدواتها تراجع هو خطوة إلى الوراء وهو يشير لها أن تهدأ قليلاً وهو يقول:  
- أنا آسف والله مقصدش أخضك كده

وضعت فرحة يدها على قلبها من أثر انتفاضتها وقالت:

- أنا اللى آسفه معلش أصلى كنت مركزة أوى

تمعن إيهاب فى اللوحة مرة أخرى عن قرب قائلاً:

- حقيقى أنتِ موهوبة يا آنسه فرحة

أبتسمت فرحة بسعادة وقالت :

- بجد .. حقيقى والله

أوماً إيهاب برأسه مؤكداً حديثه وهو يقول :

- إلا حقيقى ده أنا حسيت بالدفىء وأنا ببص على اللوحة كأن أشعة الشمس وصلاتى منها راقب خجلها وهى تقول:

- متشكره أوى .. الحقيقة دى شهادة أعتز بيها جدا

ثم رفعت رأسها متسائلة:

- هو انت كنت فين دلوقتى ؟

- كنت بصلى الفجر وقعدت شوية فى المسجد أقرأ الورد بتاعى بعد الصلاة أبتسمت وقالت:

- تعرف أنك شبه إيمان أوى .. انتوا حقيقى توأم؟

أبتسم وهو يقول بمزاح:

- أيوا توأم بس مش شبه بعض .. وعلى فكرة انا نزلت قبلها بخمس دقائق

كانت مريم تقف فى الشرفة تراقب هذا الحديث بابتسامة مرسومة على شفتيها حين دخلت إيمان الشرفة وهى تقول:

- أيه ده أيه اللى مصحيكى بدرى كده أيه النشاط ده كله؟!

أشارت مريم بعينيها إلى إيهاب وفرحة قائلة :

- شايقة منسجمين أزاى

ضحكت إيمان ضحكة رقيقة ثم قالت:

- والله أنت دماغك مريحاكى .. مرة تقوليلى أنت وعبد الرحمن لايقين على بعض .. ومرة تقوليلى إيهاب وفرحة منسجمين .. أيه ناوية تسيبى السياحة وتشتغلى خاطبة!

التفتت مريم إليها وأمسكتها من ذقنها بخفة وقالت:

- لا يا أموره.. ناوية أشتغل فى شركة عمى .. أنت ناسية ولا أيه

\*\*\*

خطت مريم أول خطواتها داخل مكتب الحاج حسين وهى منبهرة بما ترى من أماكن، فلم تكن تتوقع أن تكون الشركة بكل هذه الضخامة وخصيصا أنها علمت أنها تعمل فى أكثر من اتجاه وليس فى اتجاه المقاولات فقط.

رحبت بها هند بشدة وأدخلتها داخل مكتب الحاج حسين الذى ارتسمت علامات السرور على وجهه وأشار لها بالجلوس قائلاً بترحاب:

- تعالى يا مريم نورتى شركتك يا بنتى ها تشربى أياه  
قالت بخجل :

- شكرا يا عمى أفضل نبدأ فى الشغل على طول  
رفع حاجبيه متعجبا وقال:

- لالا ده أنا كنت فاكرك دلوعة طلعتى بتاعة شغل أهو  
قالت بمرح:

- طبعا يا عمى ده أنا أعجبك برضة

ضحك لداعباتها واتصل على يوسف وطلب منه أن يأتى إليه فى الحال

بعد لحظات طرق يوسف الباب ودخل وأغلق الباب خلفه وهو ينظر إلى مريم متعجبا من وجودها فى هذا التوقيت المبكر، أشار له والده ليجلس ثم قال له وهو يشير إلى مريم :

- أحب أقدملك مديرة مكتبك الجديدة

نظر إليها يوسف غير مصدق ثم نظر إلى أبيه وأخيرا تكلم قائلاً:

- أراى يعنى يا بابا مش فاهم

حسين:

- مش أنت مديرة مكتبك أتقلت مكان تانى .. أنا بقى قلت بدل ما نضيع وقت فى الإعلانات ونطلب مديرة مكتب جديدة أهو عندنا مديرة مكتب نشيطة وزى القمر

نهض يوسف معترضا وقال:



- أيوا يا بابا بس أنا מבחש أشغل مع حريم .. أنا مصدقت البنت اللي كانت شغالة مشيت  
أنا بصراحة علوز راجل يمسكلى السكرتارية

قام حسين من مكانه وأتكأ على مكتبه ونظر إلى يوسف نظرة جعلته يشعر أنه يخترق  
تلافيف عقله ليحذره من الرفض مجدداً وقال :

- بس مريم هتفهم الشغل بسرعة ومش هتضايقك.. انا متأكد

كان يوسف يشعر بالحنق والغضب ولكنه لم يستطع الرفض بعد تلك النظرة من أبيه فقال:

- زى ما تحب يا بابا

ثم نظر لها وقال:

- تحبى تبدأى شغلك أمتى

نهضت مريم فى نشاط وانتصار وقالت:

- دلوقتى لو حضرتك معندكش مانع

أوما برأسه وأشار إليها أن تسبقه وذهب خلفها وهو يشير لـ هند أن تتبعهما

قضت معها هند بعض الوقت تشرح لها طبيعة العمل التى فهمته مريم فى سرعة، ثم تركتها  
هند وانصرفت إلى مكتبها وبدأت مريم تضع أول لمساتها فى مكتبها الخاص

بذلت مريم مجهوداً شاقاً من أول يوم عمل لها حتى تكون دقيقة وسريعة وحتى تستوعب كل  
شئ فى أقل وقت ممكن ، جاء وقت الراحة فى منتصف اليوم وخرج يوسف من مكتبه  
ولكنه فتح الباب بقوة فأصدر صوتها عالياً مما جعل مريم تنتفض وتصرخ صرخة خفيفة

لم يكن الموقف يحتمل أى مداعبات ولكنه وجد نفسه يبتسم رغماً عنه ، فلقد صرخت صرخة  
طفولية جداً وهى تغطى فمها بيدها، وضعت يدها على رأسها وقد شعرت بالدوار نتيجة ما  
حدث وجلست على مقعدها بوجه شاحب ،أقرب منها بضع خطوات وقال:

- أنتِ كويسة؟.. أجيبك مية ؟

قالت مريم بإعياء:

- لالا شكراً أنا دلوقتى هبقى كويسة

- طيب الحمد لله .. أنا هروح أتغدى مش عاوزة حاجة

وقفت وهى تبحث عن حقيبتها قائلة:

- لا شكرا أنا هروح أشوف أى مطعم أتغدى فيه

دخل وليد مقاطعا وكأنه كان يستمع لهذا الحوار من بدايته:

- وأحنا روحنا فين تعالى أتغدى معانا

قالت مريم بخجل:

- لا شكرا أتفضلوا أنتوا

وليد بتصميم :

- لا والله ما ينفع .. تبقى بنت عمنا وتروحي تدورى على مطعم

تدخل يوسف موجهها حديثه نحو وليد:

- سيبها على راحتها يا وليد يمكن هتروح تتغدى مع هند

وليد:

- يا عم هند قالتلى أنها بتتغدى مع خطيبها..

ثم تابع قائلا:

- وعمى بيروح البيت يتغدى هناك

نظرت مريم إلى يوسف وكأنها تنتظر قراره فقال بضجر:

- طيب أتفضلى معانا

قالت مريم بصوت خفيض:

- طيب ثوانى أتصل بعمى أسأله

وأخرجت هاتفها وتحدثت إلى الحاج حسين تستأذنه بينما اقترب وليد من يوسف وغمز له هامسا:

- هتصل بعمى أستاذنه .. يا سلام على الأفلام

جلست مريم معهما على إحدى الطاولات فى المطعم وهى تشعر بالحرى الشديد ولكنها لا تعلم سبب هذا الحرى فلقد حققت خطوتين نحو هدفها فى يوم واحد فمن المفروض أن تشعر بالانتصار ولكنها بدلا من ذلك تشعر بالحرى والخجل، أنتهت مريم من تناول طعامها فقال لها وليد على الفور:

- أیه مكلتیش لیه

- لا كلت والله الحمد لله

- أنت مكسوفة مننا ولا أیه .. لالا بكرة هناخد على بعض .. ده أحننا ولاد عم يا مريم

قاطع يوسف حديث وليد قائلا:

- تشربى أیه يا مريم شای ولا عصير

قالت بخفوت:

- لو ممكن يعنى قهوة مطبوط

قال وليد باندعاش وهو ينظر إلى يوسف نظرة خاصة:

- أیه ده.. بتشربى قهوة مطبوط بعد الأكل زى يوسف .. يا محاسن الصدف

رفع النادل الطعام وآتى بالمشروبات ، بينما نظر وليد إلى مريم قائلا مباشرة:

- هى صاحبتك اللى كانت معاكى فى المركب اسمها أیه؟

شعرت مريم بالأرتباك من ذكر هذا الموقف فى حين قال يوسف :

- مالناش دعوة يا وليد متدخلش فى خصوصياتها

وليد:

- وفيها أیه يا يوسف متحبكعاش كده.. دى بنت عمنا عادى يعنى

قالت مريم بارتباك:

- هى مش صاحبتى أوى يعنى دى زميلتى فى الكلية

قال وليد وهو يتصنع الدهشة:

- لا.. بجد .. أنا قلت كده برضة

نهض يوسف حانقاً وهو ينهى هذا الحوار العقيم قائلاً :

- أظن يا لا بقى ساعة الراحة خلصت

أنتهى اليوم وعادت مريم بصحبة عمها فى سيارته ولم تستطع أن تتناول العشاء من شدة  
الأرهاق ودخلت لتنام على الفور.

\*\*\*\*

فى صباح اليوم التالى أستيقظ يوسف مبكراً وخرج بدون تناول طعام فطوره ، كان يخشى  
أن يطلب منه والده أن يأخذ مريم معه إلى العمل، و ذهبت مريم فى ميعاد عملها تماماً  
وطرقت الباب ودخلت وهى مبتسمة قائلة:

- صباح الخير يا يوسف

يوسف باقتضاب ودون أن ينظر إليها:

- صباح النور

كانت تحمل فى يديها صينية عليها فنجان شاي وبعض قطع الكيك

وضعتهم على المكتب وهى تقول:

- أنت نزلت من غير ما تفطر

نظر إلى الكيك وأبتسم قائلاً:

- متشكر أوى يا مريم

أبتسمت وهى تغادر الحجرة ولكنها اصطدمت بـ وليد الذى قال مبتسماً :

- وأنا ماليش فطار أنا كمان ولا أيه

أبتسمت أبتسامة خفيفة وخرجت دون أن تجبه، جلس وليد أمام مكتب يوسف وقال وهو  
يمسك بأحد قطع الكيك:

- ناس ليها كيك وناس ليها وش خشب

يوسف:

- عاوز أيه يابنى على الصبح كده سايب شغلك ليه

وليد:

- اه طبعا بقيت تضايق من وجودى منا اللى بحجب عنك الرؤية

ثم غمز ليوسف وقال:

- بس حلو الجو ده.. قهوة مظبوط وفطار وحركات

زفر يوسف وقال بضيق:

- أنا مش فاضى للكلام ده يا وليد .. وانت عارف أنى مش بتاع الحاجات دى

قال وليد بمكر :

- أنت مش بتاع الحاجات دى.. لكن هى بتاعتها .. وحطاك فى دماغها ولا أنت دخلت عليك  
الافلام دى

وضع يوسف الأوراق التى كانت بيده على المكتب بانفعال وقال :

- عيب كده يا وليد .. دى برضة بنت عمنا

قال وليد ساخراً :

- ونسيت صاحببتها.. ونسيت الفيلم اللى اتعمل فى المركب .. ونسيت رأيك فيهم

هتف يوسف بعصبية:

- لا منستش ومش هنسى .. بس انت كمان متنساش أنها بنت عمنا يعنى سمعتها من سمعتنا  
وقفل بقى على السيرة دى فورت دى يا أخى

\*\*\*\*

فوجىء حسين باتصال إيمان به وصوتها كأنها تبكى وهى تقول:

- معلىش يا عمى لو ممكن تبعتلى حد ياخذنى أصل .. أصل شنطتى أفسرقت منى فى المواصلات

أعتدل حسين فى جلسته بانفعال قائلا:

- أوصفىلى أنت فىن بالضبط وخالىكى عندك

أنظرت إيمان ما يقرب عن النصف ساعة حتى وجدت سيارة تقف أمامها ويخرج منها عبد الرحمن ويدور حولها بسرعة ليقف أمامها متسائلا بقلق:

- إيمان أنت بخير؟

أومات برأسها بحرج شديد وهى تقول:

- الحمد لله

أشار لها أن تركب السيارة ولكنها تسمرت مكانها فأعاد كلماته مرة أخرى:

- أركبى يالا

صمتت مرة أخرى وبعد لحظات قالت:

- مش هينفع أركب معاك لوحدى

- مينفعش أركب معاك لوحدى

أبتسم وقال بتفحص:

- هو أنت لما بتركبى تاكسى مش بتبقى أنت والسواق لوحكم خلاص يا ستى أعتبرينى السواق

هزت رأسها نفيا وهى تقول:

- أنا مش بركب تاكسى علشان كده .. أنا بركب مواصلات عادية

وضع عبد الرحمن يده فى خصره وأستند بالأخرى على باب السيارة المفتوح وقال:

- اممم طب والعمل أيه دلوقتى .. تحبى نركب العربية ونسيب الأبواب مفتوحة

ورغم صعوبة الموقف ولكنها أبتسمت ثم أختفها سريعا وقالت :

- طب ممكن التليفون أكلم إيهاب تانى .. أصلى كلمته قبل ما أكلم عمى وتليفونه كان مقفول  
ثم تابعت بأحراج :

- لو سمحت ممكن تدفع لصاحب الكشك ده تمن المكالمة

أعطاها عبد الرحمن هاتفه لتتصل بأخيها وذهب ليدفع ثمن المكالمة وعاد سريعا فوجدها  
واضعة الهاتف على أذنها وتنقر على السيارة بتوتر بالغ وبعد لحظات قالت:

- شوية يدى مشغول وشوية يقول خارج الخدمة

قال وه مازال محتفظا بابتسامته المتعجبة :

- والعمل .. ؟

أشارت إلى المقعد الخلفى قائلا بخجل من موقفها:

- طب ممكن أركب هنا؟

أبتسم وفتح لها الباب الخلفى ، وفى الطريق نظر لها فى المرأة قائلا:

- أنا مكنتش أعرف أنك بتتكسفى أوى كده .. لو كنت أعرف كنت جيت هند معايا

قالت إيمان بصوت يشبه الهمس من شدة خجلها:

- مش موضوع بتكسف .. بس مينفعش أركب عربية مع راجل مش محرم ليا

ثم أكملت :و

- حتى خطيبتك مينفعش تركب معاك لوحدها

أوما برأسه وهو يقول فى نفسه:

- مينفعش تركب معايا لوحدها !! .. دى بتقولى كلام بيخلى وشى يحمر

\*\*\*

وفى المساء جلس عبد الرحمن يقص على الجميع ما حدث وهم يضحكون ما عدا إيهاب الذى  
كان ينظر إلى أخته بأعجاب لأنها أحسنت التصرف، نظرت عفاف إلى إيمان بحب وقالت:

- والله يا إيمان لو البنات كلها زيك كان الشباب حالهم أتصلح

ألتقت الحاج حسين طرف الخيط من كلام زوجته ونظر إلى عبد الرحمن وقال:

- صحيح يا عبده أخبار هند معاك ايه

أنتبه عبد الرحمن على سؤال والده وقال:

- هند .. اه الحمد لله كويسين

كان عبد الرحمن فى داخله يتمنى أن تتصرف هند مثل إيمان وتتعامل بنفس طريقته ولكن عزاؤه أنه يعلم أنها لا تفعل ذلك إلا معه لأنها تحبه وهو أيضا يحبها ولكنه بداخله صراع .. وضع رأسه على الوسادة وقد اشتعل الصراع داخله ، طبيعته الشرقية وطبيعة تربيته تجعله يريد أن تكون خطيبته متحفظة معه أكثر من هذا، فهذه ستكون أم أولاده ومن تحمل اسمه فى المستقبل ، لقد لفتت إيمان انتباهه دون قصد منها أنه توجد حدود بين الخاطب والمخطوبة حتى أنها لا تحل له أن تركب معه سيارته وحدها، لم يكن أمام عبد الرحمن بعد هذا الصراع إلا شىء واحد.. هو أن يتكلم مع هند ويشرح لها طبيعة مشاعره ويضع بينهما الحدود المفروضة بينهما حتى يتم تحديد ميعاد كتب الكتاب ، وكان يتوقع أن ترحب هند بهذه الفكرة بل وكان يتمنى أن تساعد عليها فهو يحبها بصدق.

جاءت سلمى لزيارة مريم يوم الجمعة بحجة أن تعطيها تفريغ المحاضرات التى غابت عنها، رحبت بها مريم وأجلستها فى الحديقة تحت المظلة ، ظلت سلمى تجول بنظرها فى أركان الحديقة وهى تقول لمريم:

- أيه ده كله.. أومال البيت من جوه شكله أيه.. يا بختك يا مريم

مريم :

- أنتِ جاية تزورينى ولا جاية تقرى عليا أشربى العصير بتاعك

أخذت سلمى كأس العصير ورشفت منه وهى تقول :

- قوليلى أخبار ولاد عمك أيه

نظرت لها مريم باستفهام :



- تقصدى مين فيهم

رفعت سلمى حاجبيها وهى تقول بمكر:

- يعنى مش عارفة أقصد مين؟

رفعت مريم رأسها من أوراق المحاضرات تنظر إليها قائلة:

- سلمى أبعدى عن وليد.. ده مش سهل أبدا .. مش بتاع خروجة وفسحة زى ما أنتِ فاكرة  
ده أنا بنت عمه وبخاف منه ومن نظراته

ضحكت سلمى وقالت:

- أنتِ تخافى علشان أنتِ قطة يا ماما.. لكن أنا لا .. أنا أعرف أخليه يدوخ حوالين نفسه وفى  
الآخر يرجع أيده فاضيه

ثم وضعت كأس العصير من يدها وأكملت حديثها قائلة :

- بقولك أيه مش هتفرجينى على بيتكوا من جوا ولا أيه

أخذتها مريم للداخل ولكن وهما فى طريقهما استوقفتها سلمى وهى تشير إلى ركن ما فى  
الحديقة وتساءلت قائلة:

- أيه ده يا مريم ؟

نظرت مريم إلى حيث أشارت سلمى فوجدت ما يشبه حلبة الملاكمة وقالت:

- مش عارفة أول مرة أشوفها

\*\*\*

## الفصل الثامن

- مش عارفة .. أول مره أشوفها

أستكملا طريقهما إلى البوابة الداخلية للمنزل ووقفت مريم تطلب المصعد، فتح الباب وخرج منه وليد ويوسف وهما يرتديان حلة رياضية فى طريقهما للخارج ، وقف وليد بابتسامة كبيرة أمام باب المصعد وهو يرحب بسلمى ، صافحها وضغط على كفها وهو يقول :

- أنا أعرف ان القمر بيطلع فى السما مش فى الأسانسير

ضحكت سلمى بميوعة وقالت :

- ميرسي أوى لذوقك

تحرك يوسف وهو يجذب وليد من يده قائلا بضيق:

- يالا يا وليد

أستوقفته سلمى قائلة :

- أزيك يا أستاذ يوسف

أشاح بوجهه بعيدا وهو يجيبها قائلا:

- كويس ..

ثم خطى بعيدا عنهم وهو يقول لوليد :

- أنا هسبقك يا وليد

تبعته مريم بعينها بينما قالت سلمى لوليد:

- أنتوا رايعين فين كده ؟

نظر لها وليد بجرأة مكشوفة وهو يقول :

- عندنا ماتش ملاكمة تيجى تتفرجى

قالت مريم بتعجب:

- ملاكمة أنتوا بتلعبوا ملاكمة مع بعض

ضحك وقال:

- يعنى حاجة كده خفيفة كل شهر مرة علشان مننساك

ثم أقترب من سلمى وقال بنظرات تفهمها جيدا :

- لازم الواحد يحتفظ بلباقتة دائما

أبتسمت سلمى وقد فهمت تلميحاته بينما قالت مريم:

- طب يالا نطلع احنا يا سلمى

أقتربت سلمى خطوة أخرى من وليد وقالت:

- لا أنا عايزة أتفرج

وهنا عاد يوسف مرة أخرى وصاح فى تأفف موجهها حديثه لوليد :

- هتيجى ولا أيه يا وليد ؟

ذهبت إليه مريم وقالت برجاء:

- ممكن نتفرج يا يوسف؟

قال بنزق وهو يذهب ودون أن ينظر إليها:

- تتفرجوا على أيه.. هى سيما ..

شعرت مريم بأحراج شديد أحمر له وجهها وعادت للداخل ولم تنتظر المصعد بل توجهت للدرج مسرعة وهى تقول بعصبية :

- حصلينى يا سلمى

وقفت أمام باب شقتها وهى تكاد تبكى مما فعل بها فى الأسفل ، كانت تشعر بالحنق الشديد حتى أنها لم تسمع فرحة وهى تلقى عليها السلام أثناء صعودها ، صعدت خلفها فرحة ووجدتها على حالتها تلك فقالت وهى تربت على كتفها:

- مالك يا مريم عنكى مالها.. كنت بتعيطى ولا ايه

أجابتها مريم حانقة:

- مفيش حاجة يا فرحة

- أراى أنا شفتك وأنت طالعة واخده فى وشك.. سلمت عليكى مردتيش عليا.. قوليلى مين زعلك وانا أخلى بابا ياخذلك حقك منه

أبتسمت مريم لطريقتها الطفولية واحتضنتها وقالت:

- تسلميلى يا حبيبتى أنا كويسة

ثم قالت بتردد:

- أخوكى بس أخرجنى شوية

أرتفع حاجبى فرحة وتسائلة:

- مين فيهم؟

مريم:

- يوسف ... قتلته ممكن آجى أتفرج على الماتش بتاعهم كلمنى بطريقة وحشه أوى

هتفت فرحة بسعادة:

- آيه ده.. هما هيبدأوا دلوقتى مشوفتوش وهو نازل يعنى

خرجت سلمى من المصعد وأتجهت إلى مريم وقالت:

- كده برضه تسيبيني وتمشى .. مالك فى آيه

نظرت لها مريم بضيق:

- لسه فاكرة تيجى تشوفيني مالى

أقبلت فرحة على سلمى وصافحتها ورحبت بها ثم أستدارت إلى مريم وقالت :

- ولا يهمك تعالوا نتفرج ..

بترت عبارتها لأصطدامها بإيهاب على باب الشقة ، شعرت بالخجل الشديد واحمرت وجنتاها ، بينما قال بابتسامة خفيفة :

- أنا آسف يا فرحة مكنتش عارف أنك داخله

قاطعتهما سلمى مرحبة به فقال إيهاب باقتضاب:

- كويس الحمد لله.. عن أذنكم

تركهم ونزل إلى الأسفل بينما تابعت فرحة عبارتها التي كانت قد بترتها وقالت :

- تعالوا نتفرج من البلكونة

استقبلتهم إيمان بالداخل وصافت سلمى التي انبهرت بالشقة الكبيرة وأثاثها الفخم ودخل الأربعة إلى الشرفة ليشاهدوا هذه المباراة الصاخبة بين وليد ويوسف وتشجيع إيهاب وعبد الرحمن المستمر مما زاد جو الألفة بين إيهاب وأولاد أعمامه.

استأذنت إيمان وتوجهت إلى عفاف زوجة عمها لتساعدها في تحضير طعام الغداء، فالיום هو الجمعة والحاج حسين لا يرضى بديلا إلا أن تجتمع الأسرة كلها على مائدة واحدة، طرقت إيمان باب شقة عمها ففتحت لها فاطمة زوجة عمها أبراهيم وعندما رأتها قالت ببرود:

- اهلا يا إيمان فى حاجة؟

قالت إيمان ببشاشة:

- أزيك يا طنط أخبارك ايه .. ممكن لو سمحتى أدخل لطنط عفاف

أشارت لها فاطمة بالدخول، دخلت إيمان ولكنها تفاجأت بوجود هند التي تعرفت عليها ببساطة و ساد جو من البهجة فى المطبخ وخصوصا بعد تواجد وفاء وأصبحت تتجاذب المداعبات مع إيمان التي تتمتع بشخصية مرحة عكس ماكان يوقع الجميع، بعد ساعة أنصرفت سلمى وكانت معها مريم التي أوصلتها إلى باب الحديقة الخارجى وودعتها وهى تستقل سيارتها الصغيرة وتنطلق بها ثم عادت مريم وقطعت الحديقة وهى تشاهدهم وهم يجمعون أحبال حلبة الملاكمة، نظرت إلى يوسف وهو يجمع الأحبال بصحبة إيهاب ويتمازحان وكأنهم أصدقاء منذ زمن، ظلت واقفة لبرهة تنظر إليهم فى حيرة وضيق ، لا تعلم لماذا يتعامل معها هكذا، إذا كان غير مرحب بوجودهم فلماذا إذن يحب إيهاب ويصادقه ويتعامل مع إيمان باحترام، أما هى فدائما يعاملها باقتضاب ونادرا ما ينظر إليها وهى تحدثه ، نفضت أفكارها جانبا وأكملت طريقها للداخل.

وأخيرا التف الجميع حول المائدة الكبيرة وجلست هند بجوار خطيبها عبد الرحمن حيث قال الحاج حسين بترحاب :

- منوره يا هند بقالك كتير مجتيش عندنا

قالت هند بابتسامه كبيرة :

- ربنا يخالك لينا يا حاج ..

ثم التفتت إلى عبد الرحمن وقالت :

- أصل عبد الرحمن بقاله فترة مشغول عنى

أكمل حسين طعامه وهو يقول:

- معلىش أنت عارفة بقى مشغولياته هو أنا اللى هقولك

والتفت إلى يوسف قائلاً:

- صحيح يا يوسف أخبار العمارة الجديدة آيه.. والمقاول ده مريحك ولا منتعاملش معاه تانى

قال يوسف بنزق:

- بصراحة يا بابا هو متعب وعاوز حد يبقى على دماغه دايمًا .. مبيجيش غير بالدق على دماغه

نظرت له مريم وفى نفسها مندهشة من تصرفاته، فهو أحياناً رقيق ومهذب وأحياناً أخرى لا يُحتمل ، بل لا يُطاق !

تابع حسين وهو ينظر إلى إيهاب قائلاً:

- بقولك آيه يا إيهاب يابنى.. آيه رأيك تاخد الشغلانة دى

أبتسم إيهاب وقال معتذراً:

- يا حاج ده شغل مهندس مدنى .. أنا مهندس ديكور

قال حسين بعملية:

- طبعا فى مهندس مدنى مسئول بس طبعا قلبه مش هيبقى على الشغل.. ده مجرد موظف

عامل الوقت ميفرقش معاه.. بالعكس الوقت لصالحه... وزى ما أنت شايف عبد الرحمن

ووليد ويوسف مش فاضين .. آيه رأيك انا محتاجلك بجد وبعد العمارة ما تخلص تمسك انت

تشطيبها ها قولت آيه ؟

نظر له إيهاب وقد شعر بالصدق فى كلماته وأنه بالفعل يحتاج مساعدته ولكنه ملتزم بالعمل فى مكان آخر فقال:

- طيب وشغلى يا عمى

أبتهج الحاج حسين وقال:

- يا سيدى خد أجازة.. ولو الشغل معانا تعبك أرجعله تانى

صمت إيهاب لبرهة ثم أبتسم وقال لعمه:

- خلاص يا عمى هرد عليك بكرة بأذن الله

وهنا نظر الحاج إبراهيم إلى يوسف وقال :

- ها يا يوسف مريم عامله معاك ايه فى الشغل

قال يوسف وهو يتناول طعامه :

- الحمد لله

تابع إبراهيم وهو يوجه حديثه إلى مريم:

- وأنت يا مريم مستريحة فى شغلك ولا معطلك .. أنا أصلى عارف يوسف طلباته كتيرة ومتعب فى شغله

ألقت مريم نظرة سريعة إلى يوسف وهى تقول :

- هو أصلا مبيكلمنيش كتير علشان تبقى طلباته كتير

أرتفع حاجبي إبراهيم وهو يتابع قائلا:

- أراى الكلام ده .. ده انتوا ولاد عم

نظر لها يوسف بحدة وقال:

- أيه المطلوب يعنى نسيب الشغل ونقعد نتساير ..

لمعت عيناها وكادت أن تبكى من حدته

فقال إيهاب بعصبيه:

- أیه یا یوسف بتکلمها کده لیه

تدخل حسین علی الفور قائلا بغضب يحسبه:

- بتکلموا بعض کده وانا قاعد .. والله عال

ثم نظر إلى يوسف بحدة وقال:

- بعد الأكل نقعد فی المكتب نشوف ایه الحکایة

حاولت وفاء کعاداتها تغير مسار الحديث المحتقن فقالت بشغف:

- تعرف یا بابا أمبارح کان عندنا محاضرة والدكتور کان بیشرحلنا فی قانون العقوبات وجابلنا قضية حقيقية من قضايا الزنا.. بس القضية كانت صعبة أوی تقریبا محدش فینا عرف یکتب فیها مرافعة تمام زی ما الدكتور عاوز.. تخيل الرجل لبس مراته قضية زنا وکمان ساومها یا أما تتنازل عن کل حاجة یا أما یحرك دعوی الزنا ضدها وتتحبس ویتعملها ملف کمان

قطب إبراهيم حاجبيه قائلا:

- أعوذ بالله.. معقول فی راجل یعمل کده.. وازای اصلا یبقى حاجة زی کده فی القانون

كانت إيمان هی الأخری ترغب فی تغير مجرى الحديث فقالت :

- طبعا یا عمی هو ده القانون الوضعی .. جريمة الزنا الزوج هو بس اللى یقدر فی أى وقت یوقف الحكم علیها ویتنازل وساعتها بتطلع براءة

قالت عفاف متسائلة:

- وده حلال بقى ولا أیه

قالت إيمان بأريحية:

- لا یا طنط الأحكام الشرعية فی الموضوع ده لو فی أربع شهداء کلهم أقروا بالجريمة دى وکلهم عدول وموثوق فیهم یتنفذ فیها الحكم حتى لو الزوج اتنازل .. أما لو کان الزوج هو اللى أدعى على مراته الزنا ومعدوش شهود یبقى ساعتها القاضى یمطبق علیهم آية اللعان



قالت عفاف متعجبة:

- ياه أربعة.. بس دى لو أربعة بحالهم شهدوا عليها وهى كده تبقى لامؤاخذة بقى  
أومات إيمان برأسها مؤكدة وهى تقول:

- ماهو ده علشان أحكام الدين فى الأصل بتدعو للستر .. اللى غلط وربنا ستره من غير ما  
حد يشوفه يتوب ويستتر على نفسه.. لكن لو وصلت لدرجة أن أربعة يشوفوها تبقى تستحق  
الرجم.. يعنى مش زى ما الناس فاكرة أن تطبيق الحدود يعنى قتل وموت وتقطيع ورجم  
عمال على بطل

قالت وفاء بتركيز:

تعرفى يا إيمان أنتِ خلّتينى آخذ بالى من حاجات كتير وأنا بقى كده نويت أعمل دراسة  
بالمقارنة بين القوانين الوضعية وأحكام الشريعة

أبتسمت إيمان وقالت بحبور:

- يالا توكلى على الله.. وأنا مستعدة اساعدك بكل جهدى والكتب اللى عندى

نظرت هند إلى عبد الرحمن فوجدته يتابع الحديث باهتمام فقالت :

- آيه يا عبد الرحمن مش بتاكل ليه مركز أوى يعنى

قال بنظرات مبهورة:

- بصراحه أنا أول مرة أسمع الكلام ده .. آيه الجهل اللى الواحد فيه ده

قال حسين موجه حديثه لـ إيمان:

- تعرفى يا إيمان أنا كل يوم بيزيد أعجابتى بيكى أكثر من اليوم اللى قبله

قالت له مداعبة:

- لا معلىش يا عمى أنا أصلى مش ناوية أرتبط دلوقتى .. يعنى هيبقى حب من طرف واحد

ضحك الجميع وشرعوا فى أتمام طعامهم حتى نهض حسين من مكانه وأشار إلى يوسف  
ومريم قائلاً:

- يوسف ومريم ..تعالوا ورايا على المكتب حالاً

نهض وليد من مكانه فاستدار إليه حسين وقال :

- بقول يوسف ومريم بس .. أظن الكلام واضح للكل

نهضت مريم بعد يوسف بلحظات ورغم مشاعر الحنق التى توجد بداخل كل منهما تجاه الآخر إلا أنهما عندما وصلا لباب المكتب تبادلوا النظرات وكأنهما طفلين تم أستدعائهما لمكتب الناظر لينالا عقابهما الرادع !.

\*\*\*\*

## الفصل التاسع

نهضت مريم بعد يوسف بلحظات ورغم مشاعر الحنق التى توجد بداخل كل منهم الا انهم عندما وصلوا لباب المكتب تبادلوا النظرات وكأنهما طفلين تم أستدعائهما إلى مكتب الناظر لينالا عقابهما.

تنهد يوسف بعمق وطرق الباب فتقدمت مريم خطوة ونظرت له بتحدى وكأنها تقول :

- النساء أولاً

زفر بقوة وتراجع خطوة ليسمح لها بالدخول قبله

دخلت مريم ودلف بعدها وهما وجلان للغاية، أشار لهما حسين بالجلوس أمام المكتب وهو ينظر لهما نظرات صامتة صارمة ثم قال:

- فى أيه بقى عاوز أفهم

وفجأة انقلب الصمت إلى معركة ، تدافع الإثنان فى الحديث وكأنهما يتسابقان من يتكلم أكثر من الآخر

- من ساعة ما شافنى وهو مش طايقنى

- مش طايقك ازاي يعنى مش فاهم

- بتكشر فى وشى وبتعاملنى وحش

- المفروض أعمل أيه يعنى أفرشلك الأرض رمله لما أشوفك

- لا بس تعاملنى معاملة كويسة

- والله ده شىء زاد عن حده ..هتعليمنى أتعامل ازاي

هتف الحاج حسين ليوقف هذه المعركة الدائرة قائلاً بصرامة :

- بــــــــس .. والله عال أومال لو كنت مش موجود معاكوا كنتوا هتعملوا أيه

أطرقت مريم برأسها خجلاً وهى تقول :

- أنا آسفه يا عمى

قال يوسف معتذراً:

- آسف يا بابا بس هى اللى نرفزتنى

نظرت له بحدة هاتفة:

- أنا اللى نرفزتك ...

ثم التفتت إلى عمها وقالت باندفاع:

- بص بقى يا عمى علشان تعرف بيتعامل ازاي .. النهاردة كسفننى قدام صاحبتى لما طلبت

منه أفرج عليه هو ووليد.. واتريق عليا وقالى هى سيما؟ .. ده غير طبعاً طريقة معاملته

ليا دايماً سواء هنا ولا فى الشركة

هتف يوسف صائحاً:

- صاحبتك !! يا بابا صاحبتها دى والله لو شفتها لتحكم عليها متكلمهاش تانى.. أنا مش

عارف مصاحبها ازاي دى

هتفت مريم معترضة:

- هو أنت كمان هتتحكم فى اصحابى

ضرب الحاج حسين المكتب بقبضة يده ونهض بحدة موجهها حديثه لكلاهما:

- لتانى مرة صوتكوا يعلى قدامى

وقف يوسف وقال بضجر:

- بابا.. أنا قتلتك من زمان أنا ماليش فى معاملة الحريم أنا آسف يعنى

هدأت العاصفة قليلاً بينما قال حسين بهدوء:

- براحة كده ومحدث يقاطع التانى علشان أفهم..

ثم نظر إلى يوسف وقال متفهماً:

- آيه اللى مضايقتك يا يوسف بالظبط

يوسف:

- أنا عاوز راجل يمسك مكتبى بعد أدنك

وقفت هى الأخرى وقالت مندفة:

- وأنا مش عاوزة اشتغل معاك

نظر لها عمها وقال بحدة:

- هو انا مش قلت محدش يقاطع التانى

أنكمشت وجلست مكانها فى صمت ، ألتفت إليه مرة أخرى قائلاً:

- آيه اللى مش عاجبك فى شغلها

نظر لها يوسف قائلاً:

- شوف حضرتك طريقة لبسها.. أنا محبش العملاء اللى داخل واللى خارج يقعد يتفرج على

بنت عمى وهى لابسة كده

أبتسم حسين وهو يومىء برأسه وقد لمعت عينيه قائلاً:

- ده بس اللى مضايقتك؟

- ايوا

ربت على كتفه وقال آمراً :

- طيب أقعد

ثم التفت إلى مريم قائلاً بهدوء:

- بصراحة يا بنتى أنا كمان مش عاجبنى اللبس ده .. وكنت هكلمك عليه من بدرى بس محبتش تضايقي مني وتفتكري أنى عاوز أتحكم فيكى

قالت بتماسك:

- ياعمى أنا بلبس كده من زمان.. ومحدث بيبصلى.. عادى يعنى لبسى مش أوفر

تدخل يوسف مقاطعاً:

- وعرفتى منين أن محدش بيبصلك

نظرت له بغضب وقالت:

- يعنى أيه عرفت منين .. كل البنات اللى حواليا بيلبسوا كده وزمايلى فى الكلية كلهم لبسهم كده

لوح يوسف بيده وهو يقول:

- لا يا بابا مش حقيقى.. أنا لما وصلتها الكلية شفت البنات داخله وخارجيه من كليتها.. فيهم بنات أه لابسين زيها وأكثر لكن برضة شفت بنات كتيرة لابسين لبس محترم زى أى كلية فى الدنيا فيها كده وفيها كده

قالت مريم بانفعال:

- يعنى أنا مش محترمة؟.. وبعدين هما حرين كل واحد حر

نظر إلى والده قائلاً :

- شايف الرد يا بابا

أرسل حسين تنهيدة طويلة ثم قال :

- بصراحة أنتوا الاتنين غلطانين .. أنتِ يا مريم لازم تاخدى بالك من طريقة لبسك ومفيهاش حاجة لو لبستى حاجة شكلها حلو برضة بس مش مجسماكى أوى كده.. ده أنتِ حتى يا بنتى محجبة!

قالت بعناد:

- زى ما حضرتك قلت ياعمى .. أنا محجبة أعمل أيه تانى

قال حسين متعجباً:

- تعملى أيه! .. الحجاب يابنتى يعنى زى ما غطيتى شعرك تغطى جسمك.. شروط الحجاب أنه ميجسمش الجسم ولا يبقى شفاف .. هنعمل أيه بطرحة على الشعر والجسم ملامحه واضحة.. ده ميبقاش حجاب يابنتى ده يبقى موضه

أطرت برأسها وقالت بخفوت:

- حاضر يا عمى هحاول أغير لبسى شوية

هتف يوسف معترضاً:

- شوية؟؟!!

هتفت مريم مؤكدةً:

- أيوه شوية .. وده علشان خاطر عمى بس

أبتسم الحاج حسين قائلاً:

- ربنا يكرمك يا بنتى.. متتصوريش فرحتينى أزاى علشان عملتيلي خاطر..

وأكمل هو ينظر إلى يوسف:

- وأنت يا يوسف طريقة النصح مش كده .. أهدى .. بطل تتحمق كده علشان الناس تفهمك

وتابع بابتسامة وهو ينظر لمريم:

- لو مكنش بيخاف عليكى مكنش زعل منك .. ها خلاص صافى يا لبن ؟

قال يوسف بتبرم :

- اللى تؤمر بيه يا بابا

قال امرأ :

- طب يالا أعتذر لبنت عمك علشان أخرجتها قدام صاحببتها  
رمقها يوسف بنظرة نارية والتفت الى أبيه بدهشة وهو يقول :

- أنا اللى اعتذر يا حاج؟

أوما له والده برأسه وقال مؤكداً:

- ولو معتذرتش هخاليك تبوس راسها

أحمر وجهه وهو ينظر لها بضيق ثم قال بسرعة:

- آسف

رمقته بنظرة مستفزة ، فانفعل مرة أخرى هاتفاً :

- شايف يا بابا بتبصلى ازاي

وقف حسين بجانبها ووضع يده على كتفها وقال بهدوء:

- وانتِ اعتذرى لابن عمك علشان رفعتى صوتك عليه

قالت بنزق :

- ياعمى هو اللى بدء

نظر لها الحاج حسين وقال امرأ:

- مريم .. اعتذرى

نظرت له فرمقها بنفس النظرة المستفزة التى نظرتها له من قبل وزاد عليها ابتسامة ساخرة  
، ألقت نظرة إلى عمها الذى كان مصوباً نظراته إليها ينتظر أعتذارها ثم عادت بعينيها إلى  
يوسف وقالت بشموخ:

- سوري

قال يوسف وهو يعقد ذراعيه أمام صدره ببرود ساخر:

- لا سوري أیه.. أنا مبعرفش لغات

ألقت علیه نظراتها الحارقة وقالت بسرعة:

- آسفه .. عن أذنك يا عمی

وخرجت مسرعة وهی تستشيط غضبا منه وحده !

\*\*\*

خرجت مندفة إلى باب الشقة ومنه إلى الدرج لتصعد شقتها فاصطدمت بوليد الذي قال بدهشة:

- أیه.. واخده فی وشك كده ورايحة فين

قالت بعصبية:

- أبعد عنی دلوقتی لو سمحت أنا مش طايقة روى

وليد:

- مالك بس مين اللى زعلك يا قمر

نظرت له وكأنها لا تراه وقالت باندفاع:

- أنا لبسى وحش ؟

تصنع وليد نظرات الدهشة وقال:

- مين اللى قال كده ده.. أنت آخر شياكة وحلاوة

قالت بمرارة:

- يوسف

قال وليد بغضب زائف:

- ولا ابن عمی ولا اعرفه.. يا شيخه ده راجل معقد سيبك منه



تركته وأكملت طريقها ، حاول أن يوقفها مرة أخرى ولكنها لم تعره اهتماما، دخلت غرفتها و ارتمت على فراشها وأخذت تبكى ، بعد لحظات وجدت إيهاب وإيمان واقفان أمامها فى وجوههما نظرات تساؤل ثم قال إيهاب:

- أيه اللى حصل مع عمك .. قالك حاجة زعلتك؟

حركت رأسها نفيا وهى تجفف دموعها ، جلست إيمان بقربها وقالت:

- طيب بتعطى ليه يا حبيبتي

قال إيهاب بانفعال:

- لو حد زعلك قوليلى.. أنا مش بنشتغل عند حد .. نمشى فوراً

قالت إيمان بترؤ:

- أهدى يا إيهاب لما نعرف فى أيه

أعدلت مريم فى جلستها وقصت عليهم ما دار فى حجرة المكتب

أنفعل إيهاب أكثر وصاح بعصبية:

- شايفه يا هانم.. ياما قلتك .. ياما اتخانقت معاكى على لبسك شوية وعلى البت اللى ماشية معاها شوية.. وأنتِ ولا أنتِ هنا.. وادي النتيجة.. الناس بقت تبصلك زيكِ زيتها .. وأكد طبعا يقولوا عليا مش راجل.. ما انا سايبك بقى تلبسى اللى تلبسيه

بكت مريم بشدة وقالت:

- خلاص بقيتوا كلكوا عليا دلوقتى

حاولت إيمان تلطيف الجو بينهما ولكنها فشلت ،خرج إيهاب مندفعاً فى غضب، قطع الحديقة بخطوات واسعة وسريعة، رآته فرحة فحاولت أن توقفه لكنه لم يسمعها، وقفت حائرة لا تعلم ما ألم به فصعدت تبحث عن إيمان ، وجدتها تهبط الدرج إلى الحديقة فاستوقفتها والقلق بادى على وجهها وقالت متسائلة:

- هو إيهاب ماله .. كان ماشى وشكله زعلان أوى حاولت أنه عليه مردش ومشى بسرعة هو حصل حاجة يا إيمان

نظرت لها إيمان بتمعن ثم وضعت يدها خلف ظهرها وصمتت ، زاد قلق فرحة وقالت:

- أيه يا إيمان بتصيلي كده ليه؟

مطت إيمان شفيتها بمكر وقالت ببطء:

- وأنت مالك قلقانة كده ليه

أرتبكت فرحة وقالت:

- أبدا عادى يعنى بسأل بس

وجهت إيمان سبابتها إلى وجه فرحة وقالت تداعبها:

- أعترفى يا فرحة الأنكار مش هيفيدك

أحمرت وجنتاها وقالت بخجل:

- أعترف بأيه مالك كده عاملة زى المحققين اللي بيطلعوا فى الأفلام

أبتسمت إيمان لها وقالت بحنان بالغ:

- هو كمان مهتم بيكى على فكرة .. ده أخويا وأنا عارفاه

أبتسمت فى خجل وقالت:

- هو اللي قالك أنه مهتم بيا

ضحكت إيمان فى سعادة واحتضنت فرحة، كان عبد الرحمن يهبط الدرج فوجدهما هكذا

فوقف ووضع يديه على وجهه وقال بطريقة مسرحية:

- لا مش ممكن .. مش مصدق عنيه .. أختى وبنت عمى .. وفين .. على السلم .. رحمتك يارب

ضحكت فرحة ضحكة عالية بينما استدارت إيمان لتخفى ضحكتها الخجولة بيدها

\*\*\*\*

اليوم التالى كان يوم الصدام الحقيقى فى الشركة بين يوسف ومريم وهند وعبد الرحمن،

كان عبد الرحمن قد قرر أن يتكلم مع هند فى طبيعة علاقتهما وأن يضع لها حدود حتى يتم عقد القران، وكانت مريم تنوى أن تنتقم من يوسف شر انتقام .

دخلت عليه مكتبه وهى معها بعض الملفات ، وجدته واضعاً سماعات الهاتف فى أذنيه ومغمض العينين فى استرخاء شديد ، خطت نحوه ببطء وتناولت مج النسكافية الفارغ من أمامه ثم قذفته على الأرض بقوة ، فزع يوسف ونزع السماعات من أذنيه وصرخ فيها :

- فى ايه !!

قالت ببرود :

- ولا حاجة.. الملف خبط فى المج وقعه على الأرض

وابتسمت باستفزاز وأكملت:

- طب أجيلك بعدين بقى تكون الخضة راحت

خرجت وأغلقت الباب خلفها بينما جلس يوسف ومازال وجهه عليه أثر المفاجأة ثم ابتسم وهو يضرب كفا بآخر ويقول:

- البت دى مش هتجيبها لبر معايا .. بس اظاهر أنها متعرفنيش كويس .. ماشى يا مريم واحدة بواحدة والبادى أظلم

\*\*\*\*

أنتظر عبد الرحمن وقت الراحة وذهب إلى هند ليتحدث معها ، عندما رآته تهلل وجهها وقالت:

- كنت متأكدة أنك جاى ... وحشتنى

أبتسم بارتباك وقال:

- هند عاوز اتكلم معاكى فى موضوع مهم

لاحظت الارتباك على وجهه فقالت بقلق:

- خير يا عبده مالك

عبد الرحمن :

- هند.. عاوزك تفهمينى كويس أوى .. أنا والله بحبك وهفضل احبك ونفسى تبقى مراتى النهاردة قبل بكرة.. لكن لحد ما نكتب الكتاب لازم علاقتنا تبقى بحدود

أقفهر وجهها وقالت:

- يعنى أيه بحدود؟

عبد الرحمن:

- يعنى مش هينفع نخرج مع بعض لوحدا وبرضة يعنى الكلام بينا هيبقى بحدود...

نظر لها ليراقب تأثير كلماته عليها فوجدها تنظر إليه بدهشة وتعجب وترقب فأكمل:

- اللى بقلهولك ده لمصلحتك أنت قبل مصلحتى .. علشان عاوز أشوفك فى أحسن صورة

ضيق عينيها وقالت بشك:

- من أمتى الكلام ده يا عبد الرحمن

قال بتصميم:

- من زمان يا هند وأنا بضايق من بعض تصرفاتك معايا.. لكن كنت بتغاضى عنها لكن أخيراً

عرفت أن فى حاجات حرام فى علاقتنا لازم نتجنبها والحرام مش هينفع نغالط فيه

قالت بسخرية:

- وأنت من أمتى بتقول حرام وحلال

نظر لها بانزعاج وقال:

- يعنى أيه ..

أومأت برأسها وقالت بانفعال :

- بس بس أنا دلوقتى فهمت

نظر لها بتمعن قائلاً:

- فهمتى أيه

هند:

- فهمت أنك بتتهرب من الجواز ..عاوز تطفشنى يعنى

زفر عبد الرحمن بقوة ثم قال :

- لا يا هند متقوليش كده أنا ناوى أكتب الكتاب قريب لكن لحد ما نكتب الكتاب لازم نراعى النقطة دى

هند:

- وايه اللى مانعك ما نكتب الكتاب

عبد الرحمن:

- مستنى بابا يحدد معاد .. كل ما أفاتحه فى الموضوع يقولى أستنى شوية

قالت بانفعال:

- وأنا بقى هستنى لما أبوك يحن عليا

هتف بغضب:

- أتكملى عن أبويا كويس يا هند أحسنلك

هوت إلى مقعدها وظلت تبكى فى صمت ، وقف بجوارها وأستند إلى مكتبها وقال بحنان :

- أنا مش عارف أنت قلقانة من أيه.. هنتجوز والله بس اصبرى عليا شوية .. أبويا مبيجيش بالضبط .. بالعكس

قالت وهى تبكى:

- مش ملاحظ أن الحاج حسين أبدى يأخر معاد الجواز من ساعة ما ولاد عمك رجعوا

قال عبد الرحمن بعدم فهم:

- طب وولاد عمى مالهم بالموضوع ده

قالت وكأنها لم تسمعه :

- وأنت كمان أهو أبتديت تقولى حرام وحلال

نظر لها متعجباً وهو يقول:

- طب وفيها أيه

هزت رأسها بحنق وهى تجفف دمعها قائلة :

- لا فيها كتير وأنا اللي غلطانة

قطب حاجبيه وهو يقول:

- مش فاهم

نظرت بعيداً فى شروود وهى تقول :

- مش لازم تفهم دلوقتي .. لو سمحت سبنى لوحدي عاوزة أقعد مع نفسي شوية قبل ما والدك يرجع المكتب تاني

نظر لها بأسى فهى لم تفهمه كما كان يتوقع وتركها وغادر إلى مكتبه ، وقف أمام المصعد لبرهة ثم شعر أنه أخطأ بحقها وقلبه أمره بأن يعود إليها ويسترضيها ، فلم يكن يجب أن يتركها فى هذه الحالة ، لابد أن يثبت لها أنه يحبها وشغوف بها ولن يتزوج غيرها أبداً.

عاد إليها ولكنه وجد باب مكتبها مغلق فظن أنها أغلقته لتبكي وحدها دون أن يسمعها أحد ، وحتى لا يفاجأها والده بدخوله عليها وهى تبكى ، فتح الباب ببطء ليطمئن عليها ولكنه سمعها تتحدث فى الهاتف ، والتقت أذناه حديثها الذى جعل عينه تكاد أن تخرج من مكانهما وكاد وجهه أن ينفجر غضباً وبغضاً من هول ما يسمع.

\*\*\*

## الفصل العاشر

وقف دقائق يستمع ويستمع وعندما انتهت مكالمتها عاد ببطء وجمود إلى المصعد مرة أخرى وهبط إلى الأسفل واستقل سيارته دون أن يتحرك بها ، أستاذ برأسه إلى ظهر المقعد وأغلق عينيه وهو لا يكاد يصدق ما سمع ، كلمات زلزلت كيانه وفطرت قلبه ، لا يعلم كم مر عليه

من الوقت وهو فى هذا الوضع خلف المقود فلم يعد يشعر بشىء غير الجمود، وفى النهاية سمع طرقات على زجاج سيارته، فتح عينيه والتفت فوجد والده قد عاد ووقف منحنيًا ينظر إليه بدهشة، قلق الحاج حسين بشدة وهو يرى ابنه فى هذا الوضع فهو يعلم أنه لا يجلس هكذا إلا إذا كان يشعر بألم حقيقى، فتح الباب وجلس بجواره قائلاً بلهفة:

- مالك يا عبد الرحمن قاعد كده ليه يابنى ؟

أرسل تنهيدة قوية وهو يقول:

- تعبان يا بابا

ظهر التوتر أكثر على ملامح حسين وهو يقول متسائلاً:

- تعبان ازاي يعنى .. فهمنى

أغمض عبد الرحمن عينيه بألم وهو يقول :

- هحكلك كل حاجة يا بابا ...

وقص عليه كل ما دار بينه وبين هند وكيف عاد حتى لا يتركها بمفردها متألّمة منه وماذا سمع منها وهى تتحدث فى الهاتف ، أنهى حديثه قائلاً بأسى:

- أنا آسف يا بابا.. مكنتش أعرف أنها كده

ربت والده على كتفه بقوة وقال بعزم:

- أجمد يا عبد الرحمن الدنيا فيها ناس كتير بالشكل ده يابنى.. وانت مش صغير.. واللى حصل ده يعلمك مش يزعلك كده يابنى

أوماً عبد الرحمن برأسه فى صمت حزين قاطعه والده قائلاً:

- تعالى معايا

- لا يا بابا .. مش عاوز أشوفها تانى بعد النهاردة

أمسك والده ذراعه قائلاً بتصميم:

- لا هتيجى معايا .. عاوزك تسمع بس متعلقش على حاجة.. تعالى

قطع حسين الممر الطويل المؤدى إلى ردهة مكتبه الخاص بصحبة عبد الرحمن ، نهضت هند عندما رأتهما ، فأشار لها أن تلحقهما إلى المكتب

جلس حسين خلف مكتبه وأشار إلى عبد الرحمن أن يجلس فى المقعد المقابل له ودخلت هند لتقف أمامه وكانت تتوقع أمراً من أمور العمل طلبها لأجله ، ولكنها تفاجأت به يقول:

- لو سمحتى روى هاتى شنطتك

نظرت له فى دهشة واستنكار ، فأعاد أمره مرة أخرى:

- هاتى شنطتك يا هند

خرجت بخطوات بطيئة ، يدور بخلفها ألف سؤال وسؤال، أحضرت حقيبتها وعادت إليهما، فمد يده أمامه قائلاً بلهجة أمره:

- هاتى تليفونك

أخرجت هاتفها وأعطته أياه:

- ضغط عدة ضغطات على لوحة المفاتيح ثم أدار شاشته لها وقال بجدية:

- رقم مين ده اللى كنتى بتكلميه من شوية

أرتبكت بشدة وزاغت نظراتها وهى تقول:

- دى واحدة صاحبتى ..

نظرت إلى عبد الرحمن فوجدته يشيح بوجهه عنها ويكسو وجهه الحزن والغضب والجمود فقالت :

- فى آيه يا حاج حسين !؟

نظر لها حسين وقال بثقة:

- كدبتى ليه عليا وقولتى أن الجواب كان فى صندوق البريد بتاع الشركة؟

هوى قلبها إلى قدميها واحمر وجهها خوفاً، لا تعلم ماذا تقول، وكيف تفعل فلجأت إلى الكذب مرة أخرى وقالت:



- ماهى هى دى الحقيقة يا حاج .. أنا فعلا لقيته فى الصندوق

خبط على المكتب فأنتنفص جسدها وقال محذرا:

- هتكذبى تانى ؟.. الجواب ده وصلك يدا بيد يا هند ...صح

ظهر الرعب على وجهها وقالت مدافعة عن نفسها:

- مين اللى وصلك الكلام ده يا حاج اللى قالك كده كداب

أشار إلى عبد الرحمن الذى كسى الحزن وجهه أكثر وأكثر وقال:

- عبد الرحمن هو اللى قالى

صمتت فى دهشة وخوف لا تدرى ولا تفهم كيف عرف عبد الرحمن بالأمر

تابع الحاج حسين كلامه:

- عبد الرحمن سمعك وأنت بتتكلمى فى التليفون يا هند.. ده أجابة السؤال اللى بيدور فى دماغك دلوقتى

أستندت إلى أقرب مقعد لها فلقد تخلت عنها قوتها واصفرت الدنيا أمامها وكادت أن يغشى عليها من الصدمة.. وبدأت فى البكاء

نهض عبد الرحمن قائلا:

- أنا مروح يا بابا عن أذنك

أوما له والده بالموافقة فانصرف دون أن يلتفت وراءه ليخفى ألمه وندمه ويداوى جرحه العميق

نهض حسين من مقعده ووقف بالقرب منها وقال:

- معقوله يا هند .. ده أنا كنت بعترك زى بنتى بالظبط تقومى تخونينى كده

بكت بشدة أكبر وقالت بمرارة:

- والله يا حاج أنا مكنت أقصد انى اخونك .. أنا قلت يعنى ده مجرد جواب هوصلهولك

وخلص وبعدين هى فهمتني أن الجواب ده فى معلومات حضرتك بتدور عليها بقالك سنين وقالتلى أن ده عمل خير

أبتسم فى سخرية مريرة قائلا:

- وهو عمل الخير اليومين دول بياخدوا له مقابل...

هتفت ببكاء:

- والله يا حاج أنا مطلبتش منها فلوس هى اللى عرضت عليا الفلوس علشان تتأكد أنى ههتم وأوصلك الجواب بنفسى لأنها كانت خايفة حد تانى يشوفه وميوصلهوش وأنا كنت محتاجة مبلغ كده فى الوقت ده وكنت مكسوفة أطلب سلفه من حضرتك .. وهو ده كل غلطى.. أنا آسفه يا حاج أنا آسفه

أنفعل عليها قائلا:

- أنتِ لسه بتكذبى يا هند.. أنتِ خدتى منها رقمها علشان تقوليلها أخبارى أول بأول ..صح .. أنا مش عارف أنتِ مستمرة فى الكذب ازاي وأنا بقولك عبد الرحمن سمعك وانتِ بتكلميهها أمتقع وجهها وقالت بارتباك:

- لا والله يا حاج أنا منقلتش أخبارك لحد.. هى لما أدتنى الرقم قالتلى علشان لو حصل وحضرتك مقرتش الجواب لأى سبب أبلغها

وبعد كده كانت بتتصل عادى تقولى أزى الحاج عامل آيه وأزى عبد الرحمن ويوسف وأنا كنت بتعامل معاها على أساس أنها قريبتكوا يعنى فبقولها كويسين وخلص

كاد أن ينفعل مرة أخرى وهو يستمع إلى كذبها المفصوح ولكنه صمت قليلا ثم قال فجأة :

- خلاص يا هند أنا مصدقك .. بس أنتِ عارفة طبعا أنك غلطتى ..والغلط ده مينفعش يعدى كده

قالت بلهفة:

- الله يخاليك يا حاج مترفدينش أنا محتاجة الشغل ده اوى

نظر لها بتفكير وقال:

- أنا مش هرفدك.. بس أبنى مجروح منك أوى ومش هيستحمل يشوفك هنا تانى .. أنا هنقلك مكان تانى تكونى بعيدة شوية عنه.. مش عاوزه يضايق كل ما يشوفك

قالت بحيرة:

- يعنى يا حاج هو قرر.....

قاطعها الحاج حسين قائلا:

- سيبه شويه كده لما يفوق من صدمته شهرين كده ولا حاجة.. يكون نسي وهدى وبعدين أبقى أتكلمى معاه يمكن وقتها يسامحك .. يالا دلوقتى خدى شنطتك وروحى وبكره إن شاء الله تيجى على شغلك الجديد

\*\*\*\*

- معقوله يا حاج اللى أنت بتقوله ده.. أزاى تسببها فى الشركة بعد اللى عملته

أعتدل حسين فى جلسته وهو يجيب زوجته عفاف قائلا:

- أهدى بس يا أم عبد الرحمن ..أنا عارف بعمل أيه كويس ... هند بتشتغل معانا من زمن ومعاه أسرار كتير عن شغلنا متنسيش أنها مديرة مكتبى ومسؤولة عن ملفات كتيرة .. لو طردتها وقطعت عيشها هتقول عليا وعليا أعدائى .. إذا كانت خانتنى وهى شغاله معايا ومخطوبة لأبنى يبقى هتعمل أيه لما الخطوبة تتفسخ وكمان أطردها من الشغل

قالت عفاف بتفكير:

- طب وبعدين

- ولا قابلين .. أنا قتلتها تسبب عبد الرحمن شهرين كده على ما يهدى .. أكون أنا غيرت تفاصيل وحاجات كتير فى الشغل وساعتها تبقى المعلومات اللى هى تعرفها قديمة ومالهاش لازمة وضررها هيبقى قليل أوى إذا مكنش معدوم يعنى .. والمكان اللى نقلتها فيه مفيهوش حاجة تعرف تضرنا بيها ولا تستعملها مع شركات معندهم مش ذمة عاوزه تضر بنا فى السوق

قالت عفاف بتعجب :

- والله يا حسين أنا مش عارفة أنت بتعرف تمسك أعصابك كده أزاى مع واحده خانتك بالشكل ده

ضحك وقال:

- أصلها بصراحة خدمتني مرتين ثلاثة كده من غير ما تحس

نظرت له بتعجب فأوماً برأسه قائلاً:

- زى ما بقولك كده خدمتني وضرت نفسها ..

تنهد بقوة وتابع كلامه:

- أحلام كانت بتستخدمها علشان تعرف أخبارنا وأخبار يوسف علشان تعرف تقربه من مريم وأبتسم قائلاً:

- وأنا معنديش مانع .. أنا نفسى فى كده أنا كمان

بس هند بقى بغائها لما لاقت عبد الرحمن معجب بكلام إيمان وكمان راح قالها حلال وحرام أفكرت أنه بيطفشها علشان خاطر إيمان فاتصلت بأحلام وجابت اللي عندها كله

قالتلها أنا أقدملك يوسف على طبق من ذهب وأنتِ عاوزة تطلعيني من المولد بلا حمص تنهدت عفاف بآلم وقالت:

- يا عيني عليك يا عبد الرحمن .. ده كان بيحبها اوى .. علشان كده يا عين أمه مخرجش من أوضته من ساعة ما رجع وقاعد فى البلكونة من ساعتها حتى مرضيش يتعشا

ثم نظرت له فجأة بانتباه وكأنها انتهت لحديثه فى التو وقالت:

- يعنى أيه أنت كمان عاوز كده يا حاج

قال مبتسماً :

- يعنى هى خططت علشان تقرب مريم من يوسف وتشغلها معاه وأنتِ عارفة يا عفاف أنى عاوز ولاد أخويا يفضلوا فى حضنى علشان كده بقولك وأنا معنديش مانع .. المهم عندى أن مريم تحب يوسف مش تبقى عاوزة تتجوزوا علشان تنفذ خطت أمها وخلص

أستندت عفاف إلى قبضتها وهى تقول بتفكير:

- وتفتكر مريم متفقة مع أمها يعنى

قال بشروء :

- مش متأكد يا عفاف ... لما كانت متحمسة فى الأول علشان تشتغل معاه كان ممكن أقول اه عارفة .. لكن بعد المشاكل اللى حصلت بينها وبين يوسف مبعثش متأكد .. لأنها لو كانت بتنفذ كلام أمها كان زمانها بتسمع كلامه وأنت عارفة يوسف بيتبسط من الست اللى بتسمع الكلام وأكد أحلام وصلت المعلومة دى لمريم .. وطالما مريم منفذتهاش يبقى اللى أنا حسيته أمبارح فى المكتب وهما بيتخانقوا قدامى كان صح.

ألتفتت إليه عفاف بتسائل وقالت :

- آيه اللى أنت حسيته .... وهى أحلام يعنى بتعمل كل ده ليه

قال حسين بلا مبالاة:

- مش مهم دلوقتى .. أهم حاجة عندى دلوقتى عبد الرحمن .. عاوزه يخرج من الحالة دى قلبى وجعنى أوى عليه .. الله يكون فى عونہ .. مش سهل عليه اللى حصل ده

\*\*\*

كانت هند تجلس فى فراشها وتبكي بشدة وقد تورمت عيناها من كثرة البكاء بينما جلست أختها علا بجوارها ومسحت على ذراعها وحاولت أن تهدئها لكن هند نفضت يد أختها فى قوة هاتفة:

- أبعدى عنى .. أنتِ السبب .. أنتِ السبب

وقفت علا ووضعت يديها فى خصرها قائلة:

- نعم يا ماما أنا السبب ازاى يعنى .. أنا بس شجعتك أنك توصلى الجواب وتاخدى الفلوس لكن مقلولتكيش تقوليلها أخبار أخو خطيبك يا هانم .. وأنتِ أصلا غبية .. لو كنتى قلتلى كنت هقولك لاء .. لأن اللى ترسم على واحد ممكن أوى ترسم على أخوه وتطلعى أنتِ من المولد بلا حمص وأهو ده اللى حصل يا ناصحة

قالت هند برجاء:

- لا لا عبد الرحمن مضعش منى .. هو بس مصدوم وعاوز فرصة يهدى وبعدين مش هيقدر يبعد عنى أنا متأكدة .. متأكدة

علا:

- وأنتِ فأكرة أن أبوه هيسمحك تدخلي عيلتهم بعد اللي عرفه .. والله أنا لو منك انتقم منه  
ده أنتِ تعرفي عنهم بلاوى

قالت هند بشرود:

- لا الحاج حسين نقلنى بس علشان ميحصلش صدام بينى وبين عبد الرحمن لكن أنا متأكدة  
أنه مش هيعارض لو عبد الرحمن عاوزنى .. ليه أروح أعاديه وأخسره للأبد

علا:

- وتفتكرى يعنى اللي أسمها أحلام دى وبنيتها هيفوتوا الفرصة .. دى أكيد هيستغلوا بعدك  
عنه ويفضلوا وراه لحد ما يتجوزها

نظرت لها هند نظرات شاردة وقالت :

- خاليها بس تحاول تاخده مني.. وأنا هوريكى هند ممكن تعمل ايه فى شركتهم دى

\*\*\*\*

كان عبد الرحمن يجلس على مقعده الخاص به فى الشرفة مغمض العينين يستعيد كل  
ذكرياته مع هند، كل كلمة حب قالها لها وكل نبضة قفز بها قلبه لأجلها ، فتح عينيه ببطء  
لينظر إلى الحديقة المظلمة وكأنه ينظر إلى الظلام المحيط بقلبه، فلقد انطفأت شمس حبه  
فجأة وبدون رجعة !

رأى الرياح تعبت ببعض أوراق الشجر فتقاوم بعضها ويستسلم البعض الآخر فتسقطها  
أرضا ، نعم من يستسلم للرياح يسقط فيصبح جزءاً من الأرض ليداس بالأقدام كما تداس  
الأرض التى سقط إليها راضياً ، لمعت عيناه وقاتلت الدموع بضراوة من أجل أن تهبط إلى  
مجراها لتروى ظمأ محنته، ولكنها وجدته مقاتل من الدرجة الأولى، لم يسمح لها وسجنها  
فى محبسها ليحتفظ بها ويجعلها مدادا لحياته القادمة والتى قرر أن تكون بلا حب وبلا  
مشاعر وبلا قلب .. المعنى الحقيقى للجمود.

## الفصل الحادى عشر

دخلت مريم صباحا إلى مكتبها فوجدت حركة غير طبيعية فى مكتب يوسف ، ثم سمعته يصرخ فى بعضهم من الداخل قائلا:

- الملف ده لو ضاع هتبقى كارثة

أطلت برأسها إلى الداخل لترى ما يحدث فوجدت اثنين من الموظفين يقفان أمامه وهو منفعّل بشدة فى الحديث و عندما رآها فجأة نظر لها نظرة حادة وقال بعصبية:

- تعالى هنا يا هاتم فى ملف ضايع وحضرتك لسه واصله

قال الموظف الأول:

- يافندم حضرتك مضيت الملف ده أمبارح

قال الآخر:

- وقلت حضرتك هتبعته للحاج إبراهيم يمضيه ويراجعه

قال فى عصبية:

- أتفضلوا انتوا دلوقتى

ثم استدار لها وهى تقول :

- ملف آيه بس وأحنا ندور عليه

هتف يوسف بعصبية:

- لسه بتسألنى .. الملف اللى أخذتيه امبارح قبل ما نمشى وقلتي هتبعتيه للحاج إبراهيم

ارتبكت مريم وهى تفكر بصوت عالى:

- مش فاكرة.. طيب استنى أفكر

أنفعل أكثر قائلاً:

- الملف ضاع وأنت لسه هتفكرى .. أكيد نسيته تبعته اتفضللى يالا دورى عليه فى مكتبك وفى الدولاب .. ألقبى الدنيا عليه

خرجت مريم فى اضطراب شديد تبحث بتوتر وسرعة ، لم تجد شيئاً ولا تذكر أيضاً شكل الملف، خرج إليها بعد دقائق وهو مازال يهتف بصوته الجهورى:

- آيه لسه مش لاقية حاجة .. أنت عارفة لو الملف ده ضاع هيحصل آيه

حاولت مريم أن تركز تفكيرها لعلها تتذكر أين هو ولكنه لم يعطيها فرصة ، صوته العالى أربكها جداً وشتت تفكيرها، ظلت تبحث أكثر من نصف ساعة وهو واقف ينظر إليها ويشتت تفكيرها بصوته ويربكها حتى جلست خلف مكتبها وهى تتنفس بصعوبة ، ولفت يدها إلى ظهرها لتمسك بجزعها وهى تقول بألم :

- خلاص مش قادرة .. ضهرى أتكسر

قال يوسف بانفعال:

- يعنى آيه مش قادرة .. قومي دورى تانى

كادت مريم أن تبكى وهى تقول:

- خلاص مش قادره ضهرى هيموتنى .. مش هدور تانى وأعمل اللى تعمله يارب حتى ترفدىنى

تركها ودخل مكتبه ثم عاد بعد لحظة وفى يده الملف الضائع ، وقف أمامها وقال مبتسماً:

- الملف أهو ..

ثم وضعه أمامها وقال بانتصار:

- فاكده المج اللى وقع أتكسر لوحده ...

واستدار لينصرف وهو يقلد طريققتها المستفزة فى الكلام " طب عن أذنك أنا بقى لحد ما ضهرك يرتاح " ثم أطلق ضحكات عالية مستفزة وعاد يستدير إليها وهى تنظر له بدهشة وحنق وقال:



- متلعبيش مع الأسد تانى يا قطة.. أتفقنا ...

وأنصرف لمكتبه وصدى ضحكاته المنتصرة يدوى فى أذنها بصخب ، نظرت إلى المكان الذى كان يقف فيه بذهول، ثم ضربت المكتب بقدمها فى غيظ شديد فألمتها قدمها فجلست تبكى وهى تشعر بالضيق والحنق منه، ها هو قد وفى بوعدده ولم يتركها تنعم بما فعلته به فى المرة الأخيرة ورد لها فعلها أضعاف مضاعفة ، بكت أكثر وهى تقول فى ضيق:

- والله لوريك يا يوسف .. والله لوريك

قالت كلمتها الأخيرة واجهشت فى البكاء كالأطفال.

\*\*\*

عادت إيمان من عملها وقت الظهيرة وعبرت الحديقة بخطوات واسعة وقبل أن تصل للداخل لفت نظرها وجود عبد الرحمن فى ركن بعيد نسبياً يقف أمام حوض معين من أحواض الزهور ، كان يحبه ويرويه دائماً بنفسه ، تعجبت إيمان فهى لم تعتاد على وجود عبد الرحمن فى البيت فى مثل هذا الوقت، فمن المفترض أن يكون فى العمل ، وقفت متأملة للحوض الذى يتأمله ، كان أجمل حوض للزهور فى الحديقة كلها، وكان يحوى زهرة بيضاء ملفتة للانتباه ومميزة جداً عن بقية الزهور ، كان عبد الرحمن يقف أمام تلك الزهرة الرائعة ، نعم هذه الزهرة كانت هند معجبة بها وهمت أن تقطفها ولكنه طلب منها أن تتركها على أن يسميها باسمها ، وبالفعل كان يسمى تلك الزهرة " هند "

وضع أطراف أصابعه على تلك الزهرة فظنت إيمان أنه يتحسسها ويلامس شذاها ولكنها تفاجأت به يقطفها فى عنف ويرمى بها بغضب خلف ظهره بقوة وغضب ، سقطت الزهرة فاقتربت منها خطوات ، وجعلت تنظر إليها وهى ملقاة على الأرض وتنظر له باستنكار، كيف يفعل هذا ، كيف يرمى تلك الزهرة الرائعة المميزة بهذا الغضب ، ماذا فعلت له تلك المسكينة .!

أستدار لينظر إلى موقع السقوط فلم يلاحظ وجود إيمان رغم اقترابها منها فنظر إلى الزهرة بغضب أكبر وخطى إليها بسرعة وغضب ليدسها بقدميه ، وقبل أن يقوم بدسها بلحظة ألقتتها فى سرعة ووقفت تنظر له بصمت متسائل .. فقال فى غضب :

- أرمى الوردة دى على الأرض.. حالاً

قالت له بتعجب :

- ليه حرام عليك ..عاوز تدوسها ليه

هتف عبد الرحمن فى عصبية :

- بقولك أرميها

فتحت حقيبتها فى سرعة ووضعتها بداخلها وقالت له بتحدى :

- مش هرميها.. لو أنت مش عاوزها أنا عاوزاها

تطايرت شرارات الغضب من عينيه وصرخ فى وجهها:

- وأنت مالك أنت.. بتدخلى فى اللى ملكيش فيه ليه.. عاوزها ولا مش عاوزها يخصك أيه أنت.. لما أقولك أرميها تسمعى الكلام وأنت ساكتة فاهمه ولا لاء.. أياكى تدخلى فى حاجة تخصنى تانى ولا حتى تقفى فى مكان أنا فيه.

كانت نظراته حادة جدا والغضب يطل من عينيه فعلت أنه ليس فى حالته الطبيعية وتراجعت للخلف خوفا من أى تطاول من الممكن أن يحدث ، ثم استدارت وخطت خطوات سريعة أقرب إلى الجرى للداخل ، لم تنتظر المصعد ولم تفكر به وصعدت الدرج فى سرعة ومنه إلى شقتها و دخلت غرفتها وألقت نفسها على الفراش وظلت تبكى وقلبها يخفق بشدة

كانت أول مرة فى حياتها تستشعر الخوف من أحد وتراجع أمامه خوفا من بطشه .. شعرت بمهانة كبيرة وبأنها شخص غير مرغوب فيه وأنها فى بيت غريب عنها من السهل أن تطرد منه فى أى وقت ، نهضت وكفكت دموعها وجمعت ملابسها فى حقيبة صغيرة ، هبطت إلى الأسفل وخرجت للخارج فى سرعة دون أن يلاحظها أحد.... وعادت من حيث أتت

\*\*\*

ظلت أم عبد الرحمن تطرق الباب ولكن لم يستجيب لها أحد ، قلقت بشدة وعادت إلى شقتها ووقفت تفكر فى حيرة ، ألقت الهاتف وحاولت الاتصال بإيمان عدة مرات ولكنها لم تلقى أى أجابة، زاد قلقها وتحدثت إلى زوجها هاتفيا وأخبرته بقلقها على إيمان وأنها لا تستجيب لطرقاتها فطلب منها أن تدخل لعبد الرحمن ليحاول فتح باب الشقة لعلها حدث لها شىء فى الداخل وهى بمفردها.

ذهبت إليه مسرعة وطلبت منه ذلك ، حاول عبد الرحمن أن يتملص من أمه فهو لا يريد ان يحتك بها بعد ما فعله معها ولكن أمه أصرت، فصعد معها وطرق الباب عدة مرات دون

فائدة ثم اضطروا فى النهاية إلى فتح الباب عنوة ، وقف فى الخارج ودخلت هى تبحث عن إيمان فلم تجدها، دخلت غرفة نومها فوجدت خزانة ملابسها خاوية فخرجت فى سرعة وهى تهتف به:

- إيمان خدت هدومها ومشيت يا عبد الرحمن .. ياترى أيه اللى حصل خلاها تعمل كده طأطأ رأسه أرضاً بأسف وقال بخفوت:

- أنا السبب

قص عليها ما حدث بينهما فى الحديقة فنظرت له مؤنبة وقالت :

- ليه كده يا عبد الرحمن.. ملقتش غير إيمان وتعمل معاها كده.. دى أمانة عندنا يابنى حرام عليك

قال بارتباك وإحساس بالذنب :

- أهو اللى حصل بقى .. أعصابى فلتت مني غصب عنى مكنش قصدى

هاتفتم زوجها مرة أخرى وأخبرته بما حدث فثار فى غضب وتوقع أن تكون عادت إلى شقتهم فى السيدة زينب ، خرج من مكتبه دون أن يخبر أحدا وتوجه إليها.

فتحت الباب فوجدته أمامها .. أخذها بين ذراعيه فبكت .. ربت على ظهرها فى حنان وجلس بجوارها وقال:

- حقاك عليا يابنتى متزعزعي

قالت وهى تبكى :

- لا يا عمى أنت مغلطش فيا بالعكس أنت كان نفسك تلمنا حواليك لكن أظاھر أن أحنا مش مرغوب فينا

قال مشفقا:

- لا يا إيمان متقوليش كده.. ده انتوا عندى أحسن من عيالى.. ده البيت ده ليكوا قبل ما يبقى لولادى يا بنتى

قالت بصوت باكى :

- معلىش يا عمى أنا مش هقدر أرجع هناك تانى .. أنا أقعد فى حجر بس بكرامتى

عقد حاجبيه وزاد سخطه على ولده وقال بانفعال:

- وكرامتك متصانة يابنتى وأنا هجبهولك لحد عندك يعتذرلك واعملى فيه اللى أنت عاوزاه  
حركت رأسها نفيا وقالت:

- مش عاوزه حد يعتذرلى .. معلىش يا عمى سبنى هنا كام يوم أريح أعصابى وبعدين نبقى  
نتكلم

حاول ترضيتها قائلا:

- حتى لو أنا أتأسفتلك يابنتى بالنيابة عنه

قالت إيمان بحرج بالغ :

- لا يا عمى أرجوك متعملش كده وبعد أذنك متقولش حاجة لإيهاب .. حضرتك عارف أنه  
حمقى وممكن يكبر الموضوع .. أنا هقوله أن المشوار من المدرسة للبيت عند حضرتك  
متعب شوية خصوصا أننا عندنا امتحانات شهر وبنروح بدرى وبنمشى متأخر وهقوله أنى  
هقعد هنا لحد ما الامتحانات دى تخلص

أسند رأسه إلى راحة يده وهو يقول بضيق :

- يعنى كمان عاوزه تقعدى لوحداك هنا

أمسكت بيده وقالت برجاء :

- معلىش يا عمى سبنى على راحتى.. وبعدين شغل إيهاب ومريم مش هيسمحلهن يخبطوا  
المشوار ده كل يوم لكن أنا سهله .. المدرسة قريبه من هنا

حاول معها كثيرا ولكنها لم تتراجع فاضطر أن يسمح لها بالبقاء يومين لا أكثر

فى المساء ذهب إليها إيهاب ومريم ، كان إيهاب غير مقتنع بما تقول فنظر لها بتمعن قائلا:

- يا إيمان أنا مش مقتنع باللى بتقوليه ده امتحانات شهر أیه اللى تقعدك هنا لوحداك

حاولت أن تخفى تعابير وجهها وهى تقول :

- معلى يا إهاب سبنى براحتى .. أنا كده هبقى مرتاحة أكثر.. ولما الامتحانات تخلص  
هرجع تانى ان شاء الله

جلس بجوارها قائلاً:

- وفجأة كده من غير ما تقوليلى

أبتسمت أبتسامة زائفة وقالت:

- منا قلت أهرب بقى قبل ما تمنعنى

نظر لها بعمق محاولاً سبر أغوارها :

- والله !! .. وفكرانى هصدقك.. ده أنتِ توأمى يا إيمان يعنى أحس بيكى من قبل ما تتكلمى

لمعت عيناها فقاطعتهما مريم قائلة:

- لو مصممة يبقى هنقعد معاكى ما هو مش معقول نسيبك هنا لوحداك

أبتسمت لها إيمان وقالت:

- ياسلام بقى الست البرنسية هترجع تقعد هنا تانى

بادلتها مريم الأبتسامة وقالت :

- يالا بقى معلى كلوا بثوابه

إيمان:

- طب والشغل يا مريم

شعرت مريم بحيرة وقالت بحزن :

- لا أنا مش هروح الشغل ده تانى

قال إهاب متعجباً:

- ليه أنتِ كمان.. حد زعلك ولا ايه

تكلمت مريم وهى تستشعر مشاعر متناقضة وقالت :

- لا يا إيهاب متقلّش .. انا بس حاسة أنى أهملت مذاكرتى وعاوزة أرجع أذاكر تانى وأحضر محاضراتى .. متنساش أنا عندنا عملى ولسه كمان فى تدريب فى الصيف عليه درجات

ضمها إليه قائلا:

- أحبك وأنت عاقلة كده ..

قالت إيمان بطريقة طفولية :

- ياسلام وأنا يعنى ماليش فى الأحضان الدافئة دى ..

ضمها ضاحكا تحت ذراعه الآخر وهو يقول فى حنان:

- ربنا يخاليكوا ليا يارب ... أيه فيلم الحرمان اللى احنا عاملينه ده

نظرت إيمان إلى مريم وهما تحت ذراعيه نظرة مأكرة وأشارت لها مريم .. واحد .. اثنين .. ثلاثة .. وفجأه انقضوا عليه بالكلمات .. ظل يجرى منهما فى مرح ويقفز من المقعد للمائدة وهما يلاحقانه بضحك هستيري !

\*\*\*

دخل الحاج حسين إلى غرفة عبد الرحمن ووقف أمامه وقال فى غضب:

- ولاد عمك كلهم هيقعدوا هناك مع إيمان .. شايف انت عملت ايه .... اللى أنا تعبت فيه جيت فى لحظة هديته

نهض ووقف أمام أبيه فى حزن شديد وقال:

- أنا آسف يا بابا .. والله ماكنت أقصد أى حاجة من اللى حصلت دى .. أنا خرجت عن شعورى أكمل والده بانفعال متجاهلاً حديثه:

- عارف البنت قالت لاختوها أيه .. قالتلهم أنها قاعدة هناك علشان امتحانات الشهر بتاعة مدرستها .. مجابتش سيرتك خالص طلعت أحسن منك يا عبد الرحمن

جلس عبد الرحمن إلى فراشه ودفن رأسه بين كفيه فى حزن عميق ، نظر له والده فى شفقة ولان صوته قائلا:

- كل ده ليه يابنى.. الدنيا مبتوقفش على حد .. أنت لسه فى عز شبابك ولسه ياما هتشوف يابنى أنت عاقل ولازم توزن الأمور أحسن من كده .. ولازم تعرف تفرق بين الغث والسمين ووضع كفه على رأسه فى حب وقال :

- أنا عارفك يا عبد الرحمن.. أنت راجل يابنى وهتعدى أى محنة قدامك وهتبقى أقوى من الأول مليون مرة .... يابنى الضربة اللى متكسر كس هتقويك .. وانت عضمك ناشف .. ده انت اللى هتشيل الشيلة كلها من بعدى يابنى تناول كف أبيه وقبله وقال:

- ربنا يديك طولت العمر يا بابا.. ده احنا من غيرك منسواش حاجة .. أرجوك متزعش منى أوعدك أنى أرجع لحياتى تانى أقوى من الأول

- وعد يا عبد الرحمن

- وعد يا بابا

وقف والده وهو يقول :

- ربنا يبارك فيك يابنى.. أنا كنت عارف أنك راجل وأنتك مش هتعمل غير كده

أنتبه عبد الرحمن فجأة وكأنه قد تذكر شيئاً فنظر إلى والده وقال:

- متعرفش يا بابا المدرسة اللى إيمان بتشتغل فيها أسمها إيه؟

\*\*\*\*

فى الصباح دخل يوسف مكتبه ولكنه لم يجد مريم، فظن أنها ستأتى متأخرة وبعد حوالى الساعة أتصل به والده وطلب منه الحضور إليه، قطع يوسف الممر إلى مكتب والده ودخل إليه فأشار له بالجلوس وهو يقول:

- أقعد يا يوسف

وبدون مقدمات قال:

- ها قولى بقى عملت إيه فى بنت عمك انت كمان

قطب جبينه وقال :

- يعنى آيه يا بابا مش فاهم قصد حضرتك

- قصدى مريم يا يوسف .. زعلتها تانى ليه هو انا مش هخلص من مشاكلكوا دى  
وأكمل بانفعال:

- مريم كلمتنى وقالتلى انها مش هتشتغل معاك تانى.. ولما سألتها ليه قالتلى على اللى  
عملته فيها وصممت مترجعش تانى وأتججت بمذاكرتها والمحاضرات

- يا بابا هى اللى ابتدت وأنت عارفنى مبحبش أسيب حقى

أنفعل الحاج حسين قائلا:

-هو انا مش هخلص من حركات العيال دى.. انا مخلف رجاله ولا عيال فهمونى هو احنا فى  
شركة ولا فى حضانه

حاول يوسف أضافة بعض المرح مع الاعتذار فقال :

- أنا آسف يا بابا خلاص أوعدك مش هضايقها تانى.. ولو عملتلى حاجة هبعت جواب لولى  
أمرها اللى هو حضرتك طبعاً ولو هى أشتكتك منى أبقي ذنبنى على السبورة

أبتسم الحاج حسين لمزاحه وقال:

- مش لما ترضى ترجع تشتغل معاك تانى يا فالح ...

قال يوسف بأسلوب استعراضى :

- أطمئن يا بابا انا هعرف اخليها ترجع الشغل تانى

أشاح حسين بوجهه وقال بمكر:

- دى مش طايقه تشوفك .. ومهما عملت مش هتصفاك .. انا متأكد انك مش هتقدر

نهض يوسف بشغف وقال بتحدى :

- ماشى يا حاج أفكر بس الكلام ده علشان لما تلاقيها رجعت تتأكد انى أقدر ولما بحط حاجة  
فى دماغى بعملها .. ماشى

قال حسين بعدم اكتراث مدروس :



- طب يالا روح شوف شغلك.. لما نشوف

أنصرف يوسف وبمجرد أن أغلق الباب خلفه ابتسم والده .. فهو يعلم جيدا أبناءه ويعلم الطريق إلى قلب كل منهم ويسلك هذا الطريق في ذكاء شديد.

جلست إيمان في المساء على فراشها وهي تنظر إلى الزهرة المسكينة التي ألقي بها على الأرض وتناولت الكوب الذي وضعتها به وجعلت تنظر إليها في شفقة وهي تتخيل شكلها وهي تدهس بالأقدام .. مررت عليها أطراف أصابعها في رقة وتهمس لها همسا :

- متزعزعي مش كل الناس معندهاش رحمه زيه

رفعت مريم الوسادة من فوق رأسها وهي تقول بتثائب:

- بتقولي حاجة يا إيمان

ألتفتت إيمان إليها قائلة:

- لالا نامي انت

نظرت لها مريم بشك قائلة:

- ازاى بقى انا سمعتك بتقولي حاجة

أجابتها إيمان بضجر :

- أوف .. أنت يابنتي ودانك دى ايه.. ده أنت ينفع تشتغلى مقياس للزلازل .. كنت بكلم الوردة خلاص ارتحتي

مريم وهي تفتح عين وتغمض الأخرى قائلة :

- والنبي أنت أتهيلتي.. بتكلمى الوردة !

ألتفتت إليها إيمان باستنكار قائلة :

- أيه والنبي دى ؟ .. لما تحلفى احلفى بالله .. قولى لا اله الا الله

رددت مريم بصوت ناعس :

- لا اله الا الله...

قامت إيمان وأطفأت المصباح واستسلمت للنوم ، نامت الفتاتان وهما لا يعلمان ماذا ينتظرهما فى الغد.!

\*\*\*\*

### الفصل الثانى عشر

أنهى يوسف بعض أعماله ونظر إلى ساعة معصمه فوجد الوقت وقد قارب على الظهيرة .. تناول هاتفه واتصل بأخته فرحة وطلب منها أن تحدث مريم وتسألها على ميعاد انتهاء محاضراتها فى الكلية دون أن تخبرها أن يوسف هو من يسأل عنها، أغلق الخط وانتظر حوالى عشرة دقائق ثم عاود الاتصال بأخته مرة أخرى

يوسف :

- أيوه يا فرحة ها قالتلك أيه

- قالتلى هتخلص على الساعة ٣ كده

- ماشى يا فرحة متشكر أوى

- يوسف ...ممكن أسألك سؤال

- لا طبعا مش ممكن هو أنا فاضيلك

- متشكرة أوى ياخويا يا حبيبى أنك وافقت .. قولى بقى أنت عاوز تعرف معاد خروجها ليه ومش عاوزها تعرف أن أنت اللى بتسأل ليه؟

- كده سؤالين يا فرحة مش سؤال واحد

- مش انت وافقت على ثلاث أسئلة

- طب انا هجاوبك قبل ما يبقوا أربعة.. بصى يا ستى بنت عمك زعلت شوية بسبب هزارى الخفيف اللى أنت مجرباه وطلعت عيله وسابت الشغل ومشيت وأنت عارفة أبوكى بقى واللى عمله فيا

- اممممممم...وانا اقول مريم مشيت من البيت ليه اتاريك انت اللى طفشتها

- والله منا عارف يا فرحة.. عموما ابوكى صمم انى اكلمها واخاليتها ترجع الشغل علشان كده عاوز اقابلها على باب الكلية واكلمها وخصوصا انها مقاتلتش لاختواتها على حاجة - والله بت جدعة

- جدعه!.... طب اقفلى بقى مش فاضيلك

- يعنى انا اللى فاضية كويس اصلا انك لحقتنى قبل ما ادخل المحاضرة

\*\*\*

كانت مريم تقف بجوار سلمى أمام بوابة الكلية وهى ترى الأخيرة تنظر إلى ساعتها ما بين الحين والآخر فقالت باهتمام:

- ايه يا سلمى انت وراكى معاد ولا ايه

ضحكت سلمى فى خبث وقالت:

- ومش وأى معاد يا مريم

مريم :

- مين المره دى

اصطنعت سلمى الدهشة وقالت:

- معقوله متعرفيش ....ايه هو مش باين عليه الغرام ولا ايه.. أو مال لو مكنتوش ساكنين فى بيت واحد وبتشتغلوا مع بعض

تسمرت مريم مكانها وقالت بذهول:

- تقصدى مين... يوسف

أطلقت سلمى ضحكة عابثة وقالت:

- ومالك اتخضيتى كده ليه ...استنى دلوقتى هتعرفيه زمانه جاى

ثم أشارت إلى ثلاث شباب مقبلين عليهما ونادتهم ، تقدم الشباب منهما بشغف وقال أحدهم:

- أزيك يا سلمى ازيك يا مريم بقالك كتير مبتجيش كنتى تعبانة ولا ايه

قالت مريم باقتضاب :

- لا ابدأ مشغولة بس شوية

قال آخر:

- مالك يا مريم مضايقة ولا ايه

- لا مفيش حاجة .. كويسه

قال ثالثهم موجهها حديثه إلى سلمى:

- ايه يا قمر ماشيه بسرعة ليه كده النهاردة

سلمى :

- أصلى عندى معاد مهم

رد قائلاً بخبث:

- أنا عارف مواعيدك يا سلمى وطبعا مريم رائحة معاكى ما أنتوا مبتفارقوش بعض أبدا

قالت مريم بعصبية :

- قصدك ايه يعنى

غمز بعينه عابثا وهو يقول:

- أبدا يا ستى وانا مالى الله يسهلوا

ثم غمز لصديقه فضحكا وضحكت معهم سلمى وهى تضرب أحدهم بخفة على كتفه، جاء

من خلفها وقال بمزاح:

- يا صباح الفرفشة .. ايه الضحك اللى جايب لآخر الدنيا ده

أستدارت له وقالت بميوعة:

- وليد أتأخرت كده ليه زعلانة منك

صافحها بحرارة وهو يقول:

- مقدرش أتأخر على القمر أبدا معادى مضبوط ٣ بالثانية

ثم نظر إلى مريم وصافحها بابتسامة قائلا:

- وحشانا يا مريم ازيك عامله ايه

لانت ملامحها كثيرا فهي كانت تظن أن الآتى لسلمى هو يوسف فتنهدت فى راحة وقالت:

- الحمد لله تمام ..ايه بقى رايعين فين

وليد :

- ولا حاجة هنتمشى شوية تحبى تيجى معانا

أجابت سريعا :

- لا شكرا انا هروح على طول علشان ايمان زمانها راجعة من شغلها

سلمى:

- طب عن اذنك بقى يا مريومة .. سلام يا حبيبتي

غادرت سلمى مع وليد واستقلت معه سيارته وانطلقا، ألتفتت مريم فوجدت زملائها الثلاثة

مازالوا وافقين يتابعون ما يحدث فقال أحدهم:

- أخص عليه الخاين كده ميجيبش صاحبه معاه

قالت مريم بعدم فهم:

- صاحبه مين .. هو انت تعرفه

قال:

- لا معرفوش .. بقولك ايه ماتيجى معانا مادام خروجتك باظت كده

مريم :

- آجى فين.. هو ده وقت كافتريات

ضحك هو وصديقيه وقال:

- معقوله كل السنين دى مصاحبة سلمى ولسه أخرك الكافتريا

نظرت لهم بدهشة وقالت :

- مش فاهمة حاجة .. أنا مصدعة مش نقصاكوا يالا سلام

كان هناك من يراقب ما يحدث فى ضيق وهو يرى مريم تقف بصحبة سلمى وثلاثة من الشباب ثم تنصرف سلمى مع وليد وتظل مريم تتحدث معهم وهم يضحكون وينظرون إليها بطريقة لا يفهمها إلا الرجال ، إذا فهو لم يظلمها عندما شاهدها فى المرة الأولى ، هى إذن معتادة على الوقوف معهم وتتباسط معهم فى الحديث وهى أيضا تعلم أن هناك علاقة ما بين سلمى ووليد وتوافق على تصرفات صديقتها المقربة

شعر بغضب شديد تجاهها .. استقل سيارته وغادر المكان والظنون تحتل عقله وتفرض عليه اليقين بسلوكها فرضاً.

\*\*\*

أما هناك وأمام مدرسة البنات كانت إيمان تخرج من بوابة المدرسة بصحبة صديقاتها وماهى إلا خطوات قليلة حتى تفاجأت بعبد الرحمن يقف أمام باب المدرسة مستندا إلى سيارته ينتظرها، وقفت للحظة ثم صرفت نظرها عنه فى ضيق وهمت أن تذهب فى الاتجاه الآخر ولكنه خطى نحوها خطوات سريعة ووقف أمامها قائلاً بحرج:

- ممكن كلمه يا ايمان لو سمحتى

نظرت له صديقاتها وقالت أحدهن:

- مين حضرتك وازاى تقف قدامنا كده

أرتبكت إيمان وقالت لهن:

- ده ابن عمى

تبادلت الصديقات نظرات مبتسمة وقالت أحدهن :

- طيب يا إيمان هنمشى احنا بقى

أستوقفتهن إيمان وقالت:

- لا متمشوش استنوا ..

قال عبد الرحمن برجاء :

- ممكن دقيقة واحدة بس يا إيمان وبعدين أبقى أمشى براحتك مع أصحابك ...

ثم تابع برجاء أكبر :

- من فضلك

قالت صديقتها:

- طيب يا إيمان هنعدي السكة وهنستناكى هناك علشان نركب مع بعض

أومأت لها إيمان موافقة فى أحراج بالغ فابتسم عبد الرحمن وقال:

- واضح أنك بتعرفى تختارى أصحابك كويس .. ماشاء الله كلهم تقريبا شبيهك فى اللبس  
وبايين عليهم بنات محترمة

قالت باقتضاب:

- شكرا ..... خير حضرتك جاى هنا ليه

قال عبد الرحمن بارتباك :

- أنا والله حاولت أجيب فرحة معايا بس اتفلقت اتصالات عليها وتليفونها مقفول ...

قالت بضيق:

- برضة حضرتك مقولتش جاى ليه

أبتلع ريقه فى صعوبة وقال:

- إيمان بدون مقدمات كده ... أنا آسف

نظرت له فى صمت فأكمل :

- والله ما أنتِ المقصودة ..غصب عنى كنت غضبان أوى ومشوفتش قدامى .. جات فيكى يا بنت عمى ..سامحيني

قالت دون أن تنظر اليه:

- لا أنت مش غلطان أنت معاك حق دى خصوصياتك وده بيتك وأنت حر فيه وأنا وضعى كضيعة المفروض مكنتش أدخل فى اللى ماليش فيه

قال بأسف:

- لا يا إيمان أنتِ مش ضيعة ده بيتك قبل ما يبقى بيتى .... يعنى انا لما ازعلك تقوليلى أمشى أطلع بره مش عاوزه أشوفك هنا تانى .. مش تاخدى هدومك وتمشى .. كده ينفع ؟

شعرت بارتباك شديد وقالت مضطربة :

- لو سمحت سيبنى امشى أصحابى وافقين لوحدهم فى الشارع وكده مينفعش .. وأصلا وافقتنا دى غلط

قال باصرار:

- مش هسيبك تمشى غير لما تسامحيني .. سامحيني بقى ده المسامح كريم .. أو مهند على حسب

نظرت له بتسائل فقال بسرعة:

- متخديش فى بالك ..ها قوليلى بقى ...هترجعى البيت أمتى

قالت بسأم:

- يومين كده أريح أعصابى من اللى حصل

قال بسرعة:

- بسيطة اليومين عدوا خلاص

إيمان:

- لا يومين كمان كده



قال مداعبا :

- لا مينفعش أنتِ قلتى يومين وخلصوا خلاص .. وبعدين يرضيكى يعنى ... ماما طول النهار مش مركزة فى شغل البيت وعماله تقول إيمان إيمان إيمان .. تيجى تطبخ الملوخية تطلع بامية .. يرضيكى أبويا يطلق أمى ونتشرد بسببك أنا ويوسف وفرحة وأنتِ عارفة فرحة تنفع تبقى متشردة أساساً

أخفت ابتسامتها التى زينت ثغرها رغما عنها وقالت مقاطعة :

- خلاص خلاص .. كل ده

قال بجدية :

- وأكثر والله .. البيت وحش أوى من غيركوا

صمتت قليلاً وترددت هل تقبل أم ترفض ثم وجدت نفسها تقول:

- مش قلت دقيقة .. والدقيقة بتاعتك خلصت .. عن أدنك

فوقف أمامها مرة أخرى يعوق طريقها وأخرج جنية معدنياً من جيبه وقدمه لها وقال :

- طب ممكن تدينى مدة ثانية... أصل الخط تقريبا أقطع وأنا فى نص المكالمه

حاولت أن تخفى ابتسامتها ثانيةً وهى تقول بجدية:

- لو سمحت يا عبد الرحمن مينفعش كده سبنى أمشى بقى

قال بتصميم:

- خلاص هاجى بالليل تكونوا جهزتوا نفسكوا علشان اخذكوا على البيت

قالت بسرعة:

- لا مش هينفع النهارده

تابع باصرار:

- طب أمتى حضرتك؟

إيمان:

**- مش عارفة قلتك يومين كده**

### حاول أن يعتذر مرة أخرى فقال بصدق:

- یعنی خلاص مش ز علانۀ منی ... صافی یا لبن

**أحمرت وجنتاها خجلا وهي تذهب من أمامه قائلة:**

## - خلاص

**نظر لها وهي تعبر الطريق وتلحق بصديقاتها ثم قال وهو يستقل سيارته:**

**- بتكسف أوى!!**

**جلست إيمان بجوار صديقتها في سيارة الأجرة فمالت عليها قائلة بخفوت:**

- بقى الواد القمر ده ابن عمك حسين .. أنا لو منك مخرجش من البيت خاااااالص

**نظرت لها إيمان وقالت بصوت هامس:**

- الرجل لسه بيقول عليكى شكاك محترم .. مغشوش يعينى

وضعت صديقتها كفها على فمها لتكتم ضحكتها بينما نظرت إيمان إلى الطريق من خلال نافذة السيارة وصدى كلماته لا يزال يجوب عقلها ويرتع به كيفما يشاء

\*\*\*\*\*

**جلست فاطمة إلى زوجها وهو يقرأ الجريدة وتساءلت في فضول:**

- متعرفش يا إبراهيم الواد عبد الرحمن فسخ خطوبته ليه

**نظر لها إبراهيم في دهشة وقال:**

**- لحقتى تعرفى يا فاطمة**

**قالت بثقة :**

**- طبعاً ما أنت عارف عفاف مبتخيش عليها حاجة**

## أبتسم في سخرية قائلاً:

- ولما هى مبتخبيش عنك حاجة جاية تسألينى ليه

قالت فى عتاب:

- كده برضة يا أبو وليد بتتريق عليا.. وأنا اللى قلت أنك انت اللى هتقولى المفيد

زفر فى ضيق وقال:

- عاوزه آيه يا فاطمة هاتى من الآخر

فاطمة بشغف:

- عاوزه أعرف ساب البت هند ليه.. أكيد أخوك حكاك

نظر لها بضيق قائلا:

- معرفش يا فاطمة ... كل اللى حسين قاله أنهم مش متفقين .. وعبد الرحمن كمان قال نفس الكلام

عاد ليكمل قراءته مرة أخرى وهو يقول فى نفسه "ده أنت لو آخر واحدة فى الدنيا مش ممكن أقولك أبدا" ، همت أن تنهض واقفة ولكنها جلست مرة أخرى ووضعت يدها على الجريدة لتمنعه من القراءة وقالت:

- بقولك آيه يا أبو وليد المثل بيقول أخطب لبنتك ومتخطبش لأبنك وأنت وأخوك روحوا فى بعض وأكيد مش هيرفضلك طلب

التفت إليها بدهشة قائلا:

- قصدك إيه يا فاطمه شكلك اتجننتى على المسا

قالت معترضة:

- ليه بس ياخويا هما لو لفوا البلد كلها هيلاقوا أحلى من بنتى وفاء

أشار لها محذرا وقال بانفعال:

- شوفى يا فاطمة يلفوا ميلفوش هما حرين لو عاوزين بنتك هما اللى يطلبوها مش أنا اللى أروح أعرضها عليهم وأياكى تفتحى الموضوع ده تانى ولا تلمحى ليه حتى .... فاهمانى

\*\*\*\*

مضى اليومان بشكل معتاد إلا أنه لم تنقطع العلاقات الطيبة بين إيهاب وعبد الرحمن ويوسف وبين فرحة وإيمان ومريم وكانت وفاء مطمئن عليهما بين الحين والآخر وفي مساء اليوم الثانى كانت إيمان تضع الطعام على المائدة ، أصدر هاتفها صوتا معلنا عن رسالة جديدة ، فتحتها فوجدتها رسالة من عبد الرحمن كتب فيها (اليومين خلصوا.. أكثر من كده هضطر آجى بنفسى .. تعبنا من أكل البامية) ، ابتسمت وأتممت وضع الطعام ونادت على مريم لتأكل معهم وأثناء قيام إيهاب بتناول طعامه قال:

- مش خلصتى امتحاناتك يا إيمان عمامك كل شوية يكلمونى

أستدارت له إيمان وقالت بجدية:

- هما بجد عاوزنا نرجع يا إيهاب ولا بيجاملونا بس

أشار لها بالنفى وقال:

- لا يا إيمان والله كلهم بيتصلوا بجد كل شوية يسألوا ده حتى عبد الرحمن لسه مكلمنى قبل ما آجى وقالى آجى أخذكوا دلوقتى وكان مصمم أوى ... قتلته استنى لما اشوف البنات خلصوا اللى وراهم ولا لاء

صمتت إيمان وفى داخلها تشعر بسعادة لتصميم عبد الرحمن على عودتهم ثم قطعت صمتها مريم وهى تسألها:

- ها يا إيمان مردتيش يعنى

ابتسمت وقالت :

- خلاص ماشى نرجع بكره بعد ما إيهاب يرجع من شغله

دخلت مريم غرفتها لترد على هاتفها المحمول ، أغلقت باب الغرفة خلفها وهى تتحدث إلى والدتها ، كانت مريم تجيبها بفتور وعدم حماس كعادتها شعرت والدتها أنها ليست على طبيعتها فسألتها مباشرة:

- مالك يا مريم بتكلمينى كده كأنك مضايقة أنى بكلمك

مريم:

- لا يا ماما مفيش حاجة والله بس مرهقة شوية

- طب مش هتقوليلي سبتى الشغل ليه

- يا ماما المحاضرات .. مينفعش أغيب أكثر من كده ده أحنا خلاص على أبواب امتحانات  
قالت أحلام بعصبية:

- يابنتى امتحانات أيه وزفت أيه اللى أنت بتعمله أهم من مليون شهادة وكلية.. ويا ستى  
لما تبقى تتجوزيه أبقي أرجعى كملى دراستك تانى  
أجابتها مريم بضيق شديد :

- يا ماما من فضلك كفاية بقى الموضوع ده بقى يتعبلى أعصابى .. مين ده اللى يتجوزنى ده  
حتى مش طابق يشوف وشى  
قالت أحلام معاتبة :

- ماهو علشان أنت مبتنفذيش اللى بقولك عليه بتتصرفى من دماغك...  
هتفت بصوت يشبه البكاء:

- مش عاوزه أنفذ حاجة أرجوكى يا ماما كفاية  
صاحت أحلام بشدة:

- أنتى أتجننتى يا بت ولا أيه مش عاوزه ترجعى حقك وحق أخواتك  
أنهارت مريم فى البكاء وهى تهتف بوالدتها :

- مش عاوزه حاجة.. نفسيتى تعبانة يا ماما أرجوكى كفاية

قطعت الاتصال وجلست على فراشها وهى تبكى بشدة، دخلت إيمان الغرفة فوجدتها فى  
هذه الحالة من البكاء المتواصل هرولت إليها فى جزع قائلة:

- مالك يا مريم فيكى أيه .. كنتى بتكلمى مين

أرتمت مريم فى حضن أختها فى أنهيار شديد وظلت تبكى وهى تقص عليها ما دار بينها  
وبين أمها وماذا كانت تريد منها فعله، أتسعت عيني إيمان فى ذهول وهى تقول:

- معقوله يا مريم ..معقوله ماما تطلب منك كده ..

وتابعت فى صدمة:

- معقوله ؟ معقوله أم ترمى بنتها فى النار بأديها بقى بدل ما تقولك خدى بالك من نفسك  
واتعاملى مع الرجالة بحدود تقوم تقولك علقه بيكى وخاليه يتجوزك ..طب ازاي .. ازاي  
حاولت مريم أن تخفف من بكائها وهى تقول:

- هى فاكدة أن مفيش غير الطريقة دى علشان نرجع بيها حقنا من عماونا  
هتفت إيمان:

- حق أيه .. ده أحنا لسه مش متأكدين من كلام ماما ... مش متأكدين لينا حق ولا لا  
وحتى لو لينا حق مش دى الطريقة اللى نرجعه بيها.. ده ميرضيش ربنا يا مريم  
وضعت إيمان رأسها بين كفيها وقد أغضت عينيها وهى تشعر بدوار شديد من أثر  
الصدمة:

- مش قادرة أصدق اللى بسمعه أنت يا مريم تعملى كده وتخبى عليه كل ده  
قالت مريم برجاء وهى تمسك بكفى أختها:

- لا يا إيمان أنا معملتش حاجة.. أنا أه صحيح حاولت فى الأول بس بعد كده لما اتعاملت مع  
عمى حسين وولاده ومراته بصراحة حبيتهم ونسيت اللى ماما طلبته مني كله وبقيت تعامل  
عادى والدليل على كده انى سبت الشغل مع يوسف  
أردفت إيمان بخفوت:

- أنا كمان يا مريم حبيت عمامى أوى ومش عارفة الحقيقة فين دماغى هتفجر

- يعنى أيه هفضل كده مش عارفين حاجة والحقيقة ضايعة ما بينهم

- لا يا مريم الحقيقة هتبان ومفيش غير طريق واحد بس

- ايه هو ؟

قالت إيمان فى تصميم:

- مفيش غير المواجهة ... لما نرجع لازم أقعد مع عمى حسين وأواجهه وأعرف الحقيقة  
بالظبط مفيش حل غير كده

\*\*\*\*

فى اليوم التالى عاد إيهاب من عمله مساءً، دخل الشقة فوجد إيمان تتابع برامج أحدى القنوات الإسلامية ومريم تلعب على الحاسوب بلا مبالاة فهتف فيهما:

- يا صلاة العيد .. واحدة بتتفرج على التلفزيون والتانية بتلعب على الكمبيوتر ومفيش حاجة أتلعت .. أنتوا مش ناويين تمشوا ولا إيه

قالت إيمان دون أن تلتفت:

- أحضرك الأكل

بينما قالت مريم ببرود:

- خلاص بقى خاليها بكره

عقد إيهاب ذراعيه أمام صدره وهو ينظر إليهما بتعجب:

- مالكم فى إيه مش متحمسين ولا مكسلين ولا إيه بالظبط

قالت إيمان وهى تقلب فى القنوات :

- خلاص يا إيهاب خاليها يوم الجمعة

هتف إيهاب منفعلًا:

- واللى جايين فى السكة دول أقولهم إيه روحوا وتعالوا يوم الجمعة

أستدارت إيمان بانتباه فى حين قالت مريم:

- مين اللى جايين

رد إيهاب قائلاً بحماس:

- عبد الرحمن ويوسف فلقونى اتصالات من الصبح ومسبونيش إلا لما وافقت يجوا ياخدونا بعربياتهم دلوقتى .. ده على أساس أن حضارتكم جهزتوا الشنط

ووقف أمام التلفاز وقال لإيمان وهو يغلقه :

- يالا بقى قوموا ألبسوا واجهزوا على ما ادخل آخذ دش أحسن مرهق أوى .. زمانهم على وصول

أطفأت مريم الحاسوب ونهضت وهى تنظر إلى إيمان ، تبادلت معها إيمان نظرات القلق والحيرة ، نعم مشاعرهما متضاربة ففى القادم مواجهة للماضى بكل آلامه وأحزانه وتاريخه الذى لا يعلمون عنه إلا كلمات أهم التى كانت تحاول بكل جهدها أن تجمل صورتها وتقبح صورة أعمامها بكل الطرق الممكنة ، أرادت إيمان ملابسها وشرعت فى تجهيز حقيبتها وكادت أن تنتهى لولا أن سمعت طرقات على باب المنزل فقالت لها مريم:

- أفتحى انتِ يا إيمان لو سمحتى أنا لسه ملبستش

ذهبت إيمان وفتحت الباب فوجدته أمامها بابتسامته العذبة ، أقترب من الباب واستند إلى حافته المفتوحة وهو واضع يديه فى جيبه وقال:

- كده ينفع ؟... فى يوم زيادة على فكرة

كادت أن تبتسم ولكنها رأت يوسف يضربه على كتفه من الخلف ويهتف به:

- مالك سادد الباب كده ليه زى الحيطه .. عدينى

ألتفت له عبد الرحمن وبادلته الهمهمة قائلاً:

- لما أنا حيطه أو مال أنت تبقى ايه

قال يوسف بمزاح:

- أنا الحيطه اللى قدامها .. خلاص وسعلى بقى

جاء إيهاب فور سماعه أصواتهما وقال بابتسامة كبيرة:

- مفيش فايدة عمركوا ما هتكبروا أبدا

وضع عبد الرحمن يده على كتف إيهاب وقال:

- أحنا بنكبر خمس أيام فى الأسبوع ... النهاردة أجازة



كانت إيمان قد تراجعت للخلف وهى تنظر لمزاحهم وقد ترددت ألف مرة عن ذى قبل ، خافت أكثر من المواجهة، كانت تتمنى أن تبقى هذه العلاقات الطيبة إلى الأبد ولا يعكرها ماضى ربما يكون مؤلم لهم جميعا.

\*\*\*

### الفصل الثالث عشر

كانت فرحة تقف مع والدتها فى شرفة غرفتها المطللة على الحديقة فى انتظار إيهاب ، فلقد مضت عليها الأيام السابقة كنيبة ويكفى أنها كانت خالية من وجود إيهاب معها فى نفس المكان، لمعت عيناها بفرحة حقيقية وهى ترى أضواء سيارتا عبد الرحمن ويوسف تقترب من بوابة الحديقة الخارجية، أشارت إلى البوابة بسعادة وهى تمسك بكف والدتها وتقول بلهفة:

- أهم يا مامتى .. وصلوا

وقفت عفاف فى بهجة وارتسمت علامات السعادة على وجهها وقالت لفرحة:

- يالا ندخل نقول لأبوكى بسرعة

دلفت عفاف للداخل وتوجهت إلى حيث زوجها وقالت :

- وصلوا يا حسين أنا هروح افتح الباب

أبتسم فى سعادة وقال:

- أو مال فرحة فين مش كانت معاكى

عفاف:

- بتلبس الحجاب وجاية

وقف عبد الرحمن أمام المصعد وقال بابتسامة كبيرة:

- أطلعوا انتوا بقى بالشنط وانا ويوسف هناخدنا سلام

أعترض إيهاب قائلا:

- لا أنا هطلع معاكوا ...

ثم أشار إلى مريم وإيمان وقال:

- أطلعوا انتوا يابنات بالشنط فى الأسانسير

ألقت مريم نظرة على يوسف فوجدته ينظر إليها بعتاب شديد دون أن ينتبه، لا تعلم سر هذه النظرة المتواصلة منذ أن خرجت من غرفتها وهى تحمل حقيبتها وألقت عليه السلام هو وأخوه وهو ينظر لها بعتاب دائما ، هل بسبب أنها تركت العمل لديه أم غير ذلك لا تعلم

استيقظت من شرودها على صوت إيهاب وهو يكلمها بقلق :

- مالك يا مريم واقفة كده ليه

قالت مريم بانتباه:

- نعم .. لا مفيش حاجة أنا داخله اهو

وكادت أن تدخل المصعد ولكنها اصطدمت بإيمان التى خرجت منه مرة أخرى فى سرعة وقالت لـ يوسف بلهفة:

- معلش يا يوسف ممكن تدينى مفتاح عربيتك

نظر لها بتسائل فى حين قال إيهاب:

- ليه يا إيمان نسيتى حاجة؟

أومأت برأسها قائلة:

- معلش نسيت حاجة مهمة ومينفعش أسيبها للصبح

قال يوسف بمزاح :

- أكيد حلة محشى صح؟

ضحك عبد الرحمن قائلا:

- يابنى انت مبتفكرش غير فى الأكل ..هات مفاتيح عربيتك يالا

وأخذ مفاتيح سيارة يوسف وقال :

- أطلعوا انتوا وأنا هروح أجيبها وآجى بسرعة

ثم وجه حديث لإيمان قائلا:

- ها نسيتى أياه وفين؟

طأطأت رأسها بخجل وقالت:

- مج لونه أبيض فيه وردة بيضا على تابلوه العربية

تذكر إيهاب وقال:

- اه صحيح نسيت أخذها فى أيدى وأنا نازل معلش يا إيمان

أبتسم يوسف وقال مداعبا إيهاب:

- أياه ده الوردة طلعت بتاعة اختك ... وانا اللى كنت فاكر انك جايبهالى علشان تعبرلى بيها  
عن اعجابك بسواقتى

ضحك كل من يوسف وإيهاب فى حين نظر لها عبد الرحمن بخجل وقد تذكر ما فعله من  
حماقة معها من أجل أنقاذها تلك الزهرة ، ذهب إلى الجراج الخاص فى صمت فى حين صعد  
الجميع إلى شقة الحاج حسين الذى ما أن وقعت عينيه عليهم حتى ابتسم بترحاب وضمت  
عفاف مريم وإيمان ورحبت بإيهاب كثيرا .

أجتمعت الأسرة فى غرفة المعيشة واقبلت فرحة متشوقة بلامح خجلة ، نظرت إلى إيهاب  
نظرة خاطفة بخجل وشوق وألقت عليه التحية واحتضنت كل من إيمان ومريم بلهفة كبيرة

وما أن أخذ الجميع أماكنهم حتى دخل عبد الرحمن وفى يده الكوب الذى يحوى الزهرة  
وقدمه لإيمان قائلا بنبرة اعتذار:

- أتفضلى .. والله خدت بالى منها جدا وانا جايبها حتى اسألها

رفع نظره فوجد والدته ووالده ينظران إليه بتسائل وعلى وجوهيهما ابتسامة فقال شارحا:

- دى إيمان نسيتها فى عربية يوسف

وقفت فرحة بفضول وقالت:

- أيه ده معقول الوردة دى شبه اللى عندنا تحت أوى

وضع عبد الرحمن كفه على وجهها ودفعها لتجلس مرة أخرى على مقعدها ثم يلتفت إلى الجميع وهو يقول بضحكة بلهاء:

- هههههه .. منورين يا جماعة والله

نهضت عفاف وقالت:

- يالا يا جماعة العشا جاهز

وقفت مريم وقالت بحزن:

- معلش يا طنط أعفينى .. أنا هطلع أستريح اصلى تعبانة شويه

اقتربت منها عفاف بلهفة قائلة:

- مالك يا مريم حاسة بأيه

مريم:

- أبدا مش تعب يعنى .. أنا بس مرهقة وعاوزة أنام

ألقت إيمان نظرة إلى عمها ثم قالت:

- وأنا كمان هطلع

وقف حسين أخيرا وقال بلهجة أمره:

- مفيش نوم قبل العشا يالا على السفرة

\*\*\*\*

خطت إيمان بخطوات بطيئة تنظر إلى مبنى الشركة الضخم ، أنه يفوق ما كانت تتصور ، أوقفها الأمن على البوابة ثم سمحوا لها بالدخول فور رؤيتهم لبطاقة هويتها الشخصية ،

ظلت تنتظر حولها فى انبهار أثناء اتجاهها فى الطريق الذى يشير إليه موظف الاستقبال الذى يصاحبها فيه حتى وصلت إلى مكتب السكرتارية الخاصة بعمها، كانت تتوقع أن تنتظر برهة ليسمحوا لها بالدخول ولكنها تفاجأت بتواجد عمها شخصيا فى استقبالها أمام باب مكتبه الخاص وعلى وجهه ابتسامة كبيرة و مرحبة بها وقال:

- نورتى الشركة يا إيمان.. طب مش كنتى تقولى انك جاية كنت بعثك العربية

جلست على استحياء مقابلة له قائلة:

- معلى يا عمى محبتش اتعبك

نظر لها الحاج حسين بعتاب قائلاً:

- تتعبينى أيه بس أنت مش هتبطلى الحساسية الزائدة دى

ثم أردف بود :

- ها تحبى تشربى أيه

قالت بحرج:

- شكرا يا عمى أنا مش هطول

- لا مينفعش لازم تشربى...

ثم أجرى اتصالاً وأمر لها بكأس عصير طازج ثم أجرى اتصالاً آخر بأخيه إبراهيم وتحدث معه فى بهجة واضحة:

- مش هتصدق يا ابراهيم مين عندنا فى الشركة دلوقتى

ثم نظر لها مبتسما فبادلته الأبتسامة فقال:

- إيمان فى مكتبى دلوقتى

أنهى الاتصال والتفت لها قائلاً:

- عمك مش مصدق قالى اقبض عليها لحد ما آجى أشوفها بنفسى

أبتسمت إيمان وهى تقول بخجل:

- ربنا يخاليكوا يا عمى انتوا بتعاملونا معاملة مكناش نتوقعها أبدا

دخل الساعى ووضع كأس العصير وقبل أن يخرج دخل إبراهيم متهللا وجهه عندما وقع نظره على إيمان سلم عليها وقال:

- أزيك يا إيمان عامله ايه

- الحمد لله يا عمى بخير

- حمد لله على السلامة يابنتى نورتى البيت والشركة

- منوره ببيكم يا عمى

شردت قليلا وهى تنظر إليهما لا تعلم كيف تبدأ حديثها بعد هذا الترحيب الكبير ماذا ستقول هل تبدأ بكلام أمها أم تسأل هى وكأنها لم تعلم ماذا حدث وأخيراً حسمت أمرها قائلة: ..

- عمى أنا عارفة أن الموضوع اللى أنا جايه فيه مينفعش اتكلم فيه فى الشغل لكن مكنتش عاوزه حد من البيت يسمعنا

تبادل حسين وإبراهيم النظرات المتسائلة فتابعت فى تردد :

- بعد أذن حضرتك يا عمى أنا عاوزه أعرف الحقيقة منكم ... أيه اللى حصل زمان خلى أمى تطلق وتهرب بينا وتختفى عنكم وهل فعلا بابا الله يرحمه كان ليه فلوس عندكم ولا لاء؟

تبادلا النظرات مرة أخرى ولكن هذه المرة كانت النظرات لها معنى آخر وساد الصمت لبرهة قطعتة إيمان وهى تنظر إليهما وكأنها قد استشعرت الحرج فى نظراتهما فقالت:

- وأنا هقبل الحقيقة دى مهما كانت

إبراهيم:

- هو أنت يا بنتى أمكوا محكتلكوش على حاجة

إيمان :

- حكطنا حاجات كتير وكنا مصدقنها لكن لما عشنا معاكوا وشوفناكوا مبقناش متأكدين من أى حاجة

حسين:

- قالتكوا آيه يا بنتى

ايمان:

- يا عمى من فضلك أنا لو كنت واثقة أن اللى اعرفه صح مكنتش جيت النهاردة .. أنا زى ما يكون كان بيتحكلى على ناس تانية غيركوا .. من فضلك يا عمى ريحنى ولعلم حضرتك مريم عارفة أنى جيايالكم النهاردة لأن هى كمان عاوزة تعرف الحقيقة ومرضتش أقول لإيهاب لآنى لو قتلته كان هيصمم يجى معايا وأنا عارفة إيهاب حمقى ومش هيستحمل كلمة على ماما وأنا لسه مش عارفة الماضى كان شكله آيه

أوما إبراهيم برأسه موافقا لها وقال:

- عين العقل يابنتى

تنهد حسين تنهيدة قوية وهو يقول:

- أنا كنت عارف أن مسيركم تسألوا.. وكنت خايف من اللحظة دى

ثم نظر إلى إبراهيم وكأنه يستشير ماذا يقول وماذا يخفى فقرر إبراهيم أن يرفع عنه الحرج فبدأ بالحديث قائلا:

- شوفى يا بنتى ...

قاطعته حسين قائلا :

- أستنى يا إبراهيم .. قبل أى كلام لازم نبعث نجيب كل الدفاتر والمستندات علشان يبقى الكلام بالدليل

أجرى حسين اتصالاً بالموظف المسؤول عن حسابات الشركة ، بعد دقائق قليلة أتى الموظف بالمستندات المطلوبة ووضعها على الطاولة أمام إيمان كما أمره الحاج حسين وانصرف

أشار لها حسين قائلا:

- دى كل المستندات ومتأرخه .. بصى على التواريخ وراجعى الحسابات وده العقد اللى أبوكى الله يرحمه مضاه بأنه أخذ كل فلوسه وعمل تخارج من الشركة لما كانت لسه صغيرة وأخذ نصيبه منها كله.. وده أعلام الوراثة بتاع أملاك جدك الله يرحمه علشان ينورك أكثر..

خدى كل دول معاكى وأعرضيهم على أى محاسب ومحامى تتقى فيه وساعتها هتعرفى الحقيقة

أردف إبراهيم متابعاً:

- مفيش غير حاجة واحدة بس مش موجودة على ورق ... جدك الله يرحمه اشترى الأرض اللى مبنى عليها دلوقتى البيت الكبير لكن ملحقش هو اللى يبنيه بعدها على طول توفاه الله واكتشفنا أن الأرض خرجت من الميراث لأن جدك كتبها بأسمى انا وحسين قبل ما يموت أكمل حسين:

- وأوعى تفتكرى يا بنتى أن جدك ظالم علشان كتب الأرض بأسمى انا وإبراهيم بس وأبوكى لاء.. جدك ساعتها كان عنده بعد نظر وكان متأكد ان أبوكى هيسحب ورثه كله ومش هيتبقاله حاجة تعيشه وساعتها وصانى قبل ما يموت اننا نبنى البيت ويبقى ده بيت العيلة الكبير ويبقى لآخويا علي الله وولاده نصيب فى البيت بنصيبهم فى الأرض .. يعنى انتوا يابنتى عايشين فى ملككوا مش ضيوف عندنا

كانت إيمان تسمع وكأنها تشاهد فيلم أبيض وأسود وترى المشاهد أمامها فقالت بخفوت:  
- بس الأرض باسم حضرتك وعمى بس يعنى قانونا احنا مالناش حاجة فيها أبترسم حسين قائلًا:

- أديكى قولتى قانونا .. لكن ضميرنا عارف أن جدك كان نيتوا أن الأرض تبقى لينا أحنا الثلاثة وجدك مربينا ومتأكد أننا مش هنخالفه حتى بعد ما يموت ... جدك كان عاوز يجمعنا مع بعض بعد مماته زى ما كان جمعنا فى حياته

قالت إيمان وقد لمعت عينيها بالدموع :

- بس ده مخالف للشرع

أوما حسين برأسه موافقا :

- صح يا بنتى الميراث بالذات لازم يبقى قانونى ومكتوب لأن النفوس والضماير بتتغير

لكن جدك كان ده تفكيره ساعتها علشان يحافظ على الحاجة الوحيدة اللى هتبقى مجمعانا فى بيت واحد ومكان واحد.. وبصراحة هو كان عنده بعد نظر وكلامه اتحقق فعلا .. أبوكى الله



يرحمه أخذ ورثه كله ودخل فى مشاريع بعيد عننا وكلها خسرت ولو كان عارف أنه ليه حق فى الأرض كان باعه هو كمان

توترت إيمان وشعرت أن عقلها غير قادر على فهم كل هذه المفاجآت فى آن واحد:  
- أنا مش فاهمة يا عمى ... ايه اللى يخلى بابا يبعد عنكم كده وياخد ورثه ويشغل لوحده  
تردد حسين فقال ابراهيم:

- أمك هى السبب

وقعت الكلمة على أذنيها ثقيلة رغم أنها كانت تتوقع الكثير فقالت:

- أراى يا عمى أمى هى السبب

حسين :

- ده تاريخ طويل يابنتى ملوش لازمة نفتح فيه دلوقتى ...

ثم أردف :

- ومعلش يابنتى ليا عندك طلب

إيمان:

- أتفضل

قال محذراً:

- مش عاوز حد يعرف دلوقتى بحكاية حقكوا اللى فى الأرض ... أنا هقولهم بنفسى بس  
مستنى الوقت المناسب..

أومأت برأسها موافقة وقالت :

- حاضر يا عمى ... بس حضرتك وعدتني تجاوبنى على أسألتى لكن جاوبتني على سؤال  
الورث والفلوس بس ورفض تجاوبنى على الباقي

وأردفت فى رجاء:

- أرجوك يا عمى ريحنى .. أنا عاوزة أعرف ليه أمى بتكرهكوا أوى كده.. ايه اللي حصل بينكوا زمان ايه اللي يخلى واحدة تطلق تاخد عيالها وتهرب ثم أستدارت له بجسدها كله قائلة:

- يا عمى احنا اتعذبنا أوى .. أحنا عشنا فى بلدنا زى الغرب بنخاف نقول أسمنها بالكامل بنخاف نجيب أسم عيلة جاسر على لسانا ... ماما كانت محسسانا أنكوا لو عرفتوا طريقنا هتقتلونا.. وكانت مفهمانا أن أنتوا السبب فى طلاقها من بابا الله يرحمه وكل ده علشان الورث اللي هو مالوش وجود أصلا .. كنا عايشين مع جوز أم بنكرهه ومكنش لينا مكان تانى نروحه علشان كده أنا وأخواتى مكنش لنا غير بعض .. كنا بنتحاما فى بعض لحد ما ربنا من علينا وأحنا فى ثانوى وجالهم شغل بره ومحدثش فينا رضى يسافر معاهم وقعدنا هنا مع بعض نذاكر ونعتمد على نفسنا ونشتغل كمان علشان مكناش عاوزين قرش من جوز أمنا.. ليه يا عمى أمى تشوفنا كده وتفضل تكرهنا فيكوا وتبعدنا عنكوا إلا اذا كان فى سبب قوى .. فهمنى يا عمى يمكن قلبى يهدى شوية

ثم بدأت فى البكاء وقد عادت إليها آلام السنين والذكريات السيئة، نهض إليها حسين وبدأ فى تهدئتها فأشار له إبراهيم أشاره وكأن يقول دع الأمر لى ، جلس إبراهيم أمامها مباشرة وقال :

- أنا هريحك يابنتى

رفعت إيمان رأسها وقالت برجاء:

- ياريت يا عمى

ابراهيم:

- يابنتى الحكاية قديمة اوى .. من ساعة ما كانت جدتك فى مشاكل بينها وبين اختها سميحة أم أمك لدرجة أنهم قطعوا بعض .. المشاكل دى كانت بتكبر لدرجة أنها وصت أن محدش من ولادها يتجوز بنتها أحلام ..أمك يعنى

لكن بقى أبوكى حبها وصمم يتجوزها بدون رغبة جدك .. جدك ساعتها غضب عليه وقاطعه لانه خالف وصية أمه الله يرحمها

وفضلت العلاقات مقطوعة بين أبوكى وجدك لكن احنا كنا بنسأل عنه وبنعرف أخباره وبعد جدك ما مات دخلنا شركة مع بعض .. أبوكى فضل معنا لحد ما أمك فضلت وراه لحد ما سحب نصيبه من الشركة وكانت بتفهمه اننا بنسرقه ومع الأسف كان بيصدقها من كتر ما كان بيحبها.. بعد ما خد نصيبه ابتدت أمك تدخله فى مشاريع خسرانه وهو ماشى وراها لحد ما خسر كل فلوسه وأبوكى كان مريض من وهو صغير كان عنده مشكله كده فى القلب

طبعا مستحملش الخسارة الكبيرة دى ودخل المستشفى وساعتها أمك مكنتش بتزوره خالص لأننا كنا موجودين دايما معاه .. وهى كانت بتخاف تواجهنا لأنها عارفة أنها السبب وأنها هى اللى وقعت بينا وبينه .. فى الوقت ده أبوكى وصانا عليكموا وأنا لازم نراعيكوا ونضمكوا لحضننا ونربيكوا وسط ولادنا وأحنا عاهدناه على كده.. بعدها أمك راحتله المستشفى وهو قالها بوصيتوا لينا اتخانقت معاه وصممت أنه يطلقها وهو تعبان كده.. أبوكى كان مضايق منها حاسس أنها دمرتله حياته فراح مطلقها.. ومات فى نفس اليوم الله يرحمه .. وأمك خافت أننا ناخدكوا منها هربت وأخذتكوا معاها وضحكت علينا عن طريق البواب وفهمتنا أنها هربت على المطار.. طبعا أحنا عرفنا بعدها أنها كانت حجزه تذاكر فعلا لكن ساعتها اللبخة اللى كنا فيها مخلتناش نتأكد هى ركبت الطائرة فعلا ولا لاء.. وطبعا خدتكوا بعيد عننا وأحنا كل ده بندور عليكموا بره مصر وعن طريق المطار والكشوفات بتاعة المسافرين

قالت ايمان وهى مازالت مشدوهة مما تسمع :

- ايوا بس ماما مسافرتش طيران خالص حتى لما سافرت مع جوزها سافرت برى ابراهيم:

- وهى دى غلطتنا يابنتى أننا كنا بندور فى الاتجاه اللى هى رسمته لينا ومدورناش فى اتجاه تانى لحد ما وفاء بنتى لفتت انتباهنا لأنكم ممكن تكونوا فى مصر من الأساس وان كل ده كان وهم امك عيشتنا فيه.. بس طبعا ده جه متأخر أوى لأن أمك كانت قررت تعرفنا طريقكوا وبعثتلنا الجواب

نظرت ايمان الى عمها حسين فوجدت فى عينيه نظرة امتنان لأخيه ابراهيم، تفرست فى ملامحه جيدا فشعرت أن عمها ابراهيم لم يقل كل الحقيقة، قالت موجهة حديثها إلى حسين :

- عمى ... هى دى كل الحقيقة؟ هو ده كل اللى حصل ؟

نظر لها فى ارتياح قائلاً:

- ايوا يا بنتى عمك قالك كل حاجة

شعرت أنهما لن يبوحا بأكثر مما قالا لها، وتأكدت بأن هناك شىء ما ولكن مع الأسف سكوتهما عنه يؤكد أنه شىء مخجل، نهضت لتتصرف ولكن حسين قال مسرعاً:

- أستنى يا ايمان نسيتى الملفات والورق ده

هزت رأسها نفياً وقالت بابتسامة مكسورة:

- ملهمش لازمة يا عمى أنا مصدقة كل كلمة قلتها

قال بتصميم:

- مفيش حاجة أسمها ملهمش لازمة

وأمسكها من يدها وأدخلها غرفة الاجتماعات الملحقة بمكتبه وقال لإبراهيم:

- لو سمحت يا ابراهيم اتصل بالمحامى والمحاسب وخاليتهم يجوا حالاً

حاولت إيمان أن تذهب ولكنه كان أشد تصميمًا من ذى قبل على أن تجلس مع المحاسب والمحامى ليشرحوا لها الأوراق ويطلعوها على الأمر برمته.

\*\*\*\*

خرجت ايمان من الشركة بين مشاعرهما المتخبطة المختلطة وكأن مشاعرهما ريشه فى مهب الريح ، نعم هى سعيدة بأنها علمت أنها تعيش فى ملك أبيها وليست كضيعة عند أعمامها ونعم قد شعرت بصدق مشاعر الحنان من أعمامها رغم تأكدها أنهما لم يصرحا بكل شىء ونعم قد عرفت حكاية زواج أمها بأبيها وطبيعة هذا الزواج رغم علمها بأنه كان زواج قائم على الطمع من أمها والثقة العمياء المفرطة من أبيها ، رغم علمها أن تلك الحقيقة منقوصة وتفتقد حلقة مهمة لوصلها ولكنها ارتاحت قليلاً ، كانت تود أن تصر على معرفة كل شىء ، كانت تود أن تصرح بشكوكها تجاه والدتها ولكنها تذكرت قول الله تبارك وتعالى "يا أيها الذين آمنوا لا تسألوا عن أشياء إن تبد لكم تسؤكم" فأبت إلا الصمت لأن بصيرتها تؤكد لها أن ما خفى عنها سوف يسوئها كثيراً، سوف تؤجل هذا فيما بعد والزمن كفيل بأن يكشف الكثير.

\*\*\*\*

عادت إلى المنزل ، دخلته ولأول مرة تشعر أنها فى مكانها ، وصعدت إلى عفاف زوجة عمها احتضنتها وقبلتها وعرضت عليها مساعدتها فى الطهى ، وقفت بجوار عفاف فى المطبخ وقالت بشكل عفوى :

- أنتِ عارفة يا طنط أنى كنت عند عمى دلوقتى فى الشركة

أرتفع حاجبى عفاف بدهشة وقالت بابتسامة :

- بجد .. ده تلاقى عمك طار من الفرحة .. ده كان نفسه أوى تزوريه أنتِ بالذات يا إيمان عمك بيقدرك أوى

أبتسمت إيمان فى حب وقالت:

- وأنا كمان بقدره وبحبه جدا ...

ثم أردفت وهى تنظر إلى عفاف:

- وكمان عرفت كل حاجة

ثم تنهدت تنهيدة طويلة وقالت :

- عمى حكاى كل حاجة .. مكنتش أتصور أبدا أن ماما تعمل كده

ظنت عفاف أن إيمان تتحدث عن عبد الرحمن وهند وسبب فسخ الخطبة فقالت بسرعة:

- أوعى تزعلى يا إيمان ..والله عبد الرحمن عارف أنك ملكيش دعوة لا أنتِ ولا أخواتك .. وإن أمك بتتصرف كده من دماغها.. وارجع واقول العيب مش عليها لوحدها العيب على خطيبته اللى كانت عاملة نفسها بتحبه وفى الآخر تطلع بتتجسس وبتنقل لامك الأخبار.. بس عمل خير أنه رمى دبلتها .. وابوه مسكتلوش على اللى عمله معاكى وعرفه غلطه وحسسه بالذنب

تفاجأت إيمان بكلمات عفاف ووقعت عليها كالصاعقة ، إلى هذا الحد أمها بهذا السوء، نعم الآن قد عرفت سر عبوس عبد الرحمن وقسوته ، لماذا أطاحت بها كلماته فى الحديقة، لماذا كان ينظر لها بغضب شديد ، وأخيراً عرفت السبب الحقيقى وراء اهتمام عبد الرحمن برجوعها المنزل مرة أخرى ، ولماذا ذهب إليها عند المدرسة ليعتذر لها ولماذا أرسل لها

الرسالة وجاء هو وأخيه وأعادهم إلى البيت الكبير، ولماذا نظراته كلها أعتذار وأسف ...  
فقط يشعر بالذنب !

جلست مع نفسها طويلاً وشعرت بمدى الألم الذى يعتمل بداخل عبد الرحمن، خطيبته التى يحبها وكان يتصور أنها تحبه تظهر على حقيقتها بهذا الشكل المؤسف ، تنقل أخباره هو وعائلته ولمن ؟ لصالح أمها هى !... يا الله كيف تتحمل ذلك ، كيف تستطيع أن تنظر إليه، كانت تجلس فى الشرفة ورأته يروح ويغدو فى الحديقة ذهاباً وإياباً، نعم هو ألم الفراق، هى لا تستحق ولكن قلبه مازال متعلق بها لا يزال يتذكرها، نظرت فى الكتاب الذى تحمله فوجدت بعض الكلمات وكأنها كتبت له، فتناولت هاتفها وكتبتها فى رسالة وأرسلتها إليه لعلها تداويه ، كان يدور فى الحديقة بلا هدف وفجأة سمع صوت هاتفه معلنا عن رسالة جديدة تناوله وفتحها وقرأ فيها

سيفتح باب إذا سد باب ..... نعم وتهون الأمور الصعاب  
ويتسع الحال من بعد ما ..... تضيق المذاهب فيها الرحاب  
مع العسر يسران هون عليك ..... فلا الهم يجدي ولا الاكتئاب

\*\*\*\*\*

## الفصل الرابع عشر

أستيقظت إيمان صباح يوم الجمعة أكثر راحة عن أيامها السابقة وأسرعت لتوقظ إيهاب ليحلق بصلاة الجمعة ، كالعادة استيقظ وأغتسل وذهب للصلاة ، كانت إيمان قد دخلت غرفة مريم لتوقظها ولكنها لم تجدها بحثت عنها فى جميع الغرف ولكن لا أثر لها إرتدت إسدال

الصلاة وخرجت إلى الشرفة وظلت تبحث عنها بنظرها حتى رأتها تجلس على الأرجوحة الكبيرة في جانب من جوانب الحديقة بالقرب من أحواض الزهور.

كانت مريم يظهر عليها علامات الأسى الواضحة وهي تستعيد ما قصته عليها إيمان ليلة أمس عن مدار بينها وبين أعمامها في الشركة ، هي لا تكذب ما سمعته من إيمان لحظة واحدة فلقد عاشت مع أمها وخبرت ذلك جيداً منها ، وعاشت أيضاً مع أعمامها وتعاملت معهم فترة كافية تجعلها تجيد الحكم عليهم وبمقارنة بسيطة تخسر أمها دائماً ، نعم فالإنسان يستطيع أن يغير فكرة الناس عنه بمعاملته وحسن عشرته أكثر من دفاعه عن نفسه بالكلام .

كانت مريم غارقة في بحر من الأفكار تتصارع في عقلها كالأمواج المتلاطمة لدرجة أنها لم تشعر باقتراب أحدهم منها من الخلف ووضع كفيه على عينيها في صمت ، أختلج قلبها بشدة تصورت أنه يوسف ، لا تعلم لماذا تمنّت هذا مع علمها أن يوسف مستحيل أن يفعل ذلك معها وخصوصاً أن العلاقة بينهما متوترة هذه الأيام ، تحطمت أمنيته على صخرة الواقع عند سماعها صوت وليد وهو يقول بمزاح:

- أنا ميبين

أستدارت فجأة وقالت بغضب :

- لو سمحت متعملش الحركات دي تاني أنا مابحبهاش

وشرعت في النهوض ولكنها تعثرت في الأرجوحة وكادت أن تقع ولكن وليد ساعدها بيديه وأمسكها من ذراعها بقوة ، إعتدلت مريم لتوبخه ولكنها تفاجأت بيوسف يقف خلفه وينظر لها بغضب ويقول لوليد :

- إيه اللي بيحصل ده

لاحظ وليد غضب يوسف مما يرى فقرر أن يستثيره أكثر فقال له غائظاً :

- ولا حاجة إنت عارف ابن عمك دايماً بيجي في الوقت المناسب علشان يلحق العرض الأول

قالت مريم بانفعال :

- عرض إيه ...

ثم تابعت مدافعة عن نفسها:

- أنا كنت هقع

قال وليد بإستفزاز :

- آه طبعا ميضرش أبدا ...

ثم نظر إليهما وقد حقق مراده وقال :

- طب الحق أنا بقى الصلاة ... عن إنكم

حاولت مريم شرح موقفها مرة أخرى وهى ترى علامات الغضب مازالت ترتسم على وجه يوسف قالت :

- أنا كنت قاعدة على المرجيحة وبعدين ..

قاطعها قائلا بغضب:

- مايخصنيش ... أنا اللي عاوز أنبهك ليه .. إنك هنا مش فى الجامعة يعنى لازم تحافظى على شكلك قدام عيلتك ولو أتماديتى مع وليد إنتِ اللي هتبقى الخسرانة الوحيدة فى اللعبة دي .

قالت بنبره تشبه البكاء :

- إيه الكلام اللي بتقوله ده .. هو أنا يعنى باعمل إيه فى الجامعة علشان تقولى كده.. وبعدين هو اللي مسك إيدى لما كنت هقع يعنى أنا ماتماديتش معاه فحاجة خالص

قال بسخرية :

- صح أصل لو واحدة بتصد واحد هيجيله جرأة ويحط إيده على عينيها ويهزر معاها هتفت بلوعة:

- وأنا مالى هو اللي دايمًا بيطلعلى من تحت الأرض وبيتصرف كده وبيغلس عليا من غير سبب

تابع بنفس اللهجة الساخرة :

- من غير سبب ... متأكدة ؟



قالت هاتفة:

- طبعاً متأكدة

رفع حاجبيه وقال بسخرية :

- غريبة أومال يعنى مش بيغلس ليه على إيمان اختك

قالت بحنق شديد:

- معرفش ... وانا مالى ماتسأله هو

هز رأسه بعصبية وقال:

- إنتِ اللى مش عاوزه تعرفى

قاطعهما صوت عمها إبراهيم وهو يلقي التحية من بعيد ويشير ليوسف أن يلحق بالصلاة فتركها وانصرف سريعاً .

\*\*\*\*

كانت إيمان تتابع ما يحدث من شرفتها فنادت على مريم التى نظرت للأعلى فأشارت لها بالصعود .. صعدت مريم إليها قائلة بتسائل :

- خير يا إيمان فى حاجة .

إيمان :

- أنا كنت واقفة وشففت اللى وليد عمله ولاحظت وشك وإنتِ بتكلمى يوسف .. هو قالك حاجة زعلتك ؟ وبعدين يا مريم إنتِ خليتي وليد ياخذ عليكى للدرجة دى ليه ؟

شعرت مريم أن الجميع يتكلم عنها بنفس الطريقة ويتهمها فى تصرفاتها فقالت بانفعال :

- هو فى إيه كلكوا بتتهمونى إنى أنا السبب وأنا اللى باسمحله يضايقتى ويغلس عليا .. انتِ تقوليلى مأخذه عليكى .. ويوسف يقولى إنى بتمادى معاه.. هو انتوا شايفنى إيه بالظبط

مسحت إيمان على شعرها وهدأتها وجلست بجوارها وقالت فى حنان :

- مريم يا حبيبتي انا قلتلك قبل كده الناس مش بتدخل جوانا وتشوف نيتنا إذا كانت طيبة ولا لاء ... الناس بتحكم بالتصرفات الظاهرية لينا .. يعنى مثلاً إنتِ وقفتي قدام فاترينة خمور فى

الشارع .. أى حد معدى هيقول بتتفرج على الخمرة ليه أو نفسها تشتري منها ... لكن انت ممكن تكونى وافقة ترتاحى من مشوار طويل ووقفتى تاخدي نفسك شوية .

لمعت عيون مريم بدموعها وقالت :

- يعنى إيه يا إيمان ... يعنى أنا هيبقى ذنبى إنى وافقة أرتاح .

إبتسمت إيمان وقالت :

- لا يا مريم مش ذنبك أنك بترتاحى .. لكن ذنبك إنك إختارتى المكان الغلط اللى ترتاحى قدامه ... يعنى ماشية مشوار طويل ومستحمله .. كان ممكن تستحملى أكثر وتمشى خطوتين كمان لكن إنت إستقربتى ووقفتى فى حطة ممكن تشبهك وإنت مش حاسة إن الناس هاتحكم عليكى من خلال المكان اللى وقفتى قدامه ...

ثم طبعت قبلة حانية على وجنتها وقالت :

- يعنى إنت كل مشكلتك يا مريم إن نيتك كويسة لكن بتستقربى الغلط وتقولى نيتى خير .

نظرت لها مريم بحنق :

- يعنى مطلوب منى أعمل إيه علشان الناس تعرف إنى كويسة .

إتسعت إبتسامة إيمان وقالت بهدوء :

- قوليلى يا مريم لما بتحبنى تقراي قصة .. إيه أول حاجة بتلفت نظرك ليها

مريم :

- العنوان وبعدين بشوف مضمونها

حصلت إيمان على ما تريد فقالت :

- بالظبط كدة ...

العنوان الأول وبعدين المضمون علشان كدة لازم تخلى عنوانك مضبوط أوى

نظرت لها مريم بعدم فهم :

- يعنى إيه عنوانى

قالت إيمان موضحة وجهة نظرها:

- عنوانك يعنى لبسك ومظهرك الخارجي .. يعنى صحابك اللى ماشية معاهم ومصحباهم ..  
يعنى وقفك ومشيتك وطريقة كلامك وهزارك .. يعنى الأماكن اللى وافقة فيها أو جواها أو  
خارجة منها

قالت مريم بتأفف :

- فاهمة ... تقصدي سلمى مش كدة

قالت إيمان بصبر :

- مش سلمى وبس ... لا.. وكل سلمى ممكن تشبهك وتخلي الناس يفتكروكى زيها .. يابنتى  
الرسول عليه الصلاة والسلام قال : المرء على دين خليله ؛ فلينظر أحدكم من يخال  
يعنى مافيش حاجة إسمها أصاحب واحدة تصرفاتها مش كويسة وانا واثقة من نفسى إنى  
مش هاعمل زيها ... فهمتى ... والدليل على كدة إنك قبل ما تصاحبها كان لبسك جميل  
ومحتشم ولا نسييتى ...

قالت مريم بعناد :

- طيب يا إيمان سيبينى مع نفسى شوية لو سمحتِ أنا مخنوقة دلوقتى

نهضت إيمان واقفة وقالت :

- ماشى هاسيبك بس عاوزاكى تعرفى إن أنا بحبك أوي وإنك أغلى واحدة عندي .. لكن  
ماتنسيش إنك مالكيش حجة أنا روحتك كليتك كتير قبل كدة وشفيت بنات محترمة كتير يعنى  
ماتجيش تقوليلى مش هلاقى أصحاب والكلام بتاع كل مرة ده .

والتفتت إليها وأردفت:

- ماتنسيش تنزلى بعد الصلاة علشان الغدا

زفرت مريم بقوة وقالت :

- مش طايفة أشوف حد ... مش نازلة

ضحكت إيمان وهى تفتح الباب قائلة :

- يبقى إنت لسه معرفتيش عمك لحد دلوقتى

تفاجأت إيمان بقبلة على وجنتها من الخلف إلتفتت إلى وفاء بسعادة وهى تحتضها وتقول :

- وحشتينى يا إيمى

أبتسمت إيمان بسعادة وقالت:

- وإنت كمان والله .. أخبار المذاكرة إيه

وفاء:

- إسكتى ياختى مش أنا اتخانقت مع المعيد بتاعنا

قالت إيمان بتسائل:

- ليه يا وفاء

وفاء:

- عرضت عليه فكرة الرسالة بتاعته إنها تبقى مقارنة بين القانون الوضعي والشرعية

إيمان:

- وبعدين

وفاء:

- ولا قابلين ده طلع معيد فيونكة ولا فاهم أي حاجة فى الشريعة

ضحكت إيمان وقالت :

- وإنت بقى شرحتيه بطريقتك قام كرهها من غير ما يعرفها

نظرت لها وفاء بتعجب وقالت :

- عرفتى منين

تابعت والدتها إعداد الطعام وقالت :

- يابت خاليكى فى مذاكرتك وسيبك من الجنان ده متخليهوش يستقصدك

قالت وفاء بتحدى وهى ترفع السكين :

- أنا وراه والزمن طويل

\*\*\*\*

وفى إحدى المشاهد المتكررة كثيراً ولكنها محببة للنفس إلتف الجميع حول مائدة واحدة كبيرة ، تناولت إيمان طعامها سريعاً وقالت وهى تقوم :

- بعد إذنك يا عمى انا نازلة

الحاج حسين :

- رايحة فين يا بنتى النهاردة الجمعة

إيهاب :

- أكيد عندك مقراًة ...

ثم تابع قائلاً :

- الله ..هو انت مش خدتى الإجازة بتاعتك

أومات برأسها قائلة :

- فعلاً ... بس هاستلم شهادة الإجازة النهاردة

نظرت لها فرحة بتساؤل وقالت :

- يعنى إيه شهادة الإجازة دى يا إيمان

أبتسمت إيمان بخجل وقالت :

- يعنى شهادة معتمدة إنى ختمت القرآن وأقدر أدرسه فى أى مكان

قال الحاج حسين بإعجاب :

- ماشاء الله ربنا يبارك فيكى يابنتى

قالت فرحة فى شغف :

- إحنا لازم نعملك حفلة يا إيمان لازم نحتفل بيكى

قال يوسف وهو يخطف نظرة سريعة إلى مريم :

- آه طبعا لازم نحتفل بيها ياريت كل البنات كدة

أشاحت مريم بوجهها فهى تعلم أن الكلام موجه لها وقالت بخفوت :

- مبروك يا إيمان

قالت إيمان بحياء :

- لا حفلة إيه وبتاع إيه كفاية الكلمتين الحلوين دول.. ده أحسن تشجيع

نظرت وفاء إلى فرحة وقالت لها :

- وأنا معاكى يا فرحة

وتابعت وهى تنظر إلى إيمان :

- إنت تروحي مشوارك ترجعى تلاقى الحفلة جاهزة ومستنياكى وهتلاقى الهدايا نازلة  
عليكى زى المطر

أبتسم عبد الرحمن قائلا :

- ومش أى مطر

\*\*\*\*\*

وفت وفاء بوعدها وقامت مع فرحة بتنظيم الحفلة السريعة ، ذهبت إليهما مريم وإيهاب  
الذى قال ممازحا :

- أنا قولت أساعدكم يعنى بصفتى بفهم فى الديكور ..

ثم تابع :

- على فكرة اللى اختار الركن ده فنان بجد

قالت فرحة فى خجل :

- أنا اللى اخترته .. حلو؟

نظر فى عينيها قائلا :

- إلا حلو .. ده تحفة .. حلو خالص

ضربته مريم على كتفه قائلة :

- إيه يا عم انت أو مال فين دروس غرض البصر اللى كنت بتقولنا عليها

فغض بصره وهو يستغفر وقال :

- طب انا هستناكوا هناك لو احتاجتوا تنقلوا ولا تشيلوا حاجة عرفونى

قالت مريم :

- ماشى يا عم هركليز

ضحكت الفتيات وبدأت كل واحدة تقوم بالعمل المخصص لها ، نظرت مريم إلى فرحة وهى تختلس النظر إلى إيهاب الذى يجلس بعيدا وقد لحق به يوسف ووليد

فاقتربت منها قائلة بجرأة :

- بصراحة الواد يتحب

إحمر وجه فرحة لكلمة مريم وقالت بصوت لا يكاد يسمع :

- قصدك إيه يا مريم

رفعت مريم كتفيها مشاكسة:

- قصدى إيه؟! لا ... ولا حاجة إشتغلى ياختى إشتغلى ربنا يوفقك

عادت إيمان بعد صلاة المغرب فوجدت الحديقة قد أعدت على أكمل وجه ، بعض الزينة البسيطة والورود المنثورة حول طاولتين كبيرتين عليهما بعض أنواع الحلوى المختلفة وبعض المشروبات الملونة تحت المظلة الخارجية الكبيرة التى وضع عليها الأنوار الملونة فكان المنظر رغم بساطته إلا أنه بديع ويحمل معانى الدفء التى افتقدتها منذ زمن

اجتمعت العائلة الكبيرة فى الحديقة حيث قال الحاج حسين :

- لو كانت الحفلة دى بكرة كنت جببتك الهدية اللى تستحقها لكن ملحوقة إن شاء الله

وهنا قال عبد الرحمن بهدوء :

- أنا بقى عندى لإيمان هدية هاتخليها تعيط

قال ايهاب بمزاح :

- طب احتفظ بيها لنفسك

ضحك عبد الرحمن قائلا:

- إستنى بس يا أخى

ثم توجه بالكلام لإيمان قائلاً :

- قوليلى بقى عندك جواز سفر

أجابت إيمان بحيرة :

- لا ... ليه

قال عبد الرحمن :

- طب إالحقى بقى طلعيه بسرعة علشان تلحقى الفوج السياحى

قالت بحيرة أكبر :

- فوج إيه ؟!

قال بود:

- ياستى الفوج اللى طالع بعد عشرين يوم ... إيه مش عاوزه تعملى عمره ولا إيه

نظرت له بامتنان بالغ وقد برقت عينيها بدموع الفرح وكادت أن تبكى ولكنها قاومت دموعها بصعوبة وهى تقول :

- جزاك الله خيرا يا عبد الرحمن بس مفيش داعى تكلف نفسك

تدخل الحاج حسين قائلا :

- تصدق والله فكرة يابنى أنا كمان بقالى فترة نفسى أطلع عمرة



ثم إلتفت إلى زوجته قائلاً:

- ها يا عفاف تيجى معانا

قالت بسرعة ولهفة :

- إلا آجى طبعاً هآجى

- خلاص جهزى جواز السفر من بكرة يا إيمان

ثم أشار إلى إيهاب وقال :

- وانت بقى تاخذ أجازة وتلف معاها على حكاية جواز السفر دى ..عاوزينه يطلع بسرعة  
علشان نلحق نساfer

لم تستطيع إيمان أن تتمالك نفسها أكثر من هذا فانسابت دموعها على وجنتيها وهى تتمتم:

- الحمد لله كان نفسى فيها من زمان...

فقبلتها أختها واحتضنتها وقالت :

- ده عنده حق بقى لما قال هدية هتخاليها تعيط

أقبل الجميع يهنئء إيمان فى بهجة ومن وسطهم انسحبت مريم بهدوء إلى مكان بعيد نسبياً  
ووقفت تتأمل الأبواب الحديدية التى تحيط بالحديقة فى صمت وحزن وهى تشعر أن هذه  
الأبواب القاسية بداخلها تحيط بقلبها وتعتصره فى قسوة، تريد أن تتحرر، تريد أن تقترب  
إلى الله مثل أختها لعلها تنال إحترام الجميع مثلها، ولكن هناك شىء يصدها دائماً لا تعلمه

شعرت أن أحدا يقترب من المكان التى تقف فيه فاستدارت مجفلة فوجدت يوسف يقف خلفها  
قائلاً ببرود :

- بابا ببسأل عليكى وقفة هنا لوحدك ليه

أشاحت بوجهها عنه وقالت :

- حاضر جاية حالا ....

مرت بجواره لتعود أدراجها ولكنه استوقفها بإشارة من يده وقال بهدوء :

- هسألك سؤال وعاوز إجابة بـ آه أو لاء ... ممكن ؟

قالت بضجر:

- إتفضل

يوسف:

- فى حاجة بينك وبين وليد؟

نظرت له باستنكار وقالت :

- لاء طبعا ... وعلشان تتأكد وليد بيقابل سلمى صاحبتى

وضع يديه فى جيبه وركل حصى صغيرة أمامه بخفة وقال ساخرا :

- ده دليل ميشرفكيش على فكرة ... بالعكس

نظرت له بغضب وغيظ شديد ثم تركته ومضت فى طريقها حيث الإجتماع العائلى المبهج تحت مظلة الحديقة.

مضت الأيام سريعاً وإيمان تستعد للسفر لأداء العمرة بصحبة الحاج حسين وزوجته عفاف وكانت المفاجأة أن عبد الرحمن أيضا سيذهب معهم لأداء العمرة فلقد كان يحتاج إلى مثل هذا الجو الروحانى ليخفف عنه ما يشعر به وليتقرب أكثر إلى الله بطاعة مثل هذه تخرجه من حالة الحزن الداخلى الذى يشعر به باستمرار ويخفيه بمزاحه ومداعباته دائما مع الجميع .

\*\*\*

وبعد السفر بعدة أيام جاءت سلمى لزيارة مريم مرة أخرى ولكنها كانت على حريتها فى المنزل أكثر من المرة السابقة فكانت تتحرك بحرية ولكن مريم لم تكن على طبيعتها معها فلقد بدأت تشعر بأن سلمى تسبب لها الكثير من الأذى دون أن تعلم وخصوصا نظرات الغضب التى تراها فى عيون يوسف كلما رآها بصحبتها ، كانت بداخلها تعلم أنه على حق ولكنها كانت تكابر دائما بعناد شديد.

وعندما حان وقت انصراف سلمى وقفت عند باب الشقة وصافحت مريم لتذهب فعرضت عليها مريم أن تهبط معها ولكنها أبت ذلك فتركها مريم وشأنها فهى أصلا لم تكن مرحبة بوجودها معها هذه المرة .

إستقلت سلمى المصعد وبعد أن استقر وخرجت منه وجدت من يجذبها لداخل الشقة الموجودة بالدور الأرضى بجوار المصعد والتي يستخدمونها فى تخزين الأشياء المهمة، إلتفتت لتجده وليد ، حاولت أن تتملص منه بصوت هامس حتى لا يسمعها أحد وهى تنظر حولها وتقول :

- بس يا وليد مينفعش كده سيبنى

ولكنه جذبها إلى الداخل وأغلق الباب بهدوء، وبعد ساعة كانت تعدل من مظهرها وتعيد شعرها إلى هيئته وتقول بدلال وهى تنظر إلى وليد :

- على فكرة بقى انت متوحش .. دى طريقة برضة.. إنت مبتسمعش عن التفاهم أبدا قال وليد بخبث:

- لا مبسمعش .. وبعدين ما احنا متفاهمين أهو .. ولا إيه ؟

إنتهت من تعديل مظهرها وقالت له :

- يالا بقى عاوزه أمشى

كادت أن تفتح باب الشقة ولكنه أوقفها قائلا :

- إستنى هنا لما أشوف حد بره ولا لاء

فتح الباب ببطء ونظر حوله بحذر فلم يجد أحد فأشار لها بالخروج وبمجرد خروجها كان يوسف عائد من الحديقة وفى طريقه إلى المصعد فتفاجأ بها تخرج مع وليد من الشقة وهى تهندم شعرها وهو يلمسها بطريقة معينة بمزاح خاص، بمجرد أن رآته احتقن وجهها وشحب وقالت فى خوف :

- يوسف

لم يستطع يوسف أن يتحمل كل هذه القذارة التى رآها فلم يتمالك نفسه فصفعها على وجهها وطردها من المنزل فأسرعت تركض للخارج، تشاجر مع وليد وهدده أنه سيبلغ والده وعمه عن أفعاله هذه وأنه ينجس المنزل بتلك الأساليب الحقيرة ، رأى وليد فى عيون يوسف أنه سيوفى بتهديده فأراد أن يقطع عليه الطريق فتوجه له قائلا بتحذير :

- إنت لو قلت حاجة يبقى مش هتفضحنى أنا وبس ... لا ده انت كمان هتفضح بنت عمك  
أمسكه يوسف من ملابسه بغضب قائلا :

- تقصد إيه ؟

نظر له وليد نظرة الواصل قائلا :

- أقصد إن سلمى مش أول واحدة تدخل الشقة دى يا يوسف وخلينى ساكت أحسن  
ثم تابع بانفعال زائف:

- يعنى انت تسكت أنا هدارى على شمعتها وأسكت لكن لو عملتلى فيها بطل ونضيف يبقى  
عليا وعلى أعدائى وهفضحها قدام العيلة كلها وانت عارف بقى أنا فى الأول والآخر راجل  
ومفيش عليا لوم بالكثير هاخدلى كلمتين وخلص ...

ثم دفع يدى يوسف بحدة وتركه وصعد فى سرعة إلى شقته ، وقف يوسف غاضبا حائرا لا  
يدري ماذا يفعل ؟ هل وليد صادق أم كاذب ؟ ألم تخبره مريم أنه ليس بينهما أي علاقة !!!  
ماذا يفعل !! كاد أن يصعد إليها ويجذبها من شعرها ويسألها عن الحقيقة ولكن خاف من  
الفضيحة ... ومن إيهاب

قضى ليلته فى الحديقة لم يذق طعم النوم وكلمات وليد تتردد فى عقله، يريد أن يبرىء مريم  
بأي شكل ولكن المشاهد المخزية التى رآها فيها تتصرف بأسلوب لا يليق بفتاة محترمة  
تتوالى أمام عينيه تمنعه من ذلك ، تغلي دماؤه فى عروقه ..غيرة على ابنة عمه ، وفي  
نفس الوقت لا يستطيع أن يلتمس لها عذرا، كل الشواهد ضدها ... من وجهة نظره!، لقد  
نجح وليد فى زرع بذور الشك فى أعماق قلبه ، قطع أحبال أفكاره آذان الفجر يطرق  
مسامعه، فانتبه من جلسته ثم قام لأداء الصلاة لعله يرتاح مما يجيش به صدره، وبعد أن  
أدى الصلاة .. خرج منها بقرار حاسم .. قرر أن ينتظر والده حتى يعود من أداء العمرة ثم  
يخبره بما رآه وسمعه من وليد، نعم ... لا يوجد حل آخر .

\*\*\*

## الفصل الخامس عشر

توجهت مريم فى الصباح الباكر وقبل ميعاد ذهابها إلى الجامعة إلى الحديقة لفتح رشاشات المياه الأتوماتيكية التى ترش المسطحات الخضراء فى الحديقة ، وقفت تنظر إليها وتتأمل المياه المتصاعدة فاقتربت منها حتى تصلها بعض رزازها المنعش ، شعرت بنشوة طفولية فاقتربت أكثر من الرزاز ، ثاثرت قطرات المياه على وجهها وابتلت ملابسها وكأنها تقف تحت قطرات مطر خفيف ، مما جعل وليد يغير طريقه وهو ذاهب إلى الجراج الخاص بهم ويقترب منها وهو ينظر إلى جسدها الواضحة معالمه من بعد أن التصقت به ملابسها على أثر المياه فى تفحص وبنظرة ذات مغزى قال لها:

- صباح الخير ..أيه الروقان ده كله

ألتفتت إليه قائلة:

- صباح الخير يا وليد

تصنع وليد الجدية قائلا:

- مريم.. انا كنت عاوز اقولك حاجة ونفسى متكسفنيش

مريم:

- خير يا وليد

قال باهتمام مصطنع :

- انا كنت عاوز أتأسفلك على أى حاجة ضايقتك فى تصرفاتى ... حقيقى انا بعاملك زى وفاء بالظبط علشان كده يمكن بتعامل بعشم شوية.. وده اللى بيضايقك منى لكن اوعدك معاملتى هتتغير

أومات مريم برأسها وهى تقول:

- خلاص يا وليد وانت برضة أبن عمى وزى اخويا

قال وليد بابتسامة خفيفة:

- يعنى خلاص مش زعلانه مني؟

ابتسمت مريم قائلة:

- خلاص مش زعلانه

حاول أن يتكلم ببراعة وهو يقول:

- لا يا ستى الأبتسامة دى متنفعش .. انتِ كده لسه زعلانه

ابتسمت مريم بشكل أوضح وهى تقول :

- خلاص والله مفيش حاجة

وليد:

- لا برضه متنفعش .. انتِ بتخمينى

ضحكت مريم لطريقته الطفولية ضحكة عالية واستجابت لكف وليد المدود لها فضربت كفها بكفه بخفة فقال :

- خلاص أنا كده أتأكدت أنك مش زعلانه .. يالا بقى سلام احسن هتأخر على الشغل

ابتسمت وهى تشير له بالتحية وهو يبادلها الإشارة ثم أطبق كفّه وهو يضعه على أذنه إشارة إلى أنه سينتظر منها مكالمته ، كانت تفعل ذلك لظنها أن وليد يعتذر فعلا عن أفعاله معها ويريد أن يفتح معها صفحة جديدة ولكنها لم تكن تعلم أن وليد يعرف أن يوسف فى طريقه للحديقة هو الآخر وكان يريد أن يجعله يرى هذا الموقف وكيف هما منسجمان فى المزاح والمداعبة كما لم تلاحظ مريم أن كثرة رزاز المياة جعل ملابسها تلتصق بجسدها لتبرز معالمه ونسيت مريم كلمات إيمان عندما قالت لها "انتِ بتختارى المكان الغلط واللى بيحبك شبهه وبتقفى فيه"

شاهد يوسف ما حدث كما أراد وليد تماما ، رآها تبتسم وتضحك وتداعبه بضرب كفها بكفه وتشير إليه بالسلام وهو يرحل ويقول لها بالأشارة بأنه سينتظر منها مكالمته ، وكل هذا وهى لا تخجل من شكلها وهى تقف أمامه هكذا بمعالم جسدها الواضحة ، صرف وجهه عنها فى غضب وانصرف إلى عمله

\*\*\*

كان يوسف يجلس فى مكتب أبيه يقوم بأعماله إلى حين عودته حين دخل عليه وليد يرسم على وجهه علامات الإعتذار، نظر له يوسف بغضب ثم تابع عمله وكأنه لم يره ، جلس وليد أمامه قائلا:

- جرى أيه يا صاحبى هتفضل مخاصمنى كده ومتكلمنيش أول مره يحصل بينا كده  
قال يوسف دون أن ينظر إليه:

- علشان أول مرة أعرف أنك كده يا وليد ... انا مش عارف انت ابن عمى ازاي  
تصنع وليد الخجل قائلا:

- معاك حق يا يوسف انا فعلا غلظت جامد وجاى اعتذرك  
قال يوسف بجمود:

- لا وفر اعتذارك لما عمك وابوك يعرفوا.. ساعتها هتعتذر كثير أوى  
قال وليد وهو يضغط أحد أزرار هاتفه النقال فى راحته فى الخفاء :  
- خلاص براحتك يا يوسف لو ده هيرحك من ناحيتى...

رن هاتف وليد فقام للرد على الفور وهو يخرج من مكتب يوسف ببطء شديد قائلا:

- أيوا يا حبيبتي أنا جاى أهو .. كله تمام ؟ .. نص ساعة هكون عندك .. لا لا مينفعش لو  
مش دلوقتى يبقى مش هينفع النهاردة خالص

خرج وليد من مكتب يوسف وقد حقق مراده بهذه المكالمة المزيفة ، بالفعل شك يوسف فى الأمر فالمسافة بين الشركة والبيت نصف ساعة تماما، كان من الممكن أن يفكر يوسف بشكل مختلف أو كان من الممكن أن لا يفكر بالأمر أبدا، فوليد علاقاته متعددة ولكن وليد غير معتاد على ترك الشركة فى هذا الوقت المزدحم بالعمل لأى ميعاد مهما كان ، وقد ربط

ذلك بآخر جملة قالها وهو يخرج من المكتب وبين أشارته لها فى الصباح بأنه ينتظر منها مكاملة.

تناول الهاتف واتصل على الخادمة التى أتت بها والدته للطبخ لحين عودتها من العمرة وسألها كأنه يسأل عن أهل البيت بشكل طبيعى :

- فرحة رجعت من كليتها؟

- ايوا يا فندم .. اتغدت ونامت من ساعة

يوسف:

- الأنسه مريم اتغدت معاها؟

- ايوا اتغدت وطلعت شقتها يا فندم

كان يريد أن يتأكد أن مريم فى المنزل، وهل هى وحدها فى شقتها أم مع فرحة، ظل يطرق بالقلم على سطح المكتب فى توتر وهو يتخيل وليد وهو يذلف إلى شقة مريم بحرص دون أن ينتبه إليه أحد ويتخيلها وهى تغلق الباب وتتلفت حولها لتتأكد انه لا أحد يراهم

زادت طرقاته بعصبية حتى كُسر القلم فى يده ونهض وهو يدفع مقعده بعيدا كاد أن ينطلق خارج المكتب ولكنه تفاجأ بدخول السكرتيرة تخبره بأن هناك عميل ينتظره والمسألة عاجلة أضطر يوسف أن يستقبل العميل، لم يستطع يوسف أن يركز ذهنه مع الرجل فلقد كان مشتتا فى خيالاته، أنهى حديثه مع الرجل بوعده بلقاء آخر ، خرج العميل وخرج يوسف خلفه مباشرة من المكتب كالسهم ومنه إلى الأسفل ، استقل سيارته وانطلق مسرعا عائدا إلى المنزل .

كان وليد يعلم ماذا يفعل جيدا، فلقد كان يوسف صديقه قبل أن تدخل مريم حياتهم ويعلم كيف يثيره وكيف يستفزه وكيف يحركه فى الطريق الذى يريد، وبالفعل خطط لكل شىء لكى يؤكد ليوسف أن هناك علاقة حقيقية بينه وبين مريم، كان يعلم أن هناك شىء ينبت فى قلب يوسف تجاه مريم فأراد وئده فى المهد ، فلقد تشرب الكره الشديد لأولاد عمه علي من أمه فاطمة كما أنه يعلم أن يوسف لن يفصح ابنت عمه وبالتالي لن يفصح علاقته بسلمى

أقرب يوسف من جراج البيت الكبير، وتأكدت ظنونه عندما رأى سيارة وليد ، ترك يوسف سيارته بعيدا حتى لا يراها وليد عند عودته ودخل إلى الباب الخلفى للحديقة ومنه إلى الدرج



المؤدى إلى الطابق الثالث حيث شقة مريم، ولكنه تفاجأ بهبوط المصعد منه إلى الطابق الأرضى، عاد يوسف أدراجه بهدوء على الدرج ووقف على آخر سلمتين فى الطابق الأرضى بجوار المصعد، خرج وليد من المصعد وهو يطلق صفيراً من بين شفتيه بطريقة منغمة تدل على الأنسجام الشديد، خرج وليد الذى كان يعلم أن يوسف يتابعه، فهو قد أعد كل شىء بدقة، فبمجرد أن رأى سيارة يوسف تقترب أسرع إلى المصعد واستقله إلى الطابق الثالث وانتظر قليلاً ثم استقله مرة أخرى عائداً إلى الدور الأرضى.

خرج وليد من المصعد واتجه إلى الجراج مرة أخرى واستقل سيارته وهو مبتسماً ابتسامة عريضة وعاد إلى الشركة مرة أخرى.

الشك أصبح يقين فى قلب يوسف، تأكد من وجود علاقة آثمة بينهما، تأكد أنها ليست فقط فتاة تتصرف بطريقة غير لائقة، لا أنها تعدت كل الحدود... أشتعلت نار الغيرة فى قلبه أكثر وأكثر، الآن تأكد بأنه يغار عليها ولكن هى لاتستحق سوى السحق بالأقدام.

\*\*\*\*

تعلن الخطوط الجوية السعودية عن أقلاع رحلتها رقم .... المتوجهة إلى جمهورية مصر العربية، نرجو من جميع الركاب ربط الأحزمة والأمتناع عن التدخين.. شكراً نظرت إيمان إلى عفاف التى تجلس بجوارها بابتسامة وهى تقول لها:

- الحمد لله عرفت أربطه لوحدى

ضحكت عفاف وهى تقول:

- كده أحسن برضه .. بدل ما نحتاس زى المرة اللى فاتت

أبتسمت إيمان قائلة :

- ها حفظتى دعاء الركوب

عفاف:

- ايوا حفظته أسكتى بقى لما اقوله متلخبطينش

نظر الحاج حسين إلى عبد الرحمن الذى يجلس على المقعد بجواره قائلا بابتسامة:

- عمره مقبوله يابنى ان شاء الله

قبل عبد الرحمن يده وقال:

- ربنا يتقبل يا حاج وميحرمناش منك ابدًا

صمت الحاج حسين قليلا ثم التفت إلى عبد الرحمن وقال بصوت خفيض وبنبرة جدية:

- بقولك أياه يا عبد الرحمن أنت مش ناوى بقى تفرحنا بيك ولا أياه

أبتسم عبد الرحمن بحزن قائلا:

- إن شاء الله يا بابا.. أدعيلى أنت بس ربنا يرزقنى ببنت الحلال

أقترب منه وهمس وهو يشير إلى المقعد الخلفى:

- طب ماهى بنت الحلال موجودة أهى

التفت عبد الرحمن للخلف ثم نظر إلى أبيه باستنكار وقال:

- حضرتك بتتكلم جد

نظر له والده يتفرس فى وجهه يحاول أن يقرأ انفعالاته وقال:

- طبعا بتكلم جد وجد الجد كمان ..لو فيها عيب طلعهولى

أرتبك عبد الرحمن وقال:

- مش مسألة فيها عيب يا بابا.. بس... بس انا بحس انها عندى زى فرحة كده.. مش أكثر

- ده بس علشان مفيش بينكم معاملة.. لكن لما تبقى خطيبتك المسافة بينكم هتقرب أكثر

قال عبد الرحمن باعتراض:

- خطيبتى أياه بس.. انا يا بابا مبفكرش فى الموضوع ده خالص دلوقتى

شرد حسين وقال بخفوت:

- أول مرة تعارضنى يا عبد الرحمن

قال عبد الرحمن مسرعاً :

- أعود بالله أنا مقدرش اعارضك يا بابا بس ده جواز وحياء يعنى مينفعش أتجوز واحدة بحبها زى أختي

قال والده بحزن:

- أول مرة تاخذ قرار من غير تفكير يا عبد الرحمن .. انت شكلك كده لسه قلبك مشغول باللى خانتك

أعصر كلام أبيه قلبه فقال بألم:

- لا يا بابا حضرتك فهمتني غلط أنا مبفكرش فيها خالص بالعكس

قال حسين متسائلاً:

- أومال ليه رفضت من غير تفكير بنت زى دى .. مؤدبة ومحترمة ومتدينة وبنت عمك يعنى دمك ولحمك

شعر عبد الرحمن أن أباه يكاد يكون يحاصره ويضغط عليه فقال محاولاً التخلص من هذا المأزق:

- خلاص يا بابا أوعدك هفكر فى الموضوع ده وأرد على حضرتك قريب

مال حسين بجسده قليلاً تجاهه قائلاً بخفوت:

- أسمع يا عبد الرحمن انا عمرى ما ضغطت عليك فحاجة.. لكن اعرف يابنى ان الموضوع ده مهم عندى فوق ما تتصور.. قدامك يومين وترد عليا علشان افتح البنت فى الموضوع

كاد أن يفعل من وقع كلمات أبيه ولكنه تذكر أنها وأمه يجلسان خلفهما فحاول ضبط أعصابه وأخفض صوته قائلاً:

- بس حضرتك يا بابا نسيت أنا سبت هند ليه.. لو اللى حضرتك عاوزه ده حصل يبقى كده هنفذ لامها اللى هى عايزاه

أبتسم حسين قائلاً:

- ومين قالك انى مش هنفذها اللى هى عايزاه

قال عبد الرحمن بتعجب:

- أول مرة مفهمش حضرتك بتفكر ازاي

أبتسم والده فى هدوء وثقة قائلا:

- شوف يابنى.. أنا وأحلام واقفين على أول طريق .. والطريق ده آخره اتجاهين.. أنا عاوز  
آخر الطريق أحوذ يمين وهى عاوزة تحوذ شمال.. يعنى أنا وهى لازم نمشى فى الطريق  
نفسه مع بعض لكن العبرة فى آخر الطريق يابنى فهمتني

عبد الرحمن:

- طب هى عارفة هى عاوزة أيه.. عاوزة فلوسنا وخلاص .. لكن حضرتك بقى عاوزنى  
اتجوزها ليه؟

حسين :

- كان لازم تعرف من ساعة ما كنت بدور عليهم يابنى.. أنا مستغرب من سؤالك ده ... ياما  
قلتلك وأنا بدور عليهم انى عاوز ألم لحمنا اللى مرات اخويا خادته وهربت .. وان عمك  
موصينى بكده قبل ما يموت .. أومال انت فاكر يعنى أيه معنى ان اخويا يقولى وهو بيطلع فى  
الروح "خد عيالى فى حضنك يا حسين " لو كنت عرفت معنى الجملة دى مكنتش سألتني  
السؤال ده يا عبد الرحمن

شعر عبد الرحمن بالخرج من والده بشدة وهو يقول:

- طب ليه حضرتك معرضتش الموضوع ده على يوسف اشمعنى انا

أبتسم مرة أخرى قائلا:

- علشان مينفعش أعرض عليه واحدة هو بيحب اختها

تفاجأ عبد الرحمن بكلمات أبيه وقال باندهاش:

- يوسف بيحب ...لالا مش معقول هما الاتنين غير بعض خالص يا بابا

قال والده بثقة:

- معاك حق.. انا كمان مستغرب بس انت عارف أبوك مبيقولش حاجة غير لما يكون متأكد منها

ثم أردف قائلاً بجدية:

- قدامك يومين تفكر وترد عليا .. اتفقنا

زفر عبد الرحمن بحلق وهو يشيح بوجهه بعيداً قائلاً بضيق :

- حاضر

\*\*\*

## الفصل السادس عشر

جعل إيهاب الحديقة فى أبهى صورة لاستقبال أخته وعمه وزوجة عمه بمساعدة فرحة ومريم ووفاء بشكل بسيط بعيداً عن التكلف بما يليق بالمناسبة فجعل من فروع الشجر الرفيعة على بوابة الحديقة بشكل متقابل بحيث تصبح كالسهم يتدلى منه بعض أضواء الزينة البسيطة وكذلك غطى عليه المظلة الداخلية بأوراق الشجر والورود البيضاء

عاونته فرحة برسم بعض الزخارف الإسلامية على أطباق الحلوى المصنوعة من الخوص واستخدام بعض الزهور الجافة ، كانا يشعان بمتعة حقيقية أثناء عملهما فى الحديقة لم تخلو هذه المتعة من بعض المنغصات التى تسببت بها وفاء ومريم بسبب تخبطهم فى الألوان وأختلافهم فيها، وأثناء عراكم كفتيات صغيرات لمحت وفاء يوسف ووالدها يخرجان من المنزل ويتوجهان للخارج فاستوقفتهما بنداآتها المتكررة وهى تتجه إليهما بخطوات واسعة ، وقفت أمامهما تسألهما أن يأخذوها معهما لاستقبالهم فى المطار ولكن والدها رفض قائلاً:

- خليكى يا وفاء.. العربية يدوب ده حتى أنا مش هروح معاه.. كانت مريم قد لحقت بها فقالت هى الأخرى:

- عاوزة أروح معاكم

وهنا هتف يوسف بحدة:

- تيجي معانا فين.. أنتِ عاوزة تنتططي في أى حطة وخلص

أضاعت عيناها بدموعها وقفزت على الفور إلى وجنتيها تعلن غضبها من نفوره الدائم منها بلا سبب تفهمه، رمقه عمه بنظرة صارمة قائلا:

- بتكلمها كده ليه يا يوسف هي قالت حاجة غريبة يعني...مش كده يا يابنى

يوسف :

- انا آسف يا عمى عن اذنك علشان كده يدوب ألحق معاد الطيارة

أستدارت مريم وتراجعت خطوات بطيئة وهي تضع يديها على فمها وتبكي بمرارة ، لحقت بها وفاء وأخذتها بعيداً حتى لا يراها إيهاب على حالتها هذه وحاولت أن تخفف عنها :

- متزعليش يا مريم.. هو يوسف كده بيطلع فجأة زى القطر

بكت مريم بحرارة وهي تقول:

- انا مش عارفة بيعاملنى كده ليه ..من ساعة ما شافنى وهو واخد مني موقف حتى لما تحصل حاجة بالغلط يفكرها حاجة وحشة أو انا قصداها

قالت وفاء مستفهمة :

- حاجة وحشة ازاي يعنى؟

تابعت مريم قائلة:

- أى حاجة تتخيلها.. أقع يقوم وليد يمسك أيدى فيفكرنى موافقة انه يمسكنى كده.. يشوف

واحدة صاحبتى بتعمل حاجة غلط يقوم يفكرنى موافقة على تصرفاتها.. وكل مرة أحاول

اثبتله أنى مبعملش حاجة غلط ميدنيش فرصة ويسيبنى ويمشى.. وبعد كل ده يهزأنى قدامك

انتِ وعمى ويشخط فيا ... انتِ متعرفيش البهذلة اللى كنت بشوفها وانا بشتغل معاه

صممت وفاء فى تفكير ثم قالت:

- وانتِ بتفسرى التصرفات دى بأيه؟

أشاحت بيدها قائلة بحق :

- مش طايقتى طبعاً.. ومش عارفة ليه ..انا عملتله أيه علشان يعاملنى كده

قالت وفاء وهى تمط شفتيها :

- يا عينى يا يوسف ..هو انت وقعت ولا الهوا اللى رماك

رفعت مريم رأسها بعينين دامعتين قائلة:

- تقصدى ايه؟

ضحكت وفاء بصخب وقالت:

- وأنتِ كمان يا مسكينة ..الله يرحمكم ويحسن إليكم

حاولت مريم جاهدة مقاطعة ضحكات وفاء وهى تهتف بها:

- بطلى ضحك وفاهمينى قصدك ايه

قامت وفاء من مكانها وجلست قريباً من مريم وقالت بخفوت :

- قصدى أنه بيحبك يا عبيطة وبيغير عليكى

تحجرت عيني مريم وهى تنظر إلى وفاء بعدم تصديق ، فأومأت لها وفاء برأسها مؤكدة وهى تقول:

- وانتِ كمان بتحبيه

نهضت مريم وكأنها لدغت وهى تصيح فى وفاء:

- أنتِ شكلك اتهللى يا بت أنتِ والقضايا اللى بتذاكريها لحست مخك

ثم انصرفت وهى تتابعها ضحكات وفاء المتواصلة فى شغف وقلبها يرتجف مع ارتجافة ابتسامة شاحبة غير مصدقة على شفتيها.

\*\*\*\*

وبعد ثلاث ساعات كان الجميع يتجهز ويتم وضع اللمسات الأخيرة على ديكور الحديقة الجديد حتى سمعوا صوت أبواق سيارة يوسف تنطلق متتالية وكأنه فى زفاف ، ذهب الجميع إلى بوابة الحديقة فى سعادة وقد كانت سعادة مريم لا توصف حينما رأت اختها إيمان تهبط من السيارة وقد زاد نور وجهها أكثر وأكثر، وزاد جمالها دون وضع أى من أدوات الزينة عليه ، نعم إنه نور الطاعة يزداد بها، أسرعت إليها بخطوات قريبة إلى العدو ولم تنتظر إيمان حتى يستطيع يوسف أن يدخل بالسيارة بشكل كامل، خرجت مسرعة إلى اختها التى تعدو إليها وسكنت مريم فى حضن أختها وكأنها أمها عادت إليها بعد غياب ، مسحت إيمان على رأس مريم وهى تنظر إلى إيهاب بشوق كبير، أقبل عليها إيهاب وحاول انتزاعها من مريم ولكنه لم يستطع ، كانت متشبثة بها بقوة فاضطر لاحتضانها معا وقبل رأس أخته بحنان وشوق بالغ وهو يقول بابتسامة عذبة:

- وحشتينا يا حجة .. خلاص بقيتى حجة رسمى ها

ضحكت ايمان ضحكة أشرق بها وجهها فزاده بهاء وقالت:

- لا برده لسه مش رسمى أوى.. دى عمره مش حج

قضى وقت طويل فى العناق والتحيات والسلام بينهم جميعا ودخل الجميع إلى مكانهم المفضل تحت المظلة ولكنها كانت مختلفة بديكورات إيهاب وفرحة، ظلت تنظر إيمان حولها بتعجب وتقول لإيهاب:

- طبعا انت صاحب الأفكار البديعة دى

أشار إيهاب إلى فرحة قائلا وهو يغمز لها:

- مش لوحدى

لم تفارق مريم إيمان ، ظلت ممسكة بيدها وهما جالسين فى الحديقة كأنها تقول لها أحتاجك بشدة وأفتقدك ، نهضت أم وليد تصيح فى الخادمة :

- يالا يا بت هاتى الأكل بسرعة

قالت عفاف بطيبة:

- طب ما نطلع فوق احسن.. بدل ما البنت تقعد طالعه نازله تجيب فى الأكل

قالت وفاء على الفور :



- لا يا طنط احنا عاملين حفلة باربكيو كلوا مشويات

ثم أشارت إلى مريم وهى تقول:

- يالا يا مريم نساعد البنت الغلابة دى

منعتها أمها وقالت:

- تساعديها ليه.. هى بتاخذ شوية.. دى بتاخذ على قلبها قد كده

تحدثت إيمان قائلة بهدوء:

- وفيها أيه يا طنط.. الرسول عليه الصلاة والسلام لما كان بيجيله ضيف كان بيخدمه بنفسه

رمقتها فاطمة بنظرة جانبية وهى تقول :

- عليه الصلاة والسلام ياختى

عانقها أخاها مرة أخرى وهو يقول:

- وحشنا كلامك والله يا إيمان

بعد الانتهاء من تناول الطعام قالت وفاء موجهة حديثها لإيمان:

- قوليلى بقى يا إيمان لما روحتوا المدينة المنورة ووقفتى قدام قبر النبى عليه الصلاة والسلام حسيتى بأيه؟

أشرق وجهها وهى تقول بعيون لامعة:

- ياه يا وفاء مقدرش أوصفك أحساسى أبدا.. حسيت بسكينة وراحة فى قلبى.. وخصوصا وانا بقول السلام عليك يا رسول الله.. قلبى ارتجف كأنى واقفة قدامه عليه الصلاة والسلام

ثم تابعت وكأنها انتبهت لشيء وقالت:

- بس تعرفى يا وفاء حجرة النبى اللى كان عايش فيها وادفن فيها كانت صغيرة أوى.. يمكن

المظلة دى أكبر منها فى الحجم.. مع أن النبى أكرم خلق الله على الله وحبیب الرحمن

ورغم كده كان بيته بالحجم ده وبالتواضع ده.. واحنا بيوتنا كبيرة أوضتين وتلاتة ويمكن

اكثر ورغم كده نقعد نشتكى ضيق الحال وضيق الرزق واللى ساكنة فى شقة عاوزة فيلا

واللى عندها فيلا عاوزة قصر.. سبحان الله

نظر حسين إلى عبد الرحمن نظرة ذات معنى وكأنه يقول له "شوفت بقى انا اخترتك ايه "

\*\*\*\*

جلست مريم مع إيهاب فى غرفة المعيشة بجوار إيمان فى شقتهم وهى تحكى لهم تفاصيل رحلتها الروحانية الجميلة وهما يستمعان فى انتباه والأبتسامة مرسومة على شفثيها إلى أن قال إيهاب:

- الله يا إيمان.. شوقتينى اروح عمره .. إن شاء الله اروح قريب أول ما اخلص تشطيب العمارة اللى عمى ادانى شغلها ويبقى معايا مبلغ محترم هسافر على طول  
قالت مريم:

- ده مبلغ يابنى يطلعك حج مش عمره انت والعيلة كلها  
رمقته إيمان بنظرة متفحصة وهى تقول:

- طب أيه رأيك طالما المبلغ حلو كده قبل ما تطلع العمرة تخطب فرحة

أبتسمت مريم وهى تنظر إلى إيهاب الذى ابتسم بدوره ولكن ظهرت عليه علامات الحيرة وهو يقول لها:

- تفتكرى يا إيمان ..تفتكرى عمى يوافق؟

ثم نهض مترددا وقال:

- وبعدين هى نفسها ممكن متوافقش

قالت إيمان بثقة :

- انا متأكدة انها هتوافق

لمعت عيناه بشغف قائلا:

- وعرفتى ازاي هى قالتلك حاجة ؟

أشارت له بأصبعها نافية وقالت بابتسامة مداعبة:

- لا طبعا هى دى حاجة تتقال.. انا اللى عندى الحاسة السادسة والسابعة والعشرة كمان

صمت مفكراً إلى أن قال ببطء :

- تفتكرى كده.. يعنى أتوكل على الله وأكلم عمى .. بس لو قالى هتعيشها فين اقوله ايه.. فى بيتك ...لا مينفعش استنوا لما يبقى معايا مبلغ تانى اجيب بيه شقة بره تليق بيها

صاحت مريم بمرح:

- ليه بس يا هوبه .. انت ناسى الاعتراف اللى عمامى قالوا لإيمان.. اننا لينا نصيب فى البيت هنا .. يعنى الشقة اللى هتجوز فيها بتاعتك من ورث بابا الله يرحمه يعنى ملكك

قالت ايمان مؤكدة:

- أنا مع مريم يا إيهاب وعلى فكرة عمى عاوز يكتبلنا نصيبنا بيع وشرا بس مش عاوز ماما تعرف حاجة زى كده

ثم نظرت لمريم موجهة الحديث إليها:

- سامعانى يا مريم

مريم:

- انا وعدتك يا إيمان خلاص

تابعت ايمان وهى تنتظر لإيهاب :

- وافق يا إيهاب علشان خاطرى .. أنا نفسى تتجوز بقى وكمان هتسكن معانا فى نفس الدور فى الشقة اللى قدامنا على طول يالا توكل على الله واستخير ربنا

أوما إيهاب برأسه موافقا وقال بسعادة غامرة:

- طول عمرك بتفتحلى الأبواب يا ايمان وبتحفزىنى دايما

\*\*\*

مضى اليومان المهلة التى طلبها عبد الرحمن من أبيه ليفكر فيهما فى موضوع زواجه من إيمان، كان يجلس فى مقعده الخاص فى شرفته المظلة على الحديقة شاردا حتى أتاه صوت أخته تناديه... ألتفت إليها قائلاً:

- ايوا يا فرحة فى حاجة؟

قالت فرحة تداعبه :

- أيوا يا رومانسى.. بابا عاوزك فى أوضة المكتب حالاً بالاً

قال عبد الرحمن وهو ينهض :

- طب روحى انتِ يا غلباوية

دخل عبد الرحمن غرفة والده بعد أن طرق الباب وأغلقه خلفه وهو يقول:

- السلام عليكم ..حضرتك بعثلى يا بابا

أشار له والده أن يجلس وهو يقول:

- اقعد يا عبد الرحمن ...

- ثم تابع:

- أيه يعنى مردتش عليا اليومين عدوا

قال بعدم فهم:

- أرد على أيه؟

رمقه والده بنظرة صارمة وقال:

- وانا اللي قلت انك بتستخير ربنا.. أتاريك الموضوع مش فى دماغك أصلاً

تذكر عبد الرحمن الحديث الذى دار بينهما على متن الطائرة ، بالفعل لقد نسيه لا لعدم أهميته ولكن لعلمه أن والده مُصر على هذه الزيجة وفى كل الأحوال سوف يضطر للموافقة انتزعه والده من بين أفكاره قائلاً:

- يعنى مردتش

عبد الرحمن:

- بابا هو حضرتك لسه مصمم على الموضوع ده؟

قال حسين بإصرار:

- أنت شايف أيه؟

أجاب عبد الرحمن باستسلام:

- خلاص يا بابا حضرتك اعمل اللي شايفه صح

تنهد حسين وهو ينظر لولده يحاول أن يستشف ما بداخله فى صمت ثم قال بهدوء :

- يابنى انت عارف قيمتك عندى كويس .. وانا مش عايز اجبرك على حاجة وكمان إيمان زى بنتى ومرضاش أبدا انها تجوز واحد مجبور عليها

أستند عبد الرحمن بظهره إلى مقعده وهو يقول:

- يا بابا والله إيمان بنت زى الفل .. وزوجة رائعة لأى حد فى الدنيا.. وانا مش مجبور ولا حاجة.. كل الحكاية انى كان نفسى أحب البنت اللي هتجوزها الأول لكن خلاص اللي فيه الخير يقدمه ربنا

ابتسم والده برضا وقال :

- عظيم ..كده مفضلش غير إيمان يارب بقى هى متخزلنيش

ألتفت إليه عبد الرحمن بتسائل:

- تفكر ممكن ترفض

قال حسين بتفكير:

- والله يابنى مش متأكد من موافقتها .. انا هقعد معاها واكلمها ولو وافقت هكلم إيهاب على طول على كتب كتاب .. بلاش خطوبة وتضيع وقت

نهض عبد الرحمن وهو يهتف:

- جواز كده على طول.. طب ناخد على بعض الأول

أبتسم حسين وقال:

- لما انت بتقول كده وانت الراجل.. أومال البنت بقى هتقول أيه

قال برجاء:

- يا بابا واحدة واحدة.. الحكاية مبتأخذش قفش كده

أشار له والده منبها :

- واعمل حسابك كتب الكتاب هيبقى شهر واحد بس .. وبعدين الفرع على طول

صمت عبد الرحمن ولم يرد عليه فصاح فيه فجأة:

- مااالك.....

أنفص عبد الرحمن لصيحة أبيه وقال بتلعثم :

- حاضر يا بابا حاضر.. لو عاوز الدخلة كمان ساعة انا جاهز

ضحك حسين بصوت مرتفع، ثم نادى على زوجته بصوت مرتفع ، دخلت والدته ولحقت بها فرحة التي قالت:

- ايه ده بابا بيضحك بصوت عالى .. أكيد فى حاجة كبيرة ..

نهض حسين من مكانه وتوجه إليها واحتضنها وهو يقول :

- عقبالك لما افرح بيكى انت كمان

نظرت له زوجته بتسائل وقالت:

- هى كمان؟

أوما برأسه قائلا:

- أيوه يا عفاف هى كمان.. أصل خلاص عبد الرحمن لقيناله عروسة

أبتسمت فى حيرة وهى تقول:

- عروسة مين يا حاج؟

قال بابتسامة مشرقة :

- إيمان....

ثم تابع بحنين بالغ :

- بنت اخويا الله يرحمه

أنفض عبد الرحمن للمرة الثانية على صوت الزغاريد الذى أطلقته والدته فجأة  
أصفر وجهه وقال :

- دى تانى مرة أتخض فى نفس القاعدة ...على فكرة انا كده مش هشر فكوا خالص  
قبلته والدته واحتضنته وانقضت عليه فرحة بسعادة هاتفة :  
- مبروك يا بودى مبروك مبروك ..

قال بسخرية :

- كل ده ولسه العروسة متعرفش أصلا ..وعلى فكرة احتمال كبير ترفضنى  
قالت عفاف بلهفة :

- انا هطلعها دلوقتى

أوقفها حسين قائلا:

- لا محدش هيكلم إيمان غيرى .. انا عمها وعارفها كويس .. أطلعى يا فرحة ناديةالى  
واوعى تلمحيلها بأى حاجة .. مفهوم

هتفت فرحة وهى تعدو :

- مفهوم يا باباااا..

طرقت فرحة على الباب وعندما فتح أطرقت برأسها فى حياء وقالت :

- أزيك يا بشمهندس .. ممكن تناديلى إيمان لو سمحت

أبتسم قائلا فى حب:

- طب وانا منفعش

تضرج وجهها بحمرة الخجل وقالت:

- لا الصراحة مينفعش خالص

جاءت إيمان وهى تقول مداعبة :

- مينفعش أياه؟

قالت فرحة بسرعة :

- إيمان بابا عاوزك تحت ضرورى جدا خالص

أبتسم ايهاب وقال بتفكه:

- ضرورى جدا خالص .. كل أدوات التأكيد اللى فى اللغة

- طب ثوانى يا فرحة هروح البس الأسدال وجاية على طول

أرتدت إيمان إسدال الصلاة وهبطت بصحبة فرحة الى شقة عمها، أشارت فرحة إلى غرفة المكتب وقالت:

- بابا مستنيكى فى أوضة المكتب

طرقت إيمان ثلاث طرقات خفيفة ودخلت ، قال حسين بابتسامة عندما رآها:

- أدخلى يا إيمان واقفلى الباب وراكى

ثم اشار لها بالجلوس فقالت:

- خير يا عمى؟

أبتسم بحنان وقال:

- قوليلى يا إيمان انتِ بتثقى فيا؟

- طبعا يا عمى

- يعنى متأكدة انى عاوز مصلحتك وانك عندى زى ولادى بالظبط؟

أرتفع حاجبها بابتسامة حائرة وقالت:

- أكيد يا عمى مفيش عندى شك فى كده .. بس حضرتك بتسألنى ليه

- هقولك بعد ما تردى عليا...



نظرت له متعجبة وقالت:

- ما انا رديت يا عمى

صمت للحظات ثم قال ببطء :

- أيه رأيك فى ولادى .. يعنى شخصيتهم .. تربيتهم.. اخلاقهم

زادت حيرة إيمان أكثر وأكثر ، لا تعلم سر هذه الأسئلة ولكنها مضطرة للرد عليها ، قالت:

- ماشاء الله يا عمى ولاد حضرتك أحسنت تربيتهم .. وأخلاقهم فوق الوصف ربنا يخاليهم ملك

أتسعت ابتسامته وقال:

- ريحتى قلبى يابنتى ..كده بقى ندخل فى الموضوع على طول

صمتت إيمان وتركت له المجال لمتابعة حديثه فقال بشكل مباشر:

- أيه رأيك فى عبد الرحمن ابنى

أرتبكت وقالت بتردد:

- من ناحية أيه؟

قال مباشرة :

- لو اتقدمك تقبلينه؟

وقفت إيمان فى خجل وأطرقت برأسها ولم ترد ، نهض عمها ووقف إلى جانبها ولف ذراعه حول كتفها قائلاً :

- يابنتى انا عاوز رأيك بصراحة.. متكسفيش مني.. لو شايفاه ميصالحش قوليلى لاء .. ليكى مطلق الحرية ده جواز مش لعبة ... طال صمتها مما جعله يشعر بالقلق فقال:

- أنا بس عاوز اقولك ان عبد الرحمن متربى ومواظب على صلاته وبيقوم بكل الفروض اللى عليه.. وعمره لا مسك سيجارة ولا غيره.. وطبعاً انت عيشتى معنا فترة وشوفتى تصرفاته

ثم تابع بتنهيذة قلقة :

- ولو وافقتى هتريحي قلبى يا إيمان .. أنا عاوز اطمئن عليكى انتِ واختك قبل ما اموت  
قالت بلهفة:

- بعد الشر عليك يا عمى.. ربنا يدك طولت العمر وحسن العمل يارب  
تابع حديثه قائلا:

- عاوز اطمئن عليكى مع راجل عارف انه هيصونك لانيك فى الآخر لحمه ودمه.. وتفضللى  
وسط عيلتك الكبيرة دى ومتسبيناش أبدا.. نبقى حواليكى دايما وانتِ عارفة عفاف بتحبك  
ازاى وهتراعيكى وهتبقى غلاوتك عندها من غلاوة فرحة وانتِ عارفها طيبة ازاى  
زاد شعوره بالقلق لطول صمتها مرة أخرى فقال:

- ها يابنتى مردتيش عليا ايه رأيك  
قطعت صمتها وقالت بحياء:

- طيب حضرتك ادينى فرصة أفكر واستخير وآخذ رأى اخويا  
ابتسم لها قائلا:

- يومين كويس

قالت على الفور:

- لا يومين قليل أوى .. يعنى .. مش أقل من أسبوع كده

- خلاص نقسم البلد نصين نخاليهم أربعة .. خلاص اتفقنا مش عاوز مقاوحة تانى يالا  
اتفضللى

خرجت إيمان من غرفة المكتب تنظرت حولها بحذر ، ثم هرولت سريعا إلى الأعلى حيث  
شقتها وقلبها يخفق بشدة ، نظر لها إيهاب وهى تغلق الباب خلفها وتحاول أن تتنفس  
بصعوبة ، قلق عليها واقترب منها مطمئنا :

- مالك يا إيمان فى حد ضايقتك

تضرج وجهها بحمرة الخجل أكثر وهى تقول:

- لا أبدا

- او مال مالك كده وشك أحمر وزى ما يكون حد بيجرى وراكى

صمتت وذهبت لتجلس حتى تستطيع تنظيم طريقة تنفسها ، ذهب خلفها فى حيرة وجلس بجوارها ونظر إليها ينتظر أجابتها ، خرجت مريم من غرفتها فوجدتهما هكذا فاقتربت وجلست بجوار أختها وهى تقول :

- مالكوأ فى أيه؟

قال إيهاب بنفاذ صبر:

- ما تكلمى يا إيمان ساكتة ليه

ارتبكت بشدة وهى تقول بخجل:

- عمى .. عمى بيقولى أيه رأيك فى عبد الرحمن

قال إيهاب بعدم فهم:

- مش فاهم يعنى أيه .. رأيك فيه ازاي يعنى

أطرقت برأسها تحاول أن تجد كلمات مناسبة ، وفجأة صفت مريم بيديها بابتسامة كبيرة وهى تقول:

- يا إيمان يا جامد .. معقوله يا إيهاب مفهمتش ده انا فهمت.

واكملت بشغف:

- عبد الرحمن عاوز يتجوز ايمان ها فهمت ولا نقول كما ان

قطب جبينه فى تفكير وقال:

- صحيح الكلام ده يا إيمان

أومأت برأسها مؤكده كلام مريم فقال بنزق:

- وعمى ليه مكلمنيش انا الأول

قاطعته مريم قائلة:

- ازاي يعنى يقولك انت الأول .. مش لما يعرف رأيها الأول يبقى يكلمك ويتفق معاك

أومأت إيمان مرة أخرى وقالت بخفوت :

- أيوه هو برضة قالى كده

قالت مريم بسعادة:

- وانتِ قولتيله أيه يا إيمان موافقة طبعا مش كده

قالت إيمان بنفس الخفوت:

- قلتله عاوزه وقت افكر واستخير ربنا

نهض إيهاب وهو يقول:

- خلاص اللي فيه الخير يقدمه ربنا.. استخيري .. بس لما توصلى لنتيجة تقوليلى وانا هبلغه بالرد

واففته إيمان بإماعة من رأسها وقالت مريم:

- بطل تحبكها يا إيهاب ده عننا.. يعنى فى مقام ابونا الله يرحمه ..مش راجل غريب وناس غريبة عننا نتعامل معاهم بالشكليات دى

قال إيهاب متعجبا :

- يا سلام.. من أمتى بقى العقل ده

ثم أردف وهو يتجه للباب:

- أنا ماشى دلوقتى علشان عندى مشوار شغل مهم أوى

بمجرد أن أغلق إيهاب الباب خلفه أمسكت مريم ذراع إيمان واجلستها فى مواجهتها وقالت  
وهى تصطنع الجدية:

- أعترفى بسرعة ...

قالت إيمان بدهشة:

- أعترف بأيه يا مجنونه

نظرت لها مريم بعين مفتوحة والأخرى مغمضة وقالت بمكر:

- أیه الی خلاکی تغیری رأیک .. مش قلتی انا عاوزہ اتجوز واحد ملتزم  
سعلت ایمان وانشغلت بطرحت اسدالها حتی تتحاشی النظر لمریم وقالت:

- أنا لسه موافقتش یا مریم .. انا لسه هستخیر

أمسکت مریم وجهها بیدها وقالت :

- او مال لیہ کده خیر اللهم اجعله خیر شکک زی ما تكونی موافقة .. وبعدين عبد الرحمن  
مش ملتزم زی ما انت عاوزہ

أبعدت ایمان وجهها وقالت:

- بصی انا کمان محتارة لأنه زی ما بتقولی مش ملتزم زی ما انا عاوزہ.. لكن عموما احنا  
عشنا معاهم وشوفنا أخلاقهم وهو أخلاقه مش بعيده عن الألتزام .. یعنی بیصلی فی المسجد  
وبار بأبوه وأمه ومحترم ومالوش فی حكاية مصاحبة البنات والستات والكلام الفاضی ده..  
مالوش فی السجاير ولا فی الحاجات الوحشة دی.. معاملاته وطريقة كلامه محترمة ده غیر  
انى عارفة عمی مربیه ازای وبما أن احنا قرايب فأنا متأكدة من أخلاق البيت الی اتربی فیہ  
هو فیہ بس شویة حاجات عاوزہ تطبیط

كانت ایمان تردد على نفسها هذه الكلمات دائما حتى تقتنع نفسها بها وهی تتقلب على  
فراشها لیلا وكأنها تجد مخرجا أو تبریراً يجعلها توافق على الزواج من عبد الرحمن ، فلقد  
كانت تطلعاتها أكبر من هذا فی الزوج الذی تريد .

طوال الأربع أيام لم يحدث أى احتكاك بین مریم ویوسف ولقد ساعد على ذلك البعد  
أختبارات آخر العام بالنسبة لمریم وفرحة ووفاء ، وبعد انقضاء المهلة المحددة واستخارة  
یومیة، أخبرت ایمان أخيها برأيها.. فقال بحیرة:

- مش عارف یا ایمان یعنی اقول لعمك أیه دلوقتی؟

ایمان :

- زی ما قلتک یا ایهاب قوله انی عاوزہ اتکلم مع عبد الرحمن مرة واحدة وبعدين هقول  
رأیی

نهض إیهاب لیذهب لعمه ولكن ایمان استوقفته قائلة :

- إيهاب... أياه رأيك تطلب أيد فرحة بالمرّة

ألتفت إليها فى تفكير وقال :

- تفتكرى ده وقت مناسب

قالت إيمان بحماس:

- طبعا افتكر ونص .. وانا عارفة النتيجة من الكنترول مقدما

قال بتردد:

- مش عارف يا إيمان .. قلقان أوى من الحكاية دى

ربتت على كتفه وقالت:

- صدقتى عمك بيحبك جدا وهيفرح أوى بطلبك ده.. وفرحة كمان مياله ليك

شرد قليلا وقال:

- بس دى بتمتحن دلوقتى

ابتسمت له قائلة:

- خلاص فاضل أسبوع وتخلص امتحانات .. وبعدين يا باشا انا لو كنت عارفة انها هتقعد

تفكر وتنشغل كنت قلتلك استنى لما تخلص امتحانات لكن انا متأكدة انها هتطير من الفرح

وهتحمس للمذاكرة أكثر

وضع إيهاب يديه فى جيبه وقد تبدل حاله فى لحظة وهو يقول بغرور مصطنع:

- طبعا يابنتى .. أخوكى لا يقاوم

\*\*\*\*

كانت سعادة حسين بالغة وهو يرى على وجه ابنته علامات الرضا بطلب إيهاب للزواج

منها وهى تقول بخجل:

- اللى تشوفه حضرتك يا بابا

فى حين قال عبد الرحمن مداعبا :

- يا سلام على الأدب .. أياه يابنت الأدب ده كله اللى نزل عليكى مرة واحدة

نظرت له نظرة جانبية وهى تقول مهددة :

- طول عمرى مؤدبة على فكرة بس انت كنت فى البلكونة.. هو محدش قالك ولا أياه

ضحك والدها من مداعباتها لأخيها وهو يقول:

- مش لسه كنت مكسوفة من شوية لحقتى تقلبى

ثم التفت إلى عبد الرحمن وقال :

- ها يا عبد الرحمن وانت فاضى أمتى علشان القاعدة اللى إيمان عاوزه تقعد معاك

قال عبد الرحمن بعدم اهتمام:

- أى وقت يا بابا وياريت لو النهاردة علشان بكرة عندى شغل كتير مش هبقى فاضى

تابع وهو ينظر لوالده فى تساؤل قائلا:

- بس هى مقالتش هى عاوزانى فايه بالظبط؟

ألفتت إليه والده متعجبا وقال:

- البنيت من حقها تقعد معاك قبل ما توافق عليك.. وانا الحقيقة مستغرب المفروض ان انت

كمان تبقى عندك نفس الرغبة

عانقت عفاف ابنتها عناق طويل وهى تبكى وتقول :

- ألف مبروك يا حبيبتي مش مصدقة انى هشوفك عروسة أخيراً

أعتدلت فرحة وهى تقول باستنكار :

- أياه أخيراً دى يا ماما هو انا عندى خمسين سنة ولا أياه

ثم نظرت إلى يوسف الذى كان يتابع التلفاز واجماً وقالت:

- ولا أياه رأيك يا يوسف؟

قال دون أن يلتفت:

- اللى انتوا شايفنه اعملوا

جلست والدته بجواره قائلة:

- أراى يابنى.. أنت أخوها ولازم يكون ليك رأى

أبتسم ابتسامة باهتة وقال:

- إيهاب مفيش عليه غبار ولا هو ولا إيمان وانا أتشرف بيهم بصراحة

نظرت له فرحة بتساؤل وقالت:

- ومريم كمان بنت كويسة

أبتسم فى سخرية وهو يقول :

- لا ومش أى بنت .. ونعم البنات

### الفصل السابع عشر

كان اللقاء المرتقب فى الحديقة ، جلست إيمان على مسافة مناسبة من عبد الرحمن وهى تحاول استعادة أى شىء مما كانت تريد قوله ولكن عقلها وكأنه قد أغلق للصيانة، ظلت تحاول أن تبدو متماسكة حتى لا تبدو بلهاء فهى من طلبت الجلوس إليه ولكن الحياء كان سيد الموقف ، شعر عبد الرحمن بما تعانيه فقرر أن يبدء هو قائلاً بأبتسامته المعهودة:

- أخبار الوردة أيه

أبتلعت ريقها بصعوبة وقالت :

- أعتنيت بيها على قد ما اقدر بس فى الآخر دبلت

أوما برأسه قائلاً:

- أكيد طبعا طالما اتقطفت خلاص

ثم استدرج مداعبا:

- منه لله الوحش اللى قطفها



أبتسمت رغما عنها فقال على الفور:

- إيمان أنا عاوزك تبقى على راحتك خالص وتكلميني فى اللى أنتِ عاوزاه  
قالت بتماسك:

- أنا كل اللى كنت عاوزاه أنى اقولك على شوية حاجات كده أحب تبقى موجودة فى بيتى  
واحب الإنسان اللى هعيش معاه يعملها.. وكنت عاوزه أعرف رأيك فيها  
حك ذقنه بتفكير وقال:

- أتفضلنى قولى أنا سامعك

أنطلقت فى الحديث مسرعة حتى لا تتوقف فتراجع وقالت:

- أول حاجه أنا مش عاوزه فى بيتى معاصى علشان ربنا يباركلنا فى حياتنا يعنى أنا مش  
بتفرج إلا على القنوات الاسلامية بس .. وأحب أن زوجى هو كمان يغض بصره  
قال عبد الرحمن بابتسامة :

- ها وأيه كمان

تابعت مسترسلة :

- تانى حاجة أنا مبسمعش أغانى .. الرسول عليه الصلاة والسلام قال (لِيَكُونَنَّ مِنْ أُمَّتِي  
أَقْوَامٌ يَسْتَحِلُّونَ الْحَرَ وَالْحَرِيرَ وَالْخَمْرَ وَالْمَعَازِفَ) وأنا مش عاوزه يبقى فى حد فى بيتنا  
بيستحل المعازف

أبتسم أبتسامة واسعة وقد أعجب بالحديث وقال:

- يعنى التحريم فى الأغانى ولا فى الموسيقى

قالت بسرعة:

- لا أنا ممكن أكون أخطأت التعبير .. التحريم فى المعازف نفسها لكن بالنسبة للأغانى  
وكلماتها فده على حسب الكلمات يعنى لو كلمات جميلة بتدعو لحاجة كويسة ومحترمة  
هتبقى حلال لكن لو كلمات بتثير الفتن والشهوات فى النفوس فطبعا دى تبقى حرام وأعتقد  
هو ده المنتشر وخصوصا فى الزمن ده

أبتسم مرة أخرى وقطب جبينه مداعبا وقال:

- طب بالنسبة للنوع الثانى .. بتاع الشهوات ده .. ينفع الست تغنيه لجوزها بصوتها كده من غير موسيقى

أطرقت برأسها خجلا من مقصد سؤاله ولم ترد ، حاول عبد الرحمن تغيير مسار الحديث وقال :

- ها خلاص كده ولا فى حاجة تانية

إيمان:

- حاجة واحدة بس ... بالنسبة للصور أنا مش هعلق صور على الحيطان مهما كانت الصورة دى عزيزة عليا لأن الرسول عليه الصلاة والسلام قال أن البيت اللى فيه صورة متعلقة مش بتدخله الملائكة .. وطبعا البيت اللى مش بتدخله ملائكة هيبقى فيه آيه غير الشياطين ويمكن ده سبب محدش واخد باله منه للمشاكل الكثير اللى بتحصل فى البيوت

نظرت إليه فوجدته يستمع لها بتركيز فقالت :

- هو كلامى ده مضايقتك

قال عبد الرحمن بجدية:

- لا طبعا يضايقتى آيه ده أنا مسلم زى زيك يعنى دى أوامر دينى أنا كمان

أبتهجت إيمان وقالت:

- أفهم من كده انك موافق على الكلام ده

أشرق وجهه بابتسامة عذبة قائلا:

- تصورى البنات دلوقتى لما تقول عايزة أقعد مع الراجل اللى متقدملى الواحد يتخيل أنها هتقعد تتشرط عليه وتطلب بقى اللى هى عايزاه

ثم تابع وهو ينظر لها باحترام:

- حقيقى يا إيمان أنا كل يوم باحترمك أكثر.. ياريت كل البنات يبقى هو ده شغلها الشاغل فى جوازها مش الذهب والجهاز والمؤخر والقايمة وعايزة زى فلانة وهاتلى زى علانة

كان ينتظر منها ردًا ولكنه وجدها صمتت فى خجل من أطراءه عليها فقال متابعا:

- أنتِ قولتى هتدى رأيك النهائى بعد ما تقعدى معايا .. ها رأيك النهائى أيه؟

نهضت وهى تبتسم فى راحة وقالت :

- هبلغ رأيى لإيهاب عن أذنك

عادت إلى الداخل فى سرعة بخطوات مرتبكة بعد أن تركت جلستها تلك أثرها البالغ فى نفس عبد الرحمن ، كلماتها جعلته يتأكد من حسن اختيار أبيه ، أنه بالفعل اختار له الزوجة الصالحة التى ستحمل أسمه وتحافظ عليه ، خجلها والملاحم التى كست وجهها وهى تحدثه جعله يشعر بأنه له مكان ما فى قلبها ، كل هذا جعله راضيا أكثر عن هذه الزيجة ولكن مازالت مشاعره تجاهها كما هى !

\*\*\*

أطلقت أصوات الزغاريد فى بيت آل جاسر بعد تحديد ميعاد العقدين معا فى آن واحد ويوم واحد بعد عشرة أيام.

كانت العائلة كلها فى سعادة غامرة إلا اثنين فقط ، وليد ووالدته التى كانت تأكل الغيرة قلبها لكرهها لأولاد أحلام كما تقول دائما، ولأنها كانت تريد عبد الرحمن لابنتها وفاء، أما وليد فقد أظهر عكس ما يبطن تماما فهو بارع فى هذا.

وكانت هناك من تستمع للخبر وتقفز فرحا وسعادة وهى تقول فى الهاتف:

- ألف مبروك يا حبيبتي ليكى أنتِ واخوكى.. أنتِ عارفه يا إيمان أنا الود ودى أنزلك مخصوص بس اعمامك واخدين مني موقف وخايفة حضوري يبوظ الفرح وابقى أنا سبب تعاستكم يا بنتى .. أنا هتصل على إيهاب وباركله بنفسى ...مع السلامة يا نور عيني

وضعت سماعة الهاتف واستدارت لزوجها بانتصار قائلة:

- شوفت تخطيطى يا عصام ..علشان كنت مش مصدقنى لما قاتلتك فلوس العيلة دى هترجلى أضعاف مضاعفة ولحد عندى

صفق لها زوجها عصام بأعجاب وقال:

- كده أبصملك بالعشرة.. أنتِ معلمة

وضعت قدم فوق أخرى وهى تقول باستعلاء:

- ولسه .. مفضلش غير مريم وتبقى العيلة كلها فى جيبى

\*\*\*

كانت الأيام تمضى بطيئة على البعض وسريعة على البعض الآخر بل كانت أول مرة تتمنى فرحة أن تأتى الاختبارات تباعا وتنتهى فى سرعة ، أخيراً ستتكلم معه وتنظر له وينظر لها دون محاذير ، لم يكن حال إيهاب مختلفا كثيرا عنها فهو يحدث نفسه دائما بأنها ستصبح حلاله يبيتها حبه وقتما شاء ، لن يغض بصره عنها بعد الآن ، أخيراً ستكون هذه الطفلة المدللة طفلة وزوجته إلى الأبد.

وعلى النقيض كانت مشاعر عبد الرحمن باردة لا يشعر بسعادة ولا بحزن ، كلاهما سواء ولكن لم يكن كلاهما سواء بالنسبة لإيمان على العكس ، كانت تشعر بالسعادة المخلوطة بالخجل ولكنها لا تستحث الأيام كما تفعل فرحة بل كلما مضى يوما تزداد له اضطرابات قلبها تم تحديد إقامة العرس فى الحديقة وتكفل إيهاب بها لمدة خمسة أيام قبل العرس وبالفعل خرجت من تحت يده زاهية لأقصى حد ، كان يعمل بها بقلبه قبل يده وخبرته ، كان عرس عائلى بسيط لم يكن به صخب كثير ، فقد كانت رغبة الجميع أن يكون الحفل الحقيقي هو يوم الزفاف.

أرتدت إيمان فستان بسيط ورقيق من اللون الفضى المطعم بالخرز والكريستالات الملونة الصغيرة ، وضعت القليل من الزينة وكان حجابها من نفس لون الفستان والتى تتميز ببساطتها فى حين أصرت فرحة على ارتداء فستان منقوش من اللون الذهبى الفاتح يغلب عليه الخرز اللامع ، كانت تريد أن تبدو كسندريلا فى فستانها ، ولفت حجاب صغير ووضعت زينتها تتماشى مع لون بشرتها الخمرية.

تم عقد قران فرحة وإيهاب أولاً ثم تولى الحاج إبراهيم الولاية عن إيمان وتم عقد قرانها على عبد الرحمن ، وقف إيهاب فى مزاح وقال :

- يالا يا جماعة كله يقولنا فى نفس واحد بارك الله لكما وبارك عليكما وجمع بينكما فى خير.. يالا واحد اثنين ثلاثة

ضحك الجميع مع اختلاف الأصوات وأطلقت أم عبد الرحمن الزغاريد الواحدة تلو الأخرى حتى كادت أن يغشى عليها من الفرحة والمجهود ، لا تعلم مريم لماذا كلما نظرت إليه تشعر

بغصة فى حلقها وكأنها تريد البكاء ، تلاقت نظراتهما فى صمت قطعه يوسف بالحديث مع والده. كان من المقرر أن يجلس كل عريس إلى عروسه بعض الوقت بعد انتهاء الحفل فى مكان مخصص لكل منهما قد أعده إيهاب من قبل ، أنصرف الجميع كل إلى شقته وظل الأربعة تحت مظلة واحدة ، نظر إيهاب إلى عبد الرحمن قائلا:

- أيه؟

عبد الرحمن:

- أيه؟!!

لوح إيهاب بيده قائلا:

- أحنا هنستهبل من أولها.. متاخذ مراتك وترح تقعد هناك

قال عبد الرحمن بتصنع عدم الفهم:

- ليه ما احنا قاعدين مع بعض أحسن

نهض إيهاب وهتف به:

- ليه هى جمعية تعاونية ولا أيه .. ما تمشى يابنى انت هى الجواز ده منظورة ولا أيه يا جدعان

نهض عبد الرحمن وهو يضحك ضحكات مستفزة وأمسك بيد إيمان وقال:

- يالا يا إيمان لو استئينا أكثر من كده هنقضى الليلة فى التخشبية

رغم أن تصرفات عبد الرحمن كانت للمداعبة إلا أن إيمان شعرت بقشعريرة فى جسدها جراء لمس عبد الرحمن ليدها، ربما لأنها أول مرة تسمح برجل أن يلمسها!

أخذها عبد الرحمن إلى مظلة صغيرة أخرى كان إيهاب قد زينها بقماش التل تزيناها المصابيح الكهربائية الملونة، جلس وهو يقول بمزاح :

- شفتى الواد اخوكى طردنا أزاى ..

أبتسمت إيمان فى خجل قائلة:

- معلىش بقى أصله بيحب فرحة أوى ونفسه يقعد يتكلم معاها براحتة

وضع عبد الرحمن كفه تحت ذقنه وظل ينظر إليها تارة وإلى الحديقة تارة أخرى فى صمت  
ويبتسم ابتسامات صماء، كانت إيمان تجلس فى مكانها ترى مظلة إيهاب وفرحة وترى  
علامات السعادة المرسومة على وجهيهما و انسجامهما سويا وهو ممسك بيدها يبيتها  
مشاعره فى شوق وحب ، أنسجت معهما كأنها تجلس بينهما، تتبع عبد الرحمن نظراتها  
فوجدها شاردة مع الأحبة، كان يريد أن يتكلم معها ولكن لم يجد كلمات يقولها ومعه حق،  
كيف يقول ما لا يشعر به، فاللسان مغرفة القلب ، أراد أن يقول أى شىء حفظا لماء الوجه  
فقال:

- على فكرة أنتِ النهاردة زى القمر

أنتبعت على كلماته ونظرت إليه وكأنها لا تصدق أنه تحدث أخيراً وقالت بحزن:

- بتقول حاجة

لمس عبد الرحمن حزنها فشعر بالأسى وقال:

- بقولك انتِ النهاردة زى القمر

أبتسمت ابتسامة صغيرة لمجاملته وقالت:

- شكرا على المجاملة اللطيفة

قال بسرعة:

- لا مش بجاملك .. أنتِ فعلا زى القمر.. أول مرة اشوفك بميكب حتى ولو خفيف

أبتسمت فى صمت حزين وأطرقت برأسها ولأول مرة تشعر أنها قد تسرعت بالموافقة على  
الزواج منه، هو لا يحبها ، كانت لابد أن تتأكد من مشاعره تجاهها قبل أن توافق

كان يطرق على الطاولة بأنامله ويحاول أن يتكلم أو يقول أى شىء ولكنه كلما وجد جملة  
معينه يشعر أنها جوفاء ستخرج منه بلا معنى أو أحساس، شعرت بتوتره ، للمرة الأولى  
تراه متوتراً هكذا فرأت رفع الحرج عنه فقالت:

- تحب نقوم ؟

ألفتت إليها قائلاً :

- ليه بتقولى كده؟

كادت أن تبكى ولكنها تماسكت وقالت:

- يعنى شايفاك مرهق والظاهر أن الأرهاق خلاك متوتر

زفر بقوة وقال:

- فعلا انا مرهق شوية

- طب خلاص لو تحب نقوم علشان تنام مفيش مشكلة

قالت هذه الجملة وهى تنظر إلى أخيها وفرحة وهما غارقان فى بحر العشق وتقول فى نفسها ماشاء الله لا قوة الا بالله اللهم بارك ، كانت تخاف أن تصيبه بالعين فتؤذيه أو تقتل من فرحته ، فنهضت قائلة :

- طيب يالا بجد مفيش مشكلة

شعر عبد الرحمن أنه لا يملك إلا الصمت ، لا يعرف ماذا يقول وماذا يفعل فاتجه معها إلى مدخل المنزل ومنه إلى المصعد ، دلف الاثنان إلى المصعد وأوصلها حتى باب شقتها وقال:

- تصبحى على خير

قالت بخفوت:

- وأنت من أهله

تفاجأت مريم بعودة إيمان بهذه السرعة ولكنها كانت غارقة فى أحزانها هى الأخرى فلم ترفع رأسها من تحت وسادتها وظلت تتصنع النوم ، أبدلت إيمان ملابسها وخرجت إلى الشرفة تنظر إلى أخيها وفرحته فوجدتها تقف ثم يمسك يديها ويجبرها على الجلوس مرة أخرى فأبتسمت لشغف أخيها بحبيبته وعادت مرة أخرى إلى غرفتها ، أطفأت المصباح ولأول مرة تفعل كما تفعل مريم دائما، تضع الوسادة على وجهها وتبكي بصمت

سمع يوسف صوت غرفة عبد الرحمن وهو يغلق الباب بعد دخوله فخرج من غرفته وتوجه إلى غرفة أخيه، دخل خلفه وقال متعجبا :

- أنت لحقت يابنى ده أنت مكملتش نص ساعة

لقى عبد الرحمن رابطة العنق على فراشه وهوى إليه بضيق قائلا:

- معرفتش أقولها ولا كلمة .. كان منظرى يكسف

جلس يوسف بجواره وقال متسائلا:

- أنت مبتحبهاش يا عبد الرحمن؟

زفر عبد الرحمن بضيق وقال:

- يا أخى حتى لو מבحبهاش كنت المفروض أتكلم معاها، أنت مشوفتش وشها وهى بتبص على إيهاب وفرحة كان عامل ازاي وهما منسجمين وبيتكلموا وأنا قاعد جمبها زى خبيبتها

ربت يوسف على كتفه وقال:

- أنت كده يا عبد الرحمن مبتعرفش تقول اللى مش حاسس بيه .. معلش بكرة تحبها وتعرف تتكلم معاها

شعر عبد الرحمن باختناق صوته وهو يقول:

- طب هى ذنبها أيه تنام يوم كتب كتابها حزينة كده وقلبها مكسور

نهض يوسف بشرود قائلا:

- ناس كتير أوى قلبها مكسور من غير ما يكون ليهم ذنب فى حاجة يا عبد الرحمن

\*\*\*

كان ضميره يؤنبه بشدة حتى أنه لم ينم جيدا ، وفى الصباح انتبهت إيمان على صوت هاتفها قفز قلبها بشكل تلقائى عندما وجدت أسمه على شاشة الهاتف ، أجابت فى تماسك على سؤاله عنها:

- الحمد لله .. اه أنا صاحبة .. بره فين .. على باب مين ؟!

ثم قالت وهى تنهض فى سرعة :

- على باب شقتنا احنا

وفتحت الباب فوجدته أمامها ملامحه يكسوها الاعتذار، قال فى أسف:

- عملتلك قلق ولا حاجة



أغلقت الهاتف وهى تقول:

- لا أبدا أنا كنت صاحبة

نظر لها متفحصا أياها، كانت أول مرة يراها بملابس البيت العادية بدون حجابها، شعرت بالخرج من نظراته وقالت:

- فى حاجة ولا أیه؟

أبتسم قائلا:

- أنا جاي أتأسف على اللى عملته امبارح .. أنا بجد مش عارف أیه اللى جرائى

أطرقت رأسها فى خجل وقالت:

- أنا مش زعلانة ..أنا عارفة انك..

قاطعها فى سرعة:

- لا زعلانة ومعاكى حق لو زعلتى .. أنا بجد مضايق أوى من نفسى ومش عارف اعتذرلك ازاي

أستشعرت الحرج وقالت :

- حتى لو كنت زعلانة خلاص.. كونك تيجى علشان تصالحنى ده فى حد ذاته شال الزعل كله من قلبى

شعر بالأمتنان لها وقال:

- أنا كنت متأكد أن قلبك كبير

ثم تناول كفها بين أصابعه وطبع عليه قبلة صغيرة وقال :

- أنا آسف مرة ثانية

\*\*\*

مضى أسابيع أخرى و إيهاب يعمل بجد لينهى ديكورات شقته وشقة أخته إيمان ، لم يكن هناك الكثير من العمل الشاق ، فقط ينقصها بعض اللمسات الفنية وكان إيهاب بارعا فى هذا وكانت أحيانا فرحة تتصل به لتؤنبه بأنه قد مضت عليه أربع ساعات لم تسمع فيهم صوته وهو منشغل فى عمله ووقت الأسترحة من العمل يتقابلان فى الحديقة ليسبح فى بحور شوقه وهو يبثها حبه.

بينما كانت إيمان تحاول دائما أن تتقرب لزوجها وتبحث عن الأشياء التى يحبها وتفعلها من أجل أن تسكن قلبه كما سكن هو قلبها ، فلقد أصبح زوجها شاعت أم أبت ولا بد أن تبذل أقصى جهد لأنجاح زواجهما رغم ما تقابله من مشاعر باردة ، لم تعتاد إيمان على الهزيمة أبدا ، كان من الممكن أن تطلب الطلاق ولكن رغبته فى أن تصبح زوجته فاقت كل شىء لقد أحبته بكل جوارحها حقا.

كانت عفاف تخصص وقتها كله من أجل شراء كل ما يلزم فرحة وإيمان من تجهيزات الزواج وظهرت نتيجة الاختبارات .. كانت النتيجة مبهرة للجميع حقا ، فهذه أول سنة تحقق فيها مريم تقدير مرتفع أما بالنسبة لفرحة فلقد كانت سعادتها بإيهاب تفوق سعادتها بتخرجها من الكلية بتقدير جيد جدا ، أما وليد فلقد كان يحاول باستماتة أن يعيد علاقته الطيبة بيوسف بكل الطرق الممكنة حتى استطاع أن يعيدها طبيعية بعض الشىء وخصوصا بعد أن استشف أن يوسف لن يتكلم عن ما رآه منه هو وسلمى ولكنه لا يعلم أن يوسف قرر أن يؤجل الحديث فى هذا الأمر إلى ما بعد زفاف أخيه وأخته حتى لا تحدث أزمة فى العائلتين كانت استعدادات مهولة تجرى على قدم وساق فى البيت الكبير منزل آل جاسر ، ولقد سخر حسين كل أمكانياته ليخرج حفل الزفاف فى أبهى صورة ، قام عبد الرحمن بحجز قاعة كبيرة فى فندق معروف .

وفى يوم الزفاف مساءً كانت قاعة الأفراح مزدحمة بالمدعوين ، تلتف كل أسرة حول طاولتها الخاصة ، وكان هناك على إحدى الطاولات الرئيسية تجلس أسرة حسين جاسر وترسم الأبتسامة على شفثيه فى وقار وهو يتحدث إلى زوجته عفاف :

- تصدقى يا أم عبد الرحمن أنا حاسس أنى بحلم .. خلاص عبد الرحمن بقى عريس و دخلته النهاردة

نظرت إليه زوجته عفاف فى سعادة وهى تقول:

- لا ومش أى عريس ده عريس زى القمر

تنهد حسين فى ارتياح وهو يقول:

- أنا كده حاسس أنى أبو العريس والعروسة فى نفس الوقت

ردت عليه زوجته مؤكدة:

- طبعا يا ابو عبد الرحمن .. إيمان زى بنتنا بالظبط ..

ثم تابعت:

- يارب عقبال مريم عن قريب يارب

وفى طاولة أخرى بجوارها كانت تجلس عائلة إبراهيم حيث قالت له زوجته فى سرعة:

- شفت الواد وليد ابنك داير فى كل حطة ازاي.. من ساعة ما دخلنا القاعة وهو داير زى النحلة

ضحك إبراهيم لحديث زوجته وقال:

- يا ستى سيبيه ده راجل هو بنت هتقعديه جنبك

ردت وفاء معترضة:

- يعنى أيه يا سى بابا.. يعنى انا بقى علشان بنت ماما تفضل رابطانى جمبها كده

قال موجهاً حديثه لفاطمة :

- سيبيها يا ام وليد تقوم براحتها

ثم أشار لها وهو يقول:

- روى يابنتى

قالت فاطمة ساخطة:

- والله أنت مدلعا

ثم أردفت وهى تجذبه من يده:

- تعال تعال نروح نقعد مع أخوك ومراته

فى هذه الأثناء كانت هناك مناقشة هامسة بين العروسين حيث كان عبد الرحمن يقول:

- مالك يا إيمان ... شكلك مضايق

نظرت إليه بعتاب وقالت:

- كده برضة .. هو ده اللى اتفقنا عليه

عبد الرحمن:

- أيه بس أيه اللى حصل

أشاحت إيمان بوجهها بعيدا عنه وقالت:

- مش عارف حصل أيه

قال عبد الرحمن فى خجل:

- والله يا إيمان ملقتش قاعة منفصلة .. الفندق هنا مفيهوش نظام الستات لوحدها والرجالة

لوحدها أعمل أيه طيب يعنى كنت احجز قاعة مناسبات فى جامع

نظرة له فى ضيق وهى تقول:

- وماله الجامع يا عبد الرحمن .. على الأقل مكنش هيبقى فى رجاله قاعة تتفرج على

زوجتك .. ولا كان هيبقى فيه اختلاط نتحاسب عليه قدام ربنا

ثم تنهدت فى حسرة وهى تقول:

- مش هو ده يوم فرحى اللى كنت بحلم بيه وبعدين انا قتلتك من الأول وانت وعدتنى

كانت مريم تقف بجوارها ولاحظت ما يحدث ، أقتربت منها وقالت :

- مالك يا إيمان فى أيه؟

تدخل عبد الرحمن فى الحديث قائلا:

- كلميها يا مريم .. فى عروسة تبقى زعانة كده يوم فرحها

نظرت له إيمان وهى تقول بخفوت :

- يوم فرحى الحقيقى أن ربنا يبقى راضى عنا لكن لما يبقى غضبان علينا من اللى بيحصل ده ميبقاش اسمه يوم فرحى

قال عبد الرحمن معذراً:

- أنا آسف يا إيمان معلش يا بنت عمى عديها .. والله لو كنت لقيت قاعة مفصولة كنت حجرت

قالت مريم باستنكار وهى تحدث إيمان:

- مفصولة ! .. أنت لسه بتفكرى كده.. أيه يا بنتى احنا فى فرح ولا فى جامع

صمتت إيمان وهى تشعر بالحسرة تملأ قلبها ، فما كانت أبدا تحلم بهذا ، كانت تتمنى أن يكون يوم زفافها هو يوم شكر نعمة الله عليها وليس يوم تحمل فيه كل هذه الذنوب التى تراها أمام عينيها ولا تستطيع دفعها ولكن هذا هو قدرها وعزائها الوحيد أنها غير راضية عن ما يحدث وترفضه بقلبها وهذا أضعف الإيمان.

كانت مريم تقف بصفة مستمرة بجوار سلمى التى استطاعت أن تعيد علاقتها بمريم قوية كما كانت و كان يحيط بهما شابين فى أواخر العشرينات يتبادل الأربعة الأحاديث والضحكات فى ركن ما فى قاعة الفرح.. عندها قالت سلمى:

- ايه يا بنتى اختك دى .. عمرى ما شفت عروسة مغطية شعرها يوم فرحها .. أيه العقد دى

قالت مريم بتأفف:

- والله حاولت اقتعها تقلع الحجاب النهاردة لكن هى صمتت وقعدت تدينى مواعظ

أنهت جملتها وضحك الأربعة بشكل ملفت للأنظار، كانت هناك عيون تراقبها باهتمام شديد تراقبها جيداً وتراقب ضحكاتهما، كان يوسف ينظر إليها من بعيد فى غضب ، فوجيء بيد تضربه بخفة على كتفه وصوت ساخر يقول :

- قفشتك ....

ثم تابع صاحب الصوت الساخر:

- أنا مش عارف انت معذب نفسك ليه دى بنت سهلة

ألتفت إليه يوسف فى حلق وهو يقول:

- كفاية يا وليد دى برضة بنت عمنا

قال وليد معترضاً:

- لالا مش بنت عمى .. دى بنت أحلام

قال يوسف بدهشة :

- وهى أحلام دى مين مش تبقى مرات عمك علي الله يرحمه

زفر وليد بحلق قائلاً:

- هنعیده تانى .. يابنى منا قلتك قبل كده أحلام دى كانت ايه.. ومحدث يعرف إيهاب وإيمان  
ومريم ولادها من عمك علي ولا لاء

أتسعت عيني يوسف غضبا ودهشة وقال:

- عيب الكلام ده يا وليد ... لو كان أبوك وأبويا عارفين كده مكانوش جابوهم يعيشوا وسطنا  
تانى .. كانوا سابوهم يعيشوا مع امهم وجوزها ده اللي اتجوزتوا بعد عمى علي الله يرحمه  
ومكناش دلوقتى فى فرح عبد الرحمن اخويا على إيمان وفرحة وإيهاب  
قال وليد باستهزاء:

- ياعم ابوك وابويا علايتهم أويييييى ... وبيدوروا على أى حد من ريحة عمى الله يرحمه  
ثم أخرج علبة سجائر مفخخة من سترته وقدمها لـ يوسف وهو يقول فى سخرية:

- خد دى بقى اتسلى فيها

نظر يوسف إلى العلبة ثم نظر إلى ابن عمه وليد وقال:

- ما انت عارف أنى ماليش فى فيها وخصوصا وهى كده  
وضعها وليد فى كف يوسف وقال وهو يتصنع الجدية:

- علشان تعرف تراقبها كويس .. أصل اللي زى دى طالعة لأمها.. وعاوزة اللي يبصلها تبقى عنيه فى وسط راسه

وأطلق ضحكة عالية وسط صخب الموسيقى وترك يوسف يأكل الشك قلبه وانصرف.

أنتصف الليل وحان وقت السفر لقضاء رحلة شهر العسل ، خرج الجميع من القاعة ومن ثم من الفندق ، ركب كل عروسين فى سيارتهما الخاصة و همت مريم بالركوب فى سيارة إيمان وعبد الرحمن ولكن سلمى جذبتها معها فى سيارتها قائلة:

- تعالى هنا أركبى معايا أنتِ رايحة فين

مريم :

- هروح معاهم نوصلهم للمطار

قالت سلمى سريعاً وهى تدير محرك سيارتها:

- هتروحي تعملى أيه هتدبى مشوار المطار ده كله علشان توصليها ..وبعدين ما عليتكوا كلها رايعين وراهم بعربياتهم هيوصلوها

قالت مريم فى استسلام:

- طيب أيه يعنى مش فاهمة.. هنروح احنا فين

سلمى :

- أبدا هنتمشى بالعربية شوية واروحك البيت

وقبل أن تنطلق بالسيارة فتح الباب الخلفى للسيارة شابين وانطلقت سلمى بسارتها مسرعة قبل أن يلاحظها أحد ، ولكنها لم تغيب عن أعين يوسف ووليد ، كانا ينظران إلى ما يحدث من بعيد وما لبث وليد أن قال لـ يوسف باستفزاز:

- شفت يا عم.. أهى غارت من اختها قالت اشمعنى انا معملش ليلة دخلتى النهاردة

وانطلقت ضحكاته العابثة مرة أخرى وهو يقول له :

- أشرب اشرب علشان تنسى ..

أستقل يوسف سيارته وعينه تلاحق سراب سيارة سلمى وتتردد في أذنه عبارة ولید  
الأخيرة وغضب شديد يجتاحه وقد أضمر شيئاً في نفسه، أنطلقت السيارات جميعها ولم  
يلحظ أحد غياب مريم ويوسف بعد.

بعد ساعتين كانت سيارة سلمى تقف أمام حديقة منزل آل جاسر ، ترجلت مريم من السيارة  
وهي تودع صديقتها وعندما ألتفتت لتدخل وجدت بوابة الحديقة مفتوحة، سارت بداخلها  
حتى وصلت إلى باب فناء المنزل والذي كان مفتوحاً أيضاً والمكان مظلم جداً، لا يوجد إلا  
شعاع ضوء بسيط يأتي من أعمدة الإنارة في الحديقة.

تحسست مريم طريقها في قلق وظنت أنهم عادوا من المطار، نظراً لوجود البوابة مفتوحة  
أخرجت هاتفها واتصلت على عمها حسين تسأله:

- أيوا يا عمى انتوا في البيت ولا فين ... لا مجتش معاكوا أنا كنت مع سلمى صاحبتي ... لا  
انا عند البيت دلوقتى .. ها كنت .. كنا بنتمشى بعربيتها شوية آسفه يا عمى متزعش مني  
.. خلاص انا هطلع استناكوا فوق .. اه معايا مفتاح شقتنا .. مع السلامة

تحسست الجدران في ببطء لعلها تجد طريقها إلى مفتاح الكهرباء، وبعد ثوان سمعت صوت  
باب الشقة الكائنة في الدور الأرضي والتي يستخدمونها كمخزن للأشياء المهملة والمحطمة  
.. توترت وتحركت في سرعة بحثاً عن مفتاح الكهرباء وهي تقول بخوف:

- مين .. مين؟

وأخيراً سمعت صوته وهو يقول:

- تعالى يا مريم متخافيش .. ده أنا

وضعت مريم يدها على صدرها وهي تهدىء روعها وتقول:

- أوف .... رعبتنى بتعمل أيه عندك؟

- بصلح الكهربا .. تعالى نوريلي بالتليفون

تقدمت نحو مصدر الصوت حتى وجدته، وشرعت في أخراج الهاتف مرة أخرى ولكنه جذبها  
داخل الشقة وأغلق الباب بقدمه في عنف ، وبعد لحظات من المقاومة والصراخ المتقطع  
والعنف والاستجداء والإصرار ... أرطمت رأسها بأحد قطع الأثاث المكونة ووقعت فوق



بعض قطع الزجاج المحطم على الأرض مغشياً عليها .. وسالت دماؤها فى لحظة غدر دون أدنى مقاومة.

\*\*\*

## الفصل الثامن عشر

بعد حوالى ساعة ونصف كانت السيارات قد اقتربت من المنزل عائدة من المطار بعد توديع عبدالرحمن وايمان وإيهاب وفرحة ، دخلت السيارات إلى الجراج ، ترجل الحاج إبراهيم من سيارته هو ووفاء وفتح الباب لزوجته فاطمة التى كانت تستقل سيارة وليد ، وأمسك يديها وساعدها على النزول منها وكذلك فعل الحاج حسين مع زوجته عفاف التى قالت:

- تلاقى مريم دلوقتى فى سابع نومه

قالت وفاء متسائلة:

- أطلع اطمئن عليها؟

قال حسين بارهاق:

- لا مفيش داعى نقلقها

قاطعتهما عفاف فى قلق وهى تقول :

- لسه تليفون يوسف مقفول يا حسين ، حاول حسين الاتصال بولده كثيراً ولكن هاتفه غير متاح ، قال إبراهيم مطمئناً:

- يمكن كان راكن عربيته بعيد شوية عند المطار وجاى ورانا

عفاف:

- بس انا مشفتوش فى المطار خالص يا ابو وليد، حتى مشوفتوش بيسلم على عبد الرحمن وايهاب فى صالة المطار

وهنا تدخل وليد قائلاً:

- أنا آخر مرة شوفتوا واحنا بنركب العربيات على باب الفندق بعد كده معرفش راح فين حاول إبراهيم أن يطمئنهم مرة أخرى قائلاً:

- خلاص يبقى أكيد جه ورانا واحنا مشوفنا هوش وجراج المطار كان زحمة أكيد ركن بعيد وتلاقيه جاى ورانا دلوقتي

حاول الجميع الإقتناع بهذه الفكرة وينتظروا حتى يعود أدراجه خلفهم، نظر حسين حوله قائلاً:

- أظاهر الكهربا بتاعة المدخل بايظة

أقربوا من المدخل وهم فى حالة أجهاد شديد فقالت وفاء وهى تمعن النظر فى مفاتيح الكهرباء الخارجية :

- فى حد نزل الزراير بتاعة المدخل

ثم قامت برفعها فأضاء المدخل بالكامل ، لم يلاحظ أحد شىء غريب، استقلوا المصعد واتجهت كل أسرة إلى طابقها، أستسلم الجميع للنوم من شدة الإرهاق ، باستثناء الحاج حسين لم يمنعه الإرهاق من القلق على ولده واستشعار شىء مريب فى غيابه ، نظر بجانبه فوجد عفاف مستغرقة فى النوم ويبدو على ملامحها التعب الشديد فتركها نائمة ووقف فى الشرفة ينظر إلى بوابة الحديقة لعله يجده عائداً بسيارته ، ظل مترقباً حتى أذن المؤذن لصلاة الفجر، توضأ ونزل للصلاة فى المسجد وقد قرر أن يأخذ سيارته ويعود إلى طريق المطار فلقد ساورته الشكوك أنه من الممكن أن يكون وقع له حادث أثناء عودته.

صلى الفجر فى المسجد ثم عاد واستقل سيارته وما أن تحرك بها قليلاً حتى لاحت له سيارة يوسف مكونة خفية بين بنايتين متقابلتين، فأوقف سيارته وهبط منها متجهاً نحو سيارة ولده ، دار حولها دورتين فى قلق ، وضع يده على مقدمة السيارة فوجدها باردة ، لم يكن هذا له معنى آخر سوى أن السيارة هنا منذ وقت ليس بالقصير، أشتدت حيرته وهو يدور حول السيارة مرة أخرى بتفكير، قطب جبينه فى تركيز شديد، ما الذى أتى بالسيارة هنا

وأين هو يوسف ، لقد بحث عنه فى شقتهم ولم يجده أين يكون قد ذهب ، لا يعلم لماذا قفزت صورة مريم فى ذهنه فى هذه اللحظة ووجد لسانه ينطق فى وجوم "مريم" ..

خفق قلبه وقرر أن يعود أدراجه للمنزل مرة أخرى على الفور وقلبه يدق بشدة، وقف ليطلب المصعد ليصعد إليها ولكنه سمع صوت تأوهات متألّمة تأتي من خلف باب الشقة المهملة بجوار المصعد

\*\*\*

نزلت صفة مدوية على وجه يوسف جعلته يرتطم بالجدار بقوة ، لم يكن يشعر يوسف بقوة الصفة بقدر ما كان يشعر بالتجمد والذهول التام وهو يقف بصعوبة و ينظر إلى أبيه الذى كان يلف عبائته حول جسد مريم العارى وهى متشبّثة به بقوة و تبكى وتتأوه بألم صارخ ، كانت عيني الحاج حسين مشتتة تفيض بالدموع كالحمم المتأججة من انفجار بركان كان خامداً وهو يزار فيه هاتفا:

- حسابك معايا مش دلوقتى يا كلب

كانت تمشى معه مستندةً على يديه وكأنه يحملها حتى أدخلها شقتها ومنها إلى غرفة نومها ، وضعها فى فراشها وهى تتألم بضعف ودثرها بغطائها وظل بجوارها حتى سكنت وهدأت أنفاسها واستغرقت فى النوم العميق ، نظر إليها وقلبه يعتصر عصراً من هول ما رأى ، لم يكن يتخيل أبداً أنه لن يستطيع حمايتها بل لم يكن يخيل إليه يوماً أن ابنه هو من سيبيطش بها فى يوم من الأيام ، أنهمرت دموعه وهو يتخيل أخاه يقول له "كده ضيعت الأمانة يا حسين أبنيك ضيع بنتى"

كانت مشاعره ثائرة لدرجة أنه فكر أن يهبط إليه مرة أخرى ويقتله بيديه ، ولكن هذا لن يعيد لها ما قد سلب منها، لن تجلب الحماقة إلا الفضيحة، قرر فى نفسه ما سيفعله ليستطيع رأب هذا الصدع المدوى وهو ينظر لها بألم وحسرة.

\*\*\*\*

دخل حسين شقته بهدوء شديد ودلف إلى غرفة يوسف ولكنه لم يجده ظن أنه ما زال بالأسفل ولكنه سمع صوت مياه جارية بالحمام فاقترب من الباب ليتأكد أنه بالداخل

عاد إلى غرفته مرة أخرى وانتظره فيها، وبعد قليل دخل يوسف غرفته وهو يرتدى منشفته ويتقطر منه الماء وعينيه لونهما أحمر كالدّم، تجمد مكانه بمجرد أن رأى والده الذى لم يتمالك نفسه حينما رآه مرة أخرى فصفعه صفقة أخرى ألقتة على الفراش بقوة ، وضع يوسف كفه على وجهه وظل مطرقاً رأسه للأسفل ، لم يستطع النظر فى عيني والده أبداً، وقف حسين أمامه وقال بلهجة غاضبة محذرة :

- أعمل حسابك.. كتب كتابك على بنت عمك بعد يومين.. وأياك وحذارى أي مخلوق على وجه الأرض يعرفوا باللى حصل ولا حتى امك .. لو سألوك كنت فين امبارح تقول أنك روحت ورانا المطار ومعرفتش تركن عربيتك من الزحمة وعلى ما دخلت صالة المطار ملقتناش وانت راجع لجنة وقفتك فى الطريق وأخرتك.

ثم صاح بغضب هادر:

- فاهمنى ولا لاء؟

أوماً يوسف برأسه ولم يستطع أن يتفوه بكلمة واحدة ، ألقى عليه والده نظرة احتقار وبغض جمدته وخرج مرة أخرى عائداً إلى مريم

\*\*\*

قضى حسين الساعات السابقة نائماً على المقعد بجوار فراش مريم، ولكنه استيقظ على همهمات المتألّمة وهى تستيقظ أو تستعيد وعيها ببطء.. أيهما أصح

وبمجرد أن فتحت عينيها حتى استعادت ذكرى الأمس فصرخت وهى تمسك بغطائها وتتشبث به ، اقترب منها حسين مطمئناً ومسح على شعرها واحتضنها وهو يقول:

- أهدى يا بنتى أنا جنبك وأنتِ فى بيتك اهدى...

نظرت له بآلم وحسرة وهى تبكى، تأوهاتها مزقت قلبه كما زادت من غضبه على نفسه وعلى ولده وهو يسمعها تقول بهستريا :

- أنا عاوزة اموت .. أنا عاوزة اموت .. موتنى يا عمى وريحنى

ظل يمسح على ظهرها بحنان وتنهمر عبراته بسكون وصمت ، كان كل ما يشغله هو مطمئنتها ، وأخيراً وبعد أن سكنت قليلاً قال بحنان:

- قومى يابنتى ادخلى الحمام .. الماية الدافية تهديكى شوية .. قومى ولما تخرجى هنتكلم

ساعدها فى ستر جسدها بعباءته التى مازالت تلتحفها وأسندها حتى دخلت الحمام وأغلقت الباب خلفها، تركت العباءة لتسقط أرضا وهى تمشى كالمنومة وفتحت صنوبر المياة ووقفت تحت رزازه بما تبقى من ملابسها الممزقة القليلة المتبقية عليها، نظرت تحت قدميها فوجدت المياة التى تغادر جسدها تتلون بلون دماؤها فأغمضت عينيها وجلست تبكى تحت قطرات الماء والآلام تنتشر فى معظم نواحي جسدها، ياله من ألم نفسى وجسدى يترك جرحاً غائراً لا شفاء له ، مؤلمة هى الطعنة التى تأتى من أقرب الناس إليك ، مرت أمامها ليلة أمس كشريط سينمائى يمر من أمام عينيها يزيد شقائها شقاء، تذكرت كيف كانت تشعر بالخوف من الظلام واطمأنت بمجرد أن استمعت إلى صوته ، لم تكن تتوقع أبداً أن يأتيها الغدر من حيث الأمان.

تذكرت أنفاسه المتقطعة وهو يجذبها إليه ويعتصر جسدها بين ذراعه، تذكرت صراخها وهى تتوسل له أن يتركها وكأنها تصرخ فى صنم لا يسمع، تذكرت استجدائها وهى تقول له

" سيبنى يا يوسف ابوس أيدك ده انا بنت عمك ..فوق يا يوسف انا مريم يا يوسف فوق "

كانت تشعر وكأنه آلة حديدية بلا روح ، بلا شعور، وكأنه حجر بلا قلب ، ترددت بداخلها صدى كلماته التى قالها بصوت كالسكارى وكأنه فى غير وعيه " أنتِ متستحقيش غير كده .. أنتِ متستاهلش الحب اللى حبهولك يا حقيرة "

ثم كانت الدفعة القوية التى أفقدتها وعيها ببطء وهى تشعر به يمزق ملابسها، ثم انقطع كل شئ له علاقة بالعالم الخارجى ، وغابت عن الوعى تماما .

أستفاقت من ذكرياتها على صوت عمها من الخارج يطرق عليها الباب بصوت قلق :

- مريم انتِ كويسة يابنتى

قالت بصوت حزين فى ضعف:

- أيوا يا عمى

وبعد قليل خرجت وهى تتسند إلى الجدارن وترتدى منشفتها الكبيرة ، ساعدها على الوصول لفراشها ، وكاد أن يساعدها على الدخول إليه ولكنها صرخت عندما رأت آثار الدماء عليه استدارت بجسدها كى لا تراه فكادت أن يختل توازنها ، أحتضنها فى حنان وهو ينظر إلى ما رأت من آثار دماء طفيفة وأغمض عينيها فى ألم وأخذها إلى غرفة إيمان. أدخلها فراشها

ودثرها وهى فى حالة أنهيار شديد من البكاء، ظل بجوارها حتى هدأت ، وبعد قليل أتى إليها ببعض الحليب وساعدها على تناوله بصعوبة برغم رفضها ولكنه أصر عليها ..هدأت قليلاً ... فابتدء بالحديث قائلاً بصبر:

- أسمعى يا بنتى .. أنا معاكى ..أنتِ مش لوحدة وعمرى ما هتبقى لوحدةك وأنا على وش الدنيا .. لازم تبقى متأكدة أنى هجبلك حقك واكثر.. لكن قبل كل ده ..لازم الأول يكتب كتابك بكت وهى تنتحب وقالت:

- كمان.. كمان ...عاوز تجوز هولى يا عمى عاوز تجوزنى اللى دبحنى ..أبنتك دبحنى يا عمى ..أبنتك دبحنى

قال بتماسك وهو يحتضن كتفها:

- أنا مش هجوز هولىك علشان أكافئه أنا هعمل كده علشان الستري يا بنتى .. الأول لازم يسترك وبعدين أنا هوريكى هعمل فيه ايه صرخت قائلة :

- مش طايقاه لو شفته قدامى هقتله

قال بحنان:

- متقلقيش الجواز ده هيبقى للستر بس.. وبعدين يبقى يطلقك فى الوقت اللى انتِ تحدديه ثم تابع فى بجدية:

- واسمعينى كويس فى الكلام اللى هقوله ده.. مش عاوز مخلوق يعرف اللى حصل .. وأنا هعرفهم انك عندك برد جامد وتعبانة.. وكلها أسبوع واخواتك يرجعوا ونكتب الكتاب .. هو طلبك منى وأنا وافقت وانتِ كمان وافقتى ...سمعانى يا مريم

أومأت بضعف فنظر لها متفحصا ثم قال:

- لو شايقة يا بنتى ان كده حقك ضاع وعاوزه تبلغى عنه بلغى.. وأنا هشهد معاكى

أشارت برأسها نفيا ..فقال:

- وأنا أوعدهك أنى اخلصلك حقك زى مانتِ عاوزه واكثر

\*\*\*

أستيقظت عفاف من نومها وقامت من الفراش وهى تشعر بالألم فى عظام جسدها ، قاومت الإجهاد التى مازالت تشعر به منذ ليلة، لم تجد زوجها بجوارها، خرجت لتطمئن على عودة يوسف ، فتحت باب غرفته ونظرت إليه باطمئنان وهو نائم فى فراشه، لاحظت حبات العرق المتزايدة على جبينه فاقتربت منه لتمسحها فانتفضت على أثر حرارته المرتفعة ، حاولت أن توقظه ولكن لا يستجيب ويتمم بكلمات غير مفهومة وهو يرتعش، خفق قلبها بشدة وخرجت تبحث عن زوجها لم تجده، فقامت بالاتصال به وبعد عدة رنات أجابها... فهتفت به:

- أنت فين يا ابو عبد الرحمن

- انا عند مريم فوق .. أصلها كلمتنى الصبح وكانت تعبانة .. تقريبا جتلها نزلة برد جامدة  
قالت على الفور :

- لا حول ولا قوة الا بالله ..هى كمان؟ .. ده يوسف كمان تعبنا أوى  
قال باقتضاب:

- تعبنا ماله يعنى

- حرارته عالية أوى وببترعش وعمال يخترف  
نهض حسين بعد كلمتها الأخيرة وهو يقول مكررا:  
- بيخترف بيقول ايه يعنى؟

قالت عفاف بتعجب:

- يا حسين هو المهم بيقول ايه .... المهم انه تعبنا ولازم نجيبه دكتور  
- طيب أنا نازل دلوقتى

وأغلق الهاتف ثم التفت إلى مريم قائلا:

- أنا هنزل اشوف الندل الذى تحت ده وهبقى اطلعك تانى.. ولو عوزتى حاجة ولا حسيتى  
انك تعبانة كلمينى على طول وياريت لو تحاولى تكملنى نومك علشان أعصابك ترتاح

كاد أن يغادر ولكنه قلق أن ترى آثار الدماء عندما تعود إلى غرفتها فيحدث لها انهيار مرة أخرى فدخل المطبخ وأخذ حقيبة بلاستيكية كبيرة سوداء ووضع فيها كل ماتبقى عليه من آثار للدماء من ملابس ، حتى غطاء السرير لم يتركه، وهبط إلى الأسفل فى هذه الشقة المهملة وجمع ما بها من بقية ملابسهما وألقى الحقيبة فى صندوق القمامات الكبير خارج المنزل لتنتهى آثار تلك الذكرى الأليمة تماما.

دخل على زوجته فى غرفة يوسف فوجدها تجلس بجواره وتضع على جبينه كمادات باردة وهو يرتجف تحت الغطاء بقوة، نظرت إليه عفاف قائلة بتوتر:

- أتصلت بالدكتور؟

كان ينظر إلى يوسف بشرود "معقول.. انت تعمل كده!! ... يخسارة تربيتى فيك"

سمع زوجته تكرر عبارتها الأخيرة:

- أتصلت بالدكتور ولا لسه؟

فأخرج هاتفه واستدعى الطبيب.

وعندما جاء وأجرى بعض الفحوصات القليلة ثم أعاد سماعه الكشف فى حقيبه الطبية وهو يقول بعملية:

- عنده حمى

\*\*\*

- أصحى يا عبد الرحمن يالا قوم

تثائب عبد الرحمن وهو مازال نائما ويقول:

- سيبينى شوية يا إيمان

ألتقى حاجبى إيهاب وهو يقول:

- إيمان مين يابنى.. انت معندكش تمييز كمان... قوم يالا

رفع عبد الرحمن رأسه من على وسادته وهو يكاد يفتح عينيه بصعوبة وهو ينظر إلى إيهاب الواقف أمامه :



- أنت ايه اللي جابك هنا.. انت ورايا ورايا فى كل حته حتى وانا نايم

هتف إيهاب مستنكرأ:

- أحنأ داخلين على العصر ومراتك الغلبانة بتصحى فيك من قبل الظهر .. قوم يالا عاوزين نخرج وانت معطلنا

وضع عبد الرحمن الوسادة على رأسه وهو يقول :

- ما تخرجوا وانا مالى

نزع عنه الوساده وهتف به :

- أنت متأكد أنك عريس وفشهر العسل .. ماتقوم يابنى آدم خلىنا نخرجهم شوية يتفرجوا على البلد .

ثم خفض صوته وقال:

- إيمان شكلها مضايق أوى... بتصحى فيك من بدرى وانت ولا انت هنا وقعه لوحدها من ساعة ما صحيت من النوم .. قوم بقى متخليهاش تضايق كده ف شهر العسل يا أخى

نهض عبد الرحمن بكسل وأخذ منشفته ودخل الحمام بتكاسل بينماخرج إيهاب لإيمان وفرحة غرفة المعيشة الملحقة بغرفتهم قائلا بنفاد صبر:

- جننى لحد ما قام

قالت ايمان باستياء:

- أومال أنا أعمل أيه ده عذبنى .... من الصبح وانا قاعدة لوحدى ومش راضى يقوم

أرتدى عبد الرحمن ملابسه وخرج إليهم معتذرا ، توجه الجميع إلى ردهة الفندق ومنه إلى الشاطئء، كانت فرحة تمشى على الشاطئء بجوار إيهاب وهو ممسك بيدها وتتشابك أصابعهما فى حب، بينما كان عبد الرحمن يمشى وهو واضع يديه فى جيبه وإيمان بجواره تنظر للبحر فى وجوم ، فقال وهو ينظر للمياة :

- الميه هنا صافية أوى...

لم ترد عليه فالتفت إليها فوجدها شاردة فقال:

- الشط هنا فاضى تحبى تقفى فى المية شوية

أشارت برأسها نفيا وقالت:

- لا مش هينفع هدومى لو اتبلت هتبقى لازقة على جسمى وهتفصله

لفت نظره فرحة وإيهاب وهما يمزحان أمامهما على الشاطيء، يتقاذفان الرمال وبعض المياة التى تأتى إليهم مسرعة على الشاطيء وكأنها تشاركهما سعادتهما ومرحهما ، وشاهد إيهاب وهو ممسك بعصاة ويكتب بها على الرمال " بحبك يا فرحة " ويرسم حولها قلب كبير، أبتمس ونظر إلى ايمان التى مرت بجوار القلب الذى رسمه أخيها ولمعت عيناها بالدموع وأسرعت الخطى، أسرع إليها عبد الرحمن بخطوات واسعة قائلا:

- فى حاجة يا ايمان؟

قالت بتحفظ:

- لا أبدا بس بردت شوية

عبد الرحمن :

- تحبى نرجع الفندق

ايمان:

- لا مش هينفع ايهاب قال هنتغدى مع بعض

قال موافقاً:

- زى ما تحبى ...

ثم تناول كفها بتردد وطبع عليه قبلة وظل ممسكا بها، لم تشعر إيمان بحرارة كفه، لم تشعر بشوقه لها أبداً، وكأنه يفعل ذلك مجاملة وأن طبيعة الموقف تفرض عليه ذلك .. يفعل ذلك لأنه يجب أن يفعله.. فقط !

\*\*\*

## الفصل التاسع عشر

صعدت الفتاتان كل منهما إلى حجرتها فى الفندق بينما ذهب عبد الرحمن وإيهاب لصلاة العشاء، دخلت إيمان غرفتها ، توضأت لصلاة العشاء واختارت جانباً بعيداً نسبياً فى غرفتها ووقفت للصلاة ، وعند أول سجدة انهار تماسكها بشكل كامل ، ظلت تبكى وتبكي وتدعو الله عزوجل أن يصرف عنها الهم والحزن وأن يقذف حبها فى قلب زوجها ، كانت تبكى وتدعو بمرارة كبيرة حتى انتهت من صلاتها وقامت لتصلّى النوافل وأصابها ما أصابها مرة أخرى عند السجود ، البكاء والألم.

تذكرت ليلتها الماضية، كيف كانت مثل أى عروس يكسوها الخجل والحياء ، تحتاج إلى زوجها ليطمئنها، ولكنه تعامل مع خجلها منه بالعزوف عنها، هو فى الأصل لم يكن مقبلاً عليها، لم يكن شغوفاً بها مثل أى زوج ليلة الزفاف، بل كان الأمر وكأنه استغل حيائها ليببب ليلته بعيداً عنها .

تذكرت كيف استيقظت باكراً لتوقظه بحجة الخروج مع إيهاب وفرحة، كانت تتصور أنه فعل ذلك بالأمس لإجهاذه بسبب السفر وحفل الزفاف وسيغير بمجرد أن ينام ويرتاح ، ولكنها وجدت شيئاً آخر ، لم يستجيب لها ورد عليها قائلاً:

- لما يجوا خارجين ابقى صحنى

أخذتها أفكارها وغفيت وهى ساجدة ، دخل عبد الرحمن الحجرة بهدوء ووقع عليها نظره وهى ساجدة فى سكون ، بدل ملابسها ودخل إلى فراشه ، انتظرها ترفع من سجودها ولكنها لم تفعل ، توقع أنها أخذتها غفوة فى سجودها ، أقرب منها ليوقظها قائلاً:

- إيمان ..إيمان أنت نائمة؟

أنتبهت من غفوتها ونهضت مستنده إلى ذراعه وقالت:

- أظاھر أنى نمت وانا ساجدة

عبد الرحمن:

- شككك تعبان ..تعالى نامى فى سريرك

خلعت أسدال الصلاة واستلقت على الفراش ولم تغمض عينيها ، نظر إليها قائلاً:

- منمتيش ليه

نظرت إليه بانتباه وقالت:

- مش جايلى نوم

قال بجدية:

- لا لازم تنامى بدرى عندنا بكرة فسحة من أول اليوم وايهاب هيصبحينا من الفجر.. تصبى على خير...

وأغمض عينية لينام ، نظرت إليه بذهول ، لم تكن تتوقع ردًا كهذا ، أل هذه الدرجة لديه عزوفا عنها ، أل هذه الدرجة لا يحبها ولا يشعر ألها زوجته، لم يكن هناك أل تفسيراً واحدا لتصرفاته ، لقد تزوجها رغما عنه، لقد أرغمه والده على الزواج منها ، هو لا يريد لها ، عندما وصلت لهذه النتيجة أغمضت عينية بألم وقررت أن تزيل عنه الإحراج الذى وقع فيه ، ستكون هى الرفضة له ، وليس العكس ، حفاظا على كرامتها

كان يتظاهر بالنوم، يغمض عينية ليهرب من نظراتها المتسائلة، لا يعلم إلى متى الهروب، لقد كان يتصور أل بمجرد أن تكون زوجته سيغتاد على وضعها الجديد فى حياته وسيشعر تجاهها بالحب ، بل حتى أضعف الإيمان أل كان سيتصرف بشكل طبيعى، فلقد أصبحت زوجته ومن المفترض أن يبدأ حياته معها، وهل كل رجل يتزوج امرأة لا يحبها يبتعد عنها هكذا، تدور الكلمات فى عقله لا يجد لها تفسيراً واضحاً ، قرر أل فى الغد وبعد عودتهم من الرحلة البحرية أن يحاول اذابة الحواجز الجليدية التى تفصله عنها.

وفى الصباح ذهبوا جميعا إلى رحلتهم البحرية ، كانت فرصة جيدة لإيمان أن تستنشق هواء البحر وتسرح فى جمال ألوانه الصافية ، كانت تحتاج إلى مثل هذا التغيير، أنشغلت فى عبادة التفكير فى خلق الله وهى ترى هذه المناظر الجميلة لأول مرة ، لم تفارق شفتاها كلمة سبحان الله من جمال ما ترى ، جلست فرحة بجوارها فى سعادة وهى تقول:

- أيه يا جميل قاعد لوحذك ليه

قالت إيمان بمزاح:

- أنا ياختى مش قاعدة لوحدى السمك قاعد معايا  
ضحكت فرحة وجاء إيهاب يلف ذراعيه حول كتفيها قائلاً:  
- وحشتينى الثوانى دول  
نظرت لهما إيمان بحنان وقالت :  
- ربنا يخليكوا لبعض...  
قبل رأسها قائلاً:  
- ربنا يخاليكى ليا يا إيمان.. ولا اقولك يا ستى ربنا يخاليكى لجوزك لحسن يزعل مني  
رسمت أبتسامة مصطنعة على شفتيها وهى تقول:  
- اه طبعا هيزعل كويس انه مش سامعك  
قال إيهاب مازحاً :  
- أنت بتخوفيني بالحوث بتاعك ماشى يا إيمان  
ثم نادى على عبد الرحمن بصوت مرتفع:  
- انت ياعم الحوث .. سايب الحوته بتاعتك لوحدها ليه  
أقرب عبد الرحمن ضاحكا وهو يقول:  
- حوته... لغتك العربية فوق الوصف يا إيهاب  
قالت فرحة بطفولية وهى تضع يديها فى خصرها:  
- لو سمحت متتريقش على جوزى  
ظل عبد الرحمن يمازحها فى حين اقترب إيهاب من إيمان وهمس فى أذنها:  
- بلاش تتصنعى السعادة تانى قدامى .. متنسيش أنى بحس بيكى  
نظرت له فى توتر ثم أنزلت نظارتها الشمسية على عينيها وهى تقول بمزاح مصطنع:  
- هتعملى فيها كرومبو.. يالا يابنى روح شوف مراتك

أمسكها إيهاب من ذراعها بقوة وألقاها فى اتجاه عبد الرحمن وهو يقول له :

- خد ياعم مراتك دى من هنا..

تلقى عبد الرحمن إيمان بين ذراعيه وأشار إلى إيهاب إشارة تحذيرية وهو يقول بمزاح:

- حذارى اشوفك فى المعركة

أخذ إيمان وهو يلف ذراعه حول كتفها واتجه إلى سور القارب الكبير ، أزاحت يده بلطف واستندت إلى السور وهى تنظر للمياة ، صمت قليلاً ثم التفت إليها متسائلاً:

- شيلتى أيدى ليه؟

قالت دون أن تلتفت:

- أبدا كنت عاوزه أسند على السور

سأل وهن يعرف الإجابة:

- أنت زعلانة مني؟

شعرت بجفاف حلقها وهى تقاوم الدموع قائلة بثبات :

- وهزل منك ليه

نظر إلى البحر شاردًا ، لا يعلم هل يعتذر الآن عن ما بدر منه ، أم ينتظر حتى يعودا إلى الفندق.

\*\*\*

أنقضت الرحلة وعادوا إلى الفندق مرة أخرى ولكن بمجرد أن دخلوا حتى وجدوا اتصالاً من وليد، رد عبد الرحمن فى قلق:

- خير يا وليد فى حاجة؟

وليد :

- لا أبدا كنت بظمن عليكموا بس

ثم تصنع التردد والأرتباك وهو يقول :

- طب اقفل انا بقى

ازداد قلق عبد الرحمن وقال:

- ما تكلم على طول يا وليد فى ايه حد جراه حاجة؟

وليد:

- انا مش عاوز اقلقك واقطع عليكوا شهر العسل بس انا عارف يوسف متعلق ببيك قد ايه  
وجودك جانبه هيساعده على الشفا

هتف به عبد الرحمن:

- ماله يوسف يا وليد ما تكلم

وليد:

- الدكتور قال عنده حمى جامدة أوى والمشكلة انه بقالوا كام يوم وحالتوا مش بتتحسن  
خالص بالعكس

أغلق عبد الرحمن الاتصال فى وجوم ، أقتربت منه إيمان وفرحة التى سالتة بقلق :

- فى حاجة يا عبد الرحمن.. أنا سمعت اسم يوسف

قال فى شرود وقلق:

- وليد بيقول تعبان وعنده حمى

أضطربت فرحة ولمعت عيناها بالدموع وهى تقول:

- يالا نروحله يا عبد الرحمن عاوزه اشوف يوسف

قال:

- خليكى أنتِ وانا هرجع مصر أظمن عليه وهبقى أكلمك اظمنك

قال إيهاب رافضاً:

- لا يا عبد الرحمن مينفعش .. أحنا ننزل كلنا نظمن عليه.. هروح اشوف فى حجز أمتى

\*\*\*

كانت عفاف تجلس بجوار مريم تحاول أن تطعمها شيئاً وهي ترفض فى ضعف قائلة:

- والله مش قادره أكل حاجة يا طنط .. معدتى وجعانى أوى من البرد

قالت عفاف بقلق:

- يابنتى ده انتِ دبلى خالص ووشك بقى اصفر من قلة الأكل

تدخلت وفاء قائلة :

- مش معقوله كده يا مريم كل يوم تغلبينا ومترضيش تاكلى حاجة ..مش شايفة نفسك  
أتعدمتى خالص ازاي

وضعت عفاف الأطباق على الطاولة أمام وفاء وقالت لها:

- خدى حاولى تأكليها أى حاجة على ما انزل أبص على يوسف زمان الدكتور جايله دلوقتى  
تنهدت وفاء فى قلق وهي تقول:

- انا مش عارفه ايه اللى حصلكوا انتوا الاتنين..هو عنده حمى ومفيش تحسن فى صحتوا  
خالص وانتِ رافضة تاكلى وتشربى بسبب النازلة المعوية..أنتوا اتحسدتوا ولا ايه يا مريم  
نظرت إليها فوجدتها شاردة وكأنها فى عالم آخر تحسست جبينها وقالت:

- مالك يا مريم انتِ تعبانة ؟

قالت فى شرود:

- لا أبدا بس محتاجة انام شوية

تفحصت وفاء فى وجهها وقالت:

- نفسى أعرف وشك اتجرح كده ازاي .. ده ربنا ستر على عنيكى

وضعت مريم يدها على الجرح بشكل تلقائى وهي تقول بتلعثم:

- أتخبطت فى مراية الحمام وانا بغسل وشى ومكنتش شايفة...

ثم أردفت فى سرعة:

- طب أنا هقوم ارتاح شوية يا وفاء



تركها وفاء لتنام وهبطت لشقة عمها وعندما رأتها والدتها أخذتها بعيدا وقالت:

- أیه یافاء مش قلتی هتحددی معاد مع العريس...مجيتيش قولتلی المعاد لیه وفاء:

- یاماما عريس أیه فی الی احنا فیہ ده دلوقتی.. مش لما نطمن علی یوسف الأول ضغطت فاطمة علی یدها قائلة:

- یابنتی ما هو مسیره هیخف .. النهاردة ولا بکره هیخف.. نأجل لیه بقی حاولت وفاء أن تتخلص من ذراع أمها وهی تقول:

- یا ماما سیبینی دلوقتی مش وقته الکلام ده أقتربت عفاف منهما وقالت متسائلة:

- فی أیه یا جماعة مالکوا قالت فاطمه بسرعة:

- شوفتی یاختی البت وفاء متقدملها عريس ومستعجل أوی أوی .. والبت یا عین امها رافضة انه یجی البیت علشان خاطر یوسف.. اقولها یا وفاء ده یوسف راجل انا عارفاه حمال قاسية وهتلاقیه قام زی الحصان النهاردة ولا بکره بالکثیر.. تقولی لا یا ماما لما نطمن علیه الأول

رفعت عفاف حاجبیها بعدم اقتناع وقالت لوفاء:

- لیه یابنتی.. لا انا میرضنیش کده أبدا یا وفاء.. کلمیه وخليه یجی فی أی وقت ومتقلقیش یابنتی إن شاء الله یوسف هیتحسن قریب..

أنهت عبارتها وانصرفت علی الفور، نظرت فاطمة إلی وفاء فوجدتها تنظر لها باستنکار شدید فقالت:

- ایه یابت بتبصیلی کده لیه ما هی کانت لازم تعرف ولا یقولوا جوزوا عیالهم وانا بنتی قاعدة کده

ضغطت وفاء علی أسنانها بغیظ وذهبت ولكنها اصطدمت بوالدها الذی قال:

- مالك يا وفاء واخذه فى وشك كده ليه

وفاء:

- ابدأ يا بابا بس رايحة اشوف طنط عفاف لو كانت محتاجة حاجة ..عن أذنك

أستغلت فاطمة الموقف واقتربت منه وقالت :

- أصلها زعلانة يا ابو وليد علشان موضوع العريس ده

قطب إبراهيم جبينه متسائلاً :

- ليه أيه اللي حصل

فاطمة:

- أبدأ أصله كان حدد معاد معاها يجيلك بكرة وهى محرجة ومش عارفة تعمل أيه

قال إبراهيم فى تفكير :

- هيجى ازاي بس فى الظروف دى

قالت فاطمة محاولة إقناعه:

- هو يعنى هيجى نلبس دبل ولا نعمل فرح.. ده هيجى يقعد معاك تشوفه بس مش أكثر

وتتعرف عليه .. قاعدة عادية كده زى أى ضيف ما بيحى

صمت إبراهيم يفكر فى الأمر ثم قال:

- خلاص متخليهاش تلغى المعاد .. يجى ويقعد معايا ساعة زمن كده ويمشى.. لما نشوف

ميته أيه

أبتسمت فاطمة بانتصار ونادت على وفاء التى جاءت متبرمة:

- أفندم يا ماما

- خلى العريس يجى بكرة.. أبوكى حدد المعاد خلاص

أتسعت عيناها فى ذهول وقالت:

- ليه كده بس يا ماما.. مش هينفع طبعاً قولى لبابا يأجل

قالت فاطمة فى مكر:

- عموما أبوكى عارف أن المعاد العريس هو الذى حدده.. يعنى لو روحتى وقتيله انه لغى المعاد هيفتكر انه راجل بيرجع فى كلامه وهيرفضه من قبل ما يشوفه

زفرت وفاء فى ضيق وقالت :

- ليه كده بس يا ماما عملتى كده ليه

- بكره تعرفى انى عاوزه مصلحتك.. يالا روحى كلميه بسرعة

\*\*\*

وبعد ظهر اليوم التالى تفاجأ الجميع بعودة عبد الرحمن وإيهاب وإيمان وفرحة ، قبل عبد الرحمن كف أمه وأبيه الذى سألته بدهشة:

- أيه الذى جابكوا دلوقتى يا عبد الرحمن

عبد الرحمن:

- مقدرناش نستنى لما عرفنا ان يوسف تعبنا

قال الحاج حسين باستنكار :

- مين الذى قالكوا انه تعبنا

قالت فرحة :

- وليد كلمنا وقالنا انه تعبنا أوى وعنده حمى

هتف حسين بضيق :

- وأيه الذى خلاه يعمل كده.. هو خلاص بقى كل واحد يتصرف من دماغه

قال عبد الرحمن مهدئاً:

- أهدى يا بابا.. هو عارف ان يوسف هيتحسن لما يشوفنى.. يعنى أكيد قصده خير

ثم تابع قائلاً:

- عن أذنك يا بابا ادخله

دخل ثلاثتهم إلى يوسف وانتظرت إيمان فى الخارج قليلا ثم قالت :  
- أنا هطلع اشوف مريم

\*\*\*

أما فى الداخل فى غرفة يوسف ، كان يجلس بصعوبة وهو يضم أخيه بقوة ، اتسعت ابتسامته عفاف وهى تقول :

- اللهم لك الحمد ، ده أول مرة يتحرك دلوقتى لما شافك يا عبد الرحمن

تحسس عبد الرحمن جبين يوسف وقال:

- الحرارة عالية شوية

تحسسته عفاف وهى تقول بسعادة:

- دى كده نزلت شوية الحمد لله.. أيدك فيها البركة يا عبد الرحمن..

تقدم إيهاب من يوسف وقال :

- لا بأس طهور ان شاء الله.. ربنا يقومك بالسلامة يا يوسف

لم يستطع يوسف أن ينظر إلى عيني إيهاب وتمتم بضعف:

- متشكر يا إيهاب ..

نظر إلى أخيه قائلا بخفوت:

- انتوا ايه اللى جابكوا من شهر العسل

قال إيهاب على الفور:

- شهر عسل أيه وانت تعبان كده يا يوسف.. أنت أهم من أى حاجة تانية

شعر يوسف بكلمات إيهاب تمزق قلبه وتكوى عروقه ، لعن نفسه وهو يستمع لكلماته الصادقة، كاد أن يهتف "تركناها بيننا لنحميها فغدرت بها فى غيابك كأي كلب مسعور يتجول فى الطرقات لينهش الأعراس"

طال صمته فـشعر إيهاب أنه ربما يود التحدث مع أخيه على انفراد فقال :

- طب استأذن انا بقى.. هطلع اشوف مريم

حاول يوسف القيام ولكنه لم يستطع فـساعده عبد الرحمن على النوم فى الفراش مرة أخرى وهو يهتف بإيهاب:

- أستنى يا إيهاب عاوزك فى موضوع مهم

أقبل عليه إيهاب وهو يقول بقلق:

- أستريح بس يا يوسف شكلك تعبان أوى

حاول يوسف الأبتسام وهو يقول:

- الموضوع اللى عاوزك فيه لو وافقت عليه هخف على طول واستريح  
قال إيهاب بآنتباه:

- خير يا يوسف أوامر انا عنيه ليك

- أنا مش عاوز عنيك انا عاوز الأعلى من عنيك عندك .. عاوز اتجوز مريم

أبتسم إيهاب فى حين قال عبد الرحمن مداعبا:

- تصدق انا غلطان أنى اتخضيت عليك.. بقى تعبان كده وعاوز تتجوز  
يوسف :

- أصلى بصراحة كنت عاوز أكلم إيهاب فى الموضوع ده قبل ما يسافر.. بس قلت أأجل لما  
يرجع من شهر العسل بس طالما جه خلاص نأجل ليه

قال إيهاب بتعاطف:

- طب لما تتحسن كده نبقى نتكلم

قال يوسف بأصرار:

- لا أنا مش هتحسن إلا لما ترد عليا

ألـتفت له عبد الرحمن وهو يقول:

- رد عليه يا عم خلىنا نخلص

أبتسم إيهاب وقال:

- أنا مش هلاقى لاختى أحسن منك يا يوسف .. بس لازم آخد رأيها الأول وكمان عمى لازم أسمع رأيها الأول

قال يوسف على الفور :

- أنا كنت اتكلمت معاه قبل كده وهو موافق ومستنى موافقتك انت ومريم

\*\*\*

أندفعت مريم بين أحضان إيمان وبكت بشدة وهى تتشبث بها بقوة، شعرت إيمان بالقلق على أختها فربتت على ظهرها ثم أمسكت وجهها بين يديها ونظرت فى وجهها متفحصة آياه وقالت بقلق:

- مالك يا مريم.. فى حاجة حصلتلك ولا آيه؟ مالك كده لونك مخطوف وآيه الجرح اللى فى وشك ده؟

قالت مريم من بين دموعها:

- مفيش حاجة يا إيمان متقلقيش .. أنت بس وحشيني أوى أنت وإيهاب حسيت من غيركوا انى ضايعة وماليش حد

أبتسمت إيمان وهى تجلس بجوارها وتلف ذراعها حول كتفها وقالت:

- ليه بس .. او مال عمى حسين وعمى ابراهيم وطنط عفاف كل دول مش معاكى

مريم :

- مهما كان مش زيكوا برضة يا إيمان

تحسست إيمان الجرح فى وجه مريم وقالت:

- من آيه ده

قالت مريم بارتباك:

- ابدا اتجرحت فى مراية الحمام

وتابعت :

- وبعدين ده حاجة بسيطة يعنى بكره يخف

ضمتها ايمان بحب وقالت :

- أحكىلى بقى عملتى أيه اليومين اللى فاتوا دول..

قاطعها طرقات إيهاب المنغمة على الباب ، نهضت إيمان وفتحت الباب لإيهاب فدخل مبتسماً ولكنه بمجرد أن رأى مريم عقد حاجبيه قائلاً:

- أيه ده مالك يا مريم

قالت إيمان على الفور :

- جالها نازلة برد جامدة يوم الفرح .. وطنط عفاف قالتلى انها من ساعتها مش عاوزة تاكل

عادا مرمحه تسترخى ثانية وسألها نفس السؤال عن جرحها فقالت :

- مراية الحمام الله يسامحها خدتنى على خوانه وانا مغمضة عنه

أحتضنها إيهاب وهو يقول :

- وحشتينى أوى يا مريم مكنتش أعرف أنك هتوحشينى أوى كده.. هقولك بقى على خبر

هيخاليكى تاكلى أكل البيت كله

رفعت رأسها من صدره وقالت :

- خير يا إيهاب

قال إيهاب مبتسماً:

- يوسف طلبك منى دلوقتى

أطرت مريم برأسها وأغمضت عينيها وأضاءت صورته فى عقلها وهو يدفعها للخلف

فانتفضت بدون وعى منها، نظر لها إيهاب بقلق:

- مالك؟

حاولت مريم السيطرة على مشاعرها وهى تقول متصنعة الخجل:

- أبدا يا إيهاب وانت قتلته ايه

- قتلته لما اسالك الأول

وقفت إيمان بشكل عنيف وهى تقول بحسم:

- لاء ... أنا مش موافقة

\*\*\*\*

## الفصل العشرون

- لاء..أنا مش موافقة

نظر لها إيهاب مندهشاً وقال:

- ليه يا إيمان ..أنت تعرفى حاجة عن يوسف تخليكى ترفضى

كانت مريم تنظر إليها بوجه ممتقع وهى تقول:

-لا معرفش حاجة ... أنا بقول وجهة نظرى وخلاص

إيهاب:

- طب أيه هى وجهة نظرك دى يمكن اقتنع بيها أنا كمان

أرتبكت إيمان وهى تقول:

- أنا بس خايفة تكون دى رغبة عمى حسين مش رغبة يوسف نفسه

زاد امتقاع وجه مريم وزادت ضربات قلبها بشدة فكل منهما تفكر بشىء مختلف عن الأخرى

هز رأسه نفيا وقال:

- لا مفكرش يا إيمان لو كان كده فعلا كان يوسف استنى لما يخف .. وبعدين يوسف قالى

أنه قال لو والده وهو موافق وبعدين احنا كل ده مسمعناش رأى مريم نفسها

ثم نظر إليها قائلاً:

- ها يا مريم انتِ أيه رايك؟

قررت مريم حسم الخلاف فجميعهم لا يعلمون ما حدث وهذه الزيجة لن تكون إلا للستر فقط

ويوسف فى كل الأحوال مضطر إلى الزواج منها، فوقفت وهى تقول بخفوت:

- أنا موافقة

صاحت إيمان وهى تلتفت إليها قائلة:



- أنتِ هبلّة ولا أيه؟.. أنتوا شخصيتكوا مختلفة تماما عن بعض ومكانش فى بينكوا أى  
عمار أساسا ولا ناسية.. فجأة كده عاوز يتجوزك.. مش تشغلى مخك أكيد عمى هو اللى ضغط  
عليه زى ما عمل مع...

وبترت عبارتها وهى تنظر إلى مريم وإيهاب ثم قالت بعصبية :  
- أنتوا حرين .. أنا قلت رأيى وخلاص

ودخلت غرفتها وتركتهما يتبادلان النظرات الحائرة  
طرق وليد باب غرفة يوسف ودخل مبتسما دون أذن وهو يقول:  
- أزيك النهاردة يابن عمى

ثم وقع بصره على عبد الرحمن فقال مبتهجا وهو يعانقه :  
- وأنا أقول البيت نور ليه أتاى العرسان رجعوا  
عانقه عبد الرحمن وهو يقول:

- ما انت السبب ياخويا  
وليد:

- طبعا ياعم مين قدك لازم تبقى مضايق أنك رجعت  
أقترب وليد من فراش يوسف وجلس على طرفه قائلا:  
- ها عامل أيه النهاردة

أشاح يوسف برأسه بعيدا وقال باقتضاب:  
- الحمد لله

نظر لهما عبد الرحمن وقال:

- طب أروح أنا بقى أشوف حالى  
قال يوسف رافضا:

- لا أستنى يا عبد الرحمن عاوزك فى موضوع مهم  
وقف وليد متحرجا وقال:

- طب استأذن انا بقى يا جماعة .. حمد لله على سلامتك يا صاحبى  
ثم خرج وأغلق الباب خلفه.. قال عبد الرحمن بعتاب:

- ليه كده يا يوسف أخرجته جامد  
أشاح يوسف بوجهه:

- مبقتش طايقه يا عبد الرحمن بقى عامل زى الكابوس على صدرى  
قال عبد الرحمن مستفهما:

- ليه هو عمل حاجة ضايقتك  
قال يوسف باقتضاب:

- تصرفاته كلها بضايقتى .. انا مش عارف كنت مصاحبه ازاي  
غير عبد الرحمن مسار الحديث وقال بجدية:

- طب قولى بقى انت عاوز تتجوز مريم بجد ولا ابوك هو اللى ضغط عليك  
أمتقع وجهه وهو يقول:  
- وبابا هيضغط عليا ليه فى حاجة زى كده  
عبد الرحمن:  
- طب الحمد لله.. عموما أنا كنت عارف أنك بتحبتها بس كنت عاوز أتأكد  
نظرله يوسف بانتباه قائلا:  
- وعرفت ازاي  
غمز عبد الرحمن له وهو يقول:  
- أبوك هو اللى قالى ..اه يا ندل بقى ابوك يعرف وانا لاء  
قال يوسف مندهشا:  
- بابا قالك كده امتى

عبد الرحمن:  
- واحنا راجعين من العمره ..قالى أنه حاسس أنك بتحبتها  
صمت يوسف فى شروء فقال عبد الرحمن:  
- بس انت الحمد لله حاسس أنك بقيت أحسن من أول ما شفتك بكثير.. ما تحاول تقوم كده  
معايا تاخد دش وننزل الجنينة شوية  
خرجت فرحة من شرفة غرفة يوسف وهى تقول:  
- هو مين اللى خرج دلوقتى  
عبد الرحمن :  
- أنتِ لسه فاكركه يا هانم..حبك الكلام فى التليفونات دلوقتى  
قالت فرحة وهى تجلس بجوار يوسف:  
- بكلم صاحباتى بقى مش خلاص اطمنا على يوسف الحمد لله  
ربت يوسف على يد فرحة وقال:  
- قوليلى ايهاب عامل ايه معاكى  
أبتسمت فرحة فى خجل وقالت:  
- الحمد لله يا يوسف إيهاب انسان جميل أوى وبيحبنى جدا  
أوما يوسف فى حزن وهو يقول:  
- ربنا يسعدكوا

\*\*\*

- يا إيمان متخبّيش عليا.. أنتِ في حاجة بينك وبين عبد الرحمن يابنتي ده أنا أخوكي وعارفك كويس .. أنتِ من أمتي يعني عصبية كده

زفرت إيمان بقوة وقالت باقتضاب :■

- لو سمحت يا إيهاب كفاية وبعدين حتى لو في حاجة بيني وبين جوزي مش هقولها لأي حد أبدا ولا حتى لآخواتي  
قال إيهاب بقلق:

- يا إيمان يا حبيبتي أكيد اللي زعلك منه حاجة كبيرة.. ده أنتوا لسه مكملتوش أسبوع مع بعض .. قوليلي أنا ليه طريقة معاه ومتقلقيش مش هتحقق عليه

هتفت إيمان بضيق:

- سبني يا إيهاب لو سمحت عاوزة انام تعبانة من السفر أوي  
وضع قبله على رأسها وقال بحنان:

- كمان هتنامي هنا.. وهتسيبي شقتك؟ عموما خلاص أنا مش عاوز أعرف براحتك خالص  
بس لو احتاجتي تتكلمي أنا موجود...أنا هروح شقتي مش عاوزة حاجة؟

غادر إيهاب إلى شقته الخاصة وهو في حيرة من أمرها، حاول الاتصال بفرحة ولكن هاتفها مشغول دائما، هبط إلى شقة عمه طرق الباب ففتحت له عفاف قالت مرحبة :

- تعالى يا إيهاب ادخل

وعند دخوله وجد يوسف يخرج من حجرته وهو متكأ على كتف أخيه ويمشي ببطء قال  
إيهاب في سعادة:

- أيوه كده يا راجل قوم ورخم علينا تاني  
أبتسما عبد الرحمن ويوسف وقال إيهاب:

- ها كنتوا رايعين فين

عبد الرحمن:

- يوسف هيدخل ياخد دش وننزل الجنيينة شوية يغير جو.. تيجي معانا؟  
إيهاب:

- اجي وانا بيهمني يعني  
قالت عفاف متسائلة:

- أومال فرحة فين

عبد الرحمن:

- في البلكونة جوه بتكلم صاحباتها  
أوما إيهاب قائلا:

- انا قلت كده برضة

دخل يوسف الحمام وجلس عبد الرحمن بجوار إيهاب واستند إلى ظهر مقعده الوثير وأغمض عينيه يحاول الأسترخاء ، تصنع إيهاب الامبالاة وقال:

- مش عارف يا اخى ايمان بقت عصبية كده ليه

أنتبه عبد الرحمن وفتح عينيه والتفت إلى إيهاب قائلاً باهتمام:

- ليه حصل ايه؟

مط إيهاب شفتيه وقال:

- لما قلت لمريم على طلب يوسف لقيتها كده اتعصبت وقالت الاتنين طباعهم مختلفة

ثم نظر إلى عبد الرحمن وتفحص فى عينيه وهو يتابع:

- وقالت ان ممكن يكون عمى حسين هو اللى ضغط عليه

هرب عبد الرحمن ببصره وقال بحذر :

- وأيه اللى خلاها تفتكر كده

عقد إيهاب يديه أمام صدره وتنهد بقوة قائلاً :

- مش عارف أنا أول مرة اشوفها منفعة كده

خرجت فرحة من غرفة يوسف فرأتها يجلسان بجوار بعضهما والصمت هو سيد الموقف فقالت:

- وحدووه

ألقت إيهاب إليها ونظر لها نظرة شوق طويلة أخفضت بصرها فى خجل وهى تقول:

- أو مال فين يوسف

قام إيهاب وهو يقول:

- بياخد دش يا برنسية

رفعت حاجبها وهو تقول:

- بتتريق حضرتك

قال بعتاب:

- لا وهتريق ليه .. هو لا سمح الله انا بتصل بيكى من بدرى وانت تليفونك مشغول ولا فكرتى

تعبرينى من ساعتها .. لالالا محصلش طبعاً

قالت بعناد:

- بكلم أصحابى يا إيهاب بلاش يعنى

- لا بلاش ليه كلميهم بس ابقى أفكرينى بكلمتين انا كمان

قالت بدلال:

- طب خلاص متزعلى هفتكر بتلات كلمات

أمسكها من يدها وقال لعبد الرحمن :

- طب يا عبد الرحمن عاوز حاجة أحنا ماشين

رفع عبد الرحمن حاجبيه قائلاً:

- أنت مش قلت هتيجى معانا تحت يابنى

قال ايهاب بدهشة مصطنعة:

- أنا قلت كده.. مش فاكّر أصل انا ساعات بتكلم وانا واقف .. أدعيلى ربنا يشفينى  
وسار بخطوات سريعة وهو يجر فرحة من يدها وهى تكاد تكون تعدو خلفه لتلحق بخطواته  
الكبيرة

\*\*\*

وفى المساء بينما كانت إيمان لاتزال نائمة، انتبهت على صوت مريم وهى توقظها بهدوء  
أعتدلت وهى تمسح وجهها لتزيل آثار النوم عنه فقالت مريم بخفوت:

- كل ده نوم .. أنت مش هتروحي شقتك ولا ايه  
قالت إيمان بجدية:

- لا مش هروح

نظرت لها مريم بحيرة وقالت:

- ازاي يعنى يابنتى مينفعش

إيمان:

- مش هينفع أسيبك وانتِ تعبانة كده

مريم:

- لا متلككيش بيا انا بقيت كويسة من ساعة ما شفتكوا.. يالا بقى روحى شقتك  
قالت إيمان بسخرية:

- من ساعة ما شوفتينا ولا من ساعة ما عرفتى ان يوسف عاوز يتجوزك

أطرقت مريم رأسها بحزن فرفعت إيمان رأسها بيدها وقالت:

- أنت مخبية عليا حاجة.. انتِ مش مريم اللى اعرفها

صمتت مريم فتابعته إيمان:

- موافقة عليه ليه .. بتحبيه ولا ماما أقنعتك

هزت رأسها نفيا وهى تقول:

- ماما مالهاش دعوة بالموضوع ولسه أصلا متعرفش أنه طلبنى للجواز

قالت إيمان برفق:

- طب حبتيه أمتى ده ... ده أنتوا مكنتموش طايقين بعض

شعرت مريم بجفاف حلقها ونغز شديد فى صدرها وهى تقول بتماسك:

- حبيته لما عرفت انه بيحبنى

تابعت إيمان متسائلة:

- هو قالك انه بيحبك؟

أجابتها مريم بجمود:

- ايوه قالى

ثم شردت وهى تقول:

- قالى يوم فرحك انت وايهاب

سمعت صوته يدوى فى عقلها يزلزلها وهو يقول "أنت متستهليش الحب اللى حبت هولك يا حقيرة"

فوضعت كفها على أذنيها بانفعال بشكل لأرادى ، أمسكت ايمان يديها وهى تقول بقلق :  
- مالك يا مريم

رفعت عينيها وهى تقول باجهد وكأنها كانت تحارب :

- لا مفيش أظاهر أن ودنى ملتعبة شوية.. أنا هقوم ارتاح فى أوضتى

قضت ايمان ليلتها تصلى وتبكي بين يدى الله عزوجل وقلبها تعتصره الآلام ، هو حتى لم يسأل عنها ولو لمرة واحدة منذ أن تركته فى الأسفل وصعدت إلى أختها، شعرت بكبرياء أنوثتها يتحطم على صخرة هذه الزيجة الغير مرغوب فيها ، وأخذت تدعو وتدعو وظلت على حالها هكذا حتى غفت مرة أخرى وهى ساجدة ، فرأت رؤية أثلجت قلبها كثيرا  
رأت نفسها ساجدة وهى باكية العيون والقلب ثم رأت من بعيد حمامتان فى غاية الروعة والجمال شفافتان كالثلج من شدة بياضهما يحملان صدفة كبيرة بينهما فوقفا أمامها فوجدت نفسها تنهض وتعتلى الصدفة المصقولة بالحرير ، طارت بها الحمامتان بعيدا حتى أتت على أرض خضراء واسعة مليئة بالزهور والرياحين ، ظلت تشم وتستنشق عبيرها وشذاها حتى استفاقت من سجودها فوجدت نفسها كما هى لازالت ساجدة ، فابتسمت لتلك الرؤية الرائعة وشعرت بسعادة قلبية ورضى لم تشعر بهما من قبل.

خرجت إلى الشرفة لتتنسم الهواء الطلق وتستنشقه بقوة حتى امتلأت رئتيها بالهواء النقى فزفرت فى بطء شديد وهى تنظر إلى الأسفل ، وجدته نائما تحت المظلة فى الحديقة واضعا يديه تحت رأسه وينظر إلى السماء فى شروود

\*\*\*\*\*

تلقى الحاج حسين اتصالاً من أخيه وهو فى مكتبه فى الشركة فأجابه :

- السلام عليكم

الحاج ابراهيم :

- عليكم السلام .. أيوا يا حسين انا هروح اتغدى فى البيت علشان فى ضيف جايلى واحتمال مرجعش النهاردة تانى ... وعموما وليد مش جاى معايا هيفضل هنا فى مكتبى لو احتجت حاجة منه

قال حسين بانتباه:

- خير يا ابو وليد مين اللى جايلك

ابراهيم:

- ده واحد معيد كان فى كلية وفاء وجاى يتعرف علينا هو ووالدته وأخوه علشان طالبها للجواز

أبتسم حسين قائلا:

- طب مش كنت تقولى يا ابراهيم واجب ابقى موجود علشان اشوفه انا كمان ولا هى وفاء بنتك لوحدك

ابراهيم:

- أنا مرضتش اعطلك النهاردة انت كنت مشغول من ساعة ما يوسف تعب وفى شغل كثير بقى فوق راسك وخصوصا ان عبد الرحمن هو كمان أجازة

حسين :

- تعطننى ايه بس يا ابراهيم ...أسمع انا نص ساعة واحصلك

أنهى حسين المكالمة ثم اتصل على عبد الرحمن يخبره بأمر الضيف وأمره أن يستعد

لاستقباله مع عمه ابراهيم حتى يلحق بهم

صعدت فاطمة إلى عفاف التى رحبت بها فقالت فاطمة:

- والله يا عفاف أنا تعبت من كثر الناس اللى بتيجى لوفاء يارب بقى توافق على ده وتريحنا أبتسمت عفاف وقالت:

- طالما جاى عن طريقها يبقى هتوافق....

ثم تابعت :

- هو الحاج حسين وصل عندكوا ولا لسه

فاطمة :

- ايوا ياختى لسه داخل حالا .. يالا بقى هاتى فرحة وإيمان ومريم وتعالوا علشان الست والدته جاية معاه

عفاف:

- طب ثوانى هكلم إيمان ومريم ينزلوا

حاولت إيمان أن تأخذ مريم معها ولكنها رفضت وقالت :

- معلى يا ايمان انزلوا انتوا.. انا اصى تعبانة شوية

ايمان:

- خلاص وانا كمان مش هنزل

قالت مريم بسرعة:

- لا أنزلى طنط عفاف كلمتنا بنفسها كده هتزلعل وبعدين كمان علشان وفاء متزعلش  
توجهت ايمان إلى الطابق الأول حيث شقة عمها إبراهيم التى نادرا ما تتوجه إليها، طرقت  
الباب ففتح عبد الرحمن ووقف ينظر إليها فقالت وهى تتحاشى النظر إليه :

- السلام عليكم

أبتسم قائلا:

- عليكم السلام ..تعالى ادخلى

دخلت وألقت التحية على أعمامها وزوجاتهما وفرحة ووفاء التى جلست بجوارها وقالت  
مداعبة :

- مش كنتى بتقولى عليه فيونكة أدكى هتلبسيه

ضحكت الفتاتان فنظر عبد الرحمن لإيمان مندهشا ، كان يتوقع أن تكون حزينة ومغلوب  
على أمرها ولكنه وجدها تتحدث وتمزح وتضحك، ظل ينظر إليها بتعجب وهو يحدث نفسه:  
- أنا كنت فاكرها هتبقى زعلانة ومضايكة مالها كده كأنها مصدقت أبعد عنها

بعد قليل حضر العريس بصحبة والدته وأخيه وبعد التعارف جلس الجميع فى غرفة الصالون  
الكبيرة ولم يكن يبدو على وفاء أنها هى العروس فكانت كعادتها دائما تمزح وتتكلم بسلاسة  
مع الجميع.. قال عبد الرحمن للعريس:

- طبعا أنت بقى يا أستاذ عماد .. وفاء كانت مجنناك فى الكلية والسكاشن مش كده..

مبتسبش حقها أبدااااا

قال عماد وهو ينظر لوفاء:

- الآنسه وفاء مثال رائع للطالب اللى بيحب يفهم مش يحفظ وبس

ثم تابع بمزاح:

- ومن ناحية بتحب تاخذ حقها فهى بتاخذ حقها تالت ومثلت

وفاء :

- بس بالعدل كده ..مش انا أول واحدة فتحت موضوع اننا نعمل مقارنة بين الشريعة

والقانون الوضعى فى غير وقت السكاشن للطلبة

ضغطت أمها على يديها وقالت لها هامسة وهى تتصنع الأبتسامة:

- هو ده وقته يا بت هتجيبلى نقطة

وفاء:



- ايه يا ماما هو انا قلت حاجه غلط  
عفاف:

- دى كانت يابنى داوشانا بالموضوع ده كل جمعه لازم تاخذ وقت الغدا كله كلام على الحكايه  
دى

قالت وفاء وكأنها قد انتبهت فجأه:

- اه صحيح

ثم أشارت لايمان وقالت :

- دى بقى ايمان اللى كنت قلتك أنها هتساعدنى فى الدراسة دى  
نظر لها عماد قائلا:

- ايه ده بجد ... أتشرفت بيكى جدا هو حضرتك خريجة أيه  
قالت ايمان بجدية:

- كلية شريعة جامعة الازهر

لفتت عبارتها الأخيرة نظر محمد أخو عماد فقال:

- ماشاء الله .. انا كمان جامعة الازهر بس أنا كنت قسم تفسير

قالت ايمان بهدوء :

- اهلا وسهلا

محمد :

- اهلا بحضرتك

أقربت والدة عماد ومحمد بالقرب من إيمان وربتت على ظهرها وهى تقول بابتسامة:

- هو أنتِ عندك كان سنه يا ايمان

- ٢٣ يا طنط

قالت والدتهما وهى تنظر لابنها محمد :

- ماشاء الله ... ماشاء الله

أبتسم محمد وهو يلقي نظرة أخرى على ايمان قائلا:

- بصراحة عماد أخويا كانت ليه وجهة نظر معينة كده فى الحكاية دى.. ومكنتش عارف

أقنعه لحد ما الآتسه وفاء أبتدت تتناقش معاه وتقنعه بالحجة المناسبة لزمانا دلوقتى

قالت وفاء:

- الحق يقال يا أستاذ محمد كل اللى كنت بقوله فى مناقشاتى مجبتوش من عندى ده كلام

ايمان بنت عمى هى اللى أقنعتنى وحمستنى أنى أوصله للطلبة عندنا فى حقوق

قال عماد شارحا:

- وانا كمان أتحمست وقررنا نعمل ندوات ثقافية للطلبة وهيبقى حقوق وغيرها .. الندوة

هتبقى مفتوحة .. ياريت لو تساعدنا فى تجميع المادة اللى هتكتب وتتوزع على الطلبة

تحدثت ايمان بطلاقة وأريحية وقالت:

- انا مغديش مانع خالص.. أنا كان نفسى من زمان أساعد فى الموضوع ده .. هبقى إن شاء الله ابعت الورق مع وفاء وانتوا بقى راجعوه واكتبوه على الكمبيوتر علشان انا بحب اكتب بخط أيدى بحس بالكلام اكرر  
قال محمد وهو ينظر لها بإعجاب:  
- وبعد اذنك يعنى لو ممكن حضرتك تحضرى معانا الندوات دى وتشرحى بعض الأجزاء بنفسك ثم قال وهو ينظر إليها:  
- اصلك عندك طلاقة فى الكلام ماشاء الله وبتقدرى توصلى المعلومة  
نظرة محمد الأخيرة وتصرفات والدته استفزت عبد الرحمن جدا فنهض وأخذ مقعده ووضع  
بجوار مقعد ايمان ووضع ذراعه على ظهر مقعدها ومال عليها وقال وهو يضغط حروف  
كلماته بضيق موجهها حديث لـ محمد:  
- ايمان.. مرأتى .. معندهاش وقت تروح تشرح كفاية عليها هتساعد بالكتابة بس يدوب كده  
علشان وقت بيتها  
وأشار إلى صدره وهو يتابع:  
- وجوزها  
تجهم وجه محمد أخو عماد وهو يقول بتلعثم:  
- اه طبعا مفيش مشكلة  
تجهم وجه محمد استفز عبد الرحمن أكثر، إذن فهو صدم عندما علم أنها متزوجة  
لم تغب تلك التصرفات عن عيني الحاج حسين الذى كان يتابع بصمت ويراقب ردود الافعال  
قالت فاطمة بنفاد صبر:  
- منور يا عريس... منوره يا ام عماد مش نتكلم فى التفاصيل بقى ولا أیه  
أنتهت الزيارة بالاتفاق على ميعاد الخطوبة بعد أسبوع وبعد انصراف الضيوف قال الحاج  
حسين وهو ينهض:  
- خلاص يا جماعة يبقى نتوكل على الله ونعمل الخطوبة مع كتب كتاب يوسف ومريم  
تفاجاء الجميع بالأمر ماعدا عبد الرحمن وايمان فقالت فرحة بسعادة:  
- ايه ده يوسف ومريم امتى حصل ده  
أتسعت أبتسامة عفاف وهى تقول:  
- هو كلمك امتى يا حسين  
- كلمنى يوم فرح عبد الرحمن وطلبها من أخوها امبارح وإيهاب بلغنى موافقتها  
ثم نظر إلى ايمان نظرة ذات معنى وقال:  
- وفرحهم الأسبوع اللى جاى مع خطوبة وفاء إن شاء الله  
قالت فاطمة وهى مندهشة:  
- فرح كده على طول ولا قصدك كتب كتاب يا حاج  
تدخلت عفاف قائلة:

- مش هينفع فرح أبدا بعد أسبوع .. مريم لسه مشمتش نفسها من نازلة البرد اللى كانت عندها

وقف إبراهيم وقال:

- خلاص يا جماعة يكتبوا الكتاب مع خطوبة وفاء وبعدين نبقي نحدد معاد الفرح مفيش مشكلة

قاطعتهم وفاء بشغف:

- أنا ماليش دعوة بكل الحوارات دى.. أنا اتخطبت يا جماعة انتوا مش واخدين بالكوا مني ليه مسمعتش حد بيزغرت يعنى

أنطلقت زغاريد فاطمة وعفاف مع تصفيق فرحة وضحكات إيمان ووفاء السعيدة أقترب حسين من إيمان قائلا:

- تعالى معايا عاوزك انت وجوزك

وانصرف وهو يشير لعبد الرحمن بأن يلحقهما، دخل ثلاثتهم غرفة المكتب وأغلق عبد الرحمن الباب خلفه ، أشار لهما بالجلوس فى مقابلته ثم نظر لإيمان بصمت فقال عبد الرحمن:

- خير يابابا

ألتفت له والده وقال بهدوء:

- أنا كان ممكن مدخلش.. وكان ممكن آخذ كل واحد فيكم على جنب واكلمه لوحده.. بس انا عارف أنى قاعد قدام اتنين كبار بما فيه الكفاية ثم نظر إلى إيمان قائلا:

- ولا أيه يا إيمان؟

أومات برأسها موافقة فالتفت إلى عبد الرحمن وقال:

- أنت نمت امبارح فى الجنينة ليه لحد صلاة الفجر وبعدين روحت كملت نومك فى أوضة اخوك؟

نظر له عبد الرحمن بدهشة فهو كان يظن أن أحدا لم يره وارتبك وهو يفكر فى رد مناسب فقالت إيمان بسرعة:

- أصل أنا امبارح يا عمى نمت مع مريم علشان زي ما حضرتك عارف انها لسه مخفتش فمحببتش اسيبها لوحدها وهى كده.. وحضرتك عارف بقى عبد الرحمن بيحب يقعد مع

حوض الورد بتاعه كتير فتلاقيه النوم غلبه هناك

أخفض عبد الرحمن نظره ولم يعلق ولكنه فى داخله أعجب بكتمانها أسرار حياتهما الشخصية، هز الحاج حسين رأسه بابتسامة وقال:

- لا برافوا .. كان المفروض تدخلى كلية حقوق .... خلاص طالما انتِ قلتى كده أنا مش هدخل فى اللى بينكوا إلا لو الأمر احتاج لتدخلى

دلوقتي بقى انا عاوزك فى موضوع مريم اختك ... وأعتقد انه مش بعيد عن موضوعك كتير قالت بصمود:

- موضوع ايه يا عمى

حسين:

- ايهاب قالى أنك رفضتى جوازها من يوسف ولما ضغطت عليه علشان اعرف أسباب رفضك قالى أنك قلقانة أنه يكون يوسف معندوش رغبة حقيقة فيها ..وأن دى رغبتى انا بس قال جملته الأخيرة وهو ينظر لعبد الرحمن بعتاب وقال:

- أنت أيه رايك يا عبد الرحمن؟

نهض عبد الرحمن وهو ينظر لايمان وقال بثقة:

- مفيش حد بيتعصب على الجواز دلوقتى يا بابا واعتقد أنك غلطانة فى حكمك يا ايمان نهضت وهى تنظر إليه وقالت:

- انت متأكد

بادلها نفس النظرات وقال:

- أيوه متأكد

هذا ما كان يريدہ الحاج حسين تماما ، فتح لهما مجال الحديث عن الأمر بدون حرج وبشكل تلقائى..ثم قال:

- ها يا ايمان لسه مش موافقة على الجواز ولا غيرتى رأيك ايمان:

- يا عمى دى حياة مريم وهى اللى تقرر.. أنا قلت رأيى وخلاص وهى حرة بعد كده حسين:

- بس انا عاوزك انتِ كمان تبقى راضية ايمان:

- طالما مريم شايفه كده وراضية خلاص ..أنا مش عاوزہ غير سعادتها أبتمس قائلًا:

- خلاص تقدروا تتفضلوا

خرجت ايمان من المكتب ، فتحت باب الشقة فى سرعة وتوجهت إلى المصعد دون أن تلتفت لنداءات عبد الرحمن الذى فتح باب المصعد ودخل خلفها ،ضغط على الأزرار وهو يقول : مش بنادى عليكى مبترديش عليا ليه

صمتت حتى توقف المصعد خرجت منه بسرعة وقبل أن تضغط جرس الباب أمسك يدها ليمنعها قائلًا:

- انتِ خلاص هتعيشى هنا ولا ايه

قالت دون أن تلتفت إليه :

- أنا مش عاوزہ اتكلم دلوقتى لو سمحت

طريقتها استفزته جدا فشرع بالغضب وجذبها من يدها إلى شقتهم الخاصة وهو يقول بحنق:

- أسمعنى انا اللى ملكيش نفس تتكلمى معاه .. انا جوزك يا هانم ولا نسييتى  
فتح بالمفتاح وهى تحاول أن تخلص يدها من يده المطبقة عليها بقوة .. فتح الباب وأدخلها  
وصفع الباب خلفه بعنف.

\*\*\*

### الفصل الحادى العشرون

بمجرد أن أغلق الباب أفلتت يدها من قبضته وهى تتأوه وتقول:

- آيه اللى انت بتعمله ده وجايبنى هنا ليه

تغيرت ملامحه فى لحظة وعقد يديه أمام صدره قائلاً بهدوء:

- أعمل آيه عاوز اتكلم معاكى وانتِ مش مديانى فرصة

نظرت له باندهاش فلقد كانت تتوقع أن معركة ستبدأ بينهما بعد صفعه للباب بكل هذا العنف  
لم تكن تتوقع هذا الهدوء ، وقد كانت متحفزة ومستعدة للدفاع عن موقفها ولكن طريقته  
وهدوءه المفاجئ أجمها وأربكها.

ظلت تنظر له فى صمت تحاول استيعاب حديثه الهادىء، أستدار وأغلق الباب بالمفتاح  
ووضع المفتاح فى جيبه ثم التفت إليها مبتسماً وقال :

- من ساعة ما جينا وانتِ بتهربنى منى حاولت اتصل بيكى.. مريم قالتلى نايمة ومش راضية  
تصحى .. عرفت أنك مش طايقانى وبصراحة معاكى حق.. بس لو كنت أعرف أنك صاحية و  
شايفانى وانا نايم فى الجنية كنت طلعتك

أرتبكت أكثر ومازالتم علامات الدهشة على وجهها ووجدت نفسها تقول:

- بس مريم مجبتليش سيرة أنك اتصلت بيا

قال عبد الرحمن مؤكدا:

- لا أتصلت بالأمارة مريم قالتلى انها حاولت تصحيكى وانتِ شديتى المخدة على راسك  
ومردتيش عليها

وجدت نفسها تندفع قائلة :

- لو كنت عاوز تتكلم معايا كنت طلعت وصحتنى بنفسك لكن انت مصدقت

وضع يديه فى جيبه وهو مازال محتفظا بابتسامته وقال:

- يعنى أطلع وادخلك الأوضه وانتِ نايمة ومريم قاعدة بره.. بصراحة حسيت انها ممكن  
تتخرج وكمان مكنتش أضمن نتيجة كلامنا هتبقى أيه.. نفرض بقى صوتنا علي ولا حاجة  
البنبت تتعقد من الجواز يعنى

قالت وهى تحاول استيعاب الموقف:

- طب ومجتش نمت فى بيتك ليه لو اللى بتقوله ده حقيقى

أتسعت ابتسامته وقال:

- محبتش أدخل الشقة من غيرك... نزلت الجنينة وقعدت مع نفسى شوية وقعت عيني على  
حوض الورد وافتكركت وانتِ بتنقذى الوردة مني .. فضلت قاعد شوية لقيتنى بفتكر كل  
كلمة دارت بينا ، وكل موقف عجبتينى فيه.. محستش بالوقت لقيت الفجر أذن صليت وطلعت  
أنام فى أوضتى لقيت يوسف سهران قعدت معاه لحد ما النوم غلبنى جنبه

كادت أن تنهار تحت وقع كلماته الهادئة ولكنها تماسكت فهى تعلم جيدا أنه لا يحبها ولكنه  
ربما يكون يفعل ذلك من أجل أرواء والده الذى شعر بالمشكلة التى بينهما فقالت بجدية :

- خلصت قولت اللى عندك.. أفتحلى الباب بقى خلينى أمشى

أقرب منها وهو يقول:

- ومين قالك أنى خلصت كلامى

ثم نظر لها باعتذار قائلا:

- انا آسف سامحيني

ثم لمعت عيناه بمرح قائلا:

- فكرة لما جيت اعتذر لك قدام المدرسة وقتلتك المسامح كريم

قالت بسخرية :

- اه طبعا فاكدة المسامح كريم أو مهند على حسب يعنى مش كده؟

ضحك ضحكات عابثة وقال:

- الله .. ده انتِ فاكده كل كلامى أهو حتى هزارى فاكراه

حاولت أن تخفى ابتسامتها بصعوبة وقالت :

- طب سبنى امشى بقى لو سمحت

وقف أمامها قائلا:

- تمشى فين هو ده مش بيتك.. وانا جوزك .. وبعدين انا اعتذرتلك وانتِ مردتيش

قالت بتردد وهى تتمنى أن يكذب كلماتها:

- انت معملتش حاجة تعتذر وتتأسف عليها.. أنت اتصرفت بتلقائية.. واحد مبيعرفش يتكلم أو يتعامل مع الناس غير من قلبه.. أبوه غصب عليه بنت عمه ..هتكون أيه النتيجة يعنى غير كده

قطب جبينه بأسى وقال:

- ياه ده انتِ شايلة فى قلبك مني جامد

قالت بضيق:

- لاء انا مش شايلة فى قلبى ولا حاجة بالعكس .. أنا تفهمت موقفك وعذراك .. أنا بس عتابى الوحيد عليك انك مرفضتش الجوازة اللى أنت مش عايزها دى وآدى النتيجة

حاول الاقتراب منها أكثر وهو يقول:

- يا إيمان انتِ كده بتأسى عليا وعليكى جامد بالطريقة دى .. انا ابويا مغصبنيش عليكى ولا حاجة وبعدين هو فى حد بيتغصب على الجواز .. دى حتى البنات دلوقتى محدش يقدر يغصبها

جلست ايمان وهى تقول بحزن:

- الغصب هنا أنك تسمع كلامه علشان بتحبه ومش عاوز تزعله مش علشان هو جوزك بالعافية .. بس أنت باستسلامك ده ظلمتنى معاك

ثم رفعت رأسها إليه وقد جمعت دموعها فى عنيتها قائلة:

- كنت قلتلى وانا اللى كنت رفضت نهائى .. وساعتها مكنش هيزعل منك

جلس بجوارها وحاول مسح دموعها بأنامله فابتعدت عنه فقال:

- يا ايمان بالله عليكى بلاش كده .. أنا والله كنت معجب بيكى وباخلاقك وعلشان كده اتجوزتك نهضت وقالت بأصرار:

- مفيش داعى انك تقعد تكذب علشان تجبر خاطرى بالكلام ده .. أنا خلاص قررت انى احتفظ بالشوية اللى باقين من كرامتى وعزة نفسى  
قطب جبينه بتساؤل وهو يقول:

- مش فاهم

إيمان بثقة:

- هنعيش زى ما احنا كده فترة وبعدين .. وبعدين ننفصل

نهض قائلاً بحدة:

- ننفصل .. انتِ فاهمة بتقولى ايه

قالت بأصرار:

- أيوه فاهمة بقول ايه .. وفاهمة أكثر انى مقدرش أعيش مع راجل قلبه لسه متعلق بخطيبته السابقة

قال بذهول:



- انتِ بتقولى آيه! هند دى انا نسيتها من زمان .. كرهتها وطلعتها من عقلى وقلبى ورمتها على طول دراعى .. حتى الوردة اللى كانت عزيزة عليا قطفتها وكنت هدوس عليها لمجرد انها كانت شايلة أسمها

أبتسمت ايمان بألم وقالت:

- لو كنت فعلا طلعتها من دماغك ونستها مكنتش قطفت الوردة ورمتها علشان تخفيها من قدامك يا عبد الرحمن.. انا قلتلك قرارى الأخير .. عن اذنك

ثم توجهت لغرفتها وأغلقت بابها ووقفت خلفه تبكى بصمت، بعد فترة هدأت توضأت وقضت ليلتها فى الصلاة والدعاء تشكو بثها وحزنها إلى الله وقضى هو ليلته على الأريكة ينام تارة ويتقلب تارة ويفكر طويلا ويقرر ثم يتردد

صلت إيمان صلاة الفجر وبدلت ملابسها لتنام ، فتحت الشرفة لتستنشق نسيم الصباح قبل أن تنام قليلا ولكنها سمعت صوت باب غرفتها يفتح فالتفتت فوجدت عبد الرحمن مقبل عليها فى تردد ، ألتفتت مرة اخرى تنظر للخارج تستنشق النسيم الذى داعب غرتها وبعض من خصلات شعرها برقة ، شعرت بأنامل عبد الرحمن تتخلل خصلات شعرها المتطايرة وتمر خلالها ببطء ، وسمعته يقول بحنان:

- ممكن اقولك على حاجة ملهاش علاقة بقرارك ده

قالت بتردد :

- اتفضل

عبد الرحمن :

- ممكن متقعديش تانى قدام حد غريب وتتكلّمى معاه كده..أنا محبش راجل يقعد يبص لمراتى كده ويتكلم معاها

ثم تابع بنفس الهدوء:

- وبعدين هو مش المفروض انك متقعديش مع رجاله غير أخوكى وجوزك واعمامك ولا انا غلطان

أنبتت إيمان لكلماته ، بالفعل تعايشت مع هذه العائلة الكبيرة واتبعت عاداتهم وتناسست أمر الاختلاط بين الرجال والنساء وانها كان من الواجب عليها أن تفعل غير ذلك بحكم معرفتها بأمور دينها

ألتفتت إليه قائلة:

- معاك حق متشكره أوى انك نبهتني للحكاية دى..حاضر هبقى اخد بالى بعد كده

أزاح غرتها التى حركها النسيم عن عينيها بأنامله وقال بنبرة حانية:

- أصل انا بصراحة بغير ومحيش حد يعجب بيكى غيرى والواد الفيونكة ده هو واخوه كان فاضلهم شوية ويخطبوكى انت

لم تستطع إيمان أخفاء ابتسامتها عندما استخدم عبد الرحمن نفس تعبير وفاء عن عماد فقالت وكأنها تدافع عن أبتسامتها :

- هى وفاء نشرت الأسم ده فى العيلة كلها

مسح ذراعها بظهر كفه وهو يقول:

- متحاوليش ..أنا شفت ابتسامتك خلاص

شعرت بقشعريرة تسرى بجسدها على أثر لمستته الحانية فقالت بخجل:

- طب لو سمحت انا عاوزه انام ممكن تتفضل بقى

عبد الرحمن :

- أفضّل أياه ماتحدى كلامك ..أفضل اقعد ..ولا اتفضل انام

ثم أقترّب منها أكثر وقال:

- ولا اتفضل أقفل البلكونة

تحركت من مكانها مبتعدة ووقفت عند باب غرفتها قائلة بخجل تحاول أن تصبغه بنبرة جدية:

- لا اتفضل امشى

وأشارت للخارج وهى تقول:

- أفضّل روح نام فى الأوضة الثانية

\*\*\*

أجرى وليد اتصالاً داخلياً من مكتبه قائلاً:

- لو سمحتى يا آنسه علا هاتى البوسطة وتعالى

علا:

- حاضر يا فندم

طرقت علا الباب ودخلت بخفة ، وضعت البوسطة أمام وليد على مكتبه وهويتابعها بنظراته الجريئة وقالت:

- البوسطة يا فندم خدمة تانية

وليد :

- ومستعجلة ليه تعالى أقعدى شوية.. عاوزك فى موضوع مهم

جلست علا أمامه قائلة:

- خير يا وليد بيه

وليد باستنكار:

- مش انا قلتلك قبل كده بلاش وليد بيه دى

تصنعت علا الخجل وقالت:

- أنا آسفه.. مش هقدر أنفذ طلب حضرتك وانا ديك من غير ألقاب كده

نهض وليد وجلس أمامها وقال بتشجيع:

- مش هتقدرى ليه يا ستى ..أنا اللى بقولك..أحنا بنشتغل مع بعض ولازم نرفع التكلفة بينا

ثم مال إلى الأمام قائلاً:

- ولا أياه يا علا

نهضت علا وهى تتصنع الارتباك من اقترابه منها قائلة:

- من فضلك يا أستاذ وليد.. أنا محبش كده.. عن أذنك

أستدارت لتخرج من المكتب وعلى شفيتها أبتسامه مأكرة وهو يزفر بقوة من طريقة صداها له دائما.

وفى المساء كانت علا تجلس بجوار أختها هند التى كانت تسألها بشغف:

- ها وبعدين حصل ايه

نهضت علا وسارت فى الغرفة وعلامات الخبث على وجهها وقالت:

- بس ياستى ..ونفخ نفخة كان هيطير المكتب باللى عليه

أطلقت هند ضحكات عالية وهى تصفق بيديها وتقول بإعجاب:

- أنتِ أستاذة ورئيسة قسم يابنتى

جلست علا بغرور وقالت لأختها:

- طبعا يابنتى ..هو احنا بنلعب .. ولا انا حاربت الحرب دى كلها علشان اعرف أشبظ فى

الشغل ده بسهولة.. وبعدين منا لو عملتله اللى هو عاوزه هيزهق منى ويرمينى بعد

شوية... الصنف ده علشان يحب ويفكر فى الارتباط لازم يتعذب الأول وريقه ينشف

قالت هند بتفكير:

- أو مال يعنى كنتِ بتنصحينى بحاجات تانية اعملها مع عبد الرحمن ليه؟

أبتسمت علا قائلة:

- علشان عبد الرحمن علنياته مالوش فى الستات ... والحاجات دى كانت هتخليه يقدم معاد

الجواز .. لكن وليد ده مصيبة ..عاوز اللى تديله على دماغه علشان ياخذ طريق الجواز

..فهمنى

- بس تفتكرى وليد ممكن يفكر يتجوزك يا علا

قالت علا بتحدى:

- بكرة تشوفى .. هو صحيح هيتعبنى بس فى الآخر اللى انا عايزاه هياحصل

قالت هند بغل واضح:

- من ساعة ما عرفت ان عبد الرحمن اتجوز وانا باكل فى نفسى .. الراجل الكبير عرف  
يضحك عليا لكن انا هدخل العيلة دى يعنى هدخلها .. سامعانى يا علا

ظهرت ابتسامة مأكرة فى عيني علا وهى تقول:

- هتدخليها يا هند.. وهتقعدى معاهم على ترابيزة واحدة.. وهتبقى خالة ولادهم غصب عنهم  
كلهم

\*\*\*\*

أستيقظت إيمان بعد أذان الظهر، خرجت من غرفتها مترقبة تلتفت يمينا ويساراً بحثاً عنه  
فلم تجده، تنهدت بارتياح توضأت وأخذت سجادة الصلاة فوقعت منها ورقة مطوية أخذتها  
وبتعجب وفتحتها وقرأت فيها "متنسيش تدعيلى وانت بتصلى .. أدعيلى مراتى تحبني زى  
ما بحبها " ، ظلت تقرأها مرات ومرات لا تصدق اهتمامه بها ولا تصدق أنه يحبها،  
بالضرورة هو يفعل ذلك من أجل إنجاح علاقتهما الزوجية فقط ، وليس من أجلها هى،

ذهبت لتطمئن على مريم التى تركتها وحدها منذ أمس ، فتحت الباب بهدوء وأغلقت بهدوء  
حتى لا تزعجها إن كانت مازالت نائمة، أقتربت من غرفة نومها فسمعت نحيب وهمهمات،  
لم تشعر بها مريم وهى جالسة على سجادة الصلاة وترتدى الإسدال وهى تقرأ فى المصحف  
وتردد تلك الآية من سورة مريم " فَأَجَاءَهَا الْمَخَاضُ إِلَى جِذْعِ النَّخْلَةِ قَالَتْ يَا لَيْتَنِي مِتُّ قَبْلَ  
هَذَا وَكُنْتُ نَسِيًّا مَّسِيًّا " وظلت تردد " يَا لَيْتَنِي مِتُّ قَبْلَ هَذَا وَكُنْتُ نَسِيًّا مَّسِيًّا " ، ترددها  
وتبكي كثيراً حتى بُح صوتها .

طرقت إيمان على باب الغرفة حتى لا تفرعها، التفتت مريم إلى إيمان ووجهها وكأنه بركة  
من الدموع، أقتربت منها واحتضنتها بلوعة وهى تقول:

- مالك يا مريم بتعيطى كده ليه

مسحت دموعها وهى تقول بابتسامة واهنة:

- تصدقى يا إيمان.. أول مرة احس بالايات كده وانا بقرأها ..

ثم تابعت :

- تصدقى برضة انى أول مرة احس بالسيدة مريم كده وباللى مرت بيه  
جلست إيمان بقربها ومسحت على وجنتيها بحنان وقالت:  
- هو ده اللى مخليكى بتعيطى يا مريم.. ولا فى حاجة تانية؟  
هزت مريم رأسها نفيا ثم قالت بتساؤل:  
- هو مين اللى سمانى مريم يا إيمان بابا ولا ماما؟  
أبتسمت ايمان وهى تقول:  
- عمى كان مرة قالى ان بابا هو اللى كان بيخترلنا أسامينا .  
ثم تابعت وهى تنظر لمريم بفرح:  
- بس انا مبسوفة أوى انك بدأتى تحسى بالآيات يا مريم.. ربنا يفتحها عليكى يارب اكتر  
واكتر

\*\*\*

دخلت وفاء غرفة وليد واستندت على الباب وهو يتحدث فى الهاتف ،عندما رآها تابع حديث  
قائلاً:  
- طب هكلمك بعدين سلام دلوقتى  
أغلق الاتصال والتفت إليها قائلاً:  
- نعم عاوزه ايه  
وفاء :  
- مش مكسوف من نفسك.. بقى عبد الرحمن ينزل وإيمان وفرحة .. يحضروا قاعدة الاتفاق  
واخويا مش موجود معايا  
ضحك بسخرية وقال:

- وهما كانوا يقدرُوا ميحضروش .. دى كانت امك جريستهم وقالت عليهم مش عاوزين يشوفوا عريسك علشان بيغيروا منك.. وبعدين ما انتِ عارفة النظام فى البيت ده.. كله لازم يحضر يعنى هما مجوش من نفسهم من كتر حبهم فيكى وفاء:

- ولما انت عارف كده مجتش ليه

قال بنفاد صبر:

- مكنش ينفع انا وابوكى نسيب الشركة فهمتى ولا اقول كمان

قالت وفاء بحزن:

- انت ليه يا وليد بعيد عنى .. مش زى عبد الرحمن ويوسف مع فرحة.. مش بحس انك اخويا كده وهمك مصلحتى

زفر بقوة وقال:

- اطلعى من نفوخى يا وفاء.. بلا عبد الرحمن بلا يوسف بلا زفت .. أنا مش فاضيلك

قالت بحزن:

- اومال فاضى بس للبنات اللى بتعرفهم.. ده انا بحس ان عبد الرحمن بيوقف جنبى اكر منك

قام وهو يدفعها خارج غرفته:

- طب خاليه ينفعك بقى ياختى

\*\*\*

دخلت عفاف غرفة حسين وهى يبدو عليها الحيرة وجلست بجواره وهى تقول :

- أنا مش فاهمة حاجة يا حسين.. مريم مش عاوزة تستعد لكتب الكتاب خالص .. اقولها يابنتى ننزل نجيب الفستان تقولى هلبس فستان إيمان.. اقولها نتفق مع الكوافيرة تجيلك انتِ ووفاء تقولى تيجى لوفاء بس انا مش هحط حاجة فى وشى .. معقول دول كتب كتابهم بعد يومين!!!.. لالا لا ده فى حاجة كبيرة ولازم اعرفها.. الحكاية دى مش داخله دماغى أبدًا

شعر الحاج حسين بالقلق فهو يعلم أن زوجته ستظل تضغط على مريم أو يوسف حتى تعلم سبب واحد لما هم فيه الآن، نظر لها باهتمام وقال:

- انا هقولك بس متقوليش لمريم انك عرفتى حاجة.. ماشى يا عفاف  
أومأت برأسها قائلة :

- طالما عارف قولى وريحنى وانا مش هجيب سيرة

- مريم صحيح موافقة على يوسف وصحيح بتحبه وهو كمان.. بس اللى عامل فيها كده انها قلقانة لتكون بموافقتها دى بتنفذ خطة امها

صمتت عفاف بتفكير وقالت بحيرة:

- طب وبعدين.. الحال هيفضل كدة ولا أيه

هز رأسه نفيا وقال بجدية:

- لا طبعا .. انا هطلع اكلمها وهقنعه.. واشيل من دماغها أحساسها بالذنب اللى هى حاسة بيه ده.. وان شاء الله تبقى كويسة.. زيها زى أى عروسة

نهضت عفاف وهى تقول بارتياح :

- ربنا يصلح الحال يارب

\*\*\*

جلس بجوارها فى شقتها منفردًا بها وهو يربت على يدها قائلاً:

- أم عبد الرحمن بتقولى انك مش عاوزه فستان فرح ورافضه الكوافيرة تجيلك زى وفاء نظرت له بانكسار وقالت:

- معلىش ياعمى مش عاوزه فساتين ولا حتى عاوزه فرح

قال بحنان:



- أنا فاهمك يا مريم وحاسس بيكى .. بس لازم تاخدى بالك ان انا بس اللي فاهمك .. لكن الناس اللي حوالينا مستغربين من اللي بيحصل .. وانا مش عاوز حد يقعد ينكش ورا تصرفاتك يابنتى

قالت بأسى:

- يعنى أيه يا عمى .. أعمل أيه يعنى؟

- حاولى تبقى طبيعية وطاوعى مرات عمك .. ولو حتى من ورا قلبك يا ستى .. أنا مش عاوز حد يقعد يقول ليه ومش ليه .. فاهمانى

قالت باستسلام:

- حاضر يا عمى منا خلاص مبقتش املك حاجة غير كده... أنا بس ليا عندك رجاء .. يوم كتب الكتاب الله يخاليك مش عاوزة اشوفه .. إيهاب يبقى يطلعلى الدفتر وأنا همضى عليه وخلص

أرسل تنهيدة قوية وقال:

- يابنتى مينفعش .. حتى لو المأذون وافق هنقول للناس أيه .. العروسة مش عاوزة تشوف العريس ليه!

ثم تابع بتفهم :

- أنا عارف انك مش طايقاه ولا طايقة تشوفى وشه .. وانا كمان والله مبقتش طايقه فى البيت .. بس هنعمل أيه لازم كل واحد فينا ييجى على نفسه شوية علشان الأمور تعدى .. ده انا كمان مش هاطلب منك هتشوفيه وبس لا .. ده انا كمان هاطلب منك تضحكى فى وشه وترسمى السعادة على وشك ومتنسيش انكم هتقعدوا لوحدكوا شوية بعد كتب الكتاب

أنفضت قائلة برجفة سرت ف طول جسدها:

- لا يا عمى .. لا انا مش ممكن اقعد معاه لوحدى أبداً .. حتى لو قتلتنى

قال مطمئناً:

- هو انت مش بتتقى فى عمك ولا أيه؟

قالت مريم بخفوت:

- العفو يا عمى طبعاً بئق فى حضرتك بس..

قاطعها:

- مفيش بس .. أحنا مش عاوزين فاطمة مرات عمك تاخذ بالها من حاجة.. حاكم دى لما بتاخذ بالها من حاجة بتفضل تحرك وراها لحد ما تجيب قرارها.. أنتِ هتقعدى معاه فى الجنينة مش فمكان مقفول .. وعلشان تطمنى انا هبقى واقف فى بلكونة أوضتى وشايف كل حاجة.. ده غير أن وفاء وخطيبها هيبقوا قريبين منكوا.. يعنى مفيش حاجة تخليكى تقلقى شعرت مريم أن حمل من الجبال وضع على صدرها تكاد تتنفس بصعوبة كلما تخيلت نفسها تجلس معه بمفردها فقالت بصوت أشبه بالبكاء:

- حاضر يا عمى بس بعد أذنك قول لطنط عفاف انى عاوزه بجد ألبس فستان إيمان.. مش هعرف اجيب فستان محترم زيه .. إيمان ساعتها لقيته بالعافية  
أبتسم قائلاً:

- أتفقنا.. بس اسمعى كلامها فى حكاية الكوافيرة دى .. وارسمى الضحكة على وشك يابنتى  
قالت مريم باستسلام:

- حاضر

\*\*\*

وفى المساء عادت إيمان إلى شقتها، أغتسلت وصلت العشاء ونقلت ملابس عبد الرحمن كاملة إلى الغرفة الأخرى التى نام بها بالأمس ، جائتها رسالة منه على هاتفها النقال فتحتها وابتسمت رغباً عنها وهى تقرأها "يا إيمانى انا كللى حيرة.. ونار... وغيره... وشوق لىك.. نفسى أهرب من عذابى نفسى أرتاح بين أيدىك "

أعدت طعام العشاء لـ عبد الرحمن وبمجرد أن سمعت صوت سيارته هرولت إلى غرفتها وأغلقتها واطفأت المصباح وتدنثرت جيداً وتصنعت النوم.

دخل عبد الرحمن المنزل فوجد الطعام مُعد على المائدة والجو يسوده الصمت والهدوء، بدل ملابسها وطرق باب غرفة إيمان طرقات خفيفة لم ترد عليها ، فزادها بتصميمًا، نهضت فوقفت خلف الباب وقالت:

- نعم فى حاجة

عبد الرحمن:

- ممكن تفتحنى .. فى حاجة مهمة عاوز اخدها من جوه

- أنا نقلتك كل حاجتك فى الأوضة الثانية

قال وهو يتصنع الجدية :

- لاء فى فردة شراب مش لاقىها.. أكيد فى الدولاب عندك

صدقته وذهبت تنظر فى خزانة الملابس للتأكد ولكنها لم تجد شىء، عادت مجدداً قائلة:

- ملقتش حاجة

تحدث بنفس النبرة قائلاً:

- أراى يعنى .. أنا متأكد انها جوه .. أنا محتاجها بكرة ضرورى .. لو سمحتى افتحنى

وقفت ايمان مترددة ثم ارتدت إسدال الصلاة وفتحت الباب ببطء، رسم على ملامحه علامات الحنق وهو يدخل الغرفة ويقول:

- مش معقول كده.. أقف ساعة برة علشان شراب .. أومال لو كانت فائلة كنت وقفتينى قد  
أيه !

قالت على الفور:

- أنا دورت كويس وملقتش حاجة ولو مش مصدقنى شوف بنفسك

وقف أمام خزانة الملابس ينظر بعث ثم قال:

- مش موجودة... ودتيها فين

قالت بدهشة :

- منا قاتلك مش هنا مصدقتيش

عبد الرحمن:

- طبعا مش مصدقك.. شكك كده طمعتى فيها.. طب كنت قوليلى وانا كنت هجبك

شعرت بنبرة المزاح بدأت تتسلل فى صوته فعلمت أنه اخترع قصة الجوارب ليدخل ويتحدث معها فقالت بجدية:

- لو سمحت اتفضل عاوزه انا

كتف ذراعيه فوق صدره وقال بابتسامة:

- على فكرة لو بقيتى على طبيعتك هيبقى احسن .. وانا يا ستى مش هادخل الأوضة من غير ما استأذن.. لكن تقفلى الباب والحركات دى ..مش حلوة.. بحس كدة انك خايفة مني

لم ترد عليه فوقف أمامها قائلاً:

- طب بلاش كل ده .. دعيلى زى ما طلبت منك

قالت وهى تشيح بوجهها:

- أيوه دعئك ربنا يرزقك بزوجة تحبها

أقرب وهو يقول:

- طب ما هو ربنا رزقنى بيها خلاص الحمد لله

أبتسمت بسخرية مريرة وقالت بجدية :

- كل اللى بتعمله ده مالوش لازمة.. وفر على نفسك مجهود انك تحاول تقنعنى بحاجة مش موجودة ... أنا قلتلك انى قررت ومش هرجع فى قرارى .. ولعلمك انا من بكره هلم حاجاتى كلها وارجع اقعد مع مريم.. أنا مش هقبل على نفسى ولا على كرامتى اكتر من كده.

وقف ينظر إليها بصمت للحظات قبل أن يقول بهدوء:

- بس انا مش مصدقك.. انا متأكد انك بتحبينى وعازية تعيشى معايا..زى ما انا متأكد أنى عايز اكمل حياتى معاكى

سيطر عليها الإنفعال وهى تقول بعناد :

- أنا قررت وخلاص.. وكلامى ده مفيهوش راجعة يا عبد الرحمن

بادلها نفس النبرة العنيدة قائلاً:

- قراك ده تبليه وتشربى ميتة

قالت بدهشة:

- يعنى ايه

أقرب أكثر وأمسك وجهها بين كفيه قائلاً:

- يعنى انتِ مراتى وهتفضلى مراتى لحد ما اموت .. أنتيهنا

قالت بانفعال :

- يعنى أيه هو بالعافية

أغلق الباب وهو يقول :

- أيوه بالعافية.. أنا مش هصبر عليكى أكثر من كده.. انتِ دماغك ناشفة...وبعدين انا عاوز افهم انتِ ليه بتلبسى اسدال الصلاة قدامى.. هو انا مش جوزك ولا أيه ..

أتجه إلى خزانة ملابسها وأخرج منامة قصيرة تخصها ومده يده به أمامها وهو يقول :

- ده بيعمل أيه فى الدولاب.. مبشوفش يعنى الحاجات دى ..

ثم تابع بلهجة أمره:

- اتفضلى البسى ده حالياً

لم تصدق إيمان ما يحدث ، لم تكن تتوقع بأنه سيثور لهذه الدرجة وينفعل هكذا حتى يخرج عن إطار هدوء المعتاد بهذه الطريقة، ظلت تنظر فى ذهول وصمت فوضع المنامة على المقعد وأمسكها من يدها وأوقفها أمام المقعد وأشار إليها محذراً :

- أنا هخرج بره خمس دقائق.. لو رجعت لقيتك مش لابساها هلبسهولك انا

نظرت له وهو يغلق الباب خلفه ولا تكاد تصدق ما يحدث ، لم تمضى ثوان حتى طرق الباب بقوة أفزعها :

- ها خلصتى ولا آجى اساعدك

قالت بخوف :

- حاضر حاضر ..هخلص اهو

تناولت المنامة ونظرت إليها بارتعاش و تقول:

- لا مش ممكن البس ده ..مش ممكن... أعمل ايه بس ياربى

هوت إلى المقعد وهى تنظر لصورتها فى المرآة بحيرة وخوف ، حاولت أن تبكى لعله يرأف بحالها ويتركها ، ولكنها تعجبت من نفسها وهى تقول:

- هو مفيش دموع بتنزل ليه

أعصرت عيناها كالأطفال دون جدوى ، حاولت أن تتذكر اسوء ذكرى فى حياتها لعلها تبكى ولكن لا دموع أيضا، خفق قلبها على صوت طرقاته القوية وصوته الجهورى من الخارج صائحا:

- الخمس دقايق خلصوا يا آنسه !

أنتفضت وهى تبدل ملابسها بسرعة وتقول:

- حاضر حاضر

\*\*\*\*

## الفصل الثانى والعشرون

أنتهت فى سرعة من ارتدائه ونظرت مرة أخرى فى المرآة وقالت:

- ينهار مش فايت .. أنا مش ممكن اطلع كده أبداً

فتح الباب فجأة وهو يقول بحنق:

- بقالك ربع ساعة بتلبسى

أختطف اسدال الصلاة واحتضنته على صدرها لتخفى جسدها ، تخرج وجهها بحمرة الخجل فى ثوان ولم تستطع أن تنظر إليه مباشرة وهى تقول بتلعثم:

- انا لسه مخلصتش لو سمحت اطلع على ما اخلص

اقترب منها قائلاً:

- لا شكك خلصتى والله..

قالها وهو يجذب الإسدال من بين يديها فشقتها ، نظر لها يتفحصها بإعجاب وقال بمزاح وهو ينظر لعلامات الخجل والخوف البادية عليها ثم قال بمزاح :

- متخافيش انا هتجوزك مش هتخلي عنك أبدا

قالت بحلق دون أن تنظر إليه:

- حرام عليك عامل فيا كل ده وواقف تهزر

تصنع الدهشة قائلاً:

- أنتِ هاتتبلى عليا ولا أيه...هو انا لسه عملت حاجة

وأخذ يدور حولها وهو يقول:

- بس انا مكنتش اعرف انك حلوة أوي كده

خفق قلبها بشدة عندما شعرت بيده توضع على كتفها وهو يقول:

- تعالى

تصورت انه سيأخذها فى اتجاه ولكنه خيب ظنها وأخذها خارج الغرفة حتى وصل للمائدة التى وضعت عليها طعام العشاء وقال بلهجة أمره:

- اقعدى

جلست وهى تنظر له بدهشة وقالت :

- جايبنى هنا ليه

جلس أمامها على طاولة الطعام وبدأ فى تناول طعامه وهو يقول :

- جايبك تاكلى معايا.. أصلى نفسى بتفتتح وانتِ قاعدة قدامى وانا باكل

تملكتها الدهشة وهى تقول:

- يعنى رعبتى كل الرعب ده علشان آجى اقعد معاك وانت بتاكل

قال مداعباً وهو يتناول طعامه :

- وانا اللى فاكرك مؤدبة.. اومال انت افكرتى آيه

تحركت لتنهض فى انفعال ولكنه أمسك يدها وهو يضحك وجذبها لتجلس مرة أخرى وهو يحاول السيطرة على ضحكاته

وهى تشيح بوجهها عنه فى غضب ، فوضع كفه على وجنتها وأدار وجهها نحوه وقال بابتسامة واسعة:

- أسمعى بس.. بلاش الانفعال الزايد ده..

جلست وهى تنظر له بعدم فهم فقال وقد استعاد جديته وهدوءه:

- لو كنتِ عرفتينى كويس كنتِ هتعرفى انى مش ممكن اجبرك على حاجة زى كده.. أنا عملت كده علشان اصفى الجو بينا.. وكل اللى انا عملته ده كان هزار.. لكن انا عمرى ما المسك غصب عنك أبداً

زادت نظرات الحيرة فى عينيها فقال برقة شارحاً:

- صممت تلبسى كده علشان تاخدى عليا وتقعدى قدامى براحتك وتحسى انى جوزك.. متبقيش خايفة منى ولا خايفة من دخولى عليك فجأة

همست بحيرة:

- بس كده؟

أوما برأسه فى مداعبة قائلاً:

- أوعى تفهمينى صح

أرادات إيمان النهوض مرة أخرى ولكنها وجدت نفسها تقول:

- طب اتفضل كل وخلصنى خلينى اقوم انا بردانه

أقرب بمقعده منها وقال بهمس:

- طب ما انا ممكن ادفيك



**أبتعدت وهي تقول محذرة :**

**- عبد الرحمن**

## قال على الفور:

- أیه یا ایمان فی أیه.. أنا قصدی اقوم اجیبک الدفایة.. انتِ کل شویة تفهمینی صح کده وضعت یدها علی خدها وتصنعت أنها تحرك شعرها بیدها لتخفی ابتسامتها

\*\*\*

مضى اليومين ووقف يوسف أمام مرآته يرتدى حلتَه السوداء وهو شارد الذهن مشتمت الأفكار، يشعر برهبة خفية من لقاءها، كيف سينظر إلى عينيها، كيف سيواجهها عندما يخلو بها ، ماذا سيقول ، وكيف سيبدأ ، هل يبدأ بالإعتذار ، أم يقبل يديها ورأسها لتسامحه ، نفسه لم تتركه ظلت تحدثه: "لم تكن أنت المذنب الوحيد .. هي التي دفعتك لذلك دفعا .. ولم تكن أنت الوحيد.. هناك وليد والشابان الذي استقلت سيارة سلمى بصحبتهم والمكان الذي ذهبوا إليه .. هل نسيت كل هذا " .

**جلس على المقعد وهو ينظر لصورته بالمرآة وكأنه يحدثها قائلاً بحيرة:**

**- بس انا اتأكدت .. أنا كنت أول واحد**

حادثته نفسه مرة أخرى " نعم كنت أنت الوحيد .. ولكن كنت الوحيد الذى اندفع هكذا.. أما البقية فكانوا حذرين.. وهى استطاعت أن تفعل كل شىء دون أن تؤذى نفسها "

وضع يديه فوق رأسه، شعر بأنه سيذهب عقله، خرج للشرفة ووقف ينظر للسماء وقد  
تجمعت الدموع في عينيه قائلاً:

- ياااااارب ... يارب بصرنى بالحقيقة .. هتجنن

\*\*\*\*

أستعدت وفاء بفستانها المميز الرقيق بلونه الوردي بينما ارتدت مريم فستان العقد الذي ارتدته إيمان في يوم عقد قرانها ، كان في غاية الروعة علي جسدها وبساطته واحتشامه وبساطة زينتها أعطتها مظهرًا ملائكيًا، تحركت بصحبة إيهاب وهي ممسكة بيده كالطفلة

التي تتشبث بأبيها فى الزحام مخافة الضياع، ألتفت لها إيهاب مداعباً وقد شعر بأصابعها تقبض على يده بقوة وترتعش:

- مالك مرعوبة كده ليه؟

هزت رأسها بشكل عشوائى ، لم تجد كلمات ترد بها على دعابته ، لأول مرة تستقل المصعد وتشعر أنه يأخذها للجحيم لا إلى الطابق السفلى، ارتجف قلبها بشدة عندما توقف المصعد معلنا انتهاء رحلته، تحرك إيهاب خطوتين للخارج وهى تتبعه ومازالت ممسكة بيده وبمجرد ان وقع بصرها على الشقة مكان الحادث تجمدت قدمها واصفر وجهها ومادت بها الأرض، أسندها إيهاب ولحقت به إيمان التي كانت تنتظرهما بالأسفل وهو يقول فى قلق:

- مالك يا مريم؟

أشاحت بوجهها بعيداً عن أكثر مكان تكرهه على ظهر هذا الكوكب وهى تقول فى اضطراب شديد :

- مفيش حاجة.. بقالى كتير بس منزلتش فى الأسانسير .. دوخت شوية

تقدم حسين منهم وقال لإيهاب وهو يرسم ابتسامة مبهجة على شفتيه:

- عن اذنك بقى العروسة دى تخصصنى ..

أخذ يدى مريم وأسندها إلى يديه وربت عليها بحنان، كان يعلم أنها المرة الأولى التى تتحرك فيها مريم وتهبط إلى الأسفل ، كان يعلم بأنها لن تمر على مكان الحادث مرور الكرام، كانت الخطوات بطيئة وهى تتذكر كل صوت وكل حركة مرت بهما فى هذا المكان الذى لم يعد يحمل إلا الألم.

أتجه بها حسين إلى حيث ينتظرها المأذون تحت مظلتهم ورأته لأول مرة منذ الحادث ، فى البداية لم تتعرف عليه لأول وهله، كان وجهه شاحب للغاية وكأن الأيام مرت عليه سنوات طويلة، تفرست ملامحه بغل واضح وكادت أن تتحرك من مكانها تجاهه دون وعى ، ولكن حسين قبض على يديها بقوة ، كانت يدها بارده كالثلج وترتجف من الأنفعال .. همس فى أذنها:

- الناس كلها مركزة معاكى اقعدى هنا ومتبصيلوش

جلست بجانبه وهو مازال ممسك بيدها وبدأ المأذون فى إجراء مراسم الزواج ، نهض يوسف ليمضى على الأوراق فخطف نظرة سريعة إليها حتى انتهى ووضع القلم مكانه، وأشار لها المأذون أن تأتى لتذيل الأوراق بتوقيعها ففعلت ثم وضعت القلم وعادت بجانب عمها ، أنتهى المأذون قائلاً:

- زواج مبارك إن شاء الله

أنطلقت الزغاريد معلنة ارتباط جديد فى الأسرة ولكنه من نوع خاص جداً

ربت عبد الرحمن وإيهاب على كتف يوسف وعانقاه واحداً بعد الآخر ومهنيين له زواجه وكذلك فعلت فرحة ووالدته وعمه إبراهيم وهنأته إيمان ووفاء بابتسامة ، ثم أقبلوا على مريم يعانقونها ويقبلونها وهى تجاملهم بابتسامة خاوية ضائعة .. مرتعشة

أقترب وليد من يوسف ليعانقه ولكنه ابتعد عنه واكتفى بالمصافحة فقط ، نظر له وليد بحنق ثم اقترب من عبد الرحمن قائلاً:

- هو اخوك بيعاملنى ناشف كده ليه هو انا دوستله على طرف

ربت عبد الرحمن على كتفه قائلاً بمزاح:

- معلىش بقى عريس لازم نستحمله

كان عبد الرحمن يحادثه وعينيه لم تفارق إيمان وهى تجلس بين مريم ووفاء وتداعبهما بينما جلس عماد بجوار وفاء وشرع فى وضع خاتم الخطوبة فى أصبعها فهمست لها إيمان :

- مينفعش يمسك أيدك دلوقتى ده لسه خطيب مش زوج

همست لها وفاء:

- طب والعمل

قاطعهم صوت عماد :

- هاتى أيدك يا وفاء علشان البسك شبكتك

نهضت إيمان وهى مبتسمة وقالت له :

- ثانية واحدة يا عريس

واتجهت إلى والدة عماد وقالت لها:

- تعالى يا طنط لو سمحتي

أخذتها واجلستها بجوار وفاء وتناولت اللعبة القطيفة التي تحوى خاتم الخطبة وأعطتها  
لوالدة عماد وهي تقول لها بمرح :

- لو سمحتي يا طنط لبيسيها لها حضرتك .. معلىش بقى مغدناش بنات بتسيبه يمسكها يا  
فوزية

ضحك الجميع ونظر لها محمد أخو عماد بإعجاب شديد يكسوه الحزن وهو لا يشعر بنظرات  
عبد الرحمن الذى كان يتابعه عن بعد، شرعت والدة عماد فى وضع الخاتم فى أصبع وفاء  
وانطلقت الزغاريد مرة أخرى .

تقدم عبد الرحمن من إيمان وجذبها بعيداً ولكن برفق ، وقف بجوارها قائلاً بعتاب:

- ممكن تقعدى على جنب وتبطلى تتمشى قدام كل الناس كده

قالت إيمان بتلقائية :

- أنا مش بتمشى انا كنت ...

قاطعها بحق:

- ولا كنت ولا مكنتش .. خالى الفرح ده يعدى على خير متخالنش ارتكب جريمة

ثم نظر إلى محمد بطرف عينيه وقال لها:

- أنتِ مش شايفة اللى عمال يبصلك ده

نظرت إيمان إلى حيث ينظر ، حاولت أن تخفى ابتسامتها وهي تقول بلا مبالاة:

- يبص ولا ميبصش وانا مالى

وقف أمامها ليحجب عنها الرؤية قائلاً بغضب:

- متخالنش أطلعك فوق واقفل عليكى .. أنتِ تفضلى فى أيدي لحد ما يغور من هنا

وضعت يدها فى خصرها وقالت بلا مبالاة :

- زى ما تحب

عاد بها مرة أخرى ولكنه لم يترك يدها، ظل ممسكا بها بتملك وأجلسها بجواره وهو ينظر لـ محمد نظرات حادة جعلته يصرف بصره عنها طوال الحفل.

لم يترك حسين يد مريم أيضاً، ظل بجوارها يربت على يدها ويطمئنها ، وكان يوسف يجلس بجوارها من الطرف الآخر ولكن بعيد عنها نسبياً دون أى تلامس ، لم تنظر له أبداً ومازالت ترسم ابتسامة باردة على شفثيها كأنها صورة مجسمة بلا روح.

تفاجأت مريم بحضور سلمى التى اقتربت منها وقبلتها ببرود قائلة:

- مبروك يا عروسة .. زعلانه منك يا وحشة كده متعزمنيش

بادلتها مريم القبلة الباردة دون أجابة فاعتدلت سلمى ومدت يدها لتصافح يوسف قائلة :

- مبروك يا عريس

نظر لها باحتقار دون أن يمد يده فأعادت يدها مع احتقان وجهها ونظر الناس إليها واتخذت مكاناً بجوار وليد الذى أشار لها أن تأتى بجانبه ...همس لها:

- متزعليش .. بكرة هطلعه على جتته

قالت ببرود :

- أهو كلام.. قلتلى كده المرة اللى فاتت ومعملتش حاجة

قال بخفوت :

- ومين قالك انى معملتش .. هى بس مظبطتش معايا بس اوعدك هتتعوض

وقفت فرحة بجوار إيهاب وقالت بطفولية:

- انا متغاضبة.. عاوزة البس فستان فرح تانى ماليش دعوة عاوزة نتجوز تانى

قال إيهاب موافقاً:

- من عنيا يا حبيبتي أوعدك هتجوز تانى واعزمك

ضربته على كتفه فوضع يده على كتفه متألماً وهو يضحك:

- آآآآ آه...يا مفترية

عقدت ذراعيها أمام صدرها وقالت:

- قال يتجوز عليا قال ده انا كنت ادبحك

لف ذراعه حول كتفها وقال ضاحكا:

- بحبك يا مجنونة

\*\*\*

أنتهى الحفل وسمح إبراهيم لوفاء أن تجلس بعض الوقت مع خطيبها فى الحديقة قريباً من مريم ويوسف، بينما كان حسين آخر من ينصرف ويترك مريم ولكنها أطبقت على ذراعه قائلة :

- ماتمشيش يا عمى

أطرق يوسف برأسه وسمع والده يقول لمريم مطمئنا:

- متخافيش

ثم التفت إلى يوسف ناظراً إليه بحدة وهو لا يزال يوجه حديث لمريم وقال:

- انا واقف فى البلكونة وعينيا عليكٍ لحد ما تطلعى شفتك

ثم انصرف وتركهما بعد أن سمحت له على مضض ، لم تعد تحتملها قدماها فجلست قبل أن تسقط ، شعرت بأطرافها متجمدة وألم فى معدتها وهو يجلس أمامها و ينظر إلى الفراغ وطال الصمت ، تملك جسدها قشعريرة فلفت ذراعيها حول جسدها وكأنها تحتضن قلبها وتطمئنه كعصفور طار طويلاً تحت زخات المطر ووقع على ذراعيها فى أجهاد شديد يخفق فى ألم ووحدة

ظن يوسف أنها تشعر بالبرد فأخذ سترته التى وضعها من قبل على المائدة أمامه ومد يده به إليها قائلاً بصوت مرتبك:

- خدى ألبسى ده.. شكلك بردانة

نظرت لسترته ثم نظرت إليه باشمئزاز قائلة بتقرف:

- أخاف المسه ينجسنى

كلمتها كانت ثقيلة على أذنيه ، ولكنه لم يرد، وضع السترة بجواره متمماً:

- أستغفر الله العظيم

قالت على الفور وقد بدا وجهها يشتعل بغل:

- بتعرف ربنا أوى يا ندل ؟

أبتلع ريقه فى صعوبة وشعر بجفاف حلقه ، وضع رأسه بين يديه وهو يزفر بقوة.. فقالت:

- ياريت لما تنفخ تاتى تودى وشك الناحية الثانية علشان متلوش الهوا اللى بتنفسه

شعر باستفزازها له فقال وهو يضغط على أسنانه :

- الكلام ده مالوش لزوم

قالت بحقد:

- إن شاء الله ربنا هينتقم لى منك يا حقير

أشار لها يحذرهما قائلاً:

- شوفى .. أنا كنت ناوى أتأسفلك واستسمحك .. بلاش تستفزنى علشان متضطرنيش أرد

عليكى رد مش هيعجبك

قالت باستهزاء:

- كمان ليك عين تتكلم ..أما بجح صحيح

لم تكن تعلم مريم ما هذه الجرأة التى تملكها وهى تتحدث معه، ولكن كل ما تعلمه أنها بمجرد ما خلت به شعرت بكمية حقد وغل لا مثيل لهما ، بل وبحث بنظرها على الطاولة لعلها تجد سكين أو ماشبه ولكنها لم تجد فقررت ذبحه بكلماتها، كانت مطمئنة بأن عمها يراقبهما من بعيد ووفاء وخطيبها بالقرب منهما فشجعها ذلك على الإسترسال فى أهانتها وأشباع حاجتها فى تمزيقه وقتله بعباراتها.

أشاح بوجهه بعيدا عنها وهو يحاول كتم غيظة والسيطرة على انفعالاته، فهو يلتمس لها العذر فى كل ما تقول وتفعل، ما فعله ليس بهيئاً ، فما جدوى الاعتذار فى مقابل الجريمة التى ارتكبتها فقرر أن لا يرد عليها مهما قالت، صمته استفزها كثيراً فهى لم تنتهى بعد من أخراج ما بداخلها من لعنات عليه ، ولم يشفى صدرها مما يعتمل بداخله من حقد وغل تجاهه فقالت بسخرية:

- لاء واخويا بيباركلك ...

ثم نظرت له باحتقار وقالت:

- فاكرك بنى آدم

ضرب المائدة بقبضته فى غضب والتفت إليها قائلاً:

- يابنت الناس بطلى تستفزىنى.. أنا ماسك أعصابى بالعافية

قالت بسخرية :

- ده على أساس أنك عندك دم زى البنى آدمين

قال بلهجة حادة:

- أوعى تفتكرى ان انا علشان ساكت ومش عاوز اتكلم انك هتستضعفينى وتهزنى فيا براحتك لاء.. أنا ساكت علشان خايف عليكى .. أنا لو اتكلمت هاجرحك..أنا مش غلطان لوحدى يا هانم.. ومتعمليش عليا طاهرة.. أنا كنت بشوفك بعينى وانت واقفه مع راجل واتنين كل واحد فيهم بيبصلك كأنك كنت فى حضنه من شوية.. قدام باب الكلية وفى فرح اختك .. كل ده كوم والسفالة اللى كنت بتعملوها مع وليد كوم تانى

قالت بانفعال مكتوم:

- أخرس يا ندل .. كمان بتشوه سمعتى.. مش كفاية اللى عملتوا فيا

قبض على يدها بقوة قائلاً:

- أنا لو كنت ندل كنت مشيت من البيت وسافرت أى مكان ومكنتش اتجوزتك.. مكنش هايهمنى غضب ابويا عليا مانا ندل بقى .. لكن انا ندمت على اللى عملته وتوبت لربنا وكان لازم استر عليكى علشان ربنا يقبل توبتى.. الدور والباقى عليكى .. شوفى نفسك قبل ما



تتهمني بالحقارة .. على الأقل انا عملت كده وانا شارب مخدرات تغيب عقل بلد.. لكن انت كنت بتعملى اللى بتعمليه مع وليد ومع غيره وانت عارفة بتعملى آيه كويس... لا وطلعتى شاطرة وحافظتى على نفسك لآخر لحظة رغم كل اللى كنت بتعمليه  
قالت بكره شديد :

- منك لله يا .. مصمم تشوه سمعتى ماكفاش اللى عملته فيا نهض وهو يقول:

- اقعدى مع نفسك وانت تعرفى ان سمعتك كانت متشوهة لوحدها ... اه صحيح انا نسيت اقولك انى كنت ماشى وراكى بالعربية انت وصاحبك السفلة وشفتكوا .. شفت كنتوا رايعين فين ومع مين

وقبل أن ينصرف سمعها تقول بحقد:

- ربنا ياخذك ويرحنى منك

عاد مرة أخرى وقال لها بألم :

- أهى دى أحلى دعوة سمعتها من ساعتها .. أيوه كده ادعيها لى دايماً وان شاء الله ربنا هيستجيب منك ويرحك منى ويرحنى انا كمان.

\*\*\*

قبل قليل كانت إيمان تقف فى الشرفة تنظر إلى نفس المشهد الذى تكرر من قبل ، ولكن مع أختها التى ترتدى نفس الفستان وتجلس مع زوجها وكل منهما ينظر فى اتجاه ، تذكرت كيف كانت تجلس هكذا يوم عقدها على عبد الرحمن واسترجعت نفس المشاعر المؤلمة، كان عبد الرحمن قد بدل ملابسه ثم دخل إليها غرفتها فوجدتها تقف شاردة أمام شرفتها تنظر إلى مريم ويوسف فى وجوم، شعر فوراً بما يعتمل فى نفسها وانها تذكرت يوم عقدهما ، حاول أن يطفى جو من المرح على الموقف فاقترب منها وهو ينظر إلى منامتها القطنية الوردية قائلاً بمرح:

- بتعملى آيه عندك يا باربى ..

أنثشتها كلمته من أعماق ذكرياتها فالتفتت إليه ثم نظرت إلى رسوم باربى المطبوعة على ملابسها وقالت ببرود:

- عاوز حاجة؟

أقترب منها أكثر ووضع كفه على وجنتها قائلاً برقّة:

- مش عاوز حاجة غيرك

دفعته بخفة في صدره وابتعدت عنه ، دخلت الفراش وتدفرت وهي تقول:

- لو سمحت اطفى النور وانت خارج

جلس بجوارها على طرف الفراش وأزاح الغطاء قليلاً وهو يقول بعذوبة:

- طب انا مش خارج .. أيه رأيك نفضل في السرير ونجيب حد يطفئنا النور

أبتسمت وهي تضع الوسادة على رأسها واكتسب صوتها نبرة جدية وهي تقول:

- من فضلك انا تعبانة وعاوزة انام روح نام في اوضتك

طبع قبلة صغيرة على رأسها وقال:

- تصبحي على خير ..

أطفأ المصباح وخرج لينام في الغرفة الأخرى ، دخل فراشه ووضع يديه تحت رأسه وهو ينظر للأعلى شاردًا في حاله "معقول اكون حبيبتها بسرعة كده! .. هو انا لحقت .. ده انا لسه من كام يوم كنت حاسس انها زى اختي ! ... لا.. بس انا لما زعلتها وسابت البيت ومشيت مكنتش عارف ارتاح .. ومرحتش غير لما رجعت البيت .. ومكنتش عارف ليه.. معقول كنت بحبها وانا معرفش؟! ... أعتدل جالسًا في فراشه وقال وكأنه يحدث شخص آخر:

- الله .. طب لما هو كده ليه واحنا مسافرين مكنتش حاسس بحاجة ناحيتها ومكنتش عاوز حتى المسها ... يمكن علشان كنت حاسس أن بابا هو اللي كان عاوزني اتجوزها؟!!

نهض من فراشه وسار قليلاً يتكلم مع نفسه ويتذكر يوم زفافه وكيف تركها ونام ، وقعت عينيه على صورته في المرآة فوقف أمامها قائلاً:

- ما هو حاجة من الاتنين .. أنت يا أما عبيط يا أما اهل.. والاحتمال الأكبر انك الاتنين مع بعض.

\*\*\*

أوقف وليد سيارته أمام منزل سلمى وقال بضجر:

- أدينى وصلتك اهو زى ماكنتى عاوزه .. يالا اتفضلى

أستدارت بجسدها كله إليه قائلة:

- دلوقتى بقيت توصلنى غصب عنك الله يرحم....

ثم تابعت بغیظ :

- مش كفاية الكسفة اللى اكسفتها فى الفرح وهى بتسلم عليا ببرود والناس شايفانا

- ياستى قلتك اصبرى هخدك حقك

قالت بعصبية:

- كله بسببك.. قعدت توعدنى انك هتاخدلى حقى من القلم اللى يوسف ضربهولى قدامك..

وانا صدقتك لما قتللى هتفضحه فى كل حته ونفذتك اللى انت عاوزه .. وادى النتيجة مفيش حاجة حصلت.. لا وفى الآخر اتجوزها كمان

قال بشرود:

- ومين قالك ان مفيش حاجة حصلت..أنا بس لسه مش متأكد

قالت بسخرية:

- ما انت قتللى قبل كده الكلام ده واهو راح اتجوزها

قال بنفاذ صبر:

- يا غبية افهمى.. الجواز السريع ده حصل نتيجة لحاجة من الاتنين.. يا أما بعد ما شافها

طالعة معاكى انت وولاد خالتك وقرر يواجهها وفعلاً واجهها وهى قدرت تضحك عليه ...

ودى حاجة يستبدها لأنه كان شارب مخدرات تخليه تلاجة ماشية على رجلين .. يا أما

حصل عكس اللى كنت مخططه واضطر يستر عليها.

عقدت سلمى حاجبيها وقالت بعدم فهم:

- عكس اللى كنت مخططه ازاي.. أنت مش كان هدفك انه يحاول معاها وهو شارب وهى تروح تفضحه عند ابوك وتبقى كده ردتله اللى عمله معاك لما هددك انه يفضحك .. وفى نفس الوقت ابوك ميصدقوش بعد كده لو قال عليك حاجة؟!!

- بالظبط .. بس واضح ان اللى حصل اكبر من كده.. واضح ان الحكاية تعدت المحاولة بمراحل.. وإلا مكانش شكلهم بقى زى ما شفتى كده كأنهم بيتجوزوا غصب عنهم .. ومش طايقين بعض .

أستدار فجأة إليها قائلاً بضيق:

- يالا انزلى بقى وجعتلى دماغى .. عاوز اروح امخمش كده مع نفسى ..الحكاية دى لازم اتأكد منها بأى شكل بس مش عارف ازاي

\*\*\*

## الفصل الثالث والعشرون

دخل يوسف مكتب أبيه مطرقاً وقال:

- حضرتك بعثلى يا بابا؟

نظر له والده فى حدة وهو يقول:

- أنت أيه اللي جابك الشركة النهاردة؟

نظر له يوسف بدهشة قائلاً:

- جاي اشوف شغلى

نهض والده وقال بلهجة صارمة:

- ملكش شغل عندى

ثم تابع بنفس نبرته الحادة:

- تروح دلوقتى تلم حاجتك من مكتبك وتروح بيتكوا ولا تشوفك مصيبة تانية تروحها

شعر بغصة فى حلقة وهو يقول بخفوت:

- يعنى أيه ؟

قال حسين بنفس النبرة الجامدة :

- زى ما سمعت.. مشوفش وشك فى الشركة تانى وكفاية انى مطردتكش من البيت.. واسمع  
مش عايز اشوف خيالك فى البيت طول مانا هناك .. تغور فى أى حطة من قدامى .. فاهم ولا  
مش فاهم

\*\*\*

خرج يوسف من مكتب والده والدنيا تميد به، لماذا لم يدافع عن نفسه ولو بكلمة واحدة! ..  
لماذا لايعطيه فرصة ليتحدث ، لماذا لا يتكلم معه ليعرف لماذا فعل ذلك؟

أستقل سيارته وقادها بلا هدف حتى وجد نفسه يمر بكورنيش النيل، ركن سيارته جانبا  
وترجل منها، وقف أمام سور الكورنيش ينظر إلى الماء فى وجوم، يتذكر الليلة المشؤمة  
، تذكر عندما قاد سيارته مراقباً لسيارة سلمى، ظل خلفها متابعا لها بتركيز والغيرة تفتك  
بقلبه ، وبدون سابق أنذار توقفت سلمى تحت إحدى البنايات ، خرجت سلمى من سيارتها ثم  
الرجلين ، وقفا يتحدثان قليلاً ثم صعد الرجلين لفترة من الزمن قصيرة وهبطا إليها مرة  
أخرى، ثم خرجت مريم من السيارة وصعدت معهما هى وسلمى ، توجه إلى حارس العقار  
وتحجج بأنه يسأل عن شقة مفروشة خالية فى البناية فقال له الحارس بتأفف :

- بلا مفروش بلا قرف

ثم أشار إلى سيارة سلمى قائلاً:

- آدى اللى بناخده من المفروش بلا هم.. بنات عايزة قطم رقبتها ملهمش أهل يلموهم

توقفت ذكرياته عند هذه النقطة عندما شعر بألم شديد فى عضلات قلبه، عاد إلى السيارة وقادها مرة أخرى عائداً إلى المنزل، بمجرد أن دخل من بوابة المنزل الداخلية تفاجأ بخروج فرحة ومريم من المصعد وما أن رآته فرحة حتى تعلقت فى ذراعه قائلة:

- جيت فى وقتك يا اخويا يا حبيبى

ثم طبعت قبلة على كتفه تداعبه وقالت:

- ممكن توصلنا الكلية وهنيالك يا فاعل الخير والثواب

لم تعد مريم تحتمل رؤيته أكثر من هذا، أشاحت بوجهها بعيداً وهو يقول لأخته:

- معلىش يا فرحة خلى إيهاب يوصلكوا

فرحة:

- إيهاب مش هنا وهيتأخر النهاردة، واحنا كنا هناخد تاكسى بس ربنا بعثك لينا يرضيك نروح ندور على تاكسى انا ومراتك وانت موجود

نظر يوسف لمريم ولكنه تفاجأ بشكلها الجديد ، ملابسها مختلفة كثيرا ، فضفاضة ومحتشمة ، نظر إلى وجهها، الحجاب طويل يغطى صدرها، لم تصبغ وجهها بأى ألوان، ظل ينظر إليها حتى قاطعته فرحة قائلة بمشاغبة:

- أنت ياعم الرومانسى.. سيبك من مراتك دلوقتى وركز معايا

أنبتهت مريم أنه ينظر إليها بتمعن فقالت لفرحة:

- انا هستناكى عند باب الجنينة بره

تابعها يوسف بعينه حتى وصلت لباب الحديقة فأدارت فرحة وجهه بيدها قائلة:

- ياعم انت هنتأخر تعالى وصلنا وابقى بحلق براحتك فى السكة بس اوعى تعمل بينا حادثة

أضطرت مريم أن تتركب بجواره وفرحة فى الخلف ، وطوال الطريق تتحدث فى الهاتف مع صديقتها المقربة كعادتها دائما، أخرجت مريم مصحف صغير من حقيبتها وظلت تقرأ فيه طوال الطريق ، كان يختلس النظر إليها من حين لآخر وهو لا يصدق ما يرى، تردد قليلاً ثم قال:

- رايحين دلوقتى تعملوا أيه.. انتوا مش فى أجازة؟

لم تسمعه فرحة وهى تتحدث إلى صديقتها فى الهاتف فأعاد السؤال مرة أخرى وهو ينظر لمريم فقالت ببرود:

- عندى تدريب صيفى

وجد نفسه يقول:

- هتخلصى أمتى؟

قالت بصوت أشبه للهمس من بين أسنانها:

- ملكش دعوة

بعد أن انتهت فرحة وأغلقت الهاتف قال يوسف على الفور:

- هتخلصوا أمتى يا فرحة علشان آجى اخدكم

قالت فرحة بسعادة :

- آيه ده بجد ! .. أنا هخلص على ٣ كده ..

ثم نظرت إلى مريم متسائلة :

- وانتِ يا مريم هتخلصى أمتى

تصنعت مريم ابتسامة وهى تقول:

- لا متشغلوش بالكوا .. أنا لما هخلص هروح

قال يوسف:

- خلصى براحتك .. بس قوليلى على أمتى علشان آجى اخدك

صمتت بضيق من محاصرته فكرت فرحة سؤاله قائلة :

- ها يا مريم هتخلصى أمتى؟

قالت بضجر:

- يعنى على الساعة ٢ أو ٣ مش عارفة بالضبط

قال يوسف بحسم:

- الساعة أنتين هتلاقينى واقف مستنيكى

\*\*\*\*

خرج وليد من مكتبه واقترب من مكتب علا التى لا تعيره اهتماما ، رسم ابتسامة على شفاه قائلاً:

- أنا هروح اتغدى تحبى تيجى معايا؟

هزت رأسها نفياً قائلة بجدية:

- متشكرة يا أستاذ وليد.. وبعدين لسه معاد الراحة فاضل عليه نص ساعة

أتكأ على المكتب قائلاً:

- ياستى انا صاحب الشغل ولا يهمك.. وبعدين انا عاوزك فى موضوع مهم ومش هينفع هنا

نهضت ونظرة له بجدية وقالت:

- انا مفيش مواضيع بينى وبين حضرتك غير الشغل وبس ... لو فى حاجة فى الشغل افكر هنا مكانها مش فى حته تانية

أعتدل وهو يتفحصها ببرود وعقد ذراعيه أمام صدره قائلاً:

- أنتِ بتعاملينى ناشف كده ليه

جلست وهى تتابع عملها:



- أصل حضرتك متصور انى علشان بشتغل عندك يبقى سهل تاخدنى أى مكان بره الشغل ..  
لايافندم انا مش كده .. وأظن حضرتك تعرف أن ابن عمك كان خاطب اختى يعنى لو كانت  
أخلاقنا عليها غبار مكنش فكر يرتبط بيها من الأول.

ثم اقلت عبارتها الأخيرة قاصدة أياها قائلة:

- أحنا مالناش غير فى الجد وبس يا فندم.. ولو سمحت يا أستاذ وليد سبنى اكمل شغلى

أخرج وليد علبة من القטיפه من جيبه ورسم على وجهه علامات الحزن قائلاً:

- أنتِ فهمتيني غلط على فكرة.. أنا بس كنت عاوزك علشان اقدملك دى

وفتحها وأدارها إليها، أقلت عليها نظرة سريعة . كانت تحوى خاتماً ذهبياً مرصعاً بفصوص  
لللمعة براقه ، أعادت نظرها إليه ببرود وقالت:

- ايه دى

وليد :

- دى هدية بسيطة

- بمناسبة ايه؟

قال مغزلاً:

- بمناسبة جمالك

تصنعت الإنفعال وهى تقول:

- حضرتك ليه مصمم تضايقتى.. قلت لحضرتك انى ماليش فى الحاجات دى .....انت ليه  
مبتقدرش تفرق بين البنات وبعضها

وأخذت حقيبتها وهى تتصنع البكاء وهرولت سريعاً من أمامه وهى تخفى ابتسامة خبيثة  
بداخلها لم تتجاوز عقلها !

شعر بحيرة شديدة من تصرفاتها معه ، فهو لم يعتاد على ذلك من أى فتاة أخرى، هاتف  
صديقاً له وواعده على الغذاء والتقى به فى إحدى المطاعم القريبة من الشركة:

- ايه يا عم مختفى فين بقالى مدة مش شايفك على الشاشة يعنى

زفر وليد قائلاً بحنق:

- أسكت يا معتز فى بت مطلعة عيني

قال معتز باندهاش:

- آيه ده .. بقى وليد باشا مش قادر على حته بت.. لا قول كلام غير ده .. مين البت دى

زفر وليد ثانية بضيق قائلاً:

- بتشتغل معايا فى مكتبى فى السكرتارية .. بس رخمة رخامة يا أخى.. حتى الابتسامة فى وشى بطلوع الروح .. أقولها نرفع الألقاب تقولى مينفعش ... أعزمها على غدا مترضاش وتقولى أنا مش بتاعة الكلام ده .. أجيبها هدية تديهوملى فى جنبى وتسيبنى وتمشى.. لما خنقتنى

ضحك معتز ضحكات عابثة قائلاً:

- لا ده انت حالتك صعبة أوى .. قولى هى حلوة؟ .. تستاهل يعنى

قال وليد بضجر:

- وانا هعمل آيه بحلاوتها وهى منشفة ريقى كده .. لا وقال آيه تقولى أنا ماليش غير فى الجد

ضرب معتز جبينه قائلاً بفهم:

- اوباللا... بس يا باشا انا كده فهمت..البت دى رسمة على جواز

قال وليد بسخرية :

- جواز مين يابا هو انا بتاع جواز ..ما انت عارفنى كويس..انا بس مش متعود ان واحدة تنفضلى كده

أرتشف معتز من القهوة الموضوعه أمامه وقال ببساطة :

- طب انا بقى عندى فكرة تخليك تاخد راحتك معاها على الآخر

قال وليد ساخراً :

- منكم نستفيد

- بص يا باشا.. البت اللى تلاقيها معصجة معاك وماشية فى طريق الجواز ..أخطبها  
وليد باستهزاء:

- لا والله وده من ايه

- أسمع بس لما اكمل كلامى.. الحكاية دى ناس اصحابى جربوها كتير قبل كده.. الواحد منهم  
يخطب البت اللى منشقة راسها معاه.. يروح ويتقدم بقلب جامد ويعمل خطوبة ويقدم شبكة  
متوسطة كده ..ويقعد سنة بقى داخل خارج معاها ،عزومات وسهر وسينما والذى منه...  
ولما تحبك معاه أوى ياخذها تتفرج على شقة المستقبل وهى بتتوضب .. اه طبعا يعنى تعيش  
فى شقة من غير ما تقول رأيها فيها  
لمعت عيني وليد وهو يقول:

- يابنى اللعبة.. شقة المستقبل ..ازاى مخطرتش على بالى الفكرة دى قبل كده ..  
صمت لثوان فى تفكير ثم قال :

- بس يابنى ده كده ممكن يتدبس فيها ويضطر يتجوزها  
قال معتر بسخرية:

- لا ماهو اللى يعمل كده لازم ياخذ باله انه ميدبس نفسه .. يعنى ياخذ راحته من غير ما  
يدخل فى الغريق علشان فى الآخر لما يزهدق.. يقولها معلىش يا حبيبتي احنا شكلنا كده  
متفقتاش ومش قادرين نفهم بعض كل شىء نصيب بتمنالك حياة سعيدة  
- طب ماهى البت ممكن تروح تقول لأهلها

قال معتر بزهو وهو يرى اللعة فى عيني صديقه:

-هتقولهم أيه.. كنت بروح معاه شقة بيقول اننا هنتجوز فيها ؟!.. وحتى لو عملت كده  
هيقولهم محصلش دى كدابة واكشفوا عليها هتلاقوها صاغ سليم.. واهو اتبسط وعمل كل  
حاجة بالدبلة اللى لبسها لها وفى الآخر طلع منها زى الشعرة من العجين ولا حد يقدر يقوله  
تلت التلاتة كام

قال وليد بمكر:

- يابن الأيه.. ده انت حلتهالى على الآخر.. ده على كده الدبلة دى بتحل مشاكل كثير وبتقرب البعيد

\*\*\*

خرجت سلمى من الكلية ووقفت تبحث عن سيارتها بين السيارات فرأت فتاة تشبه مريم اقتربت منها ثم قالت بدهشة :

- أيه ده مريم؟

ألتفتت لها مريم وقالت ببرود:

- أهلا يا سلمى

أقربت سلمى أكثر منها وهى تنظر لملابسها قائلة:

- أيه اللى لابساه ده.. من أمتى يعنى

ثم قالت بسخرية :

- أيه هو يوسف غصبك تلبسى كده .. من أولها كده هيتحكم فيكى

نظرت لها مريم بحق قائلة:

- لا يا سلمى انا اللى غيرت لبسى علشان أبقي محجبة زى ما ربنا عايز مش زى ما الموضة عاوزة

صفقت سلمى ببطء وهى تقول:

- برافوو.. أيه ده ياربى .. واقفة قدام ايمان بذات نفسها

نظرت لها مريم بضيق وهمت بالإنصراف تاركة لها المكان ولكن سلمى قبضت على ذراعها وتصنعت التفهم:

- متزعليش بس استنى هنا انا والله مبسوفة انك مرتاحة انا بهزر معاكى مش اكتر.. ده انت حبيبتي يا مريم

- خلاص مفيش حاجة .. عن أذنك بقى مش عاوزة اتأخر

استدارت لتذهب فوجدت أحد الشباب مقدم فى اتجاههما وهو يشير لسلمى من بعيد بالتحية ، حاولت أن تذهب ولكن سلمى قبضت على يدها مرة أخرى وهى تقول :

- استنى بس انت وحشاني أوى ولسه مشبعتش منك

أرتبكت مريم ونزعت يدها من يد سلمى وقالت:

- معلى مش دلوقتى عن اذنك

ألتفتت لتذهب مرة أخرى فوجدت الشاب قد اقترب منهما قائلاً وهو يبتسم لمريم:

- ازيك يا مريم وحشتينا

قطبت جبينها وهى تقول :

- آيه وحشتينا دى لو سمحت اتكلم معايا باحترام

وتركتهم وذهبت بسرعة بعيداً ، ألتفت الشاب إلى سلمى وهو يقول بسخرية :

- دى مالها دى

ما أن خطت مريم خطوات قليلة وكأنها تعدو حتى اصطدمت بيوسف ، توترت وهى تنظر إليه وهو يقول لها:

- الواد ده ضايقك ؟

هزت رأسها نفياً فقال لها وهو ينظر إلى سلمى وصديقها شذراً :

- طب يلا.. كويس انى جيت بدرى

أستقلت معه السيارة وعندما لم تجد فرحة قالت بتوتر :

- فين فرحة؟

قال بعملية:

- صاحبها روحوا بدرى وخذوها فى سكتهم

توترت أكثر وشعرت باضطراب فى جسدها ، خفق قلبها بشدة عندما أدار محرك السيارة وهو يقول:

- كان بيقولك أيه؟

-هو مين؟

نظر لها نظرة جانبية سريعة وهو يقول:

- الواد اللى ضايقتك من شوية

قالت بضيق :

- قلتلك مضايقتيش

- أومال انا ليه شفتك بان عليكى ملامح الضيق أول ما شفتيه وسبتيه ومشيتى على طول

نظرت له بدهشة:

- أنت كنت بتراقبنى ولا ايه....

ثم أضافت بحنق :

- وبعدين أنا بطلت أقف مع ولاد

نظر أمامه ولم يرد عليها فقالت باستنكار:

- أظاھر انك نسيت نفسك وافتكرت انك جوزى بصحيح

قال بهدوء :

- متبدأيش فى استفزازى تانى من فضلك.. كفاية اللى قولتيه قبل كده

كانت تتمنى أن تستفزه فعلاً وأن توجه إليه اللعنات ، ولكن هذه المرة تختلف كثيراً، أنها وحدها معه فمن الأفضل أن تصمت، فتحت مصحفها وظلت تقرأ بعينها فى صمت وهو ينظر إليها بين الحين والآخر حتى وصل إلى المنزل، وعند البوابة تفاجأ بمرور سيارة والده فى طريقه للعبور للداخل، لمح والده مريم تجلس بجواره فى السيارة .. تراجع يوسف بسيارته ليفسح المجال أمام أبيه للعبور ، توقفت السيارتان وهبطت مريم فى سرعة وتوجهت إلى سيارة عمها وهو يترجل منها فى هدوء ، وضع يده على كتفها بترحاب قائلاً:

- ازيك يا بنتى .. كنتِ فين؟

- كان عندي تدريب في الكلية وكان المفروض ارجع مع فرحة .. بس هي روجت بدرى مع اصحابها

نظر حسين إلى يوسف الذى يقف أمام والده باحترام شديد، ثم نظر مرة أخرى إلى مريم وقال لها:

- ضايقتك؟

هزت رأسها نفيا وهي تقول :

- لاء

أعاد حسين نظره إلى يوسف قائلا:

- انا كنت هسحب منك العربية كمان.. بس خلاص خليها.. أهو تبقى توصلهم بدل ما تقعد عاطل كده ..

وأخذ مريم واتجه بها إلى الداخل ، أستند يوسف إلى سيارته ومسح على شعره وقد احمر وجهه مما سمعه من كلمات لازعة أمام مريم.

توقف بهما المصعد فى الطابق الثانى فقال حسين بحنان:

- متيجى تقعدى معايا بدل ما تطلعى تقعدى لوحدك فوق .. تلاقى ايمان عندنا دلوقتى

أومأت برأسها موافقة فلمح فى عينيها التوتر والحيرة فقال:

- عاوزه تسألنى على حاجة؟

قالت بخفوت:

- أيوه يا عمى عاوزه اعرف معنى الكلام اللى قلته تحت من شوية

أبتسم وهو يقول متسائلاً:

- يهملك تعرفى؟

زأغت نظراتها ولم ترد فقال وقد اتسعت أبتسامته أكثر:

- طردته من الشركة وقتلوا مالکش شغل عندي وكنت ناوى اسحب منه العربية بس خلاص طالما ممكن ينفعك بيها خليها معاه

شعرت مريم بشيء من الإرتياح عندما تخيلته وهو يطرد من عمله ويتكلم معه أبيه بهذه الطريقة المهينة ، وأمامها أيضاً ، طرق الباب وفتحت له إيمان بابتسامتها المشرقة:

- حمد لله على السلامة .. أيه كان عندكوا راند فو ولا أيه؟

قال حسين مداعباً :

- هزرى براحتك علشان جايبك خبر هيفرحك أوى

- خبر أيه؟

قال بلامبالاة :

- عبد الرحمن سافر بور سعيد وهيقد كام يوم هناك

شعرت إيمان بصدمة وهى تقول:

- سافر امتى.. ومقاليش ليه؟

أبتسم وهو يقول :

- أنا كنت فاكرك هاتفرحى اكمنه كان كابس على نفسك

أنطفات أشراقتها وقالت:

- مكلمنيش يعنى .. للدرجة دى مش فاضى

- كان لازم يسافر بسرعة مع العملاء.. فى مشكلة فى المينا ومفیش حد غيره هيعرف يحلها

وتلاقيه مش عارف يكلمك وهو راكب معاهم

قالت بذبول وهى تنصرف للمطبخ:

- طب ياعمى متشكرة انك قولتلى .. أروح اكمل الغدا مع طنط عفاف

جلس بجوار مريم بعد انصراف إيمان وقال لها:

- بقولك أيه يا مريم انا شايف ان مفیش داعى نستنى كثير.. أيه رأيك نعمل الفرحة أول ما

عبد الرحمن يرجع

أنتفضت وهى تلتفت إليه قائلة:



- لا يا عمى كده بدرى أوى

قال بجدية :

- بدرى على أيه؟ .. انت ناسية انتوا هتعيشوا مع بعض ازاي؟ .. يعنى مش هتفرق بقى  
نعمل الفرحة دلوقتى ولا بعدين.. كده ولا كده مش هيبقى فى بينكوا تعاملات

قالت مريم بتوتر:

- بس انا اخاف اقعد معاه فى مكان واحد .. ده انا كنت مرعوبة وانا راكبة معاه العربية  
لوحدى

قال بثقة :

- متخافيش .. ميقدرش ياذيكى بأى شكل من الأشكال .. هو عارفنى كويس وعارف انا ممكن  
اعمل فيه أيه

حاولت أن تعترض بكلمات مبعثرة متلعثمة ولكنه قاطعها قائلاً:

- خلاص بقى يا مريم خلينا نخلص من الحكاية دى بدل مانتى كده على ذمة واحد بتكرهية ..  
خليكى تدخل وتقعدى معاه شوية وبعدين تطلقى وتبدأى حياتك من جديد .. عاوز أطمئن  
عليكى يا بنتى.. ها قولتى أيه ؟

قالت بخفوت :

- معاك حق يا عمى التأجيل مالوش لازمة.. خلينا نخلص

\*\*\*

جلس وليد أمام أبيه وهو يقول:

- يا بابا الكلام ده مالوش لازمة.. البنت عاجبانى وهاخطبها خلاص

قال إبراهيم بانفعال:

- أنت ناسى دى تبقى مين.. دى اخت هند اللى ابن عمك فسخ خطوبته منها والله أعلم عمل  
كده ليه

قال وليد ببرود :

- ميهمنيش .. وبعدين انا قلت هاخطبها هو انا قلت هتجوزها

نظر له والده بتسائل:

- نعم...يعنى ايه

قال وليد بارتباك:

- لا انا قصدى يعنى انى هخطبها واشوف أخلاقها.. لو طلعت كويسة نكمل ..طلعت غير كده  
يبقى خلاص

- يابنى مش عاوزين حاجة تفرق بينا وبين عمك وولاده.. ازاي بس هتيجى بينا كده هي  
واختها اللي كانت مخطوبة لابن عمك

قال وليد فى تصميم:

- يابابا انت مكبر الموضوع أوى .. دى مجرد خطوبة وخلاص ... وبعدين يعنى هو عبد  
الرحمن ومشاعره أهم عندك مني انا

قال إبراهيم فى استنكار:

- لله الأمر من قبل ومن بعد.. أنا عارفك لما بتحط حاجة فى دماغك .. خلىنى اقول لعمك  
واشوف هيتصرف ازاي

وليد بلا مبالاة :

- يتصرف فى ايه بس .. أنا خلاص دخلت بيتهم وقعدت مع امها وحددنا معاد كمان يومين ..  
ولا يرضيك ابنك يخلف وعده ويطلع عيل

\*\*\*

ربت حسين على كتف أخيه إبراهيم وقال بابتسامة:

- هدى نفسك يا إبراهيم خلاص سيبه يعمل اللي هو عاوزه

- ازاي بس .. الواد ده مخه طول عمره تاعبنى يا حسين ومش قادر عليه

قال حسين مهدئاً:

- خلاص يا ابراهيم يخطبها هو حر .. هو اللي اختار.. سيبه على راحتة علشان ميحيش بعد كده يقولك انت غصبت عليا

- هتدخل العيله ازاي دي هي واختها... طب وعبد الرحمن  
أبتسم حسين وقال بتفهم:

- عبد الرحمن بيحب مراته يا ابراهيم.. ووجود هند من عدمه مش هيفرق معاه.. بلاش نعانده مع وليد وانا متأكد انه هيسيبيها لوحده

\*\*\*

جلس وليد بجوار علا وأمسك يدها وألبسها خاتم الخطبة الذهبي والذي حرصت علا على أن تنتقيه بسيط لتعطى انطباع لوليد عنها أنها قنوعة ولا تطمع في أمواله وإنما وافقت على الخطبة من أجل مشاعرها تجاهه .. فقط لا غير !

جلست هند في بهجة بجانبها وطبعت قبلة على وجنتها قائلة بسعادة كبيرة:

- مبروك يا لولى

كانت هند تشعر بأنها اقتربت خطوة كبيرة من عبد الرحمن ، ولابد أن تلحقها بخطوة أخرى سريعة ولكنها ستنتظر عودته أولا، كانت فاطمة تجلس بجوار زوجها وتهمس له:

- ابنك اتجنن باين عليه.. بقى دول ناس نناسبهم

وخزها بلطف قائلا:

- مالناش دعوة يا فاطمة.. أحنا جينا بس علشان منسيبوش لوحده.. لكن كده ولا كده كان هينفذ اللي في دماغه

مالت وفاء عليها قائلة :

- بس يا ماما.. الناس بتبص اسكتي

نظرت علا لوليد بدلال وقالت:

- او مال عمك مجاش ليه هو وولاده .. هما مش موافقين على خطوبتنا؟

طبع قبلة على يديها قائلا:

- مش بابا وماما واختى موجودين عاوزه عمى فأيه بس .. وبعدين يا حبيبتي ملكيش دعوة غير بيا انا بس .. أنت فى قلبى.. واللى مش عاجبه بخبط دماغه فى الحيطه

ضحكت بدلال وهى تقول:

- ربنا يخليك ليا يا حبيبى

\*\*\*

دخلت عفاف مندفعه إلى زوجها فى غرفته هاتفه :

- أنا عاوزه أعرف فى أيه بينك وبين ابنك

رفع وجهه من بين أوراقه وقال بهدوء:

- مالك يا عفاف فى أيه وابنى مين فيهم؟

قالت عفاف بانفعال:

- أبنيك يوسف ...أنا عاوزه اعرف فى أيه .. تشوفه فى مكان تسيبه وتمشى.. وهو مبيقعدش معاك فى مكان واحد.. ودايما قاعد فى الجنينة وامبارح نام فيها.. أنا عاوزه افهم !

نظر لها بضيق قائلاً:

- وانا مالى متسألينه يا عفاف

قالت بحنق:

- أنا عارفاكوا كويس ..مش ده يوسف اللى كان بينقى الكرسي اللى جنبك ويقعد فيه ..قولى فى أيه يا ابو يوسف

نظر لها نظرة جانبية وقال:

- مفيش ..هو بس غلط غلطة كبيرة أوى فى شغله.. حملنا بيها خسائر كتيرة وكان لازم يتعاقب .. أصله مش صغير يعنى علشان يغلط غلطة زى دى ميغلطهاش موظف لسه جديد

قالت بصوت أشبه بالبكاء تعاطفاً مع ولدها :

- كلنا بنغلط يا ابو يوسف .. مش معقول علشان حاجة حصلت غصب عنه يتعامل بالشكل ده.. ده بقى لا بياكل ولا يشرب لحد ما خس وعدم

رسم ابتسامة رضا على محياه قائلا:

- خلاص يا عفاف .. علشان خاطرك انتِ هسامحه.. علشان تعرفى بس غلاوتك عندى ولو  
انى مبسامحش فى الشغل أبدا

أبتسمت برضا قائلة:

- ربنا يخاليك لينا يا حسين ..

وخرجت بغير الوجه الذى دخلت به منذ قليل .

\*\*\*

كانت مريم تمسك بجهاز التحكم وهى تشاهد التلفاز وتتقلب بين قنواته فى ملل شديد، أطفأته  
ونهضت لتذهب للشرفة لتجلس فيها قليلا ، رأتها يتجول فى الحديقة ويدور حول نفسه،  
يدور كالنمر المحبوس بين قضبانها لا يجد مخرجا ، ظلت تنظر إليه بشرود وهى تتذكر  
كلماته " اقعدى مع نفسك وانتِ تعرفى ان سمعتك كانت متشوهة لوحدها .. اه صحيح انا  
نسيت اقولك انى كنت ماشى وراكى بالعربية انتِ وصاحبتك السفلة وشفتكوا وشفتم كنتوا  
رايحين فين ومع مين " .

جلست على المقعد فى وجوم وهى تقول:

- كنت ماشى ورايا ليه يا يوسف .. ولما شفتنى وانا طالعة معاهم ليه مجتش تاخذنى.. كنت  
همشى معاك والله

\*\*\*

فى نفس اللحظة كانت إيمان تتقلب فى فراشها يجافئها النوم، لقد تعودت على وجوده فى  
المنزل كيف تنام بدونه، نهضت ودخلت الغرفة التى ينام فيها ، دست جسدها تحت غطاءه  
وتدثرت به وأغمضت عينيها وهى تستنشق عبيره الذى يملأ فراشه ووسادته ، وبدأت  
بالفعل فى الاسترخاء حتى سمعت صوت هاتفها ألقتت الهاتف ونظرت فيه وابتسمت عندما  
وجدت أسمه تضىء به شاشته ردت بلهفة :

- السلام عليكم

أتاها صوته عبر الهاتف بشوق كبير:

- وعلیکم السلام.. وحشتینی یا حبیبتی .. وحشتینی أوی

لم تستطع كلماتها أن تعبر عما يحمله قلبها فصمتت فی خجل وشوق ، أتاها صوته مرة أخرى بشوق أكبر:

- هو انا كل ما اقولك حاجة تتكسفی كده.. أنا قلت وحشتینی یا حبیبتی.. یعنی مش قصدی حاجة عیب.. انت دایما كده تفهمینی صح

أبتسمت ابتسامة كبيرة فتابع وكأئه قد رآها:

- أبتسامتك وحشتنی أوی

نظرت للهاتف فی دهشة ثم قالت بصوت هادی ء:

- هتیجی أمتی؟

قال مشاكساً:

- وحشتك؟

حاولت أن تصبغ صوتها بصبغة جدیة وهی تقول:

- أخبرك أیه؟

قال مداعباً :

- لا یا شیخة .. علیا انا الحركات دی ؟

أحمر وجهها بشدة وهو يتابع حديثه :

- أنا دلوقتی فی الفندق ولسه قدامی یومین .. مش عارف هبات یومین کمان بعيد عنك ازای یا حبیبتی

وأكمل مداعباً :

- كل ما اتقلب على السریر اشوف صورتك على الوسادة الخالیة اللى جانبی

أبتسمت رغماً عنها وهی تقول:

- هو انت مبتتكلمش جد أبدًا

ظهر الشوق فى صوته بوضوح وهو يقول:

- ماهو انا لو اتكلمت جد معاكى دلوقتى مش عارف هيحصلى ايه.. مش بعيد أقوم انط فى  
أى عربية واجيلك

قالت محاولة أن تغيير مجرى الحديث:

- عمى حدد معاد فرح مريم ويوسف

قال عبد الرحمن وهو يضع ذراعه خلف رأسه ويتمدد على الفراش باسترخاء:

- قديمة.. عارفها من ساعة .. كنت بكلم بابا وقالى احاول اخلص واجى فى اقرب وقت..

ثم همس لها وهو يقول:

- ميعرفش انى عاوز اطيرو آجى بسرعة

قالت معاتبة:

- يعنى كنت فاضى اهو من ساعة وبتكلم عمى اومال مكلمتنيش ليه

تنهد بقوة قائلا:

- كنت بكلمه وانا بره مع الناس وكنت مستنى لما اقعد لوحدى علشان اكلمك.. أول ما دخلت  
اوضتى فى الفندق كلمتك على طول

ثم قال مداعبا مرة أخرى:

- بصراحة باربى وحشتنى أوى

ضحكت برقة وهى تقول:

- مكنتش اعرف انك بتحبها أوى كده

فقال بخفوت:

- أعمل ايه بس من ساعة ما شفتها وانا نفسى اروح معاها للرديلة وهى اللى مش موافقة

ظل يحادثها ويبثها حبه ولا ينتظر منها ردًا، فهو يعلم أنها مازالت تخجل منه ولن تستطيع أن تجاربه فى الحديث الآن

أنهى اتصاله وهو يضع قبلة على هاتفه لتصل إلى قلبها ، بل لأعماق قلبها بحديثه الهامس  
أحتضنت الهاتف وهى تغمض عينيها لتنام ، تفاجأت بصوت رسالة جديدة، فتحتها لتقرأ  
كلماته لها وقلبها يختلج بشدة بين ضلوعها  
أسمع صوتك أشهد وجهك .. أشعر أنك بين جفوني  
وأدوب حنان وحنينا .. للقائك يا ضوء عيوني

\*\*\*

## الفصل الرابع والعشرون

- أنت بتقول أيه يا وليد معقول الكلام ده .. بقى عبد الرحمن فسخ خطوبته من هند علشان عرف انها جاسوسة لأحلام !

قال وليد بنظرة انتصار:

- علشان تعرفى بس أن مفيش حاجة تستخبي عليا

قالت فاطمة بتفكير:

- الموضوع ده لازم ولاد حسين يعرفوه حالا ... مش لازم يستخبي أبدا

ضحك وليد بسخرية وهو يقول:

- عبد الرحمن هو اللى سمعها ومفتكرش انه قال ليوסף أو فرحة

ألثفت له بتصميم قائلة:



- لازم تقول ليوسف

حرك رأسه نفياً قائلاً:

- يوسف مش طايقنى اليومين دول ... أنتِ قولى لفرحة بصنعة لطافة كده وهى أكيد هتقول ليوسف

نظرت له أمه بتساؤل:

- ويوسف مش طايقك ليه يا واد

وليد:

- أبداً يا ستى كله من تحت راس البت اللى اسمها مريم دى .. كل ده علشان نبهته ان مشيها مش كويس .. طلع فيا ومن يومها وهو زعلان

قالت بتفكير:

- وانت عرفت عنها حاجة.. متأكد يعنى يا وليد

قال بمكر:

- هو انا لو مكنتش متأكد كنت اتكلمت يا ماما

شردت فاطمة فى تفكير وهو تقول:

- سيبلى الحكاية دى

صعدت فاطمة إلى شقة فرحة وطرقت الباب، فتحت لها فرحة مرحبة بها وأدخلتها وهى متعجبة، جلست فاطمة وبدأت فى سرد ما جاءت لأجله وعندما وجدت علامات الذهول على وجه فرحة قالت:

- ايه ده هو انتِ مكنتيش تعرفى .. ده انا فاكراكى عارفة.

نهضت فرحة وهى مصدومة وقالت:

- حضرتك متأكدة يا مرات عمى

تصنعت فاطمة الأرتباك وهى تقول:

- لالا يا بنتى مش متأكدة .. بصى كأنك مسمعتيش حاجة

وذهبت سريعا وهى تقول بصوت مسموع:

- يقطعنى ياريتنى ما كنت اتكلمت

هوت فرحة إلى مقعدها مرة أخرى وجلست تفكر فى كلام زوجة عمها "معقوله ..معقوله  
ايهاب اتجوزنى علشان أمه هى اللى خططت لكده مش علشان بيحبنى .. يعنى ايهاب  
مبيحبنيش وبيخدعنى"

تناولت الهاتف وهى مازالت مصدومة وقالت:

- ايهاب لو سمحت تعالى دلوقتى

- طب قوليلى وحشتنى وانا اجى

جاءه صوتها متجمداً وهى تقول:

- لو سمحت تعالى حالا متتاخرش

\*\*\*

لم تكن صدمة ايهاب أقل من صدمة فرحة حينما قصت عليه حديث فاطمة زوجة عمها وقال:

- أنتِ بتقولى آيه يا فرحة .. أنا أمى خططت لكل ده

وألثقت لها بحنق:

- وأنتِ مصدقة انى اتجوزتك علشان أمى هى اللى قالتلى اعمل كده؟

زاغ نظرها اضطرابا ولم ترد فأوماً برأسه قائلا بعصبية :

- أجابتك وصلت يا هانم .. وعلشان اثبتلك بقى انك لسه معرفتنيش .. جوازت مريم ويوسف  
مش هتكمل وكده ولا كده إيمان مش مبسوطه مع اخوكى وهاخد اخواتى وامشى من هنا  
وورقتك هتوصلك قريب

تعلقت فرحة بذراعه وهى تبكى :

- أرجوك يا إيهاب استنى أنا مش قصدى أنا ..

قاطعها بانفعال :

- خلاص يافرحة عنكى جاوبت قبل لسانك مفيش داعى تقولى اكر من كده

ونزع ذراعه منها وانطلق مغادراً كالسهم والغضب يتآكله ويلتهم حلمه عليها وشغفه بها ،

تناولت فرحة الهاتف واتصلت على أخيها يوسف تستجد به فى بكاء:

- ألحقنى يا يوسف إيهاب هيطلقنى وهياخد اخواته ويمشى من البيت

أنقض يوسف فزعاً وهو يهتف بها:

- ليه ايه اللى حصل..انطقى

سردت له ما حدث فى عجالة ، أغلق الهاتف وصعد إليها فى سرعة ولكنه تفاجأ بزوجة عمه فى طريقها للحديقة ، أوقفته وهى تقطع الطريق أمامه :

- مالك يا يوسف بتجرى كده ليه ياخويا

يوسف وهو يحاول أن يتخطاها:

- معلىش عن اذنك بس علشان فرحة عاوزانى ضرورى

وضعت يدها على فمها وهى تقول:

- يلهوى هى قالتلك ولا ايه

أستدار لها قائلاً:

- قالتلى على ايه

قالت بحزن مصطنع:

- أبدا ياخويا أنا أصلى حكتلها على سبب فسخ خطوبة عبد الرحمن لخطبته هند

نظر إليها ساخراً وقال:

- كتر خيرك يا مرات عمى

تركها وصعد الدرج فى سرعة ، كانت فرحة قد لحقت بمريم فى شقتها وأخذت تبكى ومريم تحاول تهدئتها ، سمع يوسف ضجيج يخرج من شقة إيمان وعبد الرحمن ومن الواضح أن إيهاب يتكلم مع إيمان بشكل أنفعالى

طرق الباب وتراجع خطوات للخلف :

- فتح الباب وأطل منه وجه إيهاب غاضبا.. فقال بسرعة :

- عاوزك شوية لو سمحت يا إيهاب

قال إيهاب فى غضب :

- أنا اللي كنت عاوزك

خرجت إيمان بعد أن ارتدت حجابها وهى تقول لإيهاب بترجى:

- أرجوك يا إيهاب أهدى شوية

فى نفس اللحظة فتحت مريم الباب ووقفت تنظر لهم بتسائل فقال يوسف:

- لو سمحت يا إيهاب نقعد نتكلم طيب..

وبعد عدة محاولات دخل الأربعة عند مريم

جلس إيهاب فى حلق وتعمد عدم النظر إلى زوجته التى كانت تبكى بشدة ، وجلس بجواره يوسف قائلا بهدوء:

- ممكن نسمع بعض علشان نعرف نفهم

أستشاط إيهاب غضبا وهو يصيح:

- خلاص كل حاجة بانى نسمع أيه ونفهم أيه

ونهض قائلا بغضب:

- أسمع يا يوسف .. أحنا من هنا ورايح ولاد عم وبس وأنا هاخذ اخواتى ونمشى من هنا

نهض يوسف ووقف أمامه قائلا:

- إيهاب الطريقة دى متفحش .. نتكلم طيب

قالت إيمان على الفور:

- وبعدين فرحة مقاتلتش حاجة غلط .. الكلام ده حصل فعلا.. ماما كانت بتكلم هند وعلشان كده عبد الرحمن فسخ الخطوبة

قاطعها يوسف:

- عبد الرحمن هو اللي قالك

هزت رأسها نفيا وقالت:

- لا طنط عفاف قالتلى وهى فاكرانى عارفة .. لأنى كنت فى اليوم ده راجعة من عند عمى فى الشركة .. كنت بسألها على موضوع يخص ماما فهى افكرت أنى قصدى موضوع هند

أبتسم يوسف بهدوء وقال لإيهاب:

- ماهو بالعقل كده.. عبد الرحمن هو اللي سمع هند وهو اللي فسخ الخطوبة ..لو كان بقى متأكد أن حد فيكوا موافق على الكلام ده .. أيه اللي هيخليه يتجوز إيمان ..

قال إيهاب بعصبية:

- ما انت لو كنت شوفته بيتعامل مع إيمان ازاي بعد يوم واحد جواز.. مكنتش قلت غير أنه مكنش علوز الجواز ده دى

أشاحت إيمان وجهها بضيق ولمعت عيونها بالدموع ثم قالت بألم :

- لا يا إيهاب الحكاية مش زى ما انت فاكر.. عبد الرحمن بيحبنى وانا الوحيدة اللي اقدر احكم عليه اذا كان اتجوزنى غصب عنه ولا بأرادته

تابع يوسف:

- ولو كان كده حتى.. أيه اللي يخليه يوافق على جوازتك من فرحة هو وبابا ... وبعدين لو بابا عرف ان انتوا موافقين على كده أيه اللي هيخليه يوافق على ده ويكمل ..مفيش حاجة تخلى بابا يوافق إلا اذا أتأكد انكوا مالكوش دعوة بالحكاية دى وأظن انت اتعاملت معاه وعرفته.

وألقي نظرة على مريم واقترب منها ووقف بجوارها ثم تناول يدها بين يديه وهو ينظر لإيهاب قائلاً بتفكه:

- وبعدين يا جدع انت ايه اللى خلاك تفتكر انى هو افق تاخد مراتى وتمشى.. هى سايبه ولا ايه؟

حاولت مريم سحب يدها بهدوء من بين يديه ولكنه قبض عليها بقوة وهو يتابع حديثه مع إيهاب:

- فرحة بتحبك يا إيهاب ..تلاقيها بس اتصدمت من الكلام اللى سمعته.. معلش اعذرها لسه صغيرة

قالت فرحة ببكاء:

- والله هو كده يا يوسف

زفر إيهاب بضيق وهو يقول:

- لا مش صغيرة يا يوسف ... بس هى معاها حق.. أمى هى اللى حطتنا فى الموقف ده وخلت الناس تبصلنا على أننا طمعانيين فيهم وبنعمل عليهم خطط علشان نوصل لفلوسهم ونظر إلى ايمان بضيق وقال:

- وانت غلطك أكبر أنك عرفتى حاجة زى دى ومقولتلىش فى ساعتها ..أنا ماشى رايح شقتنا القديمة

خرج إيهاب مسرعاً ، هرولت إيمان وفرحة خلفه وهى تناديه:

- أستنى بس يا إيهاب أستنى ...

كان يوسف يستعد للنزول خلفهم ولكنه وقف على الباب واستدار على صوت هاتف مريم وجدها تأخذه وتدخل غرفتها وهى تتكلم بعصبية واضحة:

- أيوا يا ماما.. خير عاوزه أيه منى تانى

تتبعها يوسف إلى غرفتها فى فضول ووقف يستمع لها من خلف الباب المفتوح ، لم يبذل جهداً ليستمع لأنها كانت تصيح وهى تتحدث:

- أدب أيه اللى أكلمك بيه .. مش كفاية اللى عملتية فينا.. إيهاب هيطلق مراته.. فاطمة مرات عمى قالتلها على اللى عملتية مع هند .. وإيمان مش مرتاحة مع جوزها وقاعدة معايا على طول .. وانا جوازتى مش هتكمل ... إيهاب ساب البيت وانا أول واحدة همشى وراه ..أيوه

اتجننت .. حرام عليكى بقى.. ولعلمك حتى لو يوسف قبل يكمل الجوازه أنا مش هكملها ..  
تخطيطك كله حطم حياتى.. عارفة يعنى أيه حطم حياتى .. أوعى تتبسطنى وتفكرى أن  
الجوازات دى كلها جات على هواكى لا يا مدام أحلام .. يوسف قبل يتجوزنى علشان يتستر  
عليا عارفة معنى الكلمة دى ولا مش عارفها ..

قالت آخر كلمة وهى تصرخ ثم سقطت مغشيا عليها ، وقع الهاتف من يدها ودخل يوسف  
عليها وهى ممددة على الأرض وقد سمع ما قالت، حملها بين يديه ووضعها على الفراش  
وأخذ ينظر إليها بتمعن وإلى ملامح الألم التى بدت على وجهها ، أضاعت صور مشاهد  
الإغتصاب فى عقله ، صورة تلو الأخرى ، تذكرها وهى مغشيا عليها فى المرة الأولى بين  
يديه ، تذكر وهو يحاول خلع ملابسها وتمزيقها وهى فاقدة الوعي ، ثم تذكر صفة أبيه  
فارتدت رأسه إلى الخلف.

\*\*\*

فتحت عفاف باب شقتها على صوت فرحة وهى تهرول خلف إيهاب وتناديه وتبعثها إيمان  
أوقفت عفاف إيمان فى خوف وقلق :

- فى أيه يا إيمان مال فرحة وإيهاب؟

وبدون مقدمات أرتمت إيمان على صدر عفاف وهى تبكى بشدة ، لم تستطع عفاف أن تفهم  
شيئا من كلام إيمان ، أدخلتها للداخل وتركت الباب مفتوحاً، جلست بجوارها ولكن إيمان  
ظلت متشبثة بحضن عفاف وتواصل بكائها مما جعل قلبها يخفق بشدة وهى تقول:

- مالك يا بنتى احكىلى أيه اللى حصل مالكم بس يا ولاد

عادت فرحة ودخلت عند أمها عندما وجدت الباب مفتوحا وسمعت صوت بكاء إيمان، دخلت  
وانهارت على أول مقعد وجدته وهى تقول بنفس متقطع :

- ملحقنوش خلاص يا ماما إيهاب هيطلقنى

تركت إيمان ونهضت فى فزع وهى تضرب على صدرها :

- يطلقك ليه عملتى ايه

لم تكن إيمان تبكى لما فعله أخيها وحسب ، ولكن لأنها لأول مرة تلتفت للسبب الذى ظننته  
حقيقى فى جفاء عبد الرحمن منها فى أول أيام الزواج وجعل عقلها يردد الكلمات تباعا:

- " یعنی هو ممكن كمان يكون متصور انى بنفذ تخطيط أمى.. ده غير أنه كان مغضوب عليا  
أومال ليه قالى انه بيحبنى وليه معاملته اتغيرت وكلامه اتغير "

أستمعت عفاف لرواية فرحة كاملة وكان رد فعلها بالنسبة لهم عجيب ، لم تتفوه بكلمة وإنما  
دخلت غرفتها بدلت ملابسها وخرجت بعد ثوانى وفى عينيها صرامة غريبة عليها

قالت إيمان بصوت لم يخلو من البكاء :

- رايحة فين يا طنط ..

لم ترد عليها وهى فى طريقها للخارج وقفت فرحة مكانها وهى تنظر إلى أمها بدهشة وهى  
تقول بخفوت:

- رايحة فين يا ماما دلوقتى

لم ترد أيضا وإنما تابعت طريقها ، خرجت وأغلقت الباب خلفها

\*\*\*

نهضت مريم فزعة عندما فتحت عينيها ببطء ووجدته يجلس على طرف فراشها، وقف فى  
سرعة وابتعد خطوات عندما رآها تلف ذراعيها حول قدميها وتنظر له فى خوف وفزع  
وقال:

- متخافيش .. أنا مكنتش لسه نزلت لما مامتك اتصلت بيكى وسمعتك وانت بتصرخى وبعدين  
وقعتى على الأرض مكانش ينفع اسيبك وامشى

نهضت بخوف وهى تهرول نحو باب الغرفة ومنه إلى باب الشقة التى وقفت عنده وقالت  
باضطراب:

- أفضّل أطلع بره

أقرب منها ووقف ينظر إليها فى صمت فقالت مرة أخرى:

- بقولك اطلع بره

ظل ينظر إليها بصمت وأخيرا تكلم وكأن صوته يأتى من بعيد قائلا:

- مروحتيش ليه توصلى اختك واخوكى المطار يوم فرحهم



قالت بحق وتوتر:

- ملكش دعوة بيا مفيش بينى وبينك كلام

أعاد سؤاله بنفس الطريقة وقال:

- أتكلمى.. كنت طالعة الشقة المفروشة ليه

حاولت أن تصبغ صوتها بنبرة تحذير قائلا:

- أنا بحذرك تستمر فى اللى بتعمله.. أنت مصمم تشوه سمعتى علشان تبرر عملتك السوداء..  
أفضل أطلع بره بقولك

أمسكها من ذراعيها بقوة قائلا بغضب:

- أنا شفتك بعنيه وانت طالعة معاها والشابين اللى كانوا معاكوا وروحت سألت البواب وقالى  
أنها شقة مفروشة وانكوا بنات مش محترمة

نفضت ذراعيها بقوة وهى تهتف به:

- كداب .. كداب أنا كنت طالعة شقة سلمى ودول ولاد خالتها

أمسك ذراعيها مرة أخرى وقال حانقا:

- أنت هتستعبطى .. عاوزة تفهمينى انك سبتى اختك واخوكى ورايحة معاها شقتها ولما هى  
شقتها البواب ليه قالى كده

تملصت منه وخرجت خارج الشقة وقالت بصوت مكتوم من البكاء:

- علشان تعرف انك كداب وبتفترى عليا ..

نظر إليها نظرة باردة وتركها وذهب

\*\*\*

وقفت فاطمة فى ذهول أمام عفاف التى يطل الغضب من عينيها وتتحدث وكأنها امرأة أخرى  
امرأة غير التى كانت تتعامل بطيبة وصبر ، وكأنها قطعة برية تدافع عن صغارها فى شراسة

- أنا صبرت عليكى كثير يا فاطمة وكنت بقول معلى دى عشرة عمر .. معلى دى سلفتى قبل ما تكون جارتى وليها حق عليا .. لكن يوصل كرهك ليا ولولادى انك عاوزة تخربى عليهم كلهم كده مرة واحدة لا انا مش هسكتلك تانى يا فاطمة وهوقفك عند حدك لأول مرة تشعر فاطمة بالقلق من كلمات عفاف وقالت بتوتر:

- أنا مكنش قصدى يا عفاف انا كنت بكلم فرحة والكلام جاب بعضه ضحكت عفاف بسخرية لازعة وقالت بصرامة:

- أنا عارفاكى كويس وعارفة أنك عمرك ماكنتى هتزورى بنتى إلا لما تكونى عاوزة حاجة ... أوعى تكونى فاكدة أنى ساكتة عليكى ضعف .. لا .. أنا ساكتة رافة بحالك علشان عارفة الغل اللى جواكى واللى مخليكى تاكلى فى نفسك .. طلعتى الغل ده زمان وخليتى أحلام تاخذ عيالها وتهرب ودلوقتى جاية تكلمى فى ولادى يا فاطمة لا أنا مش هقف ساكتة تانى واسيبك تهدى بيوتهم زى ما هديتى زمان صرخت فيها فاطمة :

- أومال كنت عاوزانى اعمل أيه .. كنت عاوزانى اعمل أيه وانا شايقة جوزى بيحب مرات أخوه وعنيه هتطلع عليها .. كنت عاوزانى اعمل أيه وانا شايقة نظراتها كلها احتقار ليا وتريقة عليا فى الراححة والجاية .. طبعاً منا مش مالية عين جوزى هتفت بها عفاف :

- وعلشان انت حاسة بالنقص من ناحية جوزك تقومى تدمرى عيلة بحالها وجاية دلوقتى تكلمى يا فاطمة على ولادى قالت فاطمة بانهيار مفاجىء:

- ولادك .. ولادك اللى طول عمرهم بيتعاملوا أحسن معاملة .. حتى إبراهيم كان حاططهم فوق ولادوا وبيقدمهم على ولادوا .. أنا حقى مش هيفضل طول عمره مهضوم بينك شوية وبين أحلام شوية

هوت إلى المقعد وقالت وكأنها مغيبة عن الواقع:

- طول عمرى بسمع جوزى بيشكر فيكى وبيقولى اتعلمى من عفاف طول عمرى حاسة انى أقل منك .. أطلع عندك اشوف جوزك بيدلحك ولحد ما كبر فى السن وهو بيحبك وطلباتك

أوامر وعيالك مدلعين على الآخر وواخدين حقهم تالت ومثلت.. أبص على نفسى الاقبنى  
مش عاجبة جوزى ابداهما عملت .. وحتى ولادوا مش عاجبينوا وعلى طول يقولهم  
عاوزكوا تبقوا زى ولاد حسين .. ليه انتوا أحسن مننا فأيه ؟.. لاء انا وولادى مش هنفضل  
ملطشة ليكى انت وولاد أحلام .. ولو جوزى حطنى تحت رجلكم ابنى هيحطنى فوق رأسكم  
وبكره تشوفوا.

قالت عفاف بحسم وكأنها لم تسمعها:

- أنا مش هعيد كلامى يا فاطمة .. أياكى تقربى من ولادى ولا من حياتهم .. ولو حصل ده  
ساعتها متلوميش غير نفسك .

خرجت عفاف وصفعت الباب خلفها بقوة ، أسندت فاطمة ظهرها للمقعد وهى تغمض عينيها  
بقوة وتتنفس بصعوبة ، و لم تكن هى الوحيدة التى تتنفس بصعوبة ، بل كانت وفاء أيضا  
التي استمعت إلى الحوار بكاملة وهى تقف خلف باب غرفتها، جلست على فراشها وبدأت  
دموعها بالإنهمار

\*\*\*

- أنتِ أيه اللى خلاكى تحكيلوا يا غبية ؟

هتفت علا بهذه العبارة وهى تجلس بجوار هند مؤنبة لها فقالت هند فى ارتباك:

- معرفش بقى .. أنا لما ملقتكيش وهو عزمى على حاجة فى مكتبه قعد يجرجرنى فى الكلام  
واتكلم بطريقة كأنه عارف كل حاجة .. وبعدين يعنى أيه المشكلة انه يعرف

زفرت علا فى ضيق وقالت:

- أنتِ هتفضلى طول عمرك كده .. ماتشغلى عقلك شوية .. دلوقتى أحنا استفدنا أيه لما هو  
عرف

- هو احنا لازم نستفيد يعنى

زفرت مجدداً بنفاذ صبر قائلة:

- هفضل أفهم فيكى لحد أمتى .. لما تكونى عارفة معلومة تخليكى محتفظة بيها..  
متطلعيلهاش إلا اذا كنتِ هتستفيدى.. لو مش هتستفيدى يبقى تخاليها معاكى لحد ما تلاقى  
فرصة تخليكى تتقدمى خطوة ساعتها تقوليها

واستدارت فى شروود قائلة:

- وبعدين احنا لازم نلحق الموقف لازم نستفيد من اللى حصل

قالت هند متسائلة:

- أراى يعنى.. ما خلاص ده خد المعلومة منى وطار..

ألتفتت إليها علا:

- أنا متأكدة انه زمانه قال لامه.. الفترة اللى عرفته فيها عرفت انه بتاع امه ..وانه

مبيخبيش عليها حاجة .. لازم نشوف حاجة نطلع بيها من الحكاية دى بسرعة

ثم لمعت عينيها بقوة وقالت لـ هند :

- أسمعى اللى هقولك عليه ده ونفذه بالحرف الواحد

لو عملتيه صح هترجعى مهمة تانى عند الحاج حسين وهيثق فيكى وهتبقى خطوة مهمة

أوى علشان ترجعى ثقتهم فيكى تانى

\*\*\*

وقفت هند على باب مكتب الحاج حسين تنتظر الإذن بالدخول ، خرجت إليها السكرتيرة  
قائلة:

- أفضلى

دخلت فى ارتباك مصطنع وقالت بصوت خفيض :

- أنا آسفة يا حاج انى هعطل حضرتك

أشار لها بالجلوس أمامه قائلاً:

- خير يا هند ايه الحاجة المهمة اللى عاوزانى فيها

قالت فى توتر:

- أنا آسفه بس فى حاجة حصلت غصب عنى وانا قلت آجى ألحق اقول لحضرتك قبل ما

حاجة تحصل من تحت راسى

أستمع لها الحاج حسين فى اهتمام ثم تصنع الا مبالاة وهو يقول:

- خلاص يا هند متشكر أوى تقدرى تتفضلى

وقفت وهى تطرق برأسها للأسفل وقالت:

- أنا آسفه تانى مرة يا حاج حقيقى كنت فاكرة انه عارف لكن لما بان علي وشه انه أول مرة يسمع الكلام ده اتخضيت وافكرت انى كده ممكن أتسبب فى مشكلة تانية .. أصل انا اتعلمت من اللى حصلى أول مرة لما افكرت يعنى انكوا قرايب مع بعض ومفيش ضرر هيحصل لحد من تحت راسى .. علشان كده جيت بسرعة المرة دى علشان اقول لحضرتك ثم نظرت له بضعف قائلة:

- أنا اتعلمت من غلطى يا حاج حسين واخذت عهد على نفسى انى مكرروش تانى والله أوما برأسه متفهما وقال:

- خلاص يا هند.. وعموما مفيش مشكلة ولا حاجة متقلقيش يالا اتفضلى على شغلك

خرجت من مكتبه وعلى ثغرها ابتسامة نصر وأغلقت الباب خلفها بهدوء .. بمجرد أن أغلقت الباب تناول حسين الهاتف وأجرى اتصالاً بالمنزل.. فى البداية لم يتم الرد فى المرة الثانية أجابته فرحة وهى تبكى:

- ألحقتى يا بابا.....

روت له ما حدث وظل يستمع حتى قال :

- ومريم وإيمان فين دلوقتى

بكت مرة أخرى وهى تقول:

- لسه ماشين رايعين يقعدوا مع ايهاب

تناولت عفاف سماعة الهاتف وقالت :

- متقلقش يا حسين أنا هاخدها هى ويوسف دلوقتى ونروحهم

قاطعها قائلاً:

- لا خليكى انتِ .. خالى يوسف ياخذ فرحة ويروح وانا هحصلهم

بمجرد أن أنهى الاتصال وجد عبد الرحمن يتصل به رد قائلاً:

- السلام عليكم .. أزيك يا عبد الرحمن يابنى

أتاه صوت عبد الرحمن قلقاً وهو يقول:

- وعليكم السلام يا بابا ... الحمد لله أنا كويس .. بس أنا بتصل بإيمان بقالى كتير أوى  
وتليفونها مقفول ومش بترد على تليفون البيت .. وبكلم البيت عند ماما تليفونهم يا أما مش  
بيرد يا أما مشغول طمنى يا بابا فى حاجة عندنا فى البيت؟

قال حسين بهدوء:

- انت جاي أمتى

- بكره بالليل ان شاء الله

\*\*\*

## الفصل الخامس والعشرون

جلس الحاج حسين بجوار زوجته وهو يعاتبها :

- ليه كده يا عفاف .. أنا مش قلت محدش يفتح فى القديم تانى

حاولت أن تسيطر على انفعالها وهى تقول:

- يعنى أقف اتفرج عليها وهى بتهد بيوت عيالى يا حاج ... لا والله ده لايمكن يمر بسهولة  
أبداً.. كله إلا ولادى.. أنا صبرت عليها كتير لكن توصل لخراب البيوت

تابع حسين حديثه معاتباً:

- من أمتى يا عفاف وانتِ بترديلى كلمة

قالت عفاف بلوم:

- يا حاج انا سمعت كلامك كتير واتعاملت بالحسنى مع فاطمة .. ياما كنت بتقولى معلش غيرانه خديها على قد عقلها لكن الغيرة توصل لكده ومع ولادك وتقولى مفتحش القديم نظر لها بحدة قائللا :

- واستفدنا ايه بقى ... كل اللى اتقال مش هايرصلح حاجة وادينى اتصلت بإيهاب ومريم قالتلى مش عاوز يتكلم ونايم من ساعة ما رجعوا البيت .. وايمان كمان شيطانها هيأها ان عبد الرحمن كان مصدق الكلام ده .. وأنا كمان قلت نأجل زيارتهم لبكرة.. أهو يكون عبد الرحمن رجع وتكون النفوس هديت شوية.  
ثم التفت وكأنه تذكر شيئا وقال:

- أومال يعنى مشوفتش يوسف من ساعة ما رجعت  
أنتبهت هى الأخرى وقالت:

- والله ما اعرف راح فين ... فجأة كده اختفى  
قالت وقد بدا عليها القلق:

- طب والفرح والناس اللى عزمناهم .. دى شقة مريم خلاص خلصت وهدومها اترصت فيها  
هى ويوسف  
قال فى حسم:

- كل كوم والفرح ده كوم تانى ..الفرح هيتعمل فى معاده مش هيتأجل يوم واحد

\*\*\*\*

طرقت إيمان باب غرفة إيهاب وهى تقول:

- إيهاب يالا علشان تتغدى

أتاها صوته الحزين:

- ماليش نفس يا ايمان اتغدوا انتوا

فتحت الباب ودخلت إليه فوجدته يجلس على طرف الفراش واضعا رأسه بين يديه ، عندما شعر بها قال دون أن يرفع رأسه:

- لو سمحتى يا ايمان سيبينى لوحدى دلوقتى..

جلست بجواره وربتت على كتفه وهى تنتزع ابتسامتها انتزاعا وقالت:

- يا ايها انت قاعد لوحذك من امبارح .. لازم تخرج من الحالة دى دلوقتى لازم نتكلم .. يوسف عاوز يتكلم معاك كلمتين

رفع رأسه تجاه الباب فوجد يوسف يقف مستنداً إلى حافته وقال:

- ممكن أدخل يا باشمهندس

قال دون أن ينهض :

- أفضّل يا يوسف

قال يوسف متفهّما:

- أنا حاسس ببك.. بس الحكاية متتأخذش قفش كده .. بطل الحمقة بتاعتك دى .. ده انت مدتهاش فرصة تنطق .

قالت إيمان على الفور:

- والله فرحة بتحبك أوى يا إيهاب

قال دون أن يتلفت اليها:

- صدمتنى يا إيمان.. آخر واحدة كان ممكن اتخيل انها تعمل كده.. كنت فاكرها حافظانى وفاهمانى وأى حد هيجيب سيرتى فى غيابة هتدافع عنى من غير حتى ما تسألنى

حاولت أن تداويه وهى المجروحة وقالت:

- متظلمهاش يا إيهاب .. أى واحدة فى مكانها هاتتلخبط ومتعرفش تفكر

لم يأتىها منه ردّاً فقالت بترجى:

- أديها فرصة تدافع عن نفسها يا إيهاب.. ده ربنا سبحانه وتعالى بعزته وجلاله مش هيدخلنا الجنة أو النار يوم القيامة إلا لما يخلينا نقرأ كتاب أعمالنا "اقرأ كتابك كفى



بنفسك اليوم عليك حسيبا" .. حتى العبد المؤمن ربنا سبحانه وتعالى هايعاتبه زى ما الرسول عليه الصلاة والسلام قال " اما العبد المؤمن يدنيه ربه فيضع عليه كنفه فيقرر به بذنوبه فيقول أتذكر ذنب كذا وكذا أتذكر ذنب كذا وكذا ، قال : حتى إذا ظن أنه قد هلك قال : أنا سترتها عليك في الدنيا وأنا أغفرها لك اليوم: فيعطى كتاب حسناته بيمينه "

أوما برأسه وقد هدا قليلا وهو يقول :

- عليه الصلاة والسلام..ربنا يبارك فيكى يا ايمان

أخترقت هذه الكلمات قلب وعقل يوسف الذى كان جالسا فى شروود ويستمتع لها وهى تتحدث

"انا كمان مدتش فرصة لمريم انها تدافع عن نفسها.. كنت القاضى والجلاد من غير ما اسمع دفاعها.. كنت بسمع عنها أسوء شىء فى الدنيا وفى نفس الوقت ماكنتش بديها فرصه تتكلم .. أزاي احكم من غير ما اسمع من الطرفين ده انا كده ابقى سفيه واستاهل كل اللى جralى"

أنتبه الجميع على صوت رنين باب المنزل ارتدت مريم أسدال الصلاة وخرجت من غرفتها التى دخلتها بمجرد أن علمت أن يوسف بالخارج ، فتحت الباب وسمعها الجميع وهى تهتف بدهشة:

- ماما !!!

خرجت إيمان وتبعها إيهاب ثم يوسف ليجدوا والدتهم تقف على باب المنزل ويظهر عليها القلق والإضطراب وهى تخطو داخل المنزل وتتنجه لتعانق أولادها ، قال إيهاب وهو يشير إلى يوسف:

- يوسف ابن عمى يا ماما

ثم التفت إليها بتسائل :

- هو حضرتك جيتى أمتى

قالت وبصرها معلق بمريم:

- لسه واصله

وقالت موجهة حديثها لمريم :

- خدت أول طائرة نازلة مصر بعد مكالمتك امبارح

قال يوسف بارتباك :

- طيب استأذن انا بقى

خرج يوسف وجلست أحلام بين أولادها الثلاثة ، نظر ايهاب إلى مريم قائلا بحنق:

- طبعاً كلمتيها وحكتلها التفاصيل

قالت أحلام بغضب:

- لا مكالمتيش يا باشمهندس .. أنا اللي كلمتها ومعرفتش تفاصيل ولا زفت وبعدين يعنى

هى جريمة انها تكلم أمها

نهض بعصبية قائلا:

- لا مش جريمة .. لكن الجريمة اننا نقعد نتجسس على ناس ونخطط علشان فى الآخر ناخذ

فلوس مش من حقنا أصلاً

وقفت أمامه وقالت بغضب:

- أتكلم مع أمك كويس يا ولد .. أنت نسيت نفسك ولا أيه.. وبعدين مين قال أن الفلوس دى

مش من حقكم أو عى تكونوا صدقتوهم ونسيتوا كلامى

قالت إيمان بمرارة:

- لا يا ماما أحنا مصدقاتهمش أحنا صدقنا الورق اللي شفناه بعيننا

قالت فى تهكم:

- وايه يعنى ..هما يعنى هيطلعوا الورق الحقيقى أكيد ورق مزور

وقفت إيمان ونظرت فى عينيها وقالت:

- وأعلان الوراثة كمان مزور.. والورق اللي بابا مضاه بخط أيده على أنه استلم ميراثه كله

يا ماما ..كل ده مزور ...مفيش داعى للكلام ده يا ماما ...أنا اتأكدت من كل حاجة بنفسى ..

ظهر الإضطراب والتوتر على ملامح أحلام ، تابع ايهاب بحنق:

- طبعا حضرتك مكنتيش متخيلة أنهم هيوورنا الورق ده أبدا.. مش عارف ليه.. يمكن  
علشان مكنتيش متخيلة أن حد فينا يسأل عن الحقيقة.. علشان زرعتي جوانا الخوف منهم  
من واحنا صغيرين ... أفكرتى أن محدش فينا هتجيله الجرأة ويروح يسأل ويدور ويطلع  
المستخبى .. مش كده

نظرت له أحلام بارتباك وقالت:

- وقالولكوا أيه كمان عنى

قالت ايمان بخفوت:

- الشهادة لله محدش جرح سيرتك قدامنا أبدا

تنهدت بارتياح ثم قالت بغطرسة:

- ومحدش أصلا يقدر يجيب سيرتى بحاجة

وبدون مقدمات توجه إيهاب لباب المنزل وفتحه وهو يقول بضيق:

- أنا خارج شوية

جلست أحلام بين مريم وايمان وقالت لمريم :

- أنا عاوزة افهم أيه الكلام اللى قلتيهولى فى التليفون ده

زاغت نظرات مريم بين والدتها وأختها ففهمت أحلام أنها لا تريد أن تتحدث فى وجود ايمان

ألقتت إلى إيمان وهى تربت على يدها وهى تقول:

- بغض النظر عن مقابلتك الباردة دى .. لكن وحشنى طبيخك هتأكلينى ولا إيه

أبتسمت إيمان أبتسامة باردة ونهضت وهى تقول:

- أنا أصلا كنت بخلص فى الأكل قبل ما يوسف يجى .. عن أذنكم

وذهبت للمطبخ.. تناولت أحلام يد مريم وقالت :

- تعالى نقعد فى أوضتك ...

دخلت وأغلقت الباب واستدارت لمريم بجسدها كله وقالت بحسم:

- فهميني معنى الكلام اللى سمعته فى التليفون ده .. يعنى أیه يوسف وافق يستر عليكى ..  
أنتِ أیه اللى حصلك بالظبط .. عمل فيكى أیه ابن حسين

جلست على طرف الفراش وهى تبكى وقالت بصوت متقطع:

- مش هو اللى عمل يا ماما.. أنتِ اللى عملتى

نظرت لها بحدة وقالت:

- بتقولى أیه يا مريم

مريم:

- بقولك الحقيقة يا ماما .. أنتِ معلمتنيش ازاي احافظ على نفسى فكان من السهل أى حد  
ينهشنى .. من صغرى وانتِ بتجيبلى لبس مكشوف لما بقى كشف جسمى شىء عادى ..

كنت باللبس قدامك عريان وضيق وكنتِ بتسببني اخرج كده من البيت .. مكنتنيش بتخافى  
على لحمى للناس تنهشه بعنيها.. كل ما كان إيهاب يضايق ويتكلم تقوليلوا دى لسه صغيرة  
خليها تتمتع بسنها خليها تلبس وتخرج خليتنى معرفش أفرق بين الحرام والعيب.. طول ما  
لبسى فى بنات تانية بتلبسه يبقى عادى .. وكل ما إيمان تقولك اللبس ده حرام تقوليلها ما  
أصحابها بيلبسوا كده ولا عاوزاها تبقى نشاز وسط أصحابها.. كنت باحكيلك على صحابى  
الولاد فى المدرسة وكنتِ بتضحكى وتتبسطنى ان بنتك كبرت وبقي ليها اصحاب ولاد وكنتِ  
بتكبريها فى دماغى وتقوليلى وماله بس حافظنى على نفسك .. هو فى حد عاقل يقول نحط  
وردة فى وسط كوم زبالة وتفضل الوردة محتفظة بريحتها الجميلة .. طب ازاي ... طب  
احافظ على نفسى ازاي وسط كل ده .. احافظ على نفسى بأنهى مقياس.. بمقياس العيب اللى  
خلانى أقلد اصحابى واقول لو كان عيب مكنش كل البنات دى عملته .. ولا بمقياس الحرام  
اللى لو كنت مشيت وراه زى إيمان كان زمانى محترمة ...

أنهارت أحلام على المقعد وهى تقول:

- أنا كنت بحبك وعاوزاكي تبقى مبسوطة وزيك زى اصحابك

قالت مريم بأنفاس متلاحقة من كثرة بكائها:

- لو كنتِ بتحببني كنتِ سترتى جسمى ولو غصب عنى.. كنتِ خفتى عليا اموت وانا كده  
وادخل قبرى اتحاسب.. كنتِ منعيني أكلم ولاد وعلمتيني ان ده حرام .. كنتِ علمتيني ازاي

أنقى اصحابى وعرفتيني أن مفيش حاجة اسمها ابقى كويسة وصاحبتي وحشة وماليش دعوة ... وادى النتيجة سمعتى اتشوهدت ولحمى اتنهش

أمسكت أحلام ذراعها بقوة وأوقفتها أمامها وهى تحاول خفض صوتها:

- قوليلى مين اللى عمل فيكى كده .. يوسف ولا مين

هزت رأسها نفيا وقالت:

- يوسف معملش حاجة.. يوسف هو اللى ستر عليا ووافق يتجوزنى

ونظرت لها بتهكم قائلة:

- شفتى بقى الناس اللى كنت بعناني انتقم منهم وألعب على ابنهم وقلتي عليهم انهم سرقوا ابويا وخذوا ميراثنا .. هما دلوقتي اللى ستروا بنتك .. وعمى ضغط على يوسف لحد ما وافق انه يتجوزنى وماعرفش أى حد أى حاجة ولا حتى اخواتى.. مفيش غيرى أنا وهو ويوسف بس .. حتى مراته طنط عفاف مقلهاش حاجة وسترنى وستر سيرتى عن كل الناس قالت أحلام بذهول:

- أنت بتقولى آيه؟ واللى عمل كده متجوزكيش ليه وراح فين فهمينى

قالت مريم بسخرية لازعة:

- هو اللى عاوز الحلال بيروح للحرام برضة يا ماما ولا حتى بيفضل لحد ما حد يجيبه يصلح غلطته.. طبعا بيختفى ومحدش بيعرفله طريق .... مش ده المهم .. المهم أنك تعرفى عمى حسين وقف جنبى ازاي هو وابنه علشان تعيشى بقية عمرك تشكريهم وتحمدى ربنا انه رزقنا بناس زى دول يستروا عرضنا.

بكت أحلام لأول مرة بحياتها بمرارة شديدة وهى تتذكر ماكانت تنوى فعله وما كانت تخطط له لتأخذ مال ليس من حقها ... وفى نفس الوقت يستر هو ابنتها بكل شهامة ورجولة ويخفى الامر عن الجميع ويضغط على ولده ليتزوجها .. ظلت تبكى وتبكي بمرارة حتى دخلت عليهم إيمان التى وقفت تنظر إليهما بتساؤل وقالت:

- بتعطى كده ليه يا ماما

قالت أحلام بضعف:

- مفيش يابنتى...مفيش ..

والتفتت إليها قائلة:

- أحكلى ومتخافيش أخوكى عاوز يطلق مراته ليه

نظرت إيمان إلى مريم التى كانت تنظر إلى امها ودموعها تنهمر فى صمت شديد ثم أعادت النظر إلى والدتها وهى تقول:

- هى مريم محكتلكيش حاجة

ربت أحلام على ظهرها وهى تقول:

- يابنتى قاتلك قوليلى ومتقلقيش منى.. أنا خلاص مبقاش منى قلق .. مش عاوزة حاجة من الدنيا غير سعادتكوا وسترکوا وبس

\*\*\*\*

أختلت أحلام بنفسها فى غرفة إيهاب وهى تبكى على حالها وماوصلت إليه مريم بسبب سوء تربيتها وبسبب أهمالها لهم جميعا، لماذا ظلت تلك السنين العجاف تكذب وتنمى فيهم كره أعمامهم بالباطل وهى تعلم أن كلامها غير صحيح، هل هو داعى الانتقام الذى كان يسيطر عليها أم هو غباها الذى أوقف عقلها فى لحظة من اللحظات وصدقت كلام فاطمة وهربت بالأولاد.

عادت بذاكرتها سنوات طويلة وتذكرت لحظة دخول فاطمة عليها هى وعفاف ويظهر على وجههما علامات الفزع الذى كان مسيطر بشكل أكبر على وجه عفاف التى أخبرتها بأن فاطمة سمعت حوارا بين إبراهيم وحسين وعاملين عندهما فى المصنع يخبروهما بأنهما يعلمان أن علاقاتها بعصام قائمة من قبل أن يتوفى زوجها علي بسنوات

وأنه كان يراه بصفة مستمرة يصعد شقتها فى وقت غياب زوجها ولا ينزل إلا بعد ساعات وانه كان عندها بالأمس وغادر بعد حلول الظلام، وأكدت فاطمة على أن حسين وإبراهيم صدقا العاملين وبدءا يتشاوران بأمر الأولاد هل هم أولاد علي أم لا .. وقالت فاطمة برعب " عندنا فى الصعيد اللى بيشكوا فيها بيقتلوها هى وولادها ومحدث بيعرفلهم طريق ومتنسيش ان علي كان بيشك فيكى فى حياته وكان بيقول كده لحسين علشان كده كان سهل ان حسين وإبراهيم يصدقوا العمال دول "

تذكرت وجه عفاف الذى كان يحمل كل معانى الخوف والذعر على زوجها وهى تقول "انا مش عاوزة جوزى يروح فى داهية .. انا ماليش غيره فى الدنيا.. أرجوكى يا أحلام خدى الفلوس دى واختفى شوية زى ما فاطمة اقترحت لحد بس ما براءتك تبان وبعدين ابقى ارجعى هنا تانى"

لو لم تكن فاطمة أعطتها أمانة بأن عصام كان عندها بالأمس فلم تكن لتصدق، ولكنه بالفعل كان عندها بالأمس وغادر بعد حلول الظلام، معنى هذا انها مراقبة، ولكن هى بريئة، لم تكن هذه العلاقة قائمة قبل وفاة زوجها، كان مجرد شك من زوجها فقط، ربما كانت هى التى زرعت الشك بتصرفاتها لتجعله متعلق بها دائما ولتشعل نار غيرته بشكل دائم، كانت تظن انه بذلك سيظل يحبها وسيظل بقربها ولكنها لم تخنه أبدا، تعرفت على عصام قبل وفاة علي، ولكن كانت علاقتهما عادية، نعم هو صارحها بحبه ولكنها كانت تصده بطريقتها التى تجعله يتشبث بالأمر أكثر... نعم لو كانت بريئة مائة بالمائة لكانت دافعت عن نفسها بكل ما تأتى لها من أدلة فهى بطبيعتها ليست ضعيفة ولا مستكينة، ولكنها هى نفسها تشك ببراعتها الكاملة، فكيف هم سيصدقونها.

وفى الحال جمعت ما لديها من متاع وأموال وهربت مع عصام الذى أخبرته الأمر فى عجلة وخاف هو ايضا على حياته وهرب معها، قالت أمام البواب بصوت مسموع "اطلع على المطار يا اسطى" وحجز لها عصام التذاكر على بلد لم يفكروا بالذهاب إليها أبدا فى يوم من الأيام وكان كل هذا تدبير الخوف لا تدبيرهم هم.

استفاقت من ذكرياتها وهى تضرب الفراش بقبضتها وتقول:

- لو كنت سليمة ساعتها وواثقة من تصرفاتى ومن أنى ست محترمة بجد مكنتش صدقتها بغبائى.

كانت واجمة وهى تقول:

- مكفاكيش يا فاطمة اللى عملتية .. كمان جاية تخربى بيت ولادى ... لا ده انت حسابك تقل اوى

\*\*\*

لم تكن تعلم مريم لماذا برأت يوسف ، ولكن ما علمته هو أنها أرادت أن تلقن أمها درسا قاسياً يجعلها تعيد التفكير في حياتها ككل لعلها تفيق مما هي فيه، لعلها تصلح نفسها وقد تخطت الخمسين من عمرها وبدأ الشيب يتسلل إلى خصلات شعرها ويزحف إليه ببطء

ولكن الدرس لم يكن لأحلام وحدها لقد لقت نفسها أيضا دون أن تقصد نفس الدرس ، نعم لم يكن يوسف هو المخطئ وحده، هي أيضا تتحمل معه الوزر والذنب بل هي صاحبة الذنب الأكبر لأنها هي من دفعته ليشك بها وهي من أعطته انطباع سيئ عن سلوكياتها

هي التي دفعته دفعا إليها واتخذت نفس سبيل والدتها التي اتخذته منذ سنوات ، لجأت إلى أشغال الغيرة في قلبه وحرثت قلبه بعناية وبذرت فيه بذور الشك وروتها بطريقتها الخاصة حتى نبتت فكانت هي أول من أكلت حصاده المر.

\*\*\*\*

وفي المساء وبعد صلاة العشاء بقليل طرق حسين بابهم وبصحبتهم أبناءه جميعا "عبد الرحمن" .. "يوسف" و "فرحة" ، لم يكن إيهاب قد عاد من الخارج بعد ، أستقبلتهم إيمان ومريم ، وكاد عبد الرحمن أن يعانق زوجته ولكنه تماسك أمام أبيه وأخوته وصافحها بحرارة ولكنه لم يستطع أن يترك يدها طواعية ولكنها سحبت يدها بهدوء وأقبلت على فرحة وعمها، خرجت أحلام إليهم ، وقف حسين وهو ينظر إليها وكأنه قد عادت به السنوات في لحظة واحدة وكأن تلك اللحظات لم يمر عليها سوى شهور قليلة، قطعت هي صمته قائلة بترحاب:

- اهلا وسهلا يا حاج نورت ..

أوما برأسه في وقار :

- اهلا وسهلا.. حمد لله على السلامة

أشارت لهم وهي تقول:

- أفضلو يا جماعة البيت بيتكم

لم يتحدث حسين معها كثيرا ولكنه شعر بتغير قد طرأ عليها، نظرتها بها الكثير من الأمتان،

هذه ليست أحلام المتجبرة، وكأنها قد كسرت غطرستها فجأة ، هل هو تقدم العمر أم شيئا آخر!



لم يكن عبد الرحمن يجلس بينهم بل كان يغوص فى عيون زوجته وكأنه يتحدث معها بلغة العيون وهنا قالت فرحة بلهفة:

- او مال فين ايهاب؟

قالت إيمان وهى تحاول تحاشي نظرات زوجها:

- خرج ولسه مرجعش

نهضت فرحة وقالت لمريم :

- عاوزاكى شوية يا مريم وهمست لها :

- ممكن تودينى أوضة ايهاب

أومأت لها مريم موافقة وأخذتها وأدخلتها غرفته، طلبت منها فرحة أن تتركها فى غرفته قليلا وحدها وأغلقت الباب خلفها

\*\*\*

تحدث الحاج حسين إلى أحلام قائلاً:

- أخبرك ايه يا أم ايهاب؟

أحلام :

- الحمد لله يا حاج أحنا كويسين طول ما انتوا كويسين

ثم نظرت إلى يوسف وقالت بانكسار وكانها ترجوه:

- إن شاء الله الفرح فى معاده؟

قال يوسف بحسم:

- إن شاء الله فى معاده

نهضت إيمان وهى تقول :

- ثوانى هعمل الشاى يا عمى

وتوجهت إلى المطبخ تبتعتها نظرات عبد الرحمن وتحرك فى مكانه فى لهفة ولكنه لم يقم بعد ، لاحظت أحلام ذلك فقالت له بأبتسامة:

- أدخل لمراتك يابنى

نهض مسرعاً خلفها متوجهاً نحو المطبخ ، فجأة شعرت إيمان بيد تطوقها من الخلف وقبلت تطبع على شعرها ، حاولت أن تستدير فساعدتها على مواجهته وقال وهو ينظر فى عينيها :

- وحشتينى .. كده برضة تسيبى بيتك من غير ما تقوليلى

تراجعت خطوة للخلف وهى تقول بخجل :

- مكنش ينفع أسيب ايهاب لوحده

أقترب منها مرة أخرى قائلاً:

- يعنى ينفع تسيبى انا

أبتعدت مرة أخرى وهى تقول بعتاب:

- وبعدين يا عبد الرحمن.. ممكن مريم أو ماما يدخلوا فجأة

نظر فى عينيها فى تمعن قائلاً:

- لا الحكاية مش كده ..أنتِ اللى مش عاوزانى أقرب منك .. طب انا عملت أياه مزعلك مني قوليلى

شعرت إيمان بالإحراج من أن تتحدث فى الموضوع مرة أخرى فقالت:

- صدقتى مفيش حاجة .. أنا بس مش هينفع أسيب اخواتى لوحدهم

قال عبد الرحمن بضيق:

- يعنى مش هترجعى معايا إلا بيهم

أومأت برأسها قائلة :

- متزعلش بس كمان ماما لسه واصله النهاردة مينفعش أمشى واسيبها

أطرق برأسه وقال بحلق:

- براحتك يا ايمان

\*\*\*\*

تملكت الدهشة من يوسف عندما سمع مريم تناديه وتقول له بارتباك:

- لو سمحت يا يوسف عاوزاك لحظة

خرج إليها ووقف أمامها متسائلا ، فقالت فى خفوت وبملامح هادئة:

- أنا بعفيك من جوازك مني .

\*\*\*

## الفصل السادس والعشرون

- أنا بعفيك من جوازك مني ..

تفحص ملامحها الهادئة فى سكون يحاول أن يستشف ما خلفها وقال:

- مش فاهمك

أحتفظت بملامحها الهادئة وهى تقول له:

- زى ما سمعت .. أنت عملت اللى عليك وكتبت كتابى مش مطلوب منك اكتر من كده .. أنا

خلاص بقى معايا قسيمة جواز ولما تطلقتى هيبقى معايا قسيمة طلاق وكل واحد فينا يبدأ

حياته صح .. أعتقد انك فهمتى

مسح على رأسه وقال فى توتر بالغ:

- بس انا مش هطلق

نظرت له بدهشة وتساؤل فأردف على الفور بارتباك:

- قصدى يعنى مش هطلق دلوقتى.. المفروض اننا نعمل فرح ونعيش مع بعض قدام الناس وبعدين نبقى نطلق .. وبعدين فى حاجة مهمة عرفتھا عن سلمى والبيت اللى قلتى انه بيتهما لازم اقولك عليها

قاطعتھ رافضة لحديثه :

- لو سمحت ده مش موضوعنا دلوقتى .. ومن فضلك توافق علشان ...

فى هذه اللحظة فتح إيهاب بمفتاحه ودخل ، تفاجأ بيوسف ومريم فى ردهة المنزل، حاول يوسف أن يبتسم وهو يصافحه بحرارة:

- أيه يابنى فينك من بدرى ...

إيهاب:

- معلش كنت مع واحد صاحبى ... أنت هنا من أمتى

قالت مريم بسرعة :

- عمى حسين هنا.. وقاعد جوه مع ماما

طرق الباب المفتوح ودخل إليهما ، رحب به عمه وعانقه وعاتبه قائلاً:

- أنا زعلان منك أوى يا إيهاب.. كده برضة متعملش اعتبار وتأخذ اخواتك وتمشى

خجل إيهاب وهو يقول:

- معاك حق يا عمى انا غلطان .. معلش انا أصلى كنت غضبان جدا ساعتها مقدرتش استنى

وبعدين انا مشيت لوحدى وهما جم ورايا

ربت حسين على كتفه قائلاً:

- أنا عذرك يابنى بس مراتك ملهاش ذنب دى برضة لسه صغيرة واتفاجأت زى ما يوسف

قالك كان لازم تديها فرصة تتكلم مش تمشى كده وتسببها

توتر إيهاب قليلاً فهو مخطأ فعلاً ولكن هذا لا يغير شىء فى الأمر فقال:

- ياعمى انا غلطان .. لكن ده مش معناه انها مش غلطانة .. أراى تصدق كده عليا دى عاشت معايا وعرفتني كويس

وهنا نهضت أحلام واقفة قبالتها وقالت:

- لا يا إيهاب لو اللى بتحكيها صورتها الموضوع على أنكم عارفين وعارفة كويس أوى هى بتعمل أيه.. الكلام هيخيل على بنت صغيرة ملهاش خبرة زى فرحة مراتك

نظر لها حسين متعجبا منها، لقد كان يتوقع أن تدافع عن هذه الزيجة بكل ما تملك ولكن طريقة حديثها هى التى أدهشته، كانت تتكلم كما لو كانت امرأه عاقلة تريد أن تحافظ على بيت ولدها لا لشيء إلا لرأب صدع حياته الزوجية فقط

قال إيهاب بحنق:

- الكلام ده لو هى متعرفش طنط فاطمة كويس لكن هى عارفاها

قالت والدته بثقة:

- لا يابنى.. إذا كنت انا كنت كبيرة وواعية وعندى خبرة كفاية فى الدنيا وصدقت فاطمة من أكثر من عشرين سنة

وأشارت للحاج حسين وقالت:

- واسأل عمك

نظر لها إيهاب بدهشة قائلا:

- أنتِ مقتلناش حاجة عن الموضوع ده

نظر لها حسين بحدة قائلا:

- من فضلك يا ام إيهاب مش عاوز كلام فى أى حاجة فاتت .. ده لا من صالحك ولا من صالح أى حد فينا ولا هيحقق أى نتيجة

قالت فى سرعة :

- لاء يا حاج هيحقق .. وانا متأكدة ان إيهاب هيعذر فرحة لما يعرف ان اللى ضحكت عليها هى نفسها اللى ضحكت على امه من سنين

ألتفتت إلى إيهاب وقالت بحسم:

- من غير دخول فى تفاصيل مالهاش لازمة .. فاطمة حطت السم فى ودن مراتك وخلتها متلخبطة زى ما حطت السم فى ودانى من سنين وخلتنى اخذكوا واهرب

قال فى حيرة :

- مش فاهم

كادت نظرات حسين أن تخرقها محذرة إياها من الدخول فى تفاصيل فقالت:

- ولا حاجة.. فهمتتى ان اعمامك هيخدوا ولادى منى ومش هيخلونى اشوفكم مدى الحياة وادتنى فلوس اهرب بيها منهم وانا صدقتها بمنتهى الغباء

ربت حسين على كتفه بحنان قائلاً:

- مراتك بتحبك يا إيهاب .. حتى يا سيدى لو غلطت سامحها ده ربنا ببسامح مش من أول غلطة كده تسيب البيت وتمشى

أطرق برأسه متفهماً " هو يعلم أنها تحبه بل تعشقه " ، لاحظت أحلام بوادى الأقتناع على وجهه فقالت بهدوء :

- مراتك فى اوضتك جوه ادخلها .. عاوزه تتكلم معاك أديها فرصة تتكلم براحتها

خرج إيهاب ونظر إلى يوسف ومريم يقفان أمام بعضهما وكأن على رؤوسهما الطير .. صمت مطبق

تركهما وتوجه إلى غرفته، وقف متردداً بعض الشيء ثم فتح الباب ودخل ، تعلق بصره بفرحة وهى نائمة على فراشه ، كانت ترتدى ملابس نومه فوق ملابسها وتلف ذراعيها حول نفسها وكأنها تتخيله يعانقها ، تبدو كمهرجين السيرك بالملابس الكبيرة التى تتدلى منها لفرق الطول بينهما ووجنتيها وأنفها حمراء للغاية من كثرة البكاء، محياها حرك المشاعر بداخله نحوها ، أعتدلت هى فى فراشه وعقدت ذراعيها أمام صدرها بطفولية . وهى تقول بعينين لامعتين من أثر الدموع:

- طب أعمل ايه .. كنت واحشنى أوى ملقتش غير هدومك قدامى

تماسك إيهاب وهو يحاول أن يرسم ملامح الجدية ولكنه لم ينجح بشكل كبير ، بل لم ينجح على الإطلاق ، فأبتسم وفتح ذراعيه لها وهو يقول بحب:

- وانتِ كمان وحشتيني أوى

هرولت إليه لتدفن نفسها بين أحضانه وبكت من شدة انفعالها واشتياقها لحنان زوجها واحتياجها إليه ، وجعلت تضربه فى صدره بقبضتها الصغيرة وهى تقول بطفولية:

- زعلانه منك أوى .. زعلانه .. زعلانه زعلانه...

وهو يضحك ويضمها إليه أكثر وأكثر

كان الحاج حسين يقول لأحلام بثقة فى تلك اللحظة:

- عارفة لو كنت كلمتيني وقولتيلي على مكانهم وقولتيلي جوزهم لولادى كنت هقولك وانا كمان ناوى على كده من غير ما تتعبى نفسى وتدفعى فلوس لهند وتقعدى تتجسى علينا عن طريقها

أشاحت أحلام بوجهها وقالت:

- معلىش يا حاج تفكيرى كان مختلف ساعتها مكنتش اعرف انك هتستقبلهم كده ولا هتعاملهم المعاملة دى

ضرب حسين الأريكة بجواره بخفة وهو يقول بسخرية:

- ومخفتيش بقى لما تقوليلى على مكانهم انى أقتلهم .. ولا قلتى الراجل كبير وعجز

قالت فى شرود:

- لا يا حاج أنا متابعة أخبارك كويس متنساش انى كنت عايشة فى مصر لحد ما إيهاب وإيمان خلصوا ثانوى .. وكنت متابعه كل حاجة من بعيد بس مكنتش عارفة أوصل للى كنت بتفكر فيه من ناحية ولادى.. حتى لما اتأكدت انك مش هتفكر تأذيتهم مقدرتش اقولك على مكانهم .. ولما جوزى جاتله سفريه وأضطرينا نسافر والولاد مرضيوش يسافروا معايا كنت مطمئة انك حتى لو لقيتهم مش هتأذيتهم .. كل اللى كنت خايفة منه ساعتها انك تشوه سمعتى قدامهم وتحكيلهم على عصام ..

تابع هو بتهكم :

- وكنتِ عاملة حسابك ساعتها انى حتى لو شوهدت صورتك فانتِ من قبليها وانتِ مشوها  
صورتنا وقايله علينا اننا سرقتنا ميراث ابوهم .. يعنى شىء طبيعى اننا نفتري عليكِ .. مش  
كده يا أحلام

أومات برأسها وقالت:

- مش هكدب... الكلام ده حصل لكن دلوقتى الوضع مختلف

حسين :

- وأيه اللى خلاه مختلف

قالت فى امتنان:

- موقفك مع مريم انت وابنك يوسف وشهامتكوا معانا

قال فى شك وحذر:

- موقف أياه؟

قالت فى ضعف :

- انا عارفة انك مبتحبش تفتح كلام فى الحكايات اللى زى دى .. علشان كده انا مش هتكلم  
أكثر من انى اشكرك انت وابنك .. اللى عملتوه مع بنتى محدش يعمله

قاطعهم دخول يوسف وهو يقول حائراً:

- عبد الرحمن نزل من غير ما يقول لحد.. وبكلمه مبيردش

خطى الحاج حسين خطوات للخارج وهو يبحث بعينه عن إيمان قائلاً:

- اومال فين إيمان

قالت مريم وهى تستدير :

- هشوفها فى المطبخ

دخلت مريم على اختها فوجدتها تبكى وقد أغرورقت عيناها بالدموع ، فقالت فى قلق:

- كفاية بقى يا إيمان كفاية.. تعالى عمك عايزك ضرورى



جففت دموعها وخرجت بجوار مريم وقفت أمام عمها وقالت:

- نعم يا عمى حضرتك عاوزنى

قال فى حنان:

- انت كنت بتعطى ؟ ..بس خلاص انا كده عرفت

رفعت رأسها إليه بتسائل فقال:

- عبد الرحمن خلص كلامه معاكى ومشى .. مش كده؟

أومأت برأسها وهى تمنع نفسها من البكاء مرة أخرى فقال :

- خلاص هو تلاقيه روح البيت أصله جاى من سفر وزمانه هلكان عاوز يرتاح

قالت أحلام فى حسم:

- طيب يالا يا إيمان روحى بيتك مع عمك

والتفتت إلى مريم قائلة :

- ولو عاوزه تروحي معاهم يا مريم روحى

حركت رأسها نفيا وقالت:

- لا يا ماما انا هقعد معاكى شوية .. لو إيمان عاوزه تروح تروح هى

إيمان:

- لا انا كمان عاوزه اقعد مع ماما شوية .. انا هدخل اشوف إيهاب

تحركت إيمان ودخلت إلى غرفة أخيها ونسيت أمر فرحة تماما ، فتحت الباب فجأة ثم أشاحت بوجهها وهى تبتسم فى خجل ، فدفع إيهاب فرحة بعيدا عنه وهو يقول بمرح:

- يا دى الفضيحة من دى وأيه اللى جابها فى حضنى يا إيمان

أبتسمت إيمان رغم ما تعانيه وقالت بمكر:

- ها هتروح مع عمى وفرحة ولا هتقعد فى حضنى انا هنا

تصنع ايهاب التفكير وهو يقول:

- بصى يا ايمان أنتِ اختى وكل حاجة بس بصراحة يعنى.. هروح طبعاً..

أوقفته فرحة وهى تضحك وتقول:

- طب استنى لما اقلع الهدوم دى بدل ما انا عاملة زى البلياتشو كده

بعد دقائق خرج إليهم ايهاب وفرحة ويظهر على وجوهيهما البهجة ، نظر حسين إلى أحلام قائلاً:

- خلاص يا ام ايهاب زى ما اتفقنا الفرح فى معاده يوم الخميس ان شاء الله

تدخلت مريم قائلة:

- عمى .. يمكن بس يوسف ملحقش يجهز نفسه فمحتاج يأجل شوية

قاطعها يوسف بوضوح:

- انا مش محتاج أجل حاجة .. أحنا شقنا هناك جاهزة من كله

أرتبكت وهى تنظر إليه قائلة:

- مش أحنا كنا بنتكلم من شوية وقتلى ان الفرح ممكن يتأجل

قاطعها بثقة:

- لا يا مريم تلاقيكى فهمتى غلط ...

ونظر لها بعمق مؤكدا على كلماته وهو يقول:

- الفرح فى معاده ان شاء الله

قالت أحلام :

- طالما كل حاجة جاهزة يبقى خليها معايا اليومين دول

أنهى حسين الحوار قائلاً:

- خلاص يا مريم خليكى مع والدتك بس ليلة الفرح لازم تباتيها هناك على الأقل.. أتفقنا

قالت أحلام بتردد :

- تسمحلى يا حاج احضر فرح مريم

قال على الفور :

- طبعا يا ام ايهاب ده فرح بنتك

والتفت إلى ايمان :

- ها يا ايمان لسه مصممة متروحيش بيتك

أطرقت برأسها وقالت:

- معلىش يا عمى سبنى على راحتى .. انا عاوزه اقعد مع ماما اليومين دول قبل ما تسافر

\*\*\*

كان عبد الرحمن يدور فى غرفته حول الأريكة مرة وحول المقعد مرة حتى سمع صوت رنين باب المنزل ، خرج فى سرعة على أمل أن يجدها قد عادت معهم ولكنه أطرق فى حزن ..لم تعد

ما الذى يشقيها منى .. لماذا كلما اقتربت تبتعد ..لماذا كلما غصت فى عالمها تنسلخ هى من عالمى.. لماذا أنتِ كتومة إلى هذه الدرجة.. ليس من السهل أن تبيح بمكنون قلبها ..لماذا يا عذابى؟

أقبلت عفاف على ايهاب وفرحة فى سعادة لم تكن تتوقع أن يعود ايهاب ولكنه عاد .

أخذ ايهاب زوجته وصعدا إلى شقتهم الخاصة ودخل يوسف غرفة أخيه ليطمئن عليه

:

- ايه يا عبد الرحمن اللى خلاك تسيبنا وتمشى ومكنتش بترد ليه على مكالماتى.. أنت عارف كلمتك كام مرة؟

استقبله عبد الرحمن بابتسامة باهتة وقال:

- خلاص يا يوسف معلىش سبنى لو سمحت دلوقتى

جلس بجوار أخيه قائلا:

- مالك يا عبد الرحمن فى ايه

واستدرك قائلا:

- مراتك كان شكلها مضايق أوى ايه اللى حصل بينكوا

قال عبد الرحمن بألم:

- مقالتش حاجة بس شكلها مضايق من اللى حصل ومن اللى قالته مرات عمى ..هى حساسة  
زى ايهاب وبتحب تحافظ على كرامتها

قال يوسف:

- بس ايهاب رجع مع فرحة .. يبقى أكيد بقى عاوزه تقعد مع والدتها زى ما قالت لبابا

ألتفت له عبد الرحمن قائلا:

- هى قالت كده

أوما برأسه قائلا:

- ايوه بابا قالها تعالى معانا قالتلوا عاوزه اقعد مع ماما يومين قبل ما تسافر

\*\*\*

خرج يوسف من غرفة عبد الرحمن متوجها إلى غرفته فسمع والده يناديه :

- يوسف

ألتفت إليه وأقبل عليه فى اهتمام ولهفة وهو غير مصدق أنه سمع أسمه من فم والده أخيراً  
فقال:

- نعم يا بابا

وقف حسين ينظر إليه وقد لانت ملامحه كثيراً وقال:

- مريم كانت عاوزه تأجل الفرح ليه؟

نظر له بدهشة قائلا:

- وحضرتك عرفت ازاي

أعاد حسين سؤاله وكأنه لم يسمع تعليقه :

- مريم كانت عاوزة تأجل ليه؟

يوسف:

- كانت بتقولى أنا بعفيك من الجواز منى .. وكانت مصممة ومش عاوزة توضح السبب  
يمكن علشان كنا واقفين فى الصالة مش عاوزة حد يسمعنا .. وبعدين ايهاب دخل ومعرفتش  
اكمل كلامى معاها.

أخرج حسين هاتفه وأعطاه ليوسف قائلا:

- الرسالة دى مريم بعتهالى واحنا راجعين فى السكة.. أقرأها

أخذ هاتف والده وقرأ رسالتها " أنا فهمت ماما اللى حصلنى .. بس مقولتلهاش مين اللى  
عمل كده فىا .. وفهمتها انك ضغط على يوسف علشان يستر عليا ويتجوزنى وهو وافق  
شهامة منه "

ظل يوسف يقرأها مرات ومرات وهو غير مصدق ما فعلته، نظر إلى أبيه متسائلا وقال:

- طب ليه؟

قال حسين بخفوت وثقة:

- ده فسرلى سبب تغير أمها وكسرت نفسها قدامى

وقال وهو يستدير وكأن الأمر ليس ذو أهمية:

- بس انت اتصرفت كويس

ودخل غرفته وأغلق الباب ، أبتسم يوسف وقد شعر ببداية لين والده تجاهه ولكنه يعرف  
والده جيدا، ليس من السهل أن يظهر مشاعره بسهولة

\*\*\*

دفعت علا وليد بعيدا عنها بجدية وهى تقول:

- عيب كده يا وليد

قال وهو يحاول جذبها مرة أخرى :

- ليه بس يا حبيبتي.. أنتِ خطيبتى

قالت وهى تدفعه مجدداً :

- أديك قلت خطيبتك مش مراتك...

أصطنع ولید الحزن ورسمه على ملامحه ببراعة وهو يقول:

- خلاص يا علا براحتك .. خليكى كده بعيدة عنى .. أنا بصراحة مش قادر اتأكد من مشاعرك وانت بعيدة عنى بالشكل ده..

ونظر لها نظرة جانبية وهو يقول:

- نتجوز ازاي وانا لسه مش متأكد من مشاعرك ناحيتى

جلست بجواره وقالت برقة:

- يعنى ماما تدخل ولا هند هيبقى المنظر مش لطيف .. وبعدين يعنى هو انت لسه هتأكد من مشاعري ما انت عارف انى بحبك

أطرق برأسه ثم نظر إليها بعتاب قائلاً:

- الحب من غير ثقة مالوش لازمة.. وانتِ مع الأسف مش بتثقى فيا أبدا ... حتى لما بنخرج مع بعض وبمسك ايدك بتحسسينى انك بتمنى عليا وانك مش موافقة

ونهض واقفا وقال بتبرم:

- بصراحة بقى يا علا انا راجل حامى ومحبش الست اللى مشاعرها باردة.. كده مش هنفهم بعض ... لو انتِ يابنت الناس هتفضلى كده يبقى مفيش داعى نضيع وقت مع بعض اكتر من كده

اقتربت منه وامسكت يده قائلة:

- بس انت عارف انى بثق فيك ليه بتقول كده

او ما برأسه بسخرية قائلاً:

- اه صح بأمانة لما قلتك تعالى اتفرجى على شقتك علشان تقوليلى هتتوضب ازاي رفضتى وقتيلى لا ميصحش

قالت علا بهدوء ظاهري :

- يعنى ينفع يا وليد ارواح معاك شقة واحنا لسه مخطوبين

قال بسرعة:

- هو انت هتروحي تعملى ايه .. خلاص بقى متجيش تقوليلي خلصت الشقة ولا لسه وهتحدد معاد الجواز امتى والكلام بتاعك ده.. وبعدين للدرجady خايفة مني وبعدين الشقة دى فى بيت عيلة يعنى مش هتبقى لوحدك معايا

ثم قال بنفاذ صبر:

- بصى يا علا انا كده اتأكدت ان درجة مشاعرنا مش زى ما انا كنت متخيل.. أنت كده مش هتفهمينى .. لما بتعملى كده وبتردى كلامى وانت لسه خطيبتى اومال هتعملى ايه لما نتجوز

تناول مفاتيح سيارته وهم بالإنصراف وهو يقول :

- مستنى ردك ...

تركته يذهب وجلست تفكر وتدور كلماته فى عقلها .. " أنا كده عرفت انك مش ناوى على جواز وانك خطبتنى علشان ابقى سهلة معاك " .. ولمعت عينيها بخبث وهى تقول:

- ماشى يا وليد يابن الأكابرلما نشوف انا ولا انت.

\*\*\*

اليوم التالى تقابلت مريم بسلمى فى الكلية ، صافحتها سلمى وهى تنظر لها بسخرية وتقول:

- أزيك يا حجة مريم

قابلت مريم سخريتها بهدوء وقالت:

- يارب ...أدعيلى أبقى حجة بجد دى حاجة تشرف ان الواحد يزور بيت ربنا

شعرت سلمى بغصة فى حلقها من وقع كلمات مريم عليها وقالت :

- اه اه طبعا هو حد يطول

وتابعت :

- وأخبار العريس ايه

- الحمد لله تمام

أقبلت صديقة أخرى لمريم وعانقتها بحرارة وهى تقول :

- وحشتينى أوى يا مريم

نظرت سلمى لصديقتها الأخرى بتهكم، فقد كانت هى الأخرى محتشمة فى ملابسها فقالت سلمى للفتاة:

- أنتِ بقى صاحبته الجديدة

نظرت لها صديقتها بنظرة هادئة وقالت:

- ودى حاجة تزعلك يا سلمى

نظرت لها سلمى بدهشة وقالت:

- ايه ده انتِ تعرفينى

قالت:

- الكلية كلها عارفكى شباب وبنات ... ده انتِ اشهر من النار على العلم

ثم نظرت لمريم بابتسامة مشاعبة وقالت:

- ربنا يبعدنا عن النار ويجعلنا من أهل الجنة

نظرت لهما سلمى شذرا وقالت :

- ربنا يهنى سعيد بسعيدة

ضحكت الفتاة مرة أخرى وقالت لها:

- لا يا ستى ربنا يهنى يوسف بمريم

والتفتت إلى مريم قائلة:

- فى عروسة تيجى الكلية قبل فرحها بيوم



قالت سلمى متفاجأة:

- آيه د انت فرحك بكره يا مريم..كده متعزمنيش يا وحشة

قالت مريم ببرود:

- لا ازاي انت معزومة طبعا

كعادة سلمى دائما ما أن يراها الشباب من الصنف الذى ينجذب للحلوى المكشوفة يقبل عليها وعلى من بجوارها دون تردد، أقبل عليهن فجأة أحد الشباب صافح سلمى وقال لمريم وصديقتها :

- هاى يابنات ازيكم

نظرت مريم لصديقتها وقالت:

- يلا نمشى

أخذتها صديقتها وذهبت لمكان آخر بعيد عن سلمى ، تابعهما الشاب بعينه ثم الفتت إلى سلمى قائلا بتعجب:

- هى البت دى بقت محترمة كده ازاي

ضربته سلمى على كتفه قائلة بغضب:

- قصدك ايه يعنى هو انا مش محترمة

غمز لها وهو يقول:

- أنت باشا يا باشا...هو أنت فى زيك يا قمر !

\*\*\*

مال الحاج حسين للأمام وقال بتركيز :

- زى ما فهمتك كده يا عفاف أحلام هتيجى الفرح ولازم تحجزى بينها وبين فاطمة بأى شكل.. أحنا مش عاوزين مشاكل ولا عاوزين حد يعرف عننا حاجة.. الفرح هيبقى فيه ناس غرب كثير

قالت عفاف بتوتر:

- والله ده انا قلقانة من دلوقتي يا حسين.. حتى لو زى ما قلتلى كده ان أحلام فيها حاجات كتيره اتغيرت .. برضة عمرها ما هتتغير من ناحية فاطمة.. ده اللى بينهم كبير أوى  
قال بهدوء:

- إن شاء الله ميحصلش حاجة .. انا كمان هبقى حاطط عينى عليهم .. و كلمت إبراهيم وبلغته علشان يبقى واخد باله وميتفاجأش ونبهت عليه ميجيبش سيرة لمراته  
تنهدت عفاف وقالت باضطراب:

- ربنا يستر

\*\*\*

## الفصل السابع والعشرون

صعد عبد الرحمن إلى شقيقته وأخذ يتجول فى أركانها يتلمس عطر زوجته التى فارقته، أخذته قدميه إلى غرفة نومها، فتح بابها وأضاء مصباحها فى شجن ، نظر إلى فراشها ويالها من مفاجأة ، لقد كانت نائمة فيه، أختلج قلبه وأقرب منها ببطء وحذر، أزال خصلات من شعرها كانت لا تريد أن تفارق وجنتاها، طبع قبلة رقيقة على وجنتها فاستيقظت ، نظرت له بحب وشوق وقالت:

- وحشتنى أوى

أحاطت رقبتة بذراعيها، فاقترب منها أكثر وهو يقول بابتسامة عذبة :

- مش أكثر منى يا حبيبتى ..

أقترب أكثر وأكثر وفجأة، تلقى ركلة شديدة فى معدته أستيقظ على آثارها المؤلمة، أعتدل فى جلسته فوجد نفسه فى فراشه ويوسف نائما بجواره ، مسح وجهه وهو يقول:

- استغفر الله العظيم ...

وأمسك بساق يوسف التى ركتله ودفعها بعيداً وهو يوقظه ويهتف به:

- أياه يا أخى ده.. صحتنى من أحلها نومة كنت عاوز أكمل الحلم..

أعتدل يوسف فزعاً وهو يقول:

- أياه فى أياه؟!!

قال عبد الرحمن بسخط :

- الله يقلق منامك يا أخى .. أنت أياه اللى منيمك جانبى

قال يوسف وهو يتثائب:

- مش عارف.. أنا آخر حاجه فاكلها اننا كنا بنرغى مع بعض

دفعه عبد الرحمن بعيداً لينهض من فراشه قائلاً :

- طب امشى روح نام فى أوضتك الله يكون فى عون مراتك اكيد مش هتستحمل تنام جنبك ليلة واحدة

خرج يوسف من غرفة أخيه وهو يتمتم بشجن :

- ولا حتى ليلة يا عبد الرحمن

\*\*\*

وفى الصباح كانت أحلام تنادى مريم وإيمان:

- يالا يا بنات ..إيهاب قال جاى ياخذكوا بعد ربع ساعة خلصتوا ولا لسه؟

خرجت ايمان وهى تجر حقيبتها الصغيرة قائلة:

- خلاص يا ماما مريم فاضلها حاجات بسيطة

جلست بجوار أمها حول مائدة الإفطار وهى تقول باهتمام:

- هو حضرتك مش هتيجى معنا فعلا

ألقت إليها أحلام قائلة:

- آجى فين... أنا هاجى على معاد الفرخ على طول بالليل

خرجت مريم ووضعت حقيبتها بجوار حقيبة ايمان وهى تقول:

- ليه يا ماما ما تيجى معايا

أبتسمت أحلام وهى تقول :

- مينفعش يابنتى البيت الكبير ميتحملنيش انا وفاطمة اليوم كله

ردت إيمان بتفكير:

- والله يا ماما أنا مش مصدقة ان طنط فاطمة يطلع منها كل ده..هى اه صحيح مش ودودة

معانا زى طنط عفاف بس مكنتش اتخيل انها تطلع كده

ألتفتت لها أحلام وقالت محذرة اياها:

- أسمعى يا ايمان الست دى لازم تخلصى بالك منها كويس اوى ومتخطلتيش بيها إلا فى

المناسبات بس .. دى ست مش سهلة واوعى يخيل عليكى حركات الطيبة اللى بتعملها ..دى

ممثلة درجة أولى.. أسرار بيتك أوعى تطلعها بره أبدا.. وأوعى تصدقى حاجة على جوزك

إلا لما تسأليه وتسمعى منه كويس .. أنتِ فاهمانى انتِ واختك ولا لاء؟

أومات برأسها وقالت مريم:

- أنتِ كده خوفتينا اكرر

هزت رأسها نفيا وقالت بثقة:

- لا متخافوش طول ما عمكم حسين موجود وفى صفكم متخافوش منها ...لكن محدش فيكوا

يرميلها ودنه أبدا ولا يسمع منها نصيحة

تنهدت ايمان وقالت:

- عموما احنا كده كده مش بنختلط بيها حتى وفاء مفيش بينا وبينها علاقات قوية زى فرحة

أبتسمت وهى تربت على يدها قائلة :

- أديكى شوفتى وجربتيها بنفسك

قالت مريم متسائلة :

- أنتِ صحيح يا ماما هتسافرى بكره الصبح

أومأت برأسها وهى تقول:

- ايوا مش هينفع اقعد اكر من كده.. وادينى اهو اطمنت عليكموا

أعلن هاتف أحلام عن اتصال من إيهاب وأخبرها أنه ينتظرهما بالأسفل، ودعت أحلام كل منهما وانطلقتا عائدين إلى البيت الكبير مرة أخرى

\*\*\*\*

وقفت سيارة إيهاب الصغيرة أمام المنزل قائلا بعجلة من أمره:

- يالا انزلوا عندى شغل لازم اخلصه قبل العصر

قالت إيمان بتعجب:

- كمان مش هتدخلنا الشنط ..مش كفاية نزلتنا بيهم من عند ماما لوحدنا

أشار إيهاب إلى باب المنزل قائلا:

- أومال ده واقف بيعمل ايه

ألقت إيمان فوجدت عبد الرحمن واقفا ينتظرهم عند البوابة الخارجية ،عندما رآهم اقترب من السيارة وفتح الباب الخلفى وأخرج الحقائب ، ترجلت إيمان من السيارة وبعدها مريم بخطوات متثاقلة حين قال إيهاب لعبد الرحمن:

- أنا راجع العصر ان شاء الله

أوما له عبد الرحمن برأسه والتفت إلى إيمان ومريم قائلا بابتسامة:

- حمد لله على السلامة

ظهر يوسف وهو يمر بالبوابة ويتجه إليهم بابتسامة صغيرة، اقترب منهم وقال مرحبا وهو يهم بحمل إحدى الحقائب :

- حمد لله على السلامة.. أتأخرتوا أوى

أوقفته يد عبد الرحمن تقطع عليه الطريق قائلا بحزم:

- معلى دى شنة مرالى شلل الالنة

نظر له يوسف بدهشة قائلا:

- وفيها أله؟

قال بجدة:

- لا معلى ملبش ال مسك شنة مرالى

أخلج قلب إلمان مرة أخرى وطق بقوة أكثر فهو من الأساس يطرق بشدة منذ أن رأته قاءما  
نحوهم، ال عبد الرحمن حقية إلمان اللى سارت خلفه واتجه إلى الال، نظر يوسف إلى  
مريم وهو ال ال حقيةها قائلا:

- أنا عاوز ال ال معاكى ضرورى

لم ترد ولم تنظر إليه بل أشاحت بوجهها واستبقته للال، وقف عبد الرحمن أمام المصل  
والفتت إلى إلمان قائلا بهوء وهو ال ينظر لعينية:

- طبعاً الشنة ال ال شقتنا مش كده

خفت بصرها وهى ال:

- أوه .. بس هفضل مع مريم علشان الكوافيرة زمانها جاية

أمسك كفها بآن قائلا:

- على فكرة أنا منمش ال ساعة واحدة بس .. من ساعة ما كنت عنكم وأنا بافكر فىكى  
وحتى الساعة دى المت بىكى فىها .. مش قادر اسأل الدنيا ولا لىا نفس لاجة وانت  
زعلانة منى.

قاطعه اقتراب مريم ووقوفها بجوارهما ، صعدوا إلى الطابق الالى أولاً اللى كانت عفاف  
تنظرهم ، الل وجهها بسعادة غامرة اللى رأتهما وعانقتهما بلب كبير وآن بال  
ثم ال فى سرعة:

- يالا يالبات أطلعوا بسرعة الهموا نفسكم .. فرحة بلى الكوافيرة جاية كمان ساعة

ثم ال إلى مريم الة:

- وانت يا مريم بصى كده فى شقتك ولو لقيتى حاجة ناقصة قوليلى على طول

أبتسمت مريم أبتسامه باهته وهى تقول:

- حاضر .

كان عبد الرحمن ويوسف قد صعدا بالحقائب للطابق العلوى وهبط يوسف إليهم وترك عبد الرحمن ، أستقلت الفتاتان المصعد وعندما توقف توجهتا إلى شقة مريم ولكنهما وجدا عبد الرحمن ينتظر إيمان عند باب شقتهما وقال لها على الفور:

- إيمان عاوزك خمس دقائق بس

توترت إيمان وهى تنظر إلى مريم ثم تنظر إليه معاتبة :

- معلىش أصل يدوب نلحق ..مفيش وقت

مالت مريم على أذنها قائلة بهمس:

- روحى شوفيه انا لسه هدخل آخد دوش .. على ما اطلع من الحمام تكونى جيتى

أومات برأسها موافقة فى اضطراب وذهبت إليه ، دخلت شقتها ودخل خلفها وأغلق بابها بهدوء ، نظر إليها نظرة طويلة معاتبة ولكنها مشتاقة ، نظرة محبة شغوفة ولكن تغلفها الحيرة وأخيراً تكلم قائلاً:

- ممكن اعرف انا عملت أيه علشان تتغيرى كده معايا

أطرقت برأسها وقالت فى خفوت :

- مش وقت الكلام ده دلوقتى لازم أروح أجهز مريم

أقترب منها يتفحصها بعمق وقال:

- يا إيمان متسبينيش كده قوليلى حاجة .. ريحينى.. أنا معرفش غير موضوع كلام مرات عمى لكن أيه علاقة كلامها بيا أنا وأنتِ

قالت بابتسامه شاحبة:

- أوعدك بعد الفرح ما يخلص هقعد معاك ونتكلم زى ما انت عايز

قال بحب:

- طب ينفع اقولك وحشتيني

قالت بدون تفكير:

- ليه

أبتسم ابتسامة حائرة وقال:

- ليه ؟.. علشان بحبك

قالت دون أن تنظر إليه:

- متأكد؟

أقترب منها ومسح على وجنتها قائلاً:

- طبعا متأكد معقول مش حاسة بيا كل ده

أطرقت برأسها مرة أخرى ولم ترد ، فاقترب منها وأخذها بين ذراعيه وضمها بقوة ،  
أستسلمت لضمته فلقد كانت تشتاق لرائحته مثلما يشتاق هو إليها ، ضمها أكثر وأغمض  
عينيه وقال :

- والله لو تعرفى لما بتبقى زعلانة مني بيحصلى أيه عمرك ما هتزعلى مني أبدا.. بقولك من  
ساعة ما رجعت من عندكوا وانا حاسس انك زعلانة مني وحتى معرفش ايه السبب .. وانا  
النوم مجافيني منمتش غير ساعة وحتى الساعة دى حلمت بيكى.. كل ما احاول انام افكر  
ملاحك وانت مضايقة وعنيكى اللى بتلمع بالدموع احس وانا بغمض عيني انى بغمض  
على شوك .. وادى النتيجة بقالى يومين منمتش بسبب حضرتك يا هانم.

أبتسمت وهى تدفن رأسها فى صدره بهدوء ، لقد كانت تشعر بالسكينة والراحة من وقع  
كلماته الرقيقة الصادقة، ومن أثر ضمته التى تستمع فيها إلى نبضات قلبه المتسارعة  
وكأنها تهفو إليها شوقاً، ظلاً هكذا وقت ليس بالقصير لم يشعرا بالوقت ولا بعقارب الساعة  
التي كلما قفزت زادت ضمته لها وكأنه يخشى أن تتركه وتمضى.

قطع هذا الوصال رنين هاتف عبد الرحمن ، رفعت رأسها وقالت وهى تنظر إليه :

- تليفونك

وضع رأسها على صدره مرة أخرى وقال بهمس:



- سيبيه يرن

ولكن هاتفه أصر على قطع هذا الوصال الحميمي فقالت بابتسامة:

- هو بقى مش هيسيبك .. شوف كده لتكون حاجة مهمة

نظر إلى عينيها بعمق قائلاً:

- مفيش أهم منك عندي

أبتسمت وهى تضع يدها فى سترته وتأخذ منها الهاتف ، نظرت إليه وقالت:

- ده عمى

أغض عينيه مرة أخرى وتنهد تنهيدة طويلة وكأنه يطبع صورتها داخل مقلتيه حتى لا تفارقهما أبداً ، تناول منها الهاتف وهو يتلمس أطراف أناملها مداعباً، وضع الهاتف على أذنه قائلاً :

- السلام عليكم ..

أستمع إلى والده قليلاً بتركيز وقد ارتسمت على وجهه ابتسامة عابثة ثم قال :

- حاضر يا بابا ثوانى واكون عندك

رفع رأسها إليه لتلتقى عينيها مرة أخرى قائلاً:

- كنا بنقول أياه

أبتعدت وهى تخطو باتجاه الباب وتفتحه قائلة:

- يلا انزل شوف عمى وانا رايحة لمريم

توجهت إلى شقة مريم وأخرجت مفتاحها ودلفت بسرعة للداخل وأغلقت الباب ببطء وهى تعلو وجهها بابتسامة خجلة ، أتجهت إلى غرفة مريم التى كانت انتهت من الإغتسال للتو وتجفف جسدها بالمنشفة ، فتحت إيمان الباب فانتفضت مريم وهى تحتضن منشفتها وعندما وقعت عينيها على اختها فزفرت بقوة وهى تقول:

- يخرب عقلك يا ايمان رعبتينى

تبادلت الفتاتان الضحكات ولكن نظر إيمان وقع على جرح غائر أعلى ساق مريم فاقتربت منها وهي تنظر إليه في تفحص وتقول :

- أيه الجرح ده يا مريم ؟

نظرت مريم إلى حيث تنظر إيمان ، ووضعت أطراف أناملها على الجرح تتحسسها فتذكرت لحظة سقوطها وهي يغشى عليها، تذكرت قطع الزجاج التي سقطت على أطرافه المهشمة قطع ذكرياتها صوت إيمان وهي تقول:

- أنت وقعتى على أيه ولا اتخبطتى فأيه .. أرتجفت مريم مع تذكرها الحادث وشعرت بالألم وكأن الجرح مازال حديثا وقالت بارتباك :  
- مش فاكدة .

قالت إيمان وهي تضغطه قليلاً:

- مش فاكدة ازاي ... مش بيوجعك طيب؟

حركت مريم رأسها نفيا وقالت:

- لا ..

ثم لفت المنشفة جيداً لتخفيه وهي تتصنع المرح:

- يالا بقى الست زمانها جاية ، أدخلى خدى دش انتِ كمان

\*\*\*\*

أستسلمت مريم للمُزينة تمشط شعرها وتزينها بينما جلست إيمان وفرحة يتجاذبان أطراف الحديث ويتضحكان .. قالت إيمان بتساؤل:

- فين وفاء مطلعتش ليه ولا حتى سلمت علينا لما رجعنا

مطت فرحة شفيتها وقالت:

- مش عارفة بس شكلها محرجة من اللى امها عملته

قالت إيمان بتعجب:

- سبحانه الله وفاء غيرهم خالص

أومأت فرحة موافقة:

- ده حقيقى.. بس أكيد اللى أمها بتعمله هى مش راضية عنه علشان كده تلاقيها مكسوفة تطلع

تناولت إيمان هاتفها وطلبت رقم وفاء وانتظرت ثوان إلى أن أتاها صوتها بخفوت:

- السلام عليكم ..ازيك يا إيمان

- وعليكم السلام .. أيه يابنتى مطلعتيش ليه.. الكوافيرة هنا

قالت وفاء بخجل:

- معلش يا إيمان انا هبقى احط حاجة خفيفة كده

قالت إيمان بإصرار:

- لا مينفعش .. لازم تطلعى حتى لو مش هتعملى حاجة .. كفاية انك تقعدى فى وسطينا

سيطرت وفاء على دموعها وقالت بتماسك:

- ربنا يخاليكى يا إيمان بس بجد مش هقدر

زاد إصرار إيمان وهى تقول:

- لو مطلعتيش هنزل اخذك بنفسى ..ها قلتى ايه

أبتسمت وفاء من بين دموعها وهى تقول:

- لالا خلاص خليكى انا طالعة اهو

أغلقت إيمان الهاتف فى حين قالت لها فرحة:

- والله انت طيبة أوى يا إيمان.. يابخت عبد الرحمن بيكى

\*\*\*

وفى المساء كانت الحديقة تتلألأ فى زينتها الجديدة بلمسات جمالية وضعها إيهاب وفرحة بذوق عالى وأحاساس فنان، كان الجو العام يبعث على البهجة وشاركت الطبيعة فى تزيينه

بنسَماتِ عَليَّةٍ وعبيرِ الورودِ المتسللِ إليها ليجعلِ النسَماتِ تتحولُ إلى شذى رَائعٍ يأخذُ  
بالألبابِ ويبعثُ على الإسترخاءِ فيحلو استنشاقه ببطءٍ وكأنه سحر.

ومرة أخرى يتكرر نفس المشهد ويوسف يقف أمام مراته يرتدى حلتَه الأنيقة السوداء ولكن  
كانت تعلو شفّتيه ابتسامة لا يستطيع تفسيرها، قطع ابتسامته صوت عبد الرحمن الساخر  
وهو يقول:

- اضحك اضحك ما انت مش عارف أيه اللي مستنيك

ألّفت إليه يوسف قائلاً:

- أيه ده انت لحقت تتعقد من الجواز

وقف عبد الرحمن بجواره فى المرأة وهو يهندم سترته وقال:

- ياعم مش لما اتجوز الأول ابقى اتعقد

نظر له يوسف متعجباً من كلماته وقال:

- نعم .. او مال إيمان دى تبقى أيه خطيبتك

دفعه عبد الرحمن ليلتفت مرة أخرى إلى المرأة وهو يقول:

- خليك فى حالك..

خرج يوسف إلى شرفته ينظر إلى الحديقة التى تزينت كالعروس وهو متعجباً من السعادة  
التي يشعر بها برغم من أنه يعلم أن هذا الزواج ما هو إلا غطاء شرعى لما حدث بينهما

، بدأ المدعوين بالحضور وكان أول من حضر هى علا بصحبة والدتها وأختها هند التى  
وقفت تنظر حولها وهى تقول لأختها :

- شايقة اللي اتحرمت منه اختك

قالت علا بصوت هامس:

- ممكن ترجعيله انت وشطارتك

ألقت مريم النظرة الأخيرة فى مرآتها بينما قالت إيمان:

- ماشاء الله.. أنتِ قمر والله يا مريم اللهم بارك

عانقتها فرحة ووفاء ، ألتفتت إليهم مريم قائلة:

- أنتوا كمان قمرات

قالت وفاء بمشاكسة وهى تقول:

- أنتوا بقى غيرانين منها ولايسين فساتين كتب الكتاب بتاعتكوا

ضحكت فرحة قائلة:

- والله ياختى مش بمزاجنا .. كل واحدة فينا جوزها صمم تلبس كده

أقربت إيمان من مريم وقالت مداعبة :

- بس أيه ده يا مريم .. فى عروسة تلبس الحجاب يوم فرحها ده ايه العقد دى

تلون وجهها خجلا وقالت:

- خلاص بقى بطلى .. مكنتش فاهمة وادينى فهمت ياستى

طرقت عفاف الباب فالتفت الجميع إليها وقالت مريم فى سعادة متفاجأة:

- ماما !

كانت أحلام بصحبة عفاف فهرولت مريم إليها وعانقتها ، نظرت أحلام إليها وإلى فستانها الأبيض وحجابها الحريري الذى زاد جمالها وقالت:

- عروسة زى القمر يا مريم .. كان حلمى اشوفك انتِ واختك واخوكى يوم فرحكوا

قالت إيمان مداعبة :

- ما انا لابسه فستان كتب كتابى اهو يعنى كأنك حضرتى فرحى برضة

عانقتها والدتها وقالت:

- ربنا يسعدكوا يا ولاد

ربتت عفاف على ظهرها قائلة:

- ربنا يديكى طولة العمر وتشوفى ولادهم

نظرت إليها أحلام بمودة وامتنان وقالت:

- متشكرة يا عفاف .. طول عمرك طيبة وأنا مطمئة على ولادى معاكى

أدمعت عينيى إيمان ومريم وهما يتبادلان النظرات بينما قالت فرحة:

- وبعدين .. الميكب هيبوظ كده

نظرت إليهم عفاف قائلة:

- هو فين الميكب ده انا مش شايفة غير زبدة كاكاو

ضحك الجميع .. وفجأة عم الصمت حينما ارتفع صوت فاطمة بغضب وقسوة وهى تقف على باب الغرفة وتستند إلى حافته بيد ومتخصرة باليد الأخرى وذبذبات الشر تتقاف من حولها وتقول :

- أنتِ أيه اللى جابك يا أحلام

نظر الجميع إليها بينما استدارت أحلام نحو عفاف وقالت بابتسامة هادئة :

- يالا يا ام عبد الرحمن العريس مستنى تحت خدى البنات وانزلى

قالت عفاف باضطراب:

- انا هتصل بإيهاب يطلع ياخدهم

ساد الصمت للحظات وصعد إيهاب فى الحال وتناول كف مريم وقال لوالدته:

- يالا يا ماما

أومأت برأسها وقالت:

- انزلوا انتوا وأنا جاية وراكوا

زاغت نظرات الجميع بين أحلام وفاطمة فى صمت قطعتة أحلام :

- يالا اتحركوا الناس تحت

بدأوا فى الهبوط للأسفل وتأخرت عفاف عنهم فقالت لها أحلام :

- انزلى انتِ يا عفاف

حركت رأسها نفياً وقالت بإصرار :

- مينفعش .. والمفروض ننزل كلنا .. مش وقته الكلام ده احنا فى فرح ولادنا

أوقفتها فاطمة وهى تصيح بها :

- بقيتى حبيبته يا عفاف .. اه ما انتوا بقيتوا نسايب

أقربت منها أحلام بعينين حادتين قائلة:

- أنتِ عاوزه أياه يا فاطمة

قالت فاطمة بنظرات تشع حقداً:

- تطلعى حالا من البيت ده ومتوريناش وشك تانى

ضحكت أحلام بطريقة استفزازية وقالت:

- تانى يا فاطمة .. تانى عاوزانى امشى .. مكفكيش أول مرة مشيت فيها من عشرين سنة

قالت فاطمة بحدة وبغض:

- وياريت المرة دى مترجعيش تانى لحد ما حد فينا يموت ماهى الدنيا متستحملناش سوا

أحتفظت أحلام بابتسامتها وقالت:

- لسه بتغيرى منى يا فاطمة ؟ معقول .. مع انى كبرت اهو زى ما انتِ شايفة ..واللى

بتغيرى عليه كبر هو كمان وقرب هيبقى جد.

واقتربت أكثر وهى تحقق بعينها قائلة :

- ولا انتِ لسه بتكرهينى علشان علي الله يرحمه فضلنى عليكى

كادت فاطمة أن تصفحها على وجهها ولكن أحلام أحكمت قبضتها على يدها ونظرت لها

بتحدى اكبر ، تدخلت عفاف هاتفة بحق:

- لا انا كده هتصل بالحاج حسين يجى مينفعش كده يا جماعة .. يالا يا أحلام انزلى لولادك

فى هذه اللحظة كان يوسف ينظر إلى مريم بإعجاب شديد وهو يراها بفستان زفافها الأبيض

وحجابها الذى زادها إشراقاً، تناول يدها من إيهاب وهى تتحاشى النظر إليه وسار بها إلى

المكان المخصص لهما بالجلوس بينما أمسك عبد الرحمن يدي زوجته وطبع قبيلتين على كل واحدة منهما وعينيه لم تفارق عيناها الخجلتين وكذلك كان حال إيهاب وفرحة

سار الأربعة خلف العروسين كل منهما يتأبط ذراع عروسه فى سعادة

أما فى الطابق العلوى فلا تزال المعركة مستمرة وكانت فاطمة تصفق بغضب وتقول:

- مبروك يا أحلام برافو عليكى.. حققتى كل اللى كنتِ بتمنيه وخدتى حسين وولاده ومراته فى حضنك

زفرت عفاف بضيق هاتفة:

- انتيهنا بقى يا فاطمة ...

ثم نظرت إلى الهاتف وتقول:

- يارب يسمع الجرس فى الدوشة دى

وقفت أحلام أمام فاطمة وقالت بصرامة:

- أنا بحذرك يا فاطمة لو اتعرضتى لحد من ولادى انا ممكن ادمرك

ضحكت فاطمة بجنون قائلة:

- هتعملى أيه يعنى .. انتِ اللى المفروض تخافى على نفسك يا أحلام .. سمعتك مش متسحمة

بادلتها أحلام الضحكات وقالت بهدوء:

- هعمل كتير يا فاطمة.. يعنى مثلا هقول لكل الناس وأولهم ولادك وجوزك انك كنتِ بتحبنى على الله يرحمه وبتجرى وراه بالمشوار وهو كان مطنشك وكنتِ بتسوقى عليه ناس كتير وهو ولا هو هنا لأنه كان بيحببنى ساعتها .. وفى الآخر يا مسكينة لما رضيتى بالأمر الواقع

ووقع فيك ابراهيم الراجل الغلبان وهو ميعرفش انك كنتِ بتحبنى اخوه الصغير ..اكتشفتِ برضة انه بببصلنى من تحت لتحت .. نارك قادت منى وخصوصا لما علي مات خفتى لجوزك يعملها ويتجوزنى بحجة انه يربى ولاد اخوه..علشان كده اتجننتى وعملتى عليا فيلم انهم هيقتلوا ولادى ويقتلوني وادتينى فلوس ، وأشارت إلى عفاف قائلة :



- وضحكى على الغلبانة دى وخوفتيها ان جوزها هيروح فى داهية وجبتيها معاكى علشان اصدق .. لأنك عارفة انى بصدق عفاف، صرخت بها فاطمة :

- أخرسى يا أحلام.. أنا عمرى ما جريت ورا حد.. أنا مش زيك .. أنت اللى كنت بتجرى ورا ابراهيم ولما لقيتيه شخصيته ضعيفة ومش هيقدر يقف قدام ابوه سبتيه وادورتى على علي الله يرحمه

ضحكت أحلام قائلة وقد أعجبها اشتعال النار بقلب فاطمة وقالت:

- وهو ده اللى غيظك مني.. أن الاتنين كانوا بيحبونى

كادت فاطمة أن تهتم بصفعها ولكن عفاف صرخت :

- كفاية.. كفاية.. حرام عليكموا .. ده الزمن بينسى الموت ورغم كده معرفش ينسيكوا كرهكوا لبعض

وفجأة دخل إبراهيم وحسين واقترب حسين من عفاف وامسك يدها بقلق قائلاً:

- مالك يا عفاف بتصرخى ليه ايه اللى حصل

نظر إبراهيم لزوجته قائلاً:

- انتوا ايه اللى مقعدكوا هنا سايبين الناس والمعازيم وقاعدين هنا ليه

قالت فاطمة بغل واضح:

- أبداً كنا بنصفى حساب قديم

أشار حسين إلى أحلام وقال بحسم:

- لو سمحتى يا ام ايهاب انزلى دلوقتى اقعدى جنب بنتك متسيبهاش فى لحظة زى دى

\*\*\*

أما فى الأسفل فكانت عينيى هند تراقب عبد الرحمن وتتبعه كظله، وكان وليد يهمس لعلا أن تصعد معه الآن ليريها شقتيها ولم يكن يلحظ العين التى تراقبه بابتسامة غاضبة كريهة، بينما لم تكن تعلم إيمان وفرحة المفاجأة التى أعدها لهما عبد الرحمن وإيهاب

## الفصل الثامن والعشرون

- أسمعى بس .. أنتِ هتطلعى تشوفيها وننزل على طول  
أبتسمت علا وهى تضغط على يد هند الجالسة بجوارها وقالت:  
- أوك مفيش مشكلة علشان تتأكد بس انى ببقى فيك  
أنتبهت هند لضغطة علا وكما اتفقت معها سابقاً بأن هذه الضغطة معناها أن تتدخل فوراً  
أفلتت علا يد هند وهى تنهض واقفة مع وليد فنهضت هند هى الأخرى ووقفت أمامهما  
قائلة:  
- آيه يا علا رايحة فين .  
قالت علا بتلقائية مدروسة:  
- طالعين نبص على الشقة بتاعتنا علشان نشوف هتتشطب ازاي  
أدت هند دور الشغوفة بإمتياز وهى تقول:  
- آيه د بجد طب انا جاية معاكوا  
تدخل وليد وهو يلف كتف علا بذراعه قائلاً:  
- خليكى مع ماما يا هند لحس تضايق .. أحنا مش هنتأخر  
أدت دورها جيداً مرة أخرى وهى تقول:  
- اه صحيح طب ما نجيب ماما تشوفها معانا .. دى برضة ام العروسة  
عادت هند خطوتين للخلف لتخبر والدتها فى حين قال وليد بضيق:  
- آيه بقى الخنقة دى  
نظرت له علا وتظاهرت بعدم الفهم وهى تقول:

- مالك يا حبيبى فى حاجة؟

عادت هند ومعها والدتهما وقد أبدت موافقتها للصعود معهم لرؤية منزل الزوجية  
أبتسم لها ولید ابتسامة حائقة وهو يقول:

- اه طبعاً يا طنط اتفضلى

أستبقهم للداخل وهو يزفر بقوة فى غضب بينما هند وعلا يتبادلان نظرات مكر وانتصار

لم يملكوا كثيراً فى الداخل بمجرد أن فتح لهم باب الشقة المخصصة لزوجاة ودخلوا  
وطالعوها فى دقائق وخرجوا سريعاً، وما إن خرجوا إلى الحديقة حيث حفل الزفاف حتى  
وقعت عيناه على سلمى التى تنتظرهم عند المدخل وعينيها يتطاير منها الشرر ، لم تنتظر  
كثيراً بل أسرعت إليه وصاحت فى حدة:

- بقى دى آخرتها يا ولید.. بقى أعمل علشانك كل ده وفى الآخر تروح تخطب واحدة تانية..  
أما وريتك ..أما فضحتك.. أنا هاروح اقول ليوסף كل خططك

أمسك ذراعها بقوة وهو ينظر إليها بغضب ويضغط أسنانه بقوة وقال:

-عارفة لو ماتخرسيتش هاعمل فيكى أیه

تقدمت علا منهما بينما وقفت هند ووالدتها يشاهدان ما يحدث فى دهشة ، أقتربت علا قائلة:

- فى حاجة يا آنسه؟

هتفت سلمى بغضب :

- وانت مالك انت بتدخلى ليه بين واحدة وجوزها

نظرت له علا بدهشة وقالت:

- نعم..جوزها

ألقت إلى سلمى بغضب وحنق:

- أنت بتخرفى ولا أیه.. أنا اتجوزتك امتى ان شاء الله ..فى الحلم

قاطعته وهى تصيح بوجهه وتشير إلى الشقة المشنومة بجوار المصعد:

- لا يا خويا فى الشقة دى

جذبها من يدها وحثها على الخطى السريع خلفه مرغمة حتى وصل بها إلى جراج السيارات والتفت إليها وصفعها بقوة حتى ارتدت إلى إحدى السيارات وسال الدم من بين شفاها فصرخت فى غضب:

- ماشى يا وليد والله لاروح أحكى ليوسف واقلوله أنك كنت بتفتري على مريم وانك مطلعتش شقتها ولا حاجة وانك كنت مستنيه وكنت عارف انه هيجى وراك وهقوله انك قصدت تديله حبوب علشان يتخدر وميحسش هو بيعمل ايه وانك اتفقت معايا انى اخد مريم شقة مفروشة وافهمها ان ده بيتى وكنت عارف انه هيراقبها وكان كل هدفك انك تفضحه والرووس تتساوى وميقدرش يفتح بقه معاك تانى

أحكم قبضته على ذراعها حتى ألتها وصرخ فيها:

- اسمعى يابت انت... مش انا اللي تهددينى

لو عاوزه تروحي تحكى روى .. ميهمنيش .. أنا كده ولا كده شريك فى البيت وشريك فى الشركة يعنى اللي هتقوليه مش هياثر عليا لا حد هيرفدنى ولا حد هيقدر يطردنى... ديتهابويا يزعل منى يومين وخلاص .. وانت مش هتطلعى بحاجة من ورا كده إلا انى عمري ما هبص فى وشك تانى ومش هتشوفى منى اللي كنت بتشوفيه.. لكن لو طلعتى عاقلة وحلوة كده ... هنفضل مع بعض .. فلوس وفسح وكل اللي انت عرفتيني علشاناه ..ها قولتى ايه؟

بكت وهى تحاول أن تخلص ذراعها من يده وهى تقول:

- سيبنى بقى أيدي حرام عليك

تركها وهو يدفعها للخلف مجدداً ويشير إلى رأسه قائلاً:

- عقلك فى راسك تعرفى خلاصك دورى على مصلحتك احسنالك

أشدت بكاؤها وهى تقول:

- كده برضة يا وليد تعمل فيا كده .. يعنى اللي خطبتها وهتجوزها دى فيها أيه احسن منى

أقترب منها ومسح على شعرها وكأنه لم يفعل شىء وقال:

- يا عبيطة ده انتِ اللى فى القلب ..وبعدين جواز أيه هو انا بتاع جواز  
نظرت له بدهشة وقالت:

- يعنى ايه.. او مال خطبت ليه

أقرب منها ولف ذراعيه حول خصرها قائلاً:

- هما وحياتك يومين وهخلع منها وهرجلك صاغ سليم

قالت وهى تبتعد عنه:

- انت بتضحك عليا بكلمتين.. فاكرنى هبله فى حد بيخطب يومين ويخلع

قال وليد ضاحكاً:

- أنا

قالت بدهشة وقد تغيرت ملامحه تماماً:

- أنت بتضحك عليا

قال بنفاد صبر:

- من الآخر كده.. البت دى منشقة دماغها وانا حببت أليها بالدبله اللى لبستها لها .. فهمتى  
بقي

- يعنى انت بقي عينك فارغة

أوما برأسه مؤكداً بعث قائلاً:

- بالظبط كده أديكى عرفتى... يالا بقي خديها عن قصيره وامشى دلوقتى

قالت باستفزاز:

- انا لسه مباركتش لمريم

هتف بحنق:

- قال يعنى بتحبيها أوى ... يالا اطلعى من باب الجراج وهنتقابل بكرة وهقضى معاكى يا  
ستى طول اليوم

خطت هند وعلا خطوات سريعة بخفة ليعودا أدراجهما إلى مكانهما قبل أن يعود وليد، جلستا وهما يلتقطان أنفاسهما بصعوبة وقالت هند:

- سمعتي يا علا

أومأت برأسها ووضعت أصبعها على فمها وهي تقول لهند:

- ولا كأنك سمعتي حاجة

قالت هند باستنكار :

- يعنى ايه يا علا .. هي دي كمان فيها مصالح

قالت علا مؤكدة:

- بالظبط كده زى ما اتفقتنا قبل كده أى معلومة تعرفيها تحوشيها لحد ما يجى وقتها

ونظرت بعيداً فى شرود وهي تقول:

- أما بقى بخصوص هدفه من خطوبتنا ... انا هخاليه يندم ويقع فى شر أعماله

أستقلت سلمى سيارتها الصغيرة وقادتها فى شرود والأفكار تتزاحم فى عقلها:

- صح .. أنا هستفاد أياه لما افضح كل حاجة ... كل اللي هيحصل انى هخسره للأبد ومريم

سمعتها هتتصلح عند يوسف

وأبتسمت فى سخرية وهي تقول:

- متضحكيش على نفسك يا سلمى انت كده ولا كده كنت متأكدة انه مش هيتجوزك ومكنش

هامك حاجة متعمليش فيها مصدومة طالما بيصرف عليكى يبقى خلاص خالى الفائدة تكمل  
للاخر

عاد وليد إليها قائلاً بلهفة مصطنعة:

- متزعليش يا حبيبتي دي واحدة مجنونة كانت بتشتغل معايا زمان ومشيتها .. وانا طررتها

خلاص

أبتسمت برقة وقالت:

- تصدق فعلا شكلها مش طبيعي خالص .. وبعدين دخلت هنا ازاي دي

رفع كتفيه وقال:

- انا عارف .. اهو كل فرح ولا مناسبة فى بيتنا لازم تحصل فيه بلوى شكل.. أسترها علينا يارب

\*\*\*\*

وقفت فاطمة بجوار زوجها تراقب نظراته جيداً فالتفت إليها وقال بحدة:

- أنتِ وبعدين معاكى هتفضلى تراقبينى كده لحد امتى

قالت فاطمة بحنق:

- لحد ما زفته دى تمشى من هنا وتغور

قال متأففاً:

- لاحول ولا قوة إلا بالله .. يافاطمة عيب كده احنا مش صغيرين على العمائل دى.. روحى طيب سلمى على خطيب بنتك ووالدته

تأبطت ذراعه رغماً عنه وقالت:

- اه وماله يالا نروح سوا

شعر حسين ببعض الهدوء عندما وجد ملامح السعادة عادت مرة أخرى إلى وجهه عفاف بعد أن كانت يغلب عليها الحزن مما سمعت من أحلام وفاطمة وهى تجلس بجوار يوسف بسرور وتربت على يده وتبتسم له بحب هو ومريم، أما احلام فكانت تجلس بين مريم وإيمان... حتى جاء عبد الرحمن وبسط كفه أمامها قائلاً :

- تعالى يا إيمان لحظة لو سمحتى

وضعت يدها فى يده فتناولها وسار بها خطوات ووقف أمامها قائلاً بحب:

- أيه رأيك فى شهر غسل جديد بدل اللى راح مننا

نظرت له بدهشة يغلفها الخجل وقالت:

- ازاي يعنى

أشار لإيهاب الذى كان يقف بعيدا عنهما بخطوات يتكلم مع فرحة وهى تبدو فى كامل سعادتها ، أقبل إيهاب وفرحة التى تعلقت بذراع عبد الرحمن بابتسامة واسعة وهى تقول:

- متشكرة يا عبد الرحمن حقيقى مفاجأة تجنن

نظر لها إيهاب باستنكار:

- ياسلام.. على أساس ان انا ماليش دور فى المفاجأة يعنى

قالت إيمان بابتسامة حائرة :

- مفاجأة ايه؟

لف إيهاب ذراعه حول كتفها وقال بمرح:

- هنروح مع يوسف ومريم نقضى شهر العسل معاهم

دفع عبد الرحمن ذراع إيهاب ولف ذراعه هو على كتفها قائلاً:

- لو سمحت متحطش أيدك على مراتى تانى

والتفت إليها قائلاً :

- ها أيه رأيك فى المفاجأة دى

أرتبكت إيمان واقتربت فرحة منها قائلة :

- هى دى عاوزة رأى.. طبعاً موافقة

قالت إيمان بتردد:

- بس احنا مجهزناش هدمنا ومش معقول نطلع نجهزها دلوقتى

قالت فرحة بحماس :

- لا يا ستى مش هنوضب حاجة .. دول كانوا متفقين مع ماما على كل حاجة وهى قامت بالواجب وزيادة

أكد عبد الرحمن على كلام فرحة وقال:

- الحقيقة دى كانت فكرة بابا .. هو اللى اقترح وخطط واحنا نفذنا



داعبته إيمان وقالت وهى تضع يدها على خصرها:

- ده انتوا عصابة بقى

أومات فرحة وقالت :

- بالظبط كده.. عصابة بودى وهوبة

أقربت هند منهم وهى تتهادى بدلال ووقفت أمام عبد الرحمن وهى تنظر إليه بشوق وتمد يدها لتصافحه وتقول:

- أزيك يا عبد الرحمن ليك وحشه والله

ارتبك عبد الرحمن بسبب نظرات إيمان الحارقة لهما وقال :

- الحمد لله تمام

قالت وهى مازالت باسطة كفها ليصافحها:

- مش هتسلم عليا ولا ايه ...

شعرت إيمان أن عبد الرحمن سيصافحها لشعوره بالحرص من يدها الممدودة فأسرعت واخذت يدها وصافحتها وهى وقالت بابتسامة باردة:

- معلىش بقى .. أصله مش بيسلم على ستات

أبتسمت لها هند ابتسامة صفراء وهى تقول:

- ليه ده حتى عبد الرحمن مثقف ومتعلم

بادلتها إيمان نفس الابتسامة وقالت:

- شرع ربنا مالوش علاقة بالثقافة أو الجهل

وتابعت :

- المثقف الحقيقى هو اللى يبقى عارف امور دينه وبيقوم بيها أما الجاهل هو اللى مهما اتعلم وخذ شهادات يفضل برضة مش عارف دينه بيأمره بأيه وبينهاه عن أيه

أختفت الابتسامة وقالت فى حلق :

- فرصة سعيدة يا مدام

وغادرت فى سرعة بخطوات حائقة ، فقالت فرحة موجهة حديثها لإيمان:

- البت يا عيني غرقت فى شبر ميه حرام عليكى يا إيمان

نظرت إيمان إلى عبد الرحمن الذى كان ينظر إلى الأسفل وكأنه يتأمل حشائش الأرض التى يقف عليها وقالت له:

- بتبص على الأرض كده ليه

قال وكأنه يفكر بعمق:

- لا ابدأ بفكر انا صليت العشاء ولا لاء ...

نظر إيهاب إليه بدهشة ثم انفجرا فى الضحك ، لم تستطيع فرحة كتم ضحكاتهما وهى تحتضن إيمان وتقول :

- أخويا شجاع أوى قدامك على فكرة

لم تتمالك إيمان نفسها وضحكت رغماً عنها.

\*\*\*

مالت أحلام على أذن مريم قائلة:

- مالك يا مريم مكشرة كده ليه؟

انتبهت مريم لحديث والدتها وقالت بخفوت:

- أبدا ياماما.. تلاقينى سرحت ولا حاجة

قالت أحلام بتنبيه:

- لا أبترسمى الناس بتبص عليكى وبعدين جوزك بيبص عليكى هو كمان

ألقت مريم بحركة تلقائية ليوسف الذى يجلس بجوارها فأشاح بوجهه عنها والتفت إلى والدته التى تجلس بجواره فقالت له:

- ايه يا حبيبى عاوز حاجة؟

يوسف :

- مش كفاية كده مش نمشى بقى لسه ورانا سفر

أومات برأسها وهى تبتسم له موافقة وقالت :

- طيب استنى اروح اقول لابوك

ذهبت عفاف إلى زوجها وأبلغته بالأمر فذهب إلى عبد الرحمن وإيهاب وقال:

- يالا بقى علشان تلحقوا وقتكوا لسه الطريق طويل

تحرك الجميع وسط تبريكات الأهل و المدعوين وتقديم التهاني وعانقتهم أحلام عناق طويل وودعتهم فهي أيضا ستسافر وتعود من حيث جاءت.

بعد ساعات مرهقة دخل أخيراً كل زوجين إلى جناحهما الخاص ، أسرعت إيمان إلى شرفة جناحها الكبيرة لتتظر إلى المنظر البديع، فلحقها عبد الرحمن ولف ذراعه حولها قائلاً:

- هنا بقى تقدرى تستمتعى بجد .. البلد هنا مش زحمة خالص والشواطىء تقريبا فاضية

تنهدت فى أرهاق قائلة:

- طبعاً دى بعيدة جداً لازم تبقى رايقة

قال بابتسامة عذبة:

- أنا جبتيك هنا مخصوص علشان تعرفى تستمتعى براحتك.. علشان المرة اللى فاتت مكنتيش عاوزة حتى تنزلى تبلى رجلك فى المية وكنت خايفة الهدوم تلزق عليكى.. هنا الحياة بسيطة أوى وعلى طبيعتها والشط بين الجبال ووراه نخيل كثير .

نظرت إليه وقالت فى اهتمام :

- مصر فيها أماكن حلوة جداً المصريين أنفسهم عمرهم ما شافوها طب احنا ليه دايماً مركزين على السياح اللى جاينين من بره ومهملين فى السياحة الداخلية جداً... تقريبا معظم المصريين ميعرفوش ان بلدهم فى أماكن ساحرة كده

قال بتركيز:

- فكرة برضة.. سيبينى افكر فى الحكاية دى بس لما نشوف الأول السياحة الزوجية

لم تفهم معنى كلماته فقالت بتسائل:

- يعنى أيه السياحة الزوجية

تصنع عبد الرحمن أنه يهم بشرح معنى كلماته وقال بجدية:

- تعالى وانا اشرحك بالتفصيل

ثم توقف فجأة قائلا:

- ولا اقولك غيرى هدومك وانا هدخل اخد دش .. ولما اطلع اشرحك كل حاجة بالتفصيل  
الممل

\*\*\*

كانت مريم جالسة على طرف فراشها تنظر حولها وتدور عينيها فى الجناح الخاص بهما  
حتى دخل يوسف وأغلق بابه ووقف ينظر إليها ويتأملها حتى شعرت بالإضطراب أكثر،  
وراودها شعورها بالخوف تجاهه مرة أخرى فأغلقت عينيها وهى تحاول أن تهدئ من  
روعها فقال:

- طبعا تعبانة من السفر ومحتاجة تنامى

اشار إلى الحمام الملحق بالغرفة الداخلية قائلا:

- ادخلى غيرى لو تحبى وانا هدخل البلكونة لحد ما تخلصى علشان نصلى ركعتين مع بعض

نهضت فى سرعة واقفة مكانها وقالت بسخرية:

- نصلى ركعتين ليه.. ده لما يبقى جواز حقيقى مش زينا كده

شعر بالتوتر وصمت قليلا ثم قال:

- خلاص زى ما تحبى

تركها وخرج إلى الشرفة يستنشق الهواء العليل ويحاول أن يركز تفكيره فى طريقة التعامل  
التي ستكون بينهما فى الأيام القادمة ، اخذت مريم ملابسها ودخلت الحمام ، أغتسلت فى  
سرعة وبدلت ملابسها وخرجت من الحمام إلى الفراش مباشرة وتدثرت جيدا ، عندما شعر

بها قد انتهت دخل هو الآخر وأخذ ملابسه من حقيبته الشخصية ودخل إلى الحمام أغتسل وخرج سريعاً ، مر أمام فراشها فوجدها متدثرة جيداً وتلف الغطاء حولها بعناية وتنظر إليه وتتابع تحركاته بقلق وخوف ، ألمه كثيراً ذلك الشعور وتلك النظرة الخائفة من عينيها فوقف أمام باب الغرفة الداخلية قائلاً:

- الأوضة دى ليها مفتاح لو حابة تقفلى على نفسك وانا هنام على الكنبه بره قدام التلفزيون لو احتاجتى حاجة نادى عليا.

لم يتلقى منها أى أجابه فخرج واغلق الباب خلفه وبعد ثوان شعر بها توصلد الباب بالمفتاح جيداً من الداخل ، لم تتمالك نفسها كثيراً فلقد كان الأرهاق أكبر من أى مقاومة فاستسلمت للنوم سريعاً ، وكذلك هو استسلم للنوم على الأريكة فى الخارج

\*\*\*

خرج عبد الرحمن من الحمام وهو يندن بسعادة رغم الأرهاق الواضح على عينيه ولكن سعادته لم تكتمل، فلقد وقع بصره على إيمان التى استسلمت للنوم سريعاً هى الأخرى ، حاول إيقاظها ولكنها لم تستجيب ، حاول مجدداً وهو يكاد أن يبكى:

- إيمان أصحى بقى عاوز اشرحلك السياحة الزوجية  
تمتت وهى تغط فى النوم :

- بعدين ابقى اشرحلى السياحة النيلية

أعتدل وهو يمسح رأسه بحنق وهو يردد:

- نيلية ... النيلية دى على دماغى انا دلوقتى ياختى

وأخذ الوساده وقذفها بها وهو يقول:

- نامى ياختى نامى ..

تحسست الفراش بجوارها حتى وصلت لتلك الوسادة ، أخذتها ووضعتها على رأسها ثم فتحت عينيها ببطء وابتسمت ثم عادت للنوم مرة أخرى

\*\*\*

أستيقظت فرحة فى الصباح ونظرت إلى ملابسها قائلة:

- ياه ده انا نمت بهدومى من كتر التعب

نظرت بجوارها فوجدت حال إيهاب ليس افضل من حالها ، هو أيضا نام بملابسه

حاولت ان توقظه مراراً حتى استيقظ وقال وهو مازال مغمض العينين:

- ده مش سفر دى علقة سخنة .. اخوكى ده مجنون ملقاش غير آخر بلاد المسلمين

أبتسمت فرحة بإرهاق قائلة:

- بس المكان هنا هادى أوى ومش زحمة زى باقى المصايف .. وبعدين أول مرة آجى نوبيع .. المنظر تحفة

قام بصعوبة قائلاً:

- طب انا هدخل اخد دش و اخرج اطلب الفطار ..

ثم نظر إليها وهى مازالت بفستان العقد فقال ضاحكاً:

- فى عروسة تنام بفستان الفرحة.. لو حد شافك دلوقتى يقول عليا ايه ... فسيخة!

ضحكت فرحة وهو يأخذ ملابسه ويتجه للحمام ثم تناولت الهاتف وأجرت اتصال بإيمان التى أجابتها بعد مدة قصيرة وقالت بصوت ناعس:

- السلام عليكم

- وعليكم السلام .. انتِ لسه نايمة

- اه يابنتى المشوار كان صعب أوى حتى اخوكى لسه نايم فوجأت به يأخذ الهاتف من يدها وأستند برأسه على ذراعها وهو يتحدث إلى فرحة :

- عاوزه ايه يا رخامة بتتصلى ليه على الصبح كده

- ايه ده مالك طلعت فيا كده ليه.. طب الحق عليا انى بظمن عليكوا

حاولت إيمان أن تسحب يدها من تحت رأسه وهو يتحدث ولكنه لم يسمح لها بذلك وهو يقول لفرحة:

- لا متشكرين مطمئنين تانى ومش عاوز اسمع صوتك انت ولا جوزك النهاردة يلا سلام  
أنهى الاتصال ثم أغلق الهاتف تماما وهى مازالت تحاول عبثاً أن تنهض من جواره ولكنه  
لف ذراعيه حولها وقال بابتسامة مشرقة:

- متحاوليش دخول الحمام مش زى خروجه.. انت وقعتى يا قطة  
حاول أن يقبلها ولكنها وضعت يدها على شفاه وقالت بسرعة:

- أنا جعانة وعاوزة افطر حالياً.. وكمان عاوزة ادخل الحمام  
جلس بجوارها قائلاً بضجر :

- اه هنبداً بقى فى شغل العيال ..عاوزه ادخل الحمام عاوزة اكل عاوزة انام .. ناقص تقوليلى  
عاوزه اروح لماما

نهضت مسرعة واتجهت إلى الحمام بخطوات واسعة وهى تقول :

- طب والله جعانة أوى لو سمحت اطلب الفطار على ما اطلع

تناول الهاتف وطلب الرقم الداخلى للفندق وهو يقول :

- لما نشوف هتتججى بأيه تانى

جلست إيمان وعبد الرحمن يتناولان طعام الإفطار فى الشرفة، تناولت إيمان أول رشفة من  
كوب الشاي وهو تقول باستمتاع:

- الله كان نفسى فيها أوى الكوبايه دى من امبارح

أمسك كفها وخلل أصابعها بين أصابعه وقبض عليها برقة ونظر إليها بحب قائلاً:

- طب وبالنسبة للى قاعد جمبك ده .. طب يارب ابقى كوباية شاي علشان تحبينى أوى كده

ضحكت إيمان على طريقته وقالت برقة :

- ربنا يخاليك ليا

ألقي نظرة على كوب الشاي فى يدها قائلاً:

- هى الكوباية دى مبتخلصش ولا أيه

أخذت عدة رشقات وقالت متسائلة:

- بتسأل ليه؟

أخذها منها ووضعها على الطاولة الصغيرة أمامهما وهو ينهض قائلاً:

- انا بقول كفاية كده الشاى مضر بالصحة

نهضت معترضة وقالت:

- لا لسه مخلصتش

جذبها للداخل وهو يقول:

- ده انا اللي خلصت خلاص ارحمى شوية

\*\*\*

فتحت مريم باب غرفتها ببطء بعد أن ارتدت ملابسها ونظرت إلى الأريكة تبحث عن يوسف ولكنها لم تجده ، تقدمت خطوتين ونظرت داخل الشرفة فوجدته متكأ إلى السور وغارق بعمق فى تأمل المنظر البديع على مد بصره ، أتجهت نحو باب الغرفة الخارجى وفتحته وهمت بالخروج ولكنها سمعت صوته آتى من خلفها قائلاً:

- رايحة فين

أستدارت ببطء وهى تتجنب النظر إليه وقالت:

- خارجة اتمشى على البحر شوية

تحرك من مكانه واتجه إليها ووقف بمسافة ليست بعيدة منها وقال بهدوء:

- مينفعش تخرجى دلوقتى

قالت بحنق:

- ليه ان شاء الله

حافظ على هدوءه قائلاً:



- أولا الفطار جاى حالا .. ثانيا المفروض اننا عرسان جداد .. على الأقل قدام اخواتك واخواتى ومينفعش حد فيهم يشوفك طالعة دلوقتى وكمان لوحدهك

أبتعدت عن الباب بضيق وجلست إلى الأريكة بعصبية قائلة:

- يعنى هتحبس معاك هنا ولا أياه

طرق الباب ، كانت خدمة الغرف ، أخذ يوسف طعام الإفطار ووضعها أمامها على الطاولة وقال:

- طب افطرى الأول وبعدين نتكلم

قالت بضجر:

- مش عاوزه أكل معاك

أوما برأسه وقال:

- زى ما تحبى

ثم أخذ أحد الأطباق الفارغة ووضع لنفسه بعض الطعام فيه ودخل الشرفة، جلس فيها وتناول طعامه ، أنهت مريم من طعامها ودخلت غرفتها وأوصدت الباب مرة أخرى بدلت ملابسها وجلست على فراشها تفكر:

- كيف من الممكن ان يجتمع المجرم والضحية فى مكان واحد ، كيف يمكن ان تتعايش المغتصبة مع من اغتصبها تحت سقف واحد!

وفى أمواج الأفكار التى تعصف بعقلها سمعت طرقات خفيفة على الباب فقالت بضيق:

- افندم

- من فضلك عاوز اتكلم معاكى شوية

- مش عاوزه اتكلم معاك سيبنى فى حالى

أتاها صوته باصرار أكبر وهو يقول:

- من فضلك افتحى الباب لازم نتكلم

نهضت على مضض تنفست بعمق وفتحت الباب وقالت بتأفف:

- افندم ..خير

قال بهدوء:

- تحبى نقعد فين.. هنا ولا بره؟

نظرت خلفها ثم عادت برأسها إليه وقالت:

- هتقعد فين هنا.. بره طبعاً

تنحى عن طريقها وتابعها بعينيه حتى جلست على الأريكة فجذب أحد المقاعد ووضعها امامها وبطريقة تلقائية مال للأمام فابتعدت حتى الصقت ظهرها بمسند الأريكة فى قلق وهى تقول:

- لو سمحت ابعد انت عاوز ايه بالضبط

وأشارت محذرة:

- انا بحذرك لو قربت مني

قاطعها :

- متكلميش انا الى مش هقرب من غير ما انت تقولى

عقدت ذراعيها أمام صدرها وحاولت أن تتظاهر بالشجاعة وقالت:

- عاوز تقول ايه خلصنى

تكلم بهدوء وهو ينظر إليها بعمق :

- معلش انا مش قصدى اضايك .. لكن فى حاجة مهمة عاوزك تعرفيها.. صحيح هى مش

هتغير من وضعنا شىء لكن برضة لازم تعرفيها

أشاحت بوجهها فى صمت ولم ترد فتابع حديثه:

- لما كنت فى شقتك فوق وسألتك على الشقة اللى طلعتيها مع سلمى قولتيلي انها شقتهم

بيتهم يعنى... أنا روحت تانى واتاكدت أن دى مش شقة عادية دى شقة مفروشة وكمات

سمعتها مش ولا بد.. والبواب أكدلى كده زى ما أكدلى يوم ...

صمت لعله يجد تعبير مناسب فقال:

- يوم الفرح

زفرت بقوة وقالت:

- تانى ..عاوز تشوه سمعتى تانى ..أنت أيه يا أخى انت ....

قاطعها بحسم قائلا:

- أنا مش عاوز غير انك تسمعيني للآخر.. أشوه سمعتك ازاي وانت بقيتى مراتى

- او مال بتقول كده ليه

قال وهو ينظر إليها بألم :

- لو سمعتيني للآخر هتفهمنى.. لكن انت مش عاوزة تسمعنى منى حاجة

صمتت مرة أخرى ثم قالت:

- اتفضل قول اللى عندك

أردف قائلا:

- انا راقبت البت اللى اسمها سلمى دى وعرفت عنوانها .. والبيت اللى عايشة فيه مع امها

مش هو اللى خدتك فيه يوم الفرح

نظرت له بحدة وقالت :

- وأيه المطلوب منى

قالت بتأن:

- تحكىلى اللى حصل بالظبط من ساعة ما ركبتى معاها لحد ما وصلتك البيت

نهضت من أمامه وحاولت أن تتخطاه وهى تقول بغضب:

- انت عاوز تدور على أى مبرر للى عملته

قال ببعض الإنفعال:

- انا قتلتك من الأول ان مفيش شىء هيتغير .. لكن لو سمحتى جاوبينى انا مش عاوز الآقى مبرر لنفسى.. أنا عارف انى مجرم وانى استحق الأعدام مش أنى اتكافىء واتجوزك.. جاوبينى.. أنا حاسس ان الحكاية دى وراها سر .. مش هيحصل حاجة لما تحكى اللى حصل ردت إنفعاله بانفعال مماثل وهى تقول:

- حاضر هحكىك اللى حصل علشان متفتحش الموضوع ده تانى وتابعت وكأنها تتذكر:

- لما ركبت معاها قالتلى هنروح نتمشى بالعربية شوية.. قتلها لا هنروح نوصلهم للمطار قالتلى هتدبى المشوار ده كله ليه واقعتنى ..المهم.. بمجرد ما ركبت وقبل ما تطلع بالعربية لقيت ولاد خالتها ركبوا معانا وقبل ما اعترض كانت هى طلعت ولما عاتبته قالتلى انها هتوصلهم البيت علشان مامتها طلبت من خالتها تبعثها أمانه معاهم وبعدين نروح انا وهى نتمشى بالعربية زى ما كنا متفقين.. روحنا البيت واتصلت بمامتها مردتش مرة والثانية مردتش ... ولاد خالتها قالولها هنطلع نشوفها .. طلعا واحنا استنينا فى العربية وبعد شوية نزلوا .. قالولها ان مامتها عاوزاها ضرورى وتقريبا كده كانت تعبانة

أتحايلت عليا اطلع معاها خمس دقائق تشوف مامتها وتنزل توصلنى تانى... طلعا ودخلت هى لمامتها أوضتها هى وولاد خالتها وخرجت قعدت معايا وسابتهم جوه معاها وقالتلى ان مامتها مكنتش لاقية الدوا بتاعها وهى ادتهولها.. وطلبت منى استنى شوية لحد ماتطن على مامتها وتوصلنى البيت... بس هو ده اللى حصل.. ازاي بقى دى شقة مفروشة وبيتهم فى مكان تانى

كان يستمع بإنصات شديد ويتفحصها وهى تقص عليه ما حدث وعندما انتهت قال:

- ومشوفتيش مامتها طبعاً

حركت رأسها نفياً وقالت:

- لا مدخلتش عندها

أوما برأسه وقال:

- أنتِ عمرك ما روحتى بيتهم قبل كده؟

أجابته قائلة بنفاد صبر:

- لا روجت طبعا وقعدت مع مامتها بس هما كانوا ساكنين فى مكان تانى.. بس هما عزلوا قبل فرح إيمان بأسبوع تقريبا

قطب جبينه وقال بتركيز:

- أسبوع..

ثم نظر إليها وقال :

- لا يا مريم سلمى معزلتش ولا حاجة ولو حابة تتأكدى روحيلها لما نرجع هتلاقيها معزلتش

...

وتابع فى تفكير:

- طالما قالتلك قبلها بأسبوع انها عزلت يبقى الحكاية مترتبة .. بس ليه.. وأيه المقصود

قالت بعصبية :

- شفت بقى انت بتدور على مبرر ازاي ... مرة تقولى كنت واخذ مخدرات ومرة تقولى

سلمى ودتك شقة مفروشة.. أنت عاوز توصل لأيه ... ومخدرات أيه اللى بتقول عليها

وجبتها منين وانت عمرك ما شربت سجاير أصلا

ألتفت إليها وقد ترابطت الأفكار فى ذهنه وقال فى شرود :

- أنت كده جاوبتى على سؤالى

\*\*\*\*

## الفصل التاسع والعشرون

- هتعمل ايه يا مجنون ..!

أخذ عبد الرحمن عصي ملقاة عند الشاطئ قائلاً:

- أستنى وانتِ تعرفى

وبدأ فى حفر صورة لقلب كبير على الشط وكتب بداخله "بحبك يا إيمان"

أبتسمت إيمان وهى تنظر إلى ما يفعل وترقرقت عيناها بالدموع ، وعندما انتهى ألقى العصاة جانبا والتفت إليها وهو يقول بسعادة:

- أیه رأيك فى خطى

نظر إلى عينيها فوجد آثار الدموع تلمع بها وهى تبتسم فى شجن وتنظر إليه بحب، أخذ كفها فى كفه ووضع عليه قبلة طويلة ثم لفها بذراعها وضمها إليه فى حنان وقال معذرا:

- انا آسف.. أنا مكنتش مقدر النعمة اللى ربنا أنعم عليا بيها بس الحمد لله انى فوقت لنفسى قبل ما تضيعى منى يا حبيبتي

فاضت اللآلىء من عينيها وهى تتأمل عينيه بحب فمسح دموعها بأنامله وهو يقول:

يا للآلىء عينيها حديثها أنى عشقتها .. واجمعى عمرى ودمى واصنعى عقدا لها

أبتسمت وقالت بخفوت:

- أیه ده وكمان بقيت شاعر

همس لها:

- عمرى ما عرفت اقول شعر .. أنا لقيته طالع كده من قلبى معرفش ازاي

تشابكت أصابعهما فى بطء وعينيهما متعلقة ببعضها البعض ، وفجأة وضعت يد بقوة على كتف عبد الرحمن من الخلف وسمع صوت أجش يقول بعنف:

- بطاقتك يا روميو

أستدار عبد الرحمن وهو يستعد للعراك ولكن ضحكات إيمان جعلته يلتقط العصا من على الأرض قبل أن يكمل استدارته ويسرع خلف إيهاب الذى هرول ضاحكا وهو يقول بترجى:

- خلاص ياباشا مكنتش اعرف انك مباحث

دفعه عبد الرحمن إلى المياة وهو يقول:

- والله ما انا سايبك

وقفنا إيمان وفرحة تضحكان على مزاحهما وتراشقهما بمياة البحر حتى جلس عبد الرحمن على الشاطئء بجوار إيهاب وهو يتنفس بصعوبة قائلا:

- هاخذ نفسى واقوم اقطعك

أقبلت فرحة وإيمان عليهما فقال إيهاب لإيمان بأنفاس متلاحقة :

- ضربته لحد ما مت من الضرب

أومأت برأسها قائلة:

- اه طبعا ماهو واضح

بينما هتفت فرحة :

- أنا هموت من الجوع لسه متغدتش لحد دلوقتى

نهض عبد الرحمن وأخذ يد إيمان فى يده قائلا:

- لا اتغدوا انتوا احنا هنروح الفندق نتغدى هناك

هتفت فرحة مرة أخرى :

- ليه ما نتغدى مع بعض

حرك رأسه نفيا وقال بجدية :

- لا مش هينفع أصل كنت بشرح لإيمان موضوع كده عن السياحة ولازم اكمله

نظرت له إيمان بعتاب وحاولت أن تخفى تلون وجهها خجلا من إيهاب الذى لم ينتبه لها وقال:

- سياحة أيه؟

تابع عبد الرحمن بنفس الجدية وهو يشرح بكلتا يديه لإيهاب وفرحة اللذان يتابعان شرح عبد الرحمن باهتمام وهو يقول:

- فى سياحة داخلية .. وفى سياحة خارجية فى النص بقى فى سياحة زوجية

قالت فرحة وهى تحاول فهم ما يقول:

- يعنى ايه سياحة زوجية

أردف عبد الرحمن بتركيز:

- أفهمى .. ده مشروع جديد

والتفت إلى إيمان التى تقف خلفه وغمز لها قائلاً:

- مبقالوش يومين

ثم استدار إليهما مرة أخرى وهو يتابع:

- يعنى يدوب قصينا الشريط

كانت فرحة تحاول استيعاب ما يقول حين قال إيهاب:

- هو انتوا هتدخلوا نشاط السياحة فى الشركة بتاعتكوا

استدارت إيمان تجاه البحر وهى تحاول كتمان ضحكاتهما واستمر عبد الرحمن فى الشرح:

- هو الموضوع كبير لما نرجع مصر هبقى اشرحلك

أشار لهما وهو يضع يده على كتف إيمان:

- يالا بقى كفاية عليكوا كده سلام

بمجرد أن ابتعدوا قليلاً ضربته على كتفه وهى تقول :

- ماشى يا عبد الرحمن

قال وكأنه لم يفهم :

- ليه هو انا عملت حاجة .. ده انا كنت بشرح لهم بس

ثم ضمها إليه أكثر وهو يقول:

- بس ايه رأيك مش انا بشرح كويس

أتسعت عيناها وهى تنظر له وقد تلوّنت وجنتاها احمراراً فقال بسرعة:

- لالا متفهمنيش صح.. أنا قصدى انى كنت بشرحهم كويس يعنى



استبقته بخطوات واسعة فلحقها وأمسك يدها ، أفلتت يدها منه وأسرعت تجرى فأسرع خلفها يناديها :

- أستنى بس.. يا إيمان.. أستنى.. ده أنا يدوب شرحت المميزات.. لسه هناخد الأهداف.. هدف.. هدف

\*\*\*

كانت مريم تقف فى الشرفة تتابع أصوات البحر المختلطة بحفيف النخيل وقد جلس يوسف يشاهد التلفاز ويلقى عليها نظرة من حين لآخر حتى سمع طرقات خفيفة على الباب، أستدارت مريم فى مكانها واتجهت للداخل فى سعادة وهى تسمع صوت إيهاب وفرحة التى أقبلت وعانقتها وقبلتها على وجنتها وهى تقول:

- وحشتينى أوى يا مريم بقالى يومين مشوفتكيش.

ثم همست لها :

- ها أخبار الجواز ايه

أرتبكت مريم ثم قالت:

- تعالى لما اشوف إيهاب لحسن واحسنى أوى

خرجت إلي أخيها وعانقته واستكانت بين ذراعيه ، فلقد شعرت بالأمان بمجرد أن استمعت لصوته، رفع رأسها وقبلها على جبينها وقال :

- ألف مبروك يا حبيبتي.. بصى جبتيك ايه

نظرت مريم إلى العقد المجمع من القواقع البحرية مختلفة الألوان وقالت بانبهار:

- ده جميل أوى جبته منين ده

قالت فرحة:

- نزلنا نتسوق شوية وجبنا الحاجات دى من هناك.. إيهاب اول ما شاف العقد قال هيعجب مريم أوى

أخذت تتأمله بين يديها بإعجاب وتقول:

- ده حلو اوى اوى.. متشكره اوى يا إيهاب

تدخل يوسف قائلا وهو يمسك بالهاتف :

- ها بسرعة تشربوا ايه

تقدم إيهاب نحوه وهو يقول:

- لالا مفيش داعى احنا ماشين على طول

طلب يوسف بعض العصائر وأغلق الهاتف وقال لإيهاب:

- اقعدوا معانا شوية

مالت فرحة على اذن مريم قائلة بخفوت:

- أيه ده يا بنتى فى عروسة تلبس عباية بعد يومين من فرحها

توترت مريم ورسمت ابتسامة على شفتيها قائلة:

- أصلى كنت واقفة فى البلكون زى ما شوفتيني كده ويوسف بيزعل لما بقف فيها بهدوم خفيفة

أومأت برأسها متفهمة بينما أشار لهم يوسف أن يجلسوا ، جلس إيهاب وفرحة على الأريكة الكبيرة ، بينما جلست مريم بجوار مسند الأريكة الصغيرة وكانت تتوقع أن يجلس يوسف بعيداً عنها نسبياً ولكنه جلس بجوارها ملتصقاً بها، ولف ذراعه حول كتفها وضمها إليه بخفة حتى شعرت أنها التصقت بصدرة وهو يقول مداعباً موجهاً حديثه لفرحة:

- وانتِ بقى يا معزة أخبارك أيه

عقدت فرحة يدها أمام صدرها بغضب طفولى وهى تهتف:

- مش هتبطل تقولى يا معزة ماشى يا يوسف

أنتصر لها إيهاب قائلاً:

- متزعلش يا حبيبتي هو يقصد المعزة اللى قعدة جنبه

صاح به يوسف وهو يضمها أكثر:

- نعم يا خويا .. انا مراتى دى قمر منور الدنيا كلها.. انا أصلا مش عارف انت اخوها ازاي  
تدخلت فرحة:

- بقى كده .. عموما إيهاب أحلى من مريم بكتير  
ونظرت إلى إيهاب قائلة:

- مش كده يا هوبة؟

أوما برأسه مماًزحاً :

- طبعاً يا حياتى

نسيت مريم أمر ضمة يوسف وهى تقاطع فرحة وهى تقول بمشاغبة:

- ياسلام بقى إيهاب أحلى منى.. تصدقى فعلاً انتِ معزة

ضحك يوسف وطبع قبلة على رأس مريم وهو يقول:

- أيوا كده يا حبيبتي قطعها

طرق الباب ونهض يوسف متوجهاً إليه ، لا تعلم مريم لماذا شعرت بالفراغ بعد أن أرسلها  
يوسف من ضمته، ولا تعلم لماذا تولد هذا الشعور لديها بمجرد أن فارقها وأنها كانت تود لو  
أنه بقى، أنزعجت كثيراً من هذا الشعور ونفضته سريعاً من عقلها ولكن بعد أن عاد بأكواب  
العصير كانت تتبعه بنظرها وتتوقع أن يعود إلى جلسته الأولى وخفقات قلبها تسابق  
خطواته، ولكنه لم يفعل ، جلس بعيداً عنها ولكن على نفس الأريكة ، كادت أن تشعر بخيبة  
أمل ولكن قطبت جبينها وهى تحت نفسها على ترك تلك الأفكار الغريبة، تناول إيهاب العصير  
فى سرعة ونهض واقفاً وهو يجذب فرحة قائلاً:

- يالا بقى كفاية كده.. اخوكى خلاص قرب يطردها

هتف يوسف مداعباً:

- بصراحة اه .. ولاقولك اعتبرنى طردتك خلاص

بعد أن خرجا وأغلق الباب خلفهما واستدار إليها وجدها مازالت جالسة في مكانها وشاردة في أفكارها المتصارعة وفجأة هبت العاصفة ، وقفت مريم في اضطراب وانفعال وقالت بارتباك:

- أنت ازاي تحضنى كده .. هه ازاي .. أنت بتستغل انهم قاعدين يعنى وعارف انى مش هقدر اتكلم

حاول أن يتحدث قائلا:

- أنا مكنش قصدى حاجة ..

قاطعته وهى تصيح به :

- لا انت كان قصدك .. لازم تعرف انى مش طايقاك

وتلعثمت أكثر وهى تهتف:

- مش طايقاك انت فاهم ولا لاء

حاول يوسف أن يكذب الشعور الذى راوده من نظراتها الزائغة وارتباكها، ولكن انفعالها وتلعثمها جعله يقترب منها ببطء وهى تصيح بكلماتها الغير مترابطة وهى تتحاشى النظر إليه ، وهو يتفحصها بنظراته بعمق ، أنتبهت إلى قربها فأسرعت إلى غرفتها الداخلية وأوصدت الباب بسرعة ، لم يكن هناك شىء مجهد فى الأمر ولكن أنفاسها كانت تتلاحق وصدرها يعلو ويهبط فى قمة الانفعال ، وقف خلف الباب يستمع إلى صوت أنفاسها المتقطعة وكأنها تبذل جهدا لتنفس ، وجد نفسه يطرق الباب قائلا:

- مريم .. أفتحى

صاحت من الداخل :

- مش هفتح أبعد عنى

قال مهدئا للموقف:

- طب خلاص أهدى شوية بس وحاولى تنامى

صاحت مرة أخرى :

- ملكش دعوة بيا.. مفيش كلام بينا أصلا

- طب انا آسف طيب لو كنت ضايقتك

لم ترد عليه ودخلت فراشها وضمت ساقها بيديها وأرخت رأسها عليهما وهى تقول بهمس:

- فوقى يا مريم فوقى متنسيش هو عمل فيكى أيه

ما هذا الشعور الغريب الذى يدور بين الكره والحنين !

\*\*\*\*

جلست علا أمام وليد فى مكتبه وهى تقول :

- يا حبيبى ما انا أثبتلك انى بئق فيك عاوز ايه تانى

قال باستنكار:

- بأماره أيه.. بأماره ما جبتي معاكى أختك وامك

مطت شفيتها وهى تقول:

- طب وانا اعمل ايه.. هند هى اللى شبطت فينا وبعدين راحت قالت لماما

قال بلامبالاة:

- خلاص تعالى معايا النهاردة

قالت على الفور:

- ليه مش انا شفيتها خلاص .. وبعدين يا حبيبى ذوقك عاجبنى.. أعمل فيها اللى انت عاوزه

وانا موافقة

ألتفت إليها بحنق قائلاً:

- شفتى بقى .. شفتى خايفة منى ازاي

نهضت علا باضطراب وقد شعرت بأنه وضعها بين المطرقة والسندان وقالت:

- انت عاوز ايه منى بالظبط .. قلتلى تعالى شوفى الشقة علشان تقولى رأيك وافقت وشفيتها

خلاص وأى تعديل هتعمله انا موافقة عليه .. عاوز ايه تانى

شعر وليد بالضيق فهو أصلا لا يحبها وإنما خطبها لهدف معين فى رأسه وهى لا تعطيه فرصة لتحقيق هذا الهدف فنظر لها وقال بجمود:

- خلاص براحتك وكويس انى عرفت اننا مش متفقين من دلوقتى بدل ما كنا نتجوز وبعدين نطلق

أستدارت له بجسدها كله وحاولت تدارك الموقف قائلة:

- وليد انت عارف معنى كلامك ده ايه

نظر لها وهو محتفظ بنظرته الباردة وقال:

- أسمى وليد بيه.. واعتبرى الخطوبة اتفسخت

تجمدت مكانها فهى لم تهزم طيلة حياتها، فلقد كانت الأذكى دائما ، الشعور بالهزيمة مؤلم فلم تجد مفر من أن تقول:

- يعنى انت مبتحبنيش يا وليد

شعر باللين فى صوتها بعض الشئ فقال:

- طبعا بحبك أو مال خطبتك ليه.. لكن انت مش فاهمانى واحنا مش متفقين فى حاجات كتير يبقى الأحسن ننفصل من دلوقتى

صمتت لبرهة ثم قالت ببطء :

- خلاص يا حبيبى انا موافقة

ألقت إليها يتفحصها قائلا:

- موافقة على ايه؟

نظرت له بحب وابتسمت قائلة:

- موافقة آجى معاك.. علشان تعرف بس انى واثقة فيك واننا مش مختلفين ولا حاجة

أرتمت ابتسامة نصر على شفثيه وأخذ مفاتيح سيارته وأمسك يدها قائلا :

- طب يالا

أخذت حقيبتها وسارت معه ، أستقلت سيارته وظلت طوال الطريق صامتة تحاول أن تجمع شتات نفسها لتجد مخرجاً مناسباً للموقف، فهي لا تريد فسخ الخطبة وتريد أن تتم هذه الزيجة بأى ثمن ولكنها تعلم أنه سيتركها فى كل الأحوال لذلك لابد من أن تبحث عن مخرج مربح حتى لا تخرج منهزمة وخاسرة من جميع النواحي، وضع سيارته بهدوء فى الجراج وأخذها وصعد بها شقته بحذر فهو يعلم أن البيت لا يتواجد فيه فى هذا الوقت سوى أمه وزوجة عمه فقط.

فتح الباب بهدوء وبدون أن يصدر جلبة ولكنها أسقطت حقيبتها المفتوحة فوقعت على الأرض وأصدرت المفاتيح والهاتف صوتاً مرتفعاً على أثر ارتطامهما بالأرض ، جذبها إلى الداخل وهى تقول بصوت مرتفع:

- فى آيه بتشدى كده ليه..

نجحت فى أن تشتت انتباهه فلا يلتفت إلى حقيبتها التى مازالت على الأرض فى الخارج، كانت أمه قد سمعت صوت الارتطام فشعرت بالقلق فهذا ليس وقت عودة أى منهم من العمل، فتحت الباب بحذر فوقعت عيناها على حقيبة علا المبعثرة أمام شقة وليد ، وقفت تنظر إليها بتعجب

وفى هذه الأثناء كانت علا تحاول أن تتكلم بصوت مرتفع وهى تقول:

- فى آيه مالك بتعمل كده ليه كأننا بنسرق

حاول كتم فمها وقال بخفوت:

- وطى صوتك أمى بتسمع دبة النملة

دفعته بعيداً وهى تقول :

- المفروض انى خطيبتك وانى جاية اشوف شقتنا .. فيها آيه دى بتوطى صوتى ليه

كتم فمها مرة أخرى وجذبها لحجرة بعيدة عن الباب وحاول أن ينهى ما أراده سريعاً وقال:

- أنت عارفة الناس الكبيرة دقة قديمة ومبيفهموش فى الحاجات دى.

ثم اقترب منها بابتسامة قائلاً:

- بس انت فعلا أثبتلى انك بتحبينى زى ما بحبك

حاولت أن تتحدث وهى تبتعد ولكنه جذبها إليه مرة أخرى وضمها وهو يحاول تقبيلها  
خرجت وفاء من غرفتها لتجد باب شقتهم مفتوحاً وأنها تقف فى الخارج وتقلب محتويات  
الحقيبة بين يديها فقالت:

- أياه الحاجات دى يا ماما

نظرت لها فاطمة بدهشة قائلة:

- مش عارفة يا وفاء.. سمعت صوت حاجة بتخبط على السيراميك خرجت لقيت الشنطة دى  
واقعة ومفتوحة كده

أمسكت وفاء محتويات الحقيبة وفتحت الحافظة الشخصية وبسهولة علمت لمن تنتمى هذه  
الحقيبة ولكنها تعجبت من وجودها هنا فى هذا الوقت فقالت:

- دى شنطة علا خطيبة وليد

- عرفتى منين

- بطاقتها اهي

جاءت اللحظة التى خططت علا من أجلها وغامرت بهذه الخطوة، سمحت لوليد أن يعبث  
بملابسها ولقد كانت تقاومه بضعف وساعدته فى قطع ازار سترتها لتظهر بشكل المعتدى  
عليها ، وعندما وصلت لهذه النقطة قاومت بشراسة ودفعته عنها بعنف وخرجت من الغرفة  
مسرعة إلى الباب الخارجى وهى تصرخ صرخات متتالية شديدة فزعت لها فاطمة ووفاء  
وهما بالخارج، فأخذت وفاء تدق الباب بقوة بينما فتحت علا الباب وخرجت مهرولة لتجد  
فاطمة ووفاء أمامها فاصطدمت بهما وحن وقت الأداء التمثيلى المقنع ، أرتمت فى أحضان  
فاطمة وهى تبكى فى انهيار وتقول لها :

- شايفة يا طنط ابنك بهدلنى ازاي.. شايفة اخوكى يا وفاء

حاولت وفاء أن تهدئها وأخذتها للداخل فى غرفتها وأعطتها سترة أخرى عوضا عن الذى  
تمزقت ولقد كانت علا مقتعة جدا فى أداء دورها ببراعة وهى تتلاحق أنفاسها فى حزن  
وفاء وتقص عليهم ما حدث وهنا قال وليد بعصبية:

- انتِ هتستعبطى يابت .. انتِ جاية معايا بمزاجك وعارفة انا عاوز منك ايه



أخذته أمه للخارج ودفعته قائلة:

- كده يا وليد علوز تشمت فيا الأعادي .. لو كانت مرات عمك شافتك كان زمانها فضحتنا  
قال مدافعا :

- ياماما انت بيخيل عليكى الأفلام دى ..دى جاية معايا بمزاجها  
دفعته أمه مرة أخرى وهى تقول:

- كتك القرف .. أهى دى آخرة المستوى الزفت اللى رايح تخطب منه  
قال بضجر:

- خلاص بقى مالوش لازمة انا خلاص فسخت الخطوبة  
عندما استمعت علا لهذه العبارة نهضت وخرجت لهم فى انفعال ولحقت بها وفاء التى  
سمعتها تصرخ فيه:

- يعنى أيه تفسخ الخطوبة

ثم نظرت إلى فاطمة وقالت :

- يرضيكى يا طنط ابنك يبهدلنى كده وفى الآخر يسيبنى

قالت وفاء على الفور:

- لاء طبعا

نظرت لها أمها شذرا وقالت بصرامة:

- بس يابت انت متدخليش

ثم أشارت لعلا وقالت:

- أنت اللى جيتى معاه برجلكى يبقى انت اللى غلطانة يا روحى.. أنا ابنى راجل

أنهارت مخططات علا بالكامل وهوت إلى أقرب مقعد وتقول بذهول:

- ده انت عندك بنات ازاي تقولى كده

فاطمة :

- أنا بنتى محترمة مبترووحش شقق .. يالا يا حبيبتي بطلى تمثيل وخدى بعضك عن قصيروا وروحي بيتكوا

صاحت وفاء بغضب:

- بس ده ميرضيش ربنا انت كده بتساعديه على الغلط

صفعتها أمها وصاحت بها:

- أمشى ادخلى اوضتك

والتفتت إلى علا وقالت ببرود:

- انت طالعالنا بهدومك يا حبيبتي يعنى الواد معملكيش حاجة وزى ما دخلنا بالمعروف نخرج بالمعروف .. وهنسيبك الشبكة صدقة

وفتحت الباب وأشارت وهى تقول:

- أطلعى بره وما اشوفش وشك هنا تانى

سارت علا فى الطرقات متخبطة أنهارت أحلامها وآمالها ، أنهار ما خططت له وحاولت أن تستفيد من وراءه، كانت دائما تبحث عن المصلحة وفقط

كانت تتوقع أن تنتصر لها فاطمة وتجبره على الزواج بها ولكنها وجدت لها امرأة بلا قلب وجدت نفسها تعود أدراجها إلى الشركة وهى تريد الانتقام من وليد وأمه ، ولأول مرة تتصرف وبدون تفكير عكس عاداتها دائما.

دخلت مكتب الحاج حسين بدون استأذان كأنها مغيبة وبدأت فى سرد كل ما رآته وسمعتة يوم زفاف مريم ويوسف وكل ما دار بين سلمى ووليد فى الجراج.

\*\*\*

مسحت هند على ظهر علا وهى تقول :

- عيطى يا علا متكتميش فى نفسك كده انا خايفة عليكى

نظرت لها علا بحدة قائلة:

- أول مرة أخرج من معركة خسرانة يا هند

قالت هند بذبول:

- أو مال انت كنت فاكرة أیه .. أم ولید میفرقش معاها حاجة .. وحتى لو كان ابنها عمل فيك حاجة مكنتش هتضغط عليه علشان يتجوزك

أكلت علا بشرود وكأنها لا تسمعها:

- مكنش قدامى حل تانى ومكنش ينفع ارميله الدبلة واقوله لاء .. ومكنش ينفع اضيع نفسى معاه .. كل حاجة كانت ماشية صح لو كانت امه زى منا كنت فاكرة .. لكن دى طلعت ست واطية أوى

أبتسمت هند بسخرية قائلة:

- أو مال يعنى كنت فاكرة ولید جايبه من بره

ثم تابعت :

- بس كويس ان الحاج حسين سمعك وصدقك وکمان مهنش عليه انك يتقطع عيشك وشغلک معايا

قالت علا بنظرة تحدى :

- متقلقيش عليا .. بكره هتلاقينى رجعت اقوى من الأول .

\*\*\*

- أنا معرفتش اربى الواد ده يا حسين هاین عليا أروح أموته واخلص منه

- أنا مش بحكيك علشان تعمل فى نفسك كده يا ابراهيم

وضع ابراهيم رأسه بين يديه واستند إليهما وهو يقول بحزن:

- دى غلطتى من الأول .. أنا مخترتش أم تعرف تربى ولادى

ثم نظر إلى حسين متابعا:

- لا وأيه فاطمة واقفة تبجح فى وشى وتقولى محصلش .. البت دى كدابة .. لولا وفاء حكلى على كل حاجة

ربت حسين على كتفه وهو يقف بجواره قائلاً:

- خلاص يا ابراهيم استهدى بالله .. المهم دلوقتي تسحب منه مفاتيحه حتى مفتاح شقتكوا  
مبيقاش معاه.. وتخليه تحت عينك لحد ما يعرف غلطه ويتربى بما أن الكلام والنصايح مش  
نافعة معاه

هتف إبراهيم فى دهشة:

- أنا اللي هيجننى ليه بيشوه سمعت بنت عمه .. وليه كان عاوز يوسف يقتنع أنها بنت مش  
كويسة وليه أدى ليوسف مخدرات وازاى يوسف ياخدها منه

شرد حسين فى وجوم وقال :

- متنساش ان امه مفهماه انهم مش ولاد علي الله يرحمه.. وانهم ولاد حرام علشان كده  
مش حاسس انهم ولاد عمه اللي المفروض يخاف عليهم

نهض إبراهيم وقال بغضب:

- الست دى مش هتقعد فى البيت ده تانى.. أنا هطلقها يا حسين وارجعها بيت أهلها

قال حسين فى أسى:

- أستهدى بالله بس.. ومتنساش وفاء.. هى ذنبها أيه تشوف امها مطلقة فى السن ده.. كفاية  
الى البنت فيه من ساعتها..

وتابع وقلبه يعتصر من الألم:

- وبعدين يعنى ما هو يوسف مصدقش حاجة من اللي اتقالت واهو أتجوز مريم برضة  
وبيحبها .. متحملش همهم فكر بس ازاي تحاول ترجع مراتك وابنك لصوابهم بهدوء كده  
ومن غير انفعال.

\*\*\*\*

شعر يوسف بالقلق عندما أعلن هاتفه عن اتصالاً من أبيه ، أخذ الهاتف فى سرعة وأجاب  
والده:

- السلام عليكم

- و عليكم السلام..مراتك فين

عقد يوسف حاجبيه قلقاً وهو يقول:

- نائمة

- طب اسمعنى كويس .. فى حاجة حصلت وعاوز احكيهالك بس متقاطعنيش

زاد قلقه وهو يقول:

- أتفضل يا بابا خير ايه اللى حصل

قص عليه والده ما حدث بالتفاصيل ، فاتسعت عيناه فى دهشة وذهول وهو يردد:

- أنا مش قادر استوعب

- ولا انا .. فى بعض التفاصيل مش قادر الم بيها برضة.. وعلشان كده كلمتك .. أكيد انت عندك حاجة اللى اسمها علا دى متعرفهاش

قال يوسف بشرود:

- أيوا يا بابا حكاية ان سلمى خدتها معاها بعد الفرح دى مريم حكتلى تفاصيلها وانا استنتجت منها أن الحكاية كانت مترتبة علشان اظن فى مريم انها بتروح شقق مفروشة

أردف والده بجدية:

- طب وحكاية انه طلع عند مريم وكان عارف انك ماشى وراه

قال يوسف وكأنه يتذكر:

- اليوم ده الصبح وقف وليد يكلمها فى الجنية وبعدين عمل حركة كده وهو ماشى كأنه بيقولها مستنى تليفونك .. واحنا فى المكتب جالى وبعدين جاله اتصال وحسيت من طريقة كلامه أن مريم هى اللى كانت بتكلمه .. خرجت بعديه بنص ساعة ورجعت البيت وشفته نازل من عندها بيصفر وخد عربيته ورجع الشركة تانى

قال والده بحدة:

- وعرفت منين انه نازل من عندها

أجاب يوسف بتردد:

- شفت الأسانسير نازل من الدور بتاعها

هتف والده بحدة وانفعال:

- علشان انت غبى.. وهو أى حد يعمل الحركة دى خلاص نقول نازل من عندها... عمرك  
ماعدت عليك كلام ربنا "يَا أَيُّهَا الَّذِينَ آمَنُوا إِن جَاءَكُمْ فَاسِقٌ بِنَبَأٍ فَتَبَيَّنُوا أَن تُصِيبُوا قَوْمًا  
بِجَهَالَةٍ فَتُصْبِحُوا عَلَىٰ مَا فَعَلْتُمْ نَادِمِينَ " .. أهو كان مرتب كل حاجة وكان عارف انك غبى  
وهتصدق وهتروح وراه والبنت المسكينة اتظلمت

صمت يوسف وهو يعلم أن والده محق بكل كلمة قالها، وشعر بحرارة الغضب تغلى وترتفع  
بداخله، ضغط أسنانه وهو يقول:

- أحنا هنرجع بكرا ان شاء الله وساعتها مش هرحمه .. لاهو ولا الحقيرة اللى اشتريت معاها  
فى كده

قال والده بسخرية لاذعة:

- ده على أساس انك معذور يعنى وانك انت كمان مشتركتش معاها.. مع أن انت يا أخى  
كنت اللى هما اعتمدوا عليه علشان ينفذ حكم الأعدام فيها  
أغمض يوسف عينيه فى ألم وحزن فاستدرك والده قائلاً:

- بس فأيدك تصلح علاقتك بمراتك وتخليها تسامحك.. خصوصاً لما تعرف اللى حصل  
قال يوسف بأسى :

- مفتكرش يا بابا انها ممكن تسامحنى ومعاها حق .. دى لسه بتخاف منى لحد دلوقتى  
ونايمة فى الأوضة اللى جوى وقافلة على نفسها بالمفتاح.. أنا والله مش زعلان منها.. أنا  
بس مش عاوزها تبقى خايفة منى كده

قال حسين بهدوء ووقار:

- طب انا هكلمها دلوقتى واحكيلها اللى حصل بالكلام اللى انت قلت دلوقتى

كاد والده ان ينهى الاتصال لولا انه سمع يوسف يقول:

- بابا... قولها اننا بعد ما ننزل مصر هاخد لها حقها من كل اللى ظلمها .. كل واحد فينا لازم  
ياخد جزاءه بما فيهم أنا

وضعت مريم هاتفها جانبا وهى غير مصدقة لما سمعت من عمها ، تمتعت فى خفوت:

- ليه يا سلمى.. أنا أذيتك فأيه علشان تشوهى صورتى وتتفقى مع وليد عليا .. ده انت كنت صاحبتى الوحيدة وكنت بثق فيكى وماشية وراكى وانا مغمضة.. ليه تعملى فيا كده

فتحت الباب وخرجت فى اندفاع ، كان يوسف يجلس على الأريكة الخارجية ، وقفت أمامه فى ذهول وصرخت به:

- ليه عملتوا فيا كده .. أنا عملت فيكوا ايه .. صاحبتى وابن عمى يشوهوا سمعتى وانت تصدقهم ويخططوا علشان يخلوك تستفرد بيا وانت متخدر.. وتعملهم اللي هما عاوزينه وتدبحنى .. ليه عملتوا فيا كده ليه

قال بصوت بعيد كأنه يخرج من أعماقه وهو ينهض فى مواجهتها :

- أنا هأخذك حقك مننا كلنا.. أو عدك

صرخت به ببكاء وهستيرية:

- علشان كده كنت بتقولى انت متستهليش الحب اللي حبهولك يا حقيرة.. كنت شايفنى حقيرة يا يوسف .. كنت شايفنى ازاي قولى .. مدفتش عنى ليه يا يوسف .. مخدنتيش ليه من اللي كنت فيه وضربتني قلمين فوقتنى من اللي بعمله بسذاجة وانا ماشية وراها وفاكراها صاحبتى ... مفهمتنيش ليه حقيقة وليد .. بلاش كل ده .. مجتش ليه تسألنى هو كان عندى ولا لاء.. لو كنت طلعتلى كنت لقيتنى نايمة ومش دراينا باللى بيحصل .. لو كنت مسكت تليفونى مكنتش هتلاقى ولا مكالمة واحدة لوليد.. لو كنت طلعت ورايا كنت هتلاقينى قاعدة بره مع سلمى لوحدها وهما جوى .. مواجهتنيش ليه باللى بتسمعه عنى ... وحتى لو كنت اتأكدت انى مش محترمة.. أيه اللي يدك الحق انك تعمل فيا كده.. انت أيه الفرق بينك وبين وليد وسلمى .. انتوا الثلاثة أحقر من بعض

ظلت تتكلم وكأنها تهزى ودموعها تنهمر على وجنتيها وتطلق لنفسها العنان فى رحلة بلا عودة :

- ده انا لما دخلت البيت ولقيت الدنيا ضلمة كنت مرعوبة.. وكنت عماله افكر أرجع استناهم فى الشارع لحد ما سمعت صوتك حسيت بالأمان .. من كتر الأمان اللي حسيت بيه مقدرتش احس بالتغيير اللي كان فنبرة صوتك .. حسيت ان صوتك مش طبيعى كأنك نايم لكن كان يكفينى انه صوتك علشان احس انى كويسة وانى فى حمايتك ..

ألتفتت إليه من بين دموعها وهى تهتف بغضب:

- حتى لما شدتنى ليك.. انت عارف انا فكرت انك عاوز تتخانى معايا علشان كنت بهزر مع ولاد خالتها فى الفرح وانى مشيت معاها.. أتصورت انى نجحت اخاليك تظهر غيرتك عليا.. كنت فاكراك هتشدنى وتدينى بالقلم وترعقلى وفى الآخر تعترفلى بحبك.. وفعلا اعترفت بحبك لكن وانت بتدبحنى يا يوسف.. مصعبتش عليك طيب بعد ما أغمى عليا وبقيت من غير اراده مصعبتش عليك...

وفجأة بدأت فى ضرب صدره ضربات متتالية بقبضتها الصغيرة وهى تصرخ:

- مصعبتش عليك يا يوسف.. مصعبتش عليك

تركها تضربه وأغمض عينيه وصدره يعلو ويهبط بأنفاس متلاحقة والنار تتأجج وهربت دموعه من سجنها وتحررت من مقلتيها، أنهارت مريم تماماً ولم تتحمل قدماها أكثر من هذا تخلصت فوراً من هذا الحمل الثقيل وتخلت عنها، كانت بين الحلم والواقع، لا تعرف هل تحلم أم لا، خارت قواها بشكل كامل وهى تسقط بين يديه، حملها بين ذراعيه وأدخلها غرفتها وسدحها على فراشها.

ظل ينظر إليها ويتفحصها، لم يكن يعلم هل هى فاقدة الوعي أم أن طاقتها نفذت ولا تقدر على الحراك، سقطت دموعه من عينيه على وجنتها فمسحها ببطء ومسح على شعرها وجلس بجوارها لا يدري ماذا يفعل، شعر أن أنفاسها انتظمت وأخذت تتنفس فى هدوء فعلم بأنها سقطت فى نوم عميق.

ظل جالساً بجوارها حتى سمع صوت أذان الفجر، قام وتوضأ ووقف يصلى، هربت الآيات من صدره إلا ثلاث آيات من سورة الفرقان ظل يرددّها مراراً وهو يبكى بشدة

"وَيَوْمَ يَعَضُّ الظَّالِمُ عَلَى يَدَيْهِ يَقُولُ يَا لَيْتَنِي اتَّخَذْتُ مَعَ الرَّسُولِ سَبِيلًا (٢٧)

يَا وَيْلَتَى لَيْتَنِي لَمْ أَتَّخِذْ فُلَانًا خَلِيلًا (٢٨) لَقَدْ أَضَلَّنِي عَنِ الذِّكْرِ بَعْدَ إِذْ جَاءَنِي وَكَانَ الشَّيْطَانُ لِلْإِنْسَانِ خَذُولًا (٢٩)

استيقظت مريم على صوت بكاءه وشهقاته المتلاحقة، أعتدلت على فراشها وضمت ساقاها إليها وهى تنظر له وتسمعه يرتل نفس الآيات ويبكى، لمست الآيات قلبها وشعرت وكأنها أنزلت من أجلها، وجدت الدموع طريقها إلى عينيها مجدداً وسقطت على وجنتيها فى صمت حتى انتهى يوسف من صلاته.



ألتفت إليها فوجدها قد استيقظت وتجلس مصوبة نظرها إليه ودموعها تنهمر فى سكون  
أقرب منها وحاول أن يجفف دمعها ولكنها دفعته بعيداً، جلس بجوارها على الفراش قائلاً :

- أنتِ معاكى حق فى كل كلمة قلتيها .. وماليش أى عذر ولو عندى عذر هيبقى أقبح من  
ذنبى .. بس انا الغيرة كانت هتقتلنى يا مريم .. يا مريم انتِ كنتِ أول حب فى حياتى وانا  
ماليش خبرة غير فى شغلى وبس .. ولا اعرف حاجة عن الحريم ولا كنت احب اتعامل معاهم  
غير من بعيد لبعيد ... فجأة لقيت نفسى بحبك وفى نفس الوقت مش راضى عن تصرفاتك ولا  
عن لبسك .. مكنتيش بتحسى بيا وانا بتخانى معاكى على لبسك وتصرفاتك ؟ .. كنت حاسة  
انى غيران وبرضة كنت بتتمادى كأنك مش هامك النار اللى جوايا .. كنت حاسس انك ملكى  
ومينفعش أى حد تانى يشوفك ولا يلمسك بس مكنتش قادر اتكلم .. وليد نفسه حس باللى  
جوايا وعلشان كده استغله لصالحه علشان يشككنى فيكى أكثر واكثر .. يوم ما كان واقف  
يهزر معاكى فى الجينية وتضربتى كفك بكفه وهدومك لازقة عليكى من الميه كنت حاسس  
انى ممكن اقتلك واقتله .. عقلى طار مكنتش عارف افكر .. كل اللى مسيطر عليها الغيرة ..  
أحاسسى انك بتخونينى فضل يكبر جوايا لحد يوم الحادثة .. كنت واقفة فى الفرح مع الشباب  
بطريقة خلتنى كنت هروح اشدك من ايدك قدام كل الناس واضربك انتِ وهما .. فضلت ماسك  
نفسى وكل ما تيجى عينك فى عينى تبصيلى باستفزاز تجننينى اكثر .. مكنتش قادر افكر فى  
حاجة خالص لدرجة انى أخذت منه الحبوب دى والسجاير وانا عمرى ما شربتها من غير  
وعى .. ولا فكرت انى بدمر نفسى ولا ان ممكن ده يحصل .. كل اللى كنت عاوزة انى اطفى  
النار اللى جوايا بأى حاجة تغيبنى عن الوعى .. طلعت وراكوا بالعربية وانا كان كل هدفى انى  
أراقبك واعرف انتِ رايحة فين .. ولما كلمت البواب اتجننت اكثر لما عرفت انها شقة  
مفروشة .. ساعتها قررت انى اطلعك من حياتى تماما وانساكى بس بعد ما انتقم لقلبى منك ..  
لكن صدقيني عمرى ما فكرت انى هعمل فيكى كده .. أكبر حاجة فكرت فيها انى أطفى النور  
وارعبك وبالكثير أوى اقولك اللى قلتهولك ساعتها وخلص .. لكن معرفتش اسيطر على  
حاجة بعد ما شديتك لحضنى .. فجأة لقيت نفسى خارج سيطرتى وابتدت دماغى تلف أكثر  
وافقد تركيزى واحدة واحدة .. حسيت انى ميت و أعصابى كلها متجمدة كأنى لا شايفك ولا  
سامعك لكن حاسس بيكى بين ايدى وبس ..

كانت تستمع له بدموعها المنهمرة على وجنتها وتشيح بوجهها بعيداً عنه وهى ضامة  
ساقها ، كأنه فصل قلبها شطرين بسكين كلماته التى كانت تشعر بصدقها، شطر يصدقها  
ويشعر به وشطر يكرهه ولا يجد له مبرراً ، وكأن الشاعر عبد الله الفيصل يجلس بينهما  
قائلاً

عَلَى أَنِّي أَغَالِطُ فِيكَ سَمْعِي وَتُبْصِرُ فِيكَ غَيْرَ الشَّكِّ عَيْنِي

وَمَا أَنَا بِالْمُصَدِّقِ فِيكَ قَوْلًا وَلَكِنِّي شَقِيتُ بِحُسْنِ ظَنِّي

\*\*\*\*

### الفصل الثلاثون

نهض يوسف مهزوماً أمام والده الذي وقف بعصبية شديدة وهو يهتف بانفعال:

- ازاي تعمل كده.. ازاي تطلقها من غير ما تقولى

تابع يوسف بحزن شديد:

- هي اللي أصرت يا بابا.. كانت حالتها صعبة ومكنش ينفع اقولها لاء.. لو كنت قلت لاء كانت انهارت أكثر.. لكن انا اشتريت عليها ان محدش يعرف بحكاية الطلاق دي لحد ما نرجع ونقولك الأول وهي وافقت

زفر والده وهو يستعيد جلسته الأولى خلف مكتبه وهو يقول :

- أستغفر الله العظيم يارب ..كل ما احلها تتعقد

ثم نظر إلى يوسف وتابع :

- وهنقول ايه للناس .. اخواتك واخواتها .. هنقولهم ايه سبب الطلاق بعد كام يوم .. كده هيفتكمروا أنك لقيتها فيها حاجة

نهض يوسف وافقا وقال دون أن ينظر إليه:

- صدقتى يا بابا مكنش قدامى حل تانى

أسند والده ظهره إلى المقعد وأغمض عينيه وهو يستغفر وفجأة فتح عينيه قائلا:

- الحمد لله ربنا ألهمنى الحل

ألقت له يوسف بنظرة متسائلة فأردف والده :

- أنتوا هتعيشوا مع بعض زى ما انتوا كده فشقتكوا عادى .. كأنكوا لسه متجوزين ومحدث هيعرف حكاية الطلاق دى دلوقتى خالص

زادت حيرة يوسف وهو ينظر لوالده قائلا:

- أزاى يابابا نعيش مع بعض وانا مطلقها

أبتسم والده وهو ينهض وافقا ويشير إليه أن يتبعه ، خرج حسين من غرفة مكتبه وصعد هو ويوسف إلى مريم.

طرق الباب ففتحت ، لم تكن قد أبدلت ملابسها بعد رغم الأرهاق الذى تشعر به من أثر السفر زاغت نظراتها بينهما فقال حسين مبتسما:

- مش هتقوليلنا أتفضلوا ولا ايه يا مريم

أفسحت الطريق أمامهما وهى تقول بخفوت :

- اتفضلوا

جلس حسين وهو يقول :

- أزاى تصممى على الطلاق كده يامريم من غير ما ترجعيلى .. فى بنت تطلب الطلاق من غير ما تاخذ رأى ابوها

صمتت مريم وهى تتحاشى النظر ليوسف ثم قالت:

- سامحنى يا عمى بس انا مش هقدر استحمل اكتر من كده

نهض وافقا امامها وقال وهو ينظر لعينيها:

- طب واخواتك والناس كلها هيقولوا ايه دلوقتى

أشاحت بوجهها بعيدا وهي تقول بانفعال:

- اللى عاوز يقول حاجة يقولها .. أنا أصلا كده كده سمعتى متشوهه لوحدها

أطرق يوسف إلى الأرض فى ألم فقد فهم ما ترمى إليه فتابع حسين حديثه إليها :

- تفتكرى إيهاب هيسكت لما يعرف ان أخته اطلقت بعد دخلتها بكام يوم.. أنتِ يابنتى كده هتقوملنا حريقة فى البيت

صاحت وهي تستند إلى أقرب مقعد أمامها وهي تقول:

- كفاية ضغط عليا يا عمى .. أنا مش هقدر استحمل اكتر من كده.. مش عاوزه ابقى على ذمته يوم واحد بعد كده.. وعمرى ما هوافق ارجعله أبدا مهما حصل

لف حسين ذراعه حول كتفها مهدئا أياها وقال بهدوء:

- ومين قال انك هترجعيه .. أنا مقلتش كده

قالت وهي تلتفت إليه:

- أو مال حضرتك بتقولى كده ليه

ربت على كتفها وقال بحنان :

- بقولك كده علشان تتقبلى الحل الوحيد اللى هيرضيكى.. وفى نفس الوقت هيمنع المشاكل اللى ممكن تحصل لو حد عرف بالطلاق دلوقتى

- حل أياه

قال حسين بهدوء:

- شرع ربنا يابنتى بيقول ان الست اللى بتطلق طلاق رجعى تفضل قاعدة فى بيت جوزها لحد فترة العدة ما تخلص

وقف يوسف قائلا:

- يابابا طب ماهي هي .. منا هنزل أعيش معاكوا تحت وبرضة الكل هيسأل ليه

ألتفت إليه والده قائلا:

- ومين قالك انك هتعيش معانا تحت.. انت هتعيش فى بيتك برضة معاها.. لحد فترة العدة ما تخلص

نظرت له مريم بذهول وهتفت:

- وانت يا عمى ترضى كده لفرحة

أوما برأسه قائلا:

- أيوا ارضاه.. علشان ده شرع ربنا مش حاجة جايبها من عندى

تدخل يوسف مستفهما:

- ازاي يابابا

جلس حسين وبدأ فى شرح الأمر قائلا:

- الآية الكريمة فى سورة الطلاق بتقول

(يَا أَيُّهَا النَّبِيُّ إِذَا طَلَّقْتُمُ النِّسَاءَ فَطَلِّقُوهُنَّ لِعَدَّتِهِنَّ وَأَحْصُوا الْعِدَّةَ وَاتَّقُوا اللَّهَ رَبَّكُمْ لَا تُخْرِجُوهُنَّ مِنْ بُيُوتِهِنَّ وَلَا يَخْرُجْنَ إِلَّا أَنْ يَأْتِيَنَّ بِفَاحِشَةٍ مُبَيَّنَةٍ وَتِلْكَ حُدُودُ اللَّهِ وَمَنْ يَتَعَدَّ حُدُودَ اللَّهِ فَقَدْ ظَلَمَ نَفْسَهُ لَا تَدْرِي لَعَلَّ اللَّهَ يُحْدِثُ بَعْدَ ذَلِكَ أَمْرًا)

يعنى يابنتى شرع ربنا الى ناس كتير نسيته دلوقتي بيقول ان الست اللي تطلق طلاق رجعى تفضل قاعدة مع جوزها فى بيتها زى ما كانت بتقعد معاها بالظبط وهما متجوزين .. يعنى تقعد بلبس البيت عادى .. وتكلمه ويكلمها وكأنه زوجها لكن بدون جماع .. عرفتى بقى ليه بقولك اه ارضاه لبنتى .. لأن ده شرع ربنا وأمر من ربنا انها متخرجش من بيتها بعد الطلاق الرجعى لاء دى كمان لو خرجت تأثم

صمتا يوسف ومريم وهما يستمعان لأول مرة لهذا الحكم الشرعى الذى لم يكونا يعلماه عنه شيئا من قبل ، أردف حسين قائلا:

- علشان كده بقولك الحل ده هو أفضل حل هيمنع الخلافات .. وفى نفس الوقت هيرحك لأنه هيفضل مطلقك زى ما انت عايزة .. ولما العدة تقرب تخلص نبقى نشوف ساعتها هنعمل أيه بس يكون عدى وقت .. مش الناس تعرف انكوا اطلقتوا بعد دخلتوكوا بكام يوم

تتحنح يوسف بحرج وقال بتردد وهو يتحاشى النظر إليهما :

- بس يا بابا أنا مدخلتش بيها يبقى مالهاش عدة أصلاً  
أشاحت بوجهها بعيداً بينما قال حسين بنفاد صبر:

- فى حاجة اسمها عدة احترازية ودى بتطبق على الحالات اللى زى حالتكوا كدة .. لما  
بيحصل فرح ويتقفل عليهم باب واحد والناس كلها بتبقى عارفة انها دخلتة .. لما بيحصل  
طلاق بعدها حتى لو مدخلش بيها بيطبق عليها العدة الاحترازية اللى بقولكم عليها دى  
قالت مريم فى شرود:

- بس يا عمى انا طلبت الطلاق علشان مش عاوزة اعيش معاه فى مكان واحد.. يبقى انا كده  
عملت ايه  
أوما برأسه متفههما وقال:

- انا فاهمك يا مريم.. بس ده دلوقتى حكم ربنا مش حكمى انا.. وإذا كان فى أيدك تنفيذه ..  
وإذا كان فى أيدك توافقى عليه وتمنعى مشاكل ممكن تحصل .. يبقى ليه متجيش على نفسك  
شوية ؟ وبعدين دى فترة العدة يعنى بعدها هتبقى حرة خلاص .

تدخل يوسف بشكل حاسم قائلاً:

- متقلقيش يا مريم.. أنتِ فكل الأحوال مش هتشوفينى تانى.. أنا وعدتك انى اخذك حقك من  
اللى ظلمك وأولهم انا.. وأنا هوفى بوعدى ليكى والنهاردة مش بكره  
تركهم يوسف وفتح الباب وخرج مسرعاً ، هبط الدرج بسرعة كبيرة وهو ينوى الوفاء  
بوعدده .

\*\*\*\*\*

وفى الصباح وأثناء متابعته لأعماله فى انهماك شديد جاء اتصال داخلى من مديرة مكتبه  
الذى أجابها دون أن يرفع عينيه عن الأوراق التى بين يديه، فقالت :

- فى واحد على التليفون عاوز حضرتك وبيقول انه من النيابة

قطب حسين جبينه وقال بقلق:

- وصلينى بيه

وبعد دقائق خرج حسين ملهوفاً من مكتبه وهو يقول للسكرتيرة:

- أجلى أى شغل دلوقتى لحد ما ارجع

جلس أمام يوسف بلوعة شديدة وقال:

- أياه يابنى اللى خلاك تعمل كده

تدخل وكيل النيابة فى الحديث قائلاً:

- والله يا حاج حسين لولا سمعتك الطيبة وسمعت شركاتك اللى مفيش عليها غبار مكنتش

اتدخلت فى الموضوع بشكل ودى .. وكنت مشيت فى المحضر بشكل رسمى .. لكن انا قلت

أديك خبر الأول لعل وعسى

ألتفت إليه حسين بامتنان قائلاً:

- جميلك فوق راسى

نهض يوسف فى انفعال قائلاً:

- وانا مش عاوز الجميل ده.. أنا عاوز المحضر يمشى بشكل رسمى وانا معترف على نفسى

والتفت إلى وكيل النيابة قائلاً:

- ولو سمحت يا فندم والدى شاهد أثبات فى القضية دى

حاول والده أقصاه عما يريد ولكنه هتفت بتصميم:

- لو سمحت يا بابا أنا عاوز آخذ جزائى علشان ابقى عبدة .. وعلشان ربنا يتقبل توبتى

أعتدل وكيل النيابة فى جلسته وقال:

- انا قدام التصميم ده مفيش قدامى غير انى استدعى البنت اللى بتقول انك اعتديت عليها

صاح حسين بوجل :

- دى تبقى فضيحة يا فندم.. دى بنت عمه .. وكلنا ساكنين فى بيت واحد.. ازاي عسكرى

يدخل البيت ويجيبها ويجي هنا ازاي

طرق وكيل النيابة بأصابعه على حافة المكتب فى تفكير ثم قال:

- خلاص مفيش مشكلة.. حضرتك ممكن تروح تجيبها بشكل ودى ولما تيجى وتدلى

بشهادتها نبقي نشوف هنعمل ايه ساعتها

هاتف حسين مريم وهو فى طريقه إليها وأمرها أن تبديل ملابسها بسرعة وتهبط للأسفل وتنتظره فى الجراج ، حاولت أن تعرف مريم ماذا حدث ، ولماذا يريد لها ولكنه قال باقتضاب :

- لما اشوفك هقولك

أبدلت مريم ملابسها فى عجلة وذهبت لتنتظر عمها بالجراج ولم يتأخر كثيراً ، استقلت سيارته وبمجرد أن اتخذت مكانها بجواره حتى قالت:

- خير يا عمى فى ايه

أنطلق بسيارته وهو يقول:

- يوسف راح النيابة قدم بلاغ فى نفسه واعترف فيه انه اعتدى عليكى

شهقت مريم وهى تضع يدها على فمها وتتنظر له بذهول وقالت:

- وحبسوه

هز رأسه نفيا وهو يقول:

- لا .. وكيل النيابة مرضيش يقفل المحضر إلا لما اتصل بيا.. ولما روحت لقيته هناك مصمم

ان المحضر يكمل بشكل رسمى .. ووكيل النيابة كتر خيريه مرضيش يبعثلك عسكرى ولا

أمين شرطة يستدعيكى علشان تقولى أقوالك وسابنى آجى اخذك بشكل ودى

مازال الذهول يسيطر عليها وهى تنظر إلى الطريق أمامها حتى وصلوا إلى مقر النيابة وبعد

السماح لهم بالدخول ، دخل حسين بصحبة مريم التى كانت تخطوا ببطء وهى تنظر حولها

حتى وقعت عيناها على يوسف الذى يجلس على مقعد جانبيا واضعاً رأسه بين يديه وكأنه

فى عالم آخر.

وقفت مريم أمام وكيل النيابة ورفع يوسف رأسه ولم يجروء على رفع ناظره إليها وهو

يسمعها تجيب سؤال وكيل النيابة وتقول:

- أنا مريم يا فندم

مد يده إليها قائلا:

- بطاقتك لو سمحتى يا مريم



نظر إليها ثم وضعها على المكتب أمامه وهو يشير لهما بالجلوس قائلاً:

- اتفضلى يا مريم.. اتفضل يا حاج حسين

ثم أشار ليوسف أن يأتى ويقف فى مواجهتها وقال:

- الأستاذ يوسف قدم بلاغ بيعترف فيه انه قام بالأعتداء عليكى .. ايه أقوالك

نهضت مريم واقفة فى سرعة وقالت:

- محصلش يا فندم

هتف يوسف صائحاً:

- لاء حصل وانا معترف ومش هتنازل عن البلاغ وأقوالها مالهاش أى لازمة

نظر له وكيل النيابة بحدة قائلاً:

- أنت هتعرفنى شغلى ولا أيه

ثم التفت إلى مريم قائلاً:

- يعنى انت بتنفى الواقعة

أومات برأسها بجدية وثبات وهى تقول بثقة:

- أيوا يا فندم بنفيها.. الكلام ده محصلش

هتف بها يوسف:

- حرام عليك .. أنت كده بتضيعى حقك.. أنا عاوز اتعاقب واخد جزائى حتى لو أعدام هبقى

مرتاح انى رجعتك جزء من حقك

أشاحت بوجهها عنه ونظرت إلى وكيل النيابة قائلة:

- اقدر امشى يا فندم

شبك وكيل النيابة اصابعه قائلاً:

- طبعاً تقدرى تمشى

ثم نظر إلى يوسف قائلاً:

- وانت كمان تقدر تمشى كده مفيش قضية من الأساس

\*\*\*

وقف حسين أمام سيارته وهو يقول ليوسف بحدة :

- أركب

هز يوسف رأسه نفياً قائلاً:

- سيبنى لو سمحت يا بابا

فتح حسين باب المقعد الخلفى للسيارة ودفعه داخلها بغضب شديد، أضطر يوسف أن يمتثل لأمر والده، استقل حسين سيارته وجلس خلف المقود ومريم بجواره ، نظر له فى المرأة التى أمامه قائلاً بغضب:

- انت هتفضل متهور ومتسرع كده لحد امتى .. رايح تبلغ فى نفسك .. عارف لو القضية دى راحت المحكمة هيحصل أيه.. هتبقى فضيحة للعيلة كلها واللى ميعرفش يعرف

قال يوسف بحزن :

- يا بابا انا كل اللى عاوزه انى ارجعلها حقها وبس

وضعت مريم يديها على وجهها وظلت تبكى بحزن شديد ومرارة ، بينما انطلق حسين بسيارته عائداً إلى المنزل

بمجرد أن دلف الثلاثة إلى الحديقة وقع نظر يوسف على وليد الذى كان خارجاً من المنزل متجهاً للبوابة الخارجية بحنق ، وبدون وعى هرول إليه يوسف وباندفاع شديد وبكل الغضب الذى يعتل فى صدره هجم عليه ووجه له لكمة فى أنفه أرتد على أثرها للخلف بقوة ونزفت أنفه، تلقى يوسف ارتدادته مرة أخرى ووجه إليه لكمة ثانية وثالثة أردته أرضاً وهو يترنح حتى كبله أبيه من الخلف ولف ذراعيه حوله بقوة وهو يصيح به :

- كفاية يا يوسف.. كفاية هيموت فى أيديك

حاول يوسف أن يتخلص من ذراعى أبيه ولكنه أحكم ذراعيه حوله بقوة و دفعه للمدخل الداخلى للمنزل ثم داخل المصعد الذى صعد بثلاثتهم إلى الطابق حيث شقة يوسف ومريم

حاول وليد أن ينهض ولكن لكلمات يوسف القوية جعلته يفقد توازنه فترة من الزمن فلم يستطع القيام إلا بعد وقت ليس بالقصير، لجأ إلى صنوبر صغير فى جانب الحديقة وجعل يغسل انفه من أثر الدماء ، وما إن انتهى حتى جلس إلى الأرض ثانية يحاول التقاط أنفاسه

كانت مريم مشدوهه لا تصدق ما يحدث منذ أن عادوا من سفرهم ، نيابة وتحقيق ثم مشاجرة انتهت بدماء ينزفها وليد من وجهه ، ألقت إلى حسين الذى كان يصيح فى ولده بغضب:

- أنت ايه اللى حصلك .. أتجننت ولا أيه.. أياك تتحرك من هنا النهاردة .. أنت فاهم ولا لاء

وتركهم وغادر مغلقاً الباب خلفه بقوة ، جلست على المقعد المجاور له ووضعت رأسها بين يديها وأغمضت عينيها تحاول استيعاب ما يحدث حولها ، ألقت عليها نظرة سريعة ودخل غرفة النوم ، أخرج حقيبة سفر كبيرة وفتح الخزانة ، أخرج ملابسه منها ووضعها فى الحقيبة بغير ترتيب وخرج من الغرفة واتجه إلى غرفة أخرى صغيرة، وضع ملابسه وأشياءه بها ثم ألقي بجسده على الفراش وراح فى نوم عميق

بعد دقائق ليست بالقليلة تقدمت خطوات من غرفته ونظرت نظرة جانبية من خلف الباب الذى لم يوصده فوجدته غارقاً فى النوم ، من الواضح بأنه لم ينم منذ ليلة أمس ، ظلت تنظر اليه وهى تتذكر صياحه بها أمام وكيل النيابة لتقول الحقيقة وتتهمه بما فعل

كانت الفرصة سانحة لها أن تفعل لتنتقم منه ، ولكنها لم تفعل، وهذا ما زاد عذابه وحزنه وحنقه على نفسه ومنها ومن والده ، عادت لغرفتها وأوصدتها وجلست تفكر فى الوضع الجديد التى اضطرت أن تتعايش معه ، ولكن شيئاً ما فى نفسها كان يشعر بالإرتياح بعد الموقف الذى اتخذهُ يوسف من نفسه وبعد تصميمه على إعادة حقها المسلوب من نفسه أولاً

\*\*\*\*

أستقلت سلمى السيارة بجوار وليد وقالت فى لهفة :

- مالك يا حبيبى فى أيه.. وأيه الجرح اللى تحت عينك ده

تحسس وليد عينيه وهو يقول بحنق:

- ده الزفت اللى اسمه يوسف.. خدنى على خوانة وهو عامل زى الطور كده

هتفت سلمى بدهشة:

- يوسف عمل فيك كده ليه

تحسس أنفه بألم وهو يقول:

- ما انتِ نايمة على ودانك .. الحكاية اتكشفت يا سلمى.. يوسف ومريم عرفوا كل حاجة

أتسعت عيناها وهى تقول:

- ومريم عرفت انى معاك

قال بسخرية :

- طبعا ياختى

ثم تابع وهو ينظر أمامه ببغض:

- ومش كده وبس .. النهاردة ابويا طردنى من البيت ومن الشركة وامى بجلالة قدرها  
مقدرتش تقف قدامه.. وفى الآخر سبتله البيت ومشيت

- وانت دلوقتى هتعمل ايه هتروح تقعد مع والدتك

قال بغضب:

- نعم ياختى أومال الشقة اللى انا مأجرها لك دى راحت فين

أرتبكت وهى تقول:

- موجودة طبعا .. موجودة هتروح فين.. بس هو انت يعنى هتيجى تعيش فيها

نظر إليها بتفحص قائلاً:

- ومالك اتخضيتى كده ليه .. مالها الشقة

أرتبكت أكثر واصفر وجهها عندما انطلق بالسيارة قائلاً:

- وانا اقعد اسالك ليه انا هروح اشوف بنفسى

وفى الطريق أطلق ضحكة عالية وهو يقول لها:

- يابنت اللذين.. قال وانا اللى كنت فاكر انى انا السبب فى انحرافك.. أتاريكى كان عندك

استعداد اصلا بس محتاجة حد يوجهك

أشاحت بوجهها وهى تقول:

- أنا مكنش قصدى على فكرة .. دى الحكاية كلها جات صدفة وعموما دى صاحبتى واللى  
بيجى معاها ده جوزها بس عرفى يعنى  
نظر لها نظرة جانبية وقال باستهزاء:

- عرفى...

ثم أردف بخبث:

- وبتاخدى منهم كام فى الليلة تمن بياتهم فى الشقة  
قالت بسرعة :

- مبخدش حاجة .. بقولك صاحبتى والراجل يبقى جوزها  
قال بمكر:

- عاوزه تفهمينى انك بتببتيهم عندك لوجه الله  
تلعثمت وهى تقول:

- هما مش بيباتوا كل يوم.. ده هو يدوب ثلاث أو أربع أيام فى الأسبوع  
حرك رأسه وهو يقول:

- يابنت الأيه.. بتعرفى تستخدمى كل الأماكن اللى تحت أديك بكل الطرق  
لمعت الفكرة برأسه وقال:

- وماله.. فكرة برضة .. أهو الواحد يلاقى شغلانة بدل ما انا بقيت عاطل كده  
قالت على الفور:

- يعنى هتستسلم كده ومش هترجع البيت تانى  
قال بغل :

- لا يا أموره مش انا اللى استسلم.. مسيرى هرجع واللى هلاقه قدامى هتبقى امه داعية  
عليه

\*\*\*

لم يكن عبد الرحمن يصدق ما يسمع وهو ينظر إلى فرحة وإيمان ووالدته ووفاء فهتف  
بدهشة قائلا:

- معقول اللي بسمعه ده.. ووليد يعمل كل ده ليه.. أيه اللي بينه وبين يوسف ومريم علشان  
يخطط كل التخطيط ده

قالت وفاء بانكسار:

- وليد اضايق لما حس ان يوسف بيحب مريم.. وماما بقى الله يسامحها كانت مكرهاه فى  
ولاد عمى من زمان ومكنش عاوز أى حاجة بينهم تتم

ألتفت لها عبد الرحمن متسائلا:

- واشمعى مريم ويوسف يعنى.. طب ما انا اتجوزت إيمان وإيهاب اتجوز فرحة

قالت :

- أنا كنت حاسة من زمان ان مريم عجباه.. لكن مكنتش افكر أبداً انه هيعمل كده لما ترفضه  
زاغت نظرات فرحة بينهم ثم قالت برجاء:

- أرجوكوا محدش يجيب سيرة لإيهاب عن اللي حصل .. إيهاب متهور وممكن يعمل حاجة  
فى وليد واخسره للأبد .. والحمد لله هو شغله بعيد ومبيرجعش غير متأخر أوى يعنى مش  
هيحس بحاجة

نظرت وفاء نحو إيمان وقالت :

- أنا آسفه يا إيمان.. مش عارفة أودى وشى منكوا فين .. لكن انا خلصت ضميرى وحكتلكوا  
على اللي عرفته

ربت عفاف على ظهرها قائلة:

- مكنش فى داعى يابنتى

قالت بحزن:

- لاء فى يا طنط عفاف .. لما بابا طرد وليد سمعته بيتوعد مريم ويوسف .. خفت عليهم وانا عارفة وليد شرانى .. كان لازم تعرفوا علشان تخلوا بالكم منهم وخصوصا من مريم وضعت إيمان كفها على صدرها قائلة بأسى ممتزج بالخوف:

- هو فى كده فى الدنيا معقول

أطرقت وفاء رأسها وقالت بخفوت:

- أنا اتصلت على عماد وقتلته يعجل بالجواز .. أحنا المفروض مكناش هنتجوز قبل شهرين لكن انا خلاص مبقتش قادرة اقعد فى البيت ده.. وهو قدر الظروف ووعدنى انه هيكمل اللى ناقص بسرعة ونتجوز بالكثير بعد أسبوعين وقتلت لبابا وهو وافق نهض عبد الرحمن بحدة قائلا:

- متعرفيش وليد ممكن يروح فين بعد ما مشى من البيت يا وفاء

وقفت إيمان بقلق وصوبت والتفتت نحوه وقالت بلهفة:

- عبد الرحمن أرجوك .. ملكش دعوه بيه

أعاد سؤاله مرة أخرى على وفاء وكأنه لم يسمعها فلمعت عيناها بالدمع قائلة:

- أرجوك يا عبد الرحمن انا ماليش غيرك...

بينما قالت وفاء:

- لا معرفش

نظرت إليه والدته قائلة :

- أسمع كلام مراتك يا عبد الرحمن .. وبعدين الحكاية خلصت وابوه طرده

قال بجدية:

- وانتِ فاكره انه هيسكت يا ماما

قالت :

- خلاص ناخد بالناس وخلاص .. لكن مش نروحله احنا لحد عنده يابنى

هتف قائلاً بانفعال:

- اللى حصل ده مش حل يا ماما.. كده الموضوع هيفضل متعلق ..لازم نحسمه علشان نخلص .. وبعدين يعنى انتوا شايفنى هروح اقتله

تعلقت إيمان بذراعه قائلة :

- أرجوك اسمع كلامنا ..

نظر إلى عينيها فوجدها ترجوه بشدة فربت على وجنتها بحب قائلاً:

- متخافيش يا حبيبتي.. انت عارفة انى مش متسرع.. وبعدين انا معرفش مكانه لحد دلوقتى

قالت وقد أفلتت دمعة من عينيها:

- طب على الأقل استنى لما النفوس تهدى وبعدين ابقى دور عليه .. بلاش دلوقتى علشان خاطرى

أفلت ذراعه التى كانت متعلقة بها وأحاطها بها وضمها إليه وقبل رأسها قائلاً:

- حاضر يا حبيبتي ..مش عاوز اشوفك متوترة كده وخايفة

\*\*\*

مر الأسبوعين وأضطرت فاطمة إلى العودة للمنزل لحضور حفل زفاف ابنتها ، فى هذه الفترة كانت مريم لا ترى يوسف تقريباً ، كان يخرج باكراً جداً ولا يعود قبل منتصف الليل فيدخل غرفته ولا يخرج منها إلا وقت أذان الفجر ، لم تكن تسمع صوته إلا مرة واحدة عندما يطرق باب غرفتها قائلاً:

- الفجر يا مريم قومى صلى

ولم تكن تراه إلا حين عودته من صلاة الفجر وهو يلقي عليها السلام ذاهباً إلى غرفته مرة أخرى ، حتى أيام العطلات لم يكن ليبقى فى المنزل حتى لا يضايقها بل كان يتطوع مكان عبد الرحمن ليسافر فى عمليات التخليص الجمركى

\*\*\*



كان حفل الزفاف فى أضيق الحدود لم يحضرها سوى المقربين فقط من العائلتين واضطر حسين إلى الضغط على أولاده وأزواجهم لحضور الحفل من أجل وفاء ووالدها فقط ، جلست فاطمة بالقرب من ابنتها ولم تتحرك إلا لمصافحة المدعوين ببرود.

ضغطت إيمان على يد زوجها قائلة يعتاب:

- انت مش هتبطل تبصله بقى.. الراجل مش عارف يودى وشه منك فين.. شيله من دماغك بقى

ألتفت إليها وقال بجدية:

- وهو يهمك فى حاجة يا هانم

أبتسمت بحب قائلة:

- اه يهمنى .. يهمنى انك تعرف انى بحبك انت وبس

لانت ملامحه كثيرا وقال بخفوت:

- من ساعة ما شفته بببصلك أول مرة لما اخوه جه يتقدم لوفاء وانا بكرهه لله فى الله ومبطبقهوش

قالت مداعبة:

- بس انا بقى بتبسط لما بشوفه

ضغط على يدها بقوة وقطب جبينه قائلا:

- نعم بتتبسطى لما بتشوفيه

أبتسمت بألم وهمست تشاغبه قائلة:

- أصله بصراحة لى عليا فضل كبير أوى.. من ساعة ما شوفته بببصلى وانت بقيت تغير عليا وتحبنى

نظر لها بتأمل وعمق يتفرس فى ملامحها عن قرب وقال :

- لا انا كنت بحبك من قبلها بكتير بس انا مكنتش عارف

أسندت رأسها إلى قبضتها برقة قائلة:

- وأيه بقى اللى خلاك تاخذ بالك

تنهد بارتياح وقال بثقة:

- ربنا..

نظرت له بعينين حائرتين فتابع قائلا:

- ربنا رزقنى حبك يا إيمان وأنا مكنتش لاقى تفسير لده .. لحد ما قربت منك اكتر واكتر وعرفت انت قد آيه قريبة من ربنا وانك بتلجأى له سبحانه وتعالى فى كل شىء كبير أو صغير ومبتشتكيش لحد غيره .. وساعتها عرفت معنى الحديث اللى بيقول (من كانت الآخرة همه جعل الله غناه في قلبه وجمع له شمله وأتته الدنيا وهي راغمة)

ساعتها بس عرفت ليه ربنا طوعك قلبى وبقيت احس بيكى فى دمي وان ربنا حط حبك فى قلبى ومن غير مقدمات لقيت نفسى بعشقتك ومبقتش اقدر استغنى عنك زى ما اكون بحبك من سنين

كانت ايمان تستمع إليه وعيونها تنطق بالحب والهيام ، تعلقت عينيها ببعضهما البعض لفترة طويلة وهما تبوحان بالكثير ، قطع صمتهم المتحدث هذا زفرته القوية وهو مازال يتفحصها وقال بعذوبة:

- هو مش احنا حضرنا وعملنا الواجب ماتيلى نمشى بقى

ضحكت وقال برقة:

- أحنا لحقتا !

قال بنظرة تعرفها جيدًا:

- أنا بقول نروح بقى.. أصل احنا مخلصناش موضوع السياحة بتاعنا

أبتسمت وقد احمرت وجنتاها وقالت:

- هو الموضوع ده مش هيخلص ولا ايه دى مكانتش كلمة دى

مط شفتيه وهو يمسح على وجنتها بيد ويضغط برفق على يدها الأخرى وقال :

- لا طبعا مبيخلصش .. أنا راجل بحب الأتقان و الشفافية !

\*\*\*

فجأه وبدون سابق أنذار شعرت مريم بالتوعك الشديد وهي تجلس إلى مائدتها هي ويوسف ، أمسك يوسف كتفيها وقال بقلق:

- مالك يا مريم

ظهرت علامات الألم على وجهها وقالت بصوت متقطع:

- مغمص بيقطع فى بطنى يا يوسف الحقتى

ساعدتها على النهوض ولف خصرها بزراعه وأسندها إليه برفق وهو يحاول أن لا يلاحظ أحد ما يحدث ، وبمجرد أن خرجت إلى الهواء استنشقت بقوة شديدة ثم بدأت فى التقيا إلى أن أفرغت ما فى معدتها حتى شعرت بالإعياء الشديد وخارت قواها ، كانت متشبثة به وهي تسير بجواره حتى وصلا إلى السيارة ثم سقطت مغشيا عليها.

هتف بها يوسف يحاول أن يعيدها إلى وعيها ولكنها لم تستجب له ، ازداد قلقه عليها ووقف حائراً هل يدخل لينادى أختها أو والدته أم يذهب بها إلى أى مشفى قريبة ، وأخيراً قرر أن يأخذها إلى أقرب مشفى منهم

حملها وأدخلها برفق فى المقعد الخلفى وانطلق بها وقلبه ينتفض خوفاً عليها ، ظل يبحث بعينه وهو يقود سيارته عن مشفى يمينا ويساراً تارة، وينظر إليها فى مرآته تارة أخرى وكلما ابتعد ولم يجد شيئاً ضرب المقود بقوة ، وأخيراً لاحت له من بعيد لوحة مضاءة كتب عليها اسم طبيبة ، لم ينتظر حتى يعرف تخصصها وإنما أوقف سيارته فى سرعة وخرج منها، فتح الباب الخلفى وأخرجها بحذر حتى لا تصطمم رأسها وأغلق الباب بقدمه بأهمال وصعد بها، بمجرد أن خرج من المصعد ووقع بصر بعض النساء اللاتى كن يجلسن بجوار باب العيادة حتى أسرعن إليه بتلقائية وأسندوها حتى غرفة الكشف الداخلية ، ألقت الطبيبة نظرة عليها وقالت بشك:

- حصلها أيه؟

قال بقلق:

- أحنا كنا معزومين فى فرح قريب من هنا وفجأة بطنها وجعتها أوى وبعدين بدأت ترجع جامد وأغمى عليها

فتحت الطبيبـة جفنيها ونظرت فيهما وشرعت فى فحصها ثم التفتت إلى يوسف قائلة:

- هو حضرتك تبقلها ايه

تلعثم فهل يقول زوجها أم طليقها فحسم الأمر قائلا:

- أنا جوزها

أرتباكـه لفت نظرها فنظرت له بريبة وقالت ببطء:

- طب اتفضل حضرتك استنى بره لحد ما اكشف عليها

خرج مسرعاً وأغلق الباب خلفه ، أستند برأسه إلى الحائط والقلق ينهش قلبه نهشاً، أخرج هاتفه واتصل على والده وأخبره بالأمر ، وبعد دقائق وجد حسين يخرج من المصعد ويقبل عليه بلهفة قائلا:

- خير يابنى

قال يوسف بلوعة:

- لسه الدكتورـة بتفوقها

نظر حسين إلى اللوحة على باب العيادة وقال بدهشة:

- وجايبها عند دكتورـة نسا ليه.. مودتهاش مستشفى ليه

نظر يوسف إلى اللوحة ثم عاد بنظره إلى والده وقال بضيق:

- هو انا لقيت حتة تانية يابابا ومودتهاش .. ده انا كل ما اسأل حد يقعد يبصلى ويبص عليها وهى نايمة ورا وبعدين يقولى معرفش.. وبعدين أكيد يعنى هتعرف مالها ماهى دكتورـة برضة

وبعد دقائق أخرى خرجت مريم وهى تستند إلى يد مساعدة الطبيبـة التى أوصلتها للخارج وأوقفتها بجوار يوسف ، أستندت مريم إلى ذراع عمها وهى تبكى بشدة وتنتفض، ضمها حسين بقلق قائلا:

- الحمد لله يابنتى انك فوقتى

قالت مساعدة الطبيبـة بابتسامة :

- الحمد لله كانت أغماءه عادية متخضوش كده...

ثم ربتت على ظهر مريم قائلة بعطف:

- نفسى اعرف بتعيطى ليه دلوقتى

قالت مريم من بين دموعها وهى تشيح بوجهها :

- مفيش ... لسه بطنى بتوجعنى شوية

ربتت على ظهرها مرة أخرى وقالت بابتسامة :

- طيب ماهو ده عادى ... مش الدكتوراه فهمتك كل حاجة !!؟

\*\*\*

### الفصل الحادى و الثلاثون

- حمد لله على سلامتك يا بنتى ،ده انا اتخضيت أوى لما يوسف كلمنى وقالى أنك أغمى عليكى

جففت مريم دموعها وهو مازال يضمها إلى صدره بحنان وقالت بخفوت:

- ربنا يخاليك ليا يا عمى متقلقش عليا .. الدكتوراه قالتلى ان يمكن اكون أكلت حاجة ملوثة و الحمد لله أنى رجعتها بسرعة

مسح حسين على رأسها قائلاً:

- الحمد لله يابنتى .. يالا اركبى علشان اوديكي البيت وارجع آخذ عفاف والولاد من الفرع شكلك تعبانة

تدخل يوسف قائلاً:

- أرجلهم حضرتك يا بابا علشان محدش يقلق .. وانا هوصلها

نظر لها حسين وكان يتوقع أن ترفض ولكنها قالت:

- خلاص يا عمى يوسف هيوصلنى

أبتسم وضمها للمرة الأخيرة وهو يربت على ظهرها قائلاً:

- طيب يا بنتي الحمد لله انى اطمنت عليكى .. يالا مع السلامة.. فى رعاية الله

أنتظرها يوسف حتى استقلت السيارة بجواره وانطلق بها عائداً إلى البيت ، كان يخطف النظرات إليها بين الحين والآخر، كانت تبدو مختلفة عن كل مره رآها فيها ، نعم مازالت شاردة واجمة وكأنها فى دنيا أخرى ولكنها مختلفة ، لم يستطع أن يقاوم فضوله الذى ألح عليه بشدة ليتحدث إليها :

- مريم

ألتفتت إليه وكأنه قد انتشلها من بئر عميق دفعة واحدة وقالت:

- ها .. قلت حاجة؟

قال مسرعاً قبل أن تهرب منه شجاعته:

- الدكتور كانت قلقانة مني وطلعتنى بره علشان تكشف عليكى.. مقاتلكيش حاجة.. بعد ما فوقتك

ألتفتت مرة أخرى تنظر أمامها وقالت بإقتضاب:

- سألتنى تقربلى أيه

قال وهو يخطف النظرات السريعة إليها:

- وقتلتها أيه

نظرت أمامها ولم ترد فشرع بسخافة سؤاله ، صمت مرة أخرى ، طال الصمت بينهما كثيراً ، حاول الحديث مرة أخرى قائلاً:

- أقولك على حاجة حصلت امبارح ومحدث يعرفها لغاية دلوقتى

أنتبهت لحديثه مرة أخرى وقالت :

- حاجة أيه؟

ظهر شبح ابتسامة على شفتيه وهو يقول:

- البت اللى اسمها سلمى لبست قضية تسهيل دعارة

أتسعت عيناها وشهقت وهى تضع يدها على فمها وأخذت تتمتم:

- لا حول ولا قوة الا بالله

ثم نظرت إليه بدهشة قائلة:

- وانت عرفت ازاي؟

أتسعت ابتسامته وهو يقول:

- ما هو انا اللى عملت الواجب ده معاها

لم تكذ تصدق ما تسمع وهى تنظر إليه بحيرة ، قطبت جبينها وقالت بضيق:

- وانت عرفت ازاي حاجة زى كده علشان تبلغ عنها أصلا

شرد وهو يقول ببغض :

- زى ما وليد عارف مداخلى وطريقة تفكيرى وعرف ازاي يقتعنى بكل اللى كان عاوزه ..

أنا كمان عارف مداخله كويس أوى .. علشان كده عرفت اوصله بسهولة واعرف هو راح

فين بعد ما ابوه طرده .. وساعتها كان سهل عليا اعرف انه عايش مع سلمى فى شقة

مأجرها .. فضلت وراهم لحد ما عرفت انهم بيشغلوا الشقة دى فى أعمال منافية للأداب ..

وفرصتى جات لحد عندى علشان أوفى بوعدى ليكى واخذلك حقك

كانت تنظر أمامها بذهول وهى تستمع إليه وقالت ببطء:

- يعنى وليد كمان اتقبض عليه

مط شفتيه وقال بحنق:

- مع الأسف نفذ منها .. الشقة طلعت متأجرة باسم سلمى وهى اللى لبست الليلة كلها

أسندت رأسها إلى زجاج النافذة وأخذت تنظر إلى الطريق من خلاله فى حسرة وهى تشعر

بالحزن لأجلها ... نعم هى ظلمتها وساعدت فيما حدث لها ولكن .. ليس من السهل أبداً أن لا

تشعر بالشفقة عليها .. أغمضت عينيها وهى تستغفر وتهمس بخفوت :

- للدرجة دى .. توصل بيهم لكده

تمتم قائلاً وكأنه لم يسمعها :

- بس مش هيفلت مني برضة

قالت دون أن تفتح عينيها :

- سيبيه لربنا... ربنا هو المنتقم الجبار

كاد أن يتكلم ولكن رنين الهاتف قاطعه ، نظر سريعاً إلى شاشة هاتفه قائلاً:

- ده بابا... لو سمحتى ردى يا مريم ..

نظرت إليه فقال:

- معلىش نسيت السماعة فى البيت

تناولت الهاتف وأجابته:

- السلام عليكم.. أيوا يا عمى ..لا أحنأ لسه فى الطريق.. أنتوا لسه طالعين دلوقتى؟.. لاء

أحنأ قربنا نوصل .. اه الحمد لله بخير.. ماشى يا عمى مع السلامة

وضعت الهاتف مكانة مرة أخرى فقال:

- هما طلعا من الفندق

أومأت برأسها قائلة:

- أيوا.. عمى بيقولى راح خدهم ومشى على طول وجايين ورانا

أبتسم بحزن قائلاً:

- طبعا هو بيتصل علشان يطمئنك انه جاى ورانا ومش هتروحي معايا البيت لوحدك

نظرت له ببرود ولم تجبه فتابع حديثه بسخرية حزينة قائلاً:

- أبويا خايف عليكى مني

قالت بجفاء:

- لو سمحت متكلمش فى الموضوع ده تانى

صمتت لثنائى ثم قالت وهى ترفع إحدى حاجبيها بتفكير :



- لا.. ولا اقولك .. أتكلم

نظر إليها متعجبا فتابعت ببرود وجراحة:

- أحكيلى عملت فيا آيه بعد ما أغمى عليا يوم الحادثة

ضغط مكابح السيارة حتى كادت أن ترتطم بزجاجها الأمامى لولا حزام الأمان التى كانت تلفه حولها ، بمجرد أن توقفت السيارة بعنف حتى استدار إليها فى غضب:

- أنتِ ليه بتحاولى تستفزينى وتخرجينى من شعورى كل شوية .. ليه كل ما احس ان ربنا قبل توبتى تفكرينى بذنبى تانى .

ثم عاد لجلسته الأولى وهذا قليلاً ثم انطلق بالسيارة مرة أخرى ، ظلا فى صمت مطبق إلى أن وصلا إلى المنزل ، دخل يوسف بالسيارة فى هدوء وهو ينظر يمناً ويسرة و يقول :

- هو نور الجراج مطفى ليه

شعرت مريم بخوف يدب فى أوصالها ويقشعر له بدنهما وهى تتذكر يوم الحادثة والظلام الذى كان يحيط بها فقالت فى فزع:

- مش عارفة

شعر يوسف بها وبصوتها المرتجف خوفاً فحاول طمئنتها قائلاً:

- خليكى فى العربية لحد ما انزل اشوف فى آيه

تشبثت بذراعها قائلة:

- لا متسبنيش لوحدى

فى هذه اللحظة لعن يوسف الظلام لعنات طوال ، فلولاه لكان ينظر الآن لعينيها ليرى هذا الشعور الذى تمنى أن يراه فيهما كثيراً ، شعورها بالأمان بجواره ، ربت على يدها بحنان قائلاً:

- متخافيش .

قالت على الفور :

- لاء ارجع بالعربية نستاهم .. زمانهم جايين

ضغط على يدها برفق وقال:

- طيب تعالى أدخلك من باب الجنينة اللى قدام وابقى ارجع انا اشوف ايه اللى قاطع النور فى الجراج واركن العربية واحصلك

تشبث به مرة أخرى وهى تقول بتوتر:

- لا ..هتسيبنى لوحدى وتروح لوحدك مينفعش

خفق قلبه بشدة للمستها وقال بهدوء:

- يعنى يرضيكى يرجعوا يلاقونى واقف مستنيهم علشان النور بايظ .. هيبقى شكلى وحش أوى

أضطربت كثيراً وترددت وهى تقول:

- خلاص هاجى معاك

كان يتمنى أن تتطول هذه اللحظة أكثر من هذا ولكنه أحب طمئنيتها أكثر من حبه لبقائه معها فقال بخفوت:

- طيب خلاص اطمنى عموما كلهم طالعين بعربياتهم يعنى الجراج فاضى ..هنور كشافات العربيه لحد ما اركن وبعدين انزل اشوف سكينه الكهربا

قالت وهى تبتلع ريقها الجاف :

- طيب

زحف بالسيارة قليلا داخل الجراج إلى أن وضعها جانبا ثم ترجل من السيارة وماهى إلا ثوان حتى سمعت مريم صيحة مكتومة لا تحمل سوى الألم :

- آآآآآآه

أرتدعت بقوة وهى تصرخ:

- يوسف

لم تلقى جوابا وهى ترى على ضوء السيارة ظلاً يركد خارج الجراج ويعدو نحو الباب الذى يفصل الحديقة الداخلية عن باب المرآب ، ظلت تصرخ باسمه :

- يوسف .. يوسف رد عليا ..

لم تستطع أن تنتظر أكثر من هذا ، خوفها عليه غلب فزعها من الظلام ، ترجلت من السيارة ببطء شديد وتعلو شهقاتها من شدة البكاء خوفا وفزعا وترقبا وعندما دارت حول السيارة سمعت صوت تأوهاتة المكتومة ، رآته يزحف بجوار السيارة فى اتجاهها وخيل لها أن قميصه قد تلطخ بالدماء ، أقتربت منه وجلست إلى الأرض بجواره وهى تهتف بلوعة :

- يوسف .. مالك؟

تمتم بأنفاس متقطعة :

- أنت كويسة؟

حاولت أن تساعد على النهوض ولكنها لم تستطع، وفجأة أقتربت أضواء كثيرة فى طريقها للدخول إلى الجراج ، وقفت تنظر إلى السيارات القادمة فتبين لها انها سيارات أخوتها وعمها ، فأخرجت كل ما فى صدرها من خوف وفزع كانت تكتمه فى صرخاتها وهى تصيح بهم :

- ألحقونا...ألحقونا

توقفت السيارات وترجل منها الجميع فى فزع باتجاه الصوت ، أول من وصلا إليها كان إيهاب وعبد الرحمن ، صرخت عفاف وهى تسرع باتجاه يوسف المسجى على الأرض مدرج فى دمائه وبجواره مريم تسند رأسه على ركبتيها ، صاحت بها :

- مين عمل فيه كده يا مريم ...

أسرع عبد الرحمن بالاتصال بسيارات الأسعاف بين صرخات وشهقات النساء، وإيهاب يهتف به:

- مش هينفع نستنى لما الأسعاف تيجى تعال شيله معايا نوديه أقرب مستشفى

وماهى إلا ثوان وسمع الجميع صوت ارتطام شديد اهتزت له الأرض التى يقفون عليها وكأن المنزل انهار بأكمله أو ضربه زلزال شديد ، وبعد ساعة كانت سيارات النجدة والأسعاف تحيط بمنزل آل جاسر

\*\*\*

وقف الجميع فى الممر المؤدى إلى غرفة العمليات التى يرقد يوسف داخلها ، أخططت مشاعرهم بين الحيرة والتسائل والفرع والخوف والألم والحزن ، تحركت إيمان باتجاه عفاف التى كانت تبكى بين ذراعى زوجها وتتمتم بالدعاء وقالت هى تربط على ظهرها:

- أنتِ مكانك مش هنا دلوقتى يا طنط .. تعالى نروح نصلى وندعيه لحد ما الدكتور يخرج يطمنا

نظر حسين إلى إيمان ثم نظر إلى عفاف وقال وهو يجفف دموعه:

- أسمعى كلامها يا عفاف .. روى صلى وادعيه احسن من وقفتك هنا مية مرة ولما الدكتور يخرج هاجى اندهلك على طول

أومات برأسها وقالت وهى تبتعد عنه وهى تبكى :

- أول ما يخرج تعالى على طول

- حاضر

ذهب عبد الرحمن إلى والده قائلا:

- بابا تعالى اقعد شوية انت واقف على رجلك من بدرى

أستند حسين إلى ذراعه قائلا:

- أرتاح ازاي بس مش لما نطمن على اخوك

قبض عبد الرحمن قبضته فى غضب وعينيه تحرق بالفراغ قائلا:

- أنا غلطان اللى سمعت كلام ماما وإيمان وسيبته.. كان المفروض اعلمه الأدب .. وادى النتيجة.. يضرب اخويا بسكينة فى الضلمة ... الجبان

شد حسين على ذراعه وقال:

- أمسك نفسك يا عبد الرحمن .. أهو ربنا اداله جزاءه.. فى ساعتها

ثم انتبه متسائلا:

- عمك لسه ما اتصلش؟

حرك عبد الرحمن نفيا قائلا:

- آخر مره كلمنى كان من ساعة ولسه واقفين قدام العمليات .. ربنا ياخده ونرتاح من شره  
قال حسين على الفور بضعف:

- متدعش عليه يا عبد الرحمن.. ده عمك ممكن يروح فيها .. روح يالا شوف اختك..  
جوزها مش عارف يسكتها ..

وقبل أن يذهب عبد الرحمن ألتفت إليه قائلاً بانتباه:

- فين مريم؟

تلقت حسين حوله وقال :

- كانت هنا من شوية .. روح انت حاول تهدي اختك وانا هادور عليها

كانت تجلس على الأرض بجوار غرفة العمليات وهى ضامة ساقها إلى صدرها وتستند  
رأسها إلى الحائط للخلف وقلبها يتمزق لوعة عليه ، تسكب دمعها وهى تتمتم بتضرع إلى  
الله سبحانه وتعالى فى خفوت:

- يارب نجيه.. يارب انا مسمحاه على أى حاجة يارب نجيه يارب ... يارب علشان خاطرى  
أقترب حسين منها ووضع يده على كتفها قائلاً :

- قومى يا مريم قومى يابنتى ..

رفعت رأسها إليه وهى تقول ببكاء متقطع:

- يوسف يا عمى .. يوسف هيضع

أنهمرت دمة كانت حبيسة عينيه وأطلقتها كلمات مريم ، أمسك كتفها وساعدها على  
النهوض واقفة ، ضمها إليه وهو يمسح على رأسها بوهن:

- أدعيله يابنتى.. أدعيله ربنا ينجيه

قالت وهى تسكب العبرات فى صدره :

- والله العظيم بدعيله من كل قلبى

رفع رأسها إليه ونظر إليها بضعف ورجاء قائلاً:

- سامحيه يا مريم سامحيه علشان ربنا يسامحه

قالت فى خفوت:

- أسامحه على أيه يا عمى .. يوسف معملش حاجة

قال فى أسى:

- انا قصدى على الحادثة يابنتى...

ثم تركها واستند إلى الجدار بكفه وأطرق برأسه بحزن قائلاً:

- أنا عارف ان اللى عمله صعب تسامحيه عليه .. وعارف انك عمرك ما هتنسى أبداً .. لكن

ده دلوقتى بين إيدين ربنا ومحدث عارف هايطلع منها ولا لاء

تقدمت منه ووضعت كفها على كتفه قائلة:

- أرفع راسك يا عمى متعملش كده فى نفسك.. مفيش حادثة من الأساس يا عمى .. يوسف  
لمسنيش

\*\*\*\*\*

## الفصل الأخير

ألتف الجميع حول فراش يوسف فى غرفته بداخل المشفى وهم يستمعون إلى الطبيب الذى  
يتكلم بابتسامة مطمئنة:

- الحمد لله .. الجرح مكنش عميق بدرجة خطيرة .. مش محتاجين العناية المركزة

فتح يوسف عينيه بضعف ، كانت الصورة مشوشة أمامه غير واضحة المعالم بعد وبعد دقائق استطاع الكلام بوهن فقال وكأنه يهزى:

- مريم.. أنتِ هنا؟

أقتربت منه وربتت على كفه بهدوء قائلة بخفوت:

- حمد لله على السلامة

حاول أن يستوضح ملامحها بصعوبة وأعاد سؤاله مرة أخرى:

- حصلك حاجة؟

قالت بصوت مبجوح:

- الحمد لله انا كويسة.. المهم انت

أبتسم بضعف وهو يغمض عينيه بألم فأقبلت والدته فى لهفة وهى تقبل رأسه وتقول :

- ألف حمد لله على سلامتك يابنى .. أنا مش عارفة ده كان مستخبلنا فين

بدأت الصورة تتضح أمام عينيه وهو ينظر لوالدته وقال بضعف يحاول أن يداعبها:

- كان مستخبلنا فى الجراج

قالت فرحة التى تجلس عند قدمه على طرف الفراش:

- انت فيك حيل تهزر يا أخى موتنا من الخوف عليك

تابع عبد الرحمن قائلا:

- ياستى سبيه يهزر الحمد لله انه كويس

بحث يوسف عن وجه أبيه بين الوجوه الدامعة :

- فوجده مصوباً بصره إليه بلهفة وابتسامة حزينة ، تعلق أنظارهما ببعضهما البعض ، شعر

يوسف أنه أحب تلك الطعنة لما رآه أخيراً من عطف أبيه الذى كان يفتقده، فلقد كانت لها

الفضل عليه أن يسترجع نظرة حنان فى عيني أبيه ، كان ينظر إلى عينيه ينتظر كلماته

الحنونة، لم يبخل عليه والده ولم يجعله ينتظر قليلا فقال:

- حمد لله على سلامتك يا بنى

تنهد يوسف بارتياح وقال وهو ينظر إليه بحب:

- الله يسلمك يا بابا

قبض على كف مريم بوهن وهو يوجه حديثه لعبد الرحمن:

- وليد هو الذى عمل كده صح؟

قالت فرحة على الفور:

- والحمد لله ربنا انتقمك منه فى ساعتها والأسانسير وقع بيه

أتسعت عيناه بذهول وقال بدهشة كبيرة:

- أيه ... أسانسير أيه.. وحصله أيه؟!!

أجابه عبد الرحمن بهدوء:

- أسانسير البيت عندنا يا يوسف

تدخل إيهاب قائلا:

- نفسى أعرف كان طالع البيت يعمل أيه.. الذى يعمل عملته دى كان المفروض يهرب طالما

محدث شافه.. أيه الذى خلاه يطلع البيت مش عارف

قالت ايمان بثقة:

- أكيد ربنا ليه حكمة فكه

تنهدت عفاف وهى تقول:

- ونعم بالله يابنتى

اكتسى وجه يوسف حزنا وهو يتسائل:

- وحصله أيه لما الاسانسير وقع بيه

قال عبد الرحمن:



- الأسعاف نقلته المستشفى بعد ما عرفوا يفتحوا باب الاسانسير بصعوبة.. لكن انا مش عارف ده حصل ازاي .. أحنا لسه كنا عاملين صيانة وكانت حالة الأسانسير ممتازة.. ازاي يقع فجأة كده

وجه له والده الحديث قائلا:

- أتصلت بالشركة بتاعة المصاعد ؟

أوما عبد الرحمن برأسه قائلا :

- أتصلت بعد ما يوسف خرج على طول.. وأصلا كده المفروض النيابة هتبدأ تحقيق فى الموضوع .. وكانوا مستنين يوسف لما يفوق علشان ياخدوا أقواله ..

وبعد ساعتين وهم جلوس حول يوسف، طرق إبراهيم الباب ودخل وهو يتوجه ليوسف مباشرة:

- حمد لله على سلامتك يا يوسف يابنى

نظر إليه الجميع ، كان كأنه يحمل جبال فوق كتفه وهم الدنيا فوق صدره وكان المشيب قد زحف إليه بعنف على حين غرة ، جلس على طرف الفراش بجوار يوسف قائلا بأسى:

- ربنا خدلك حقك يابنى

ونظر إلى مريم وقال:

- وانتِ كمان يابنتى .. ربنا خدلكوا حقكوا انتوا الاتنين

طأطأ رأسه وقال بآلم:

- الخبطة كانت شديدة أوى .. جاله شلل نصفى

تسمر الجميع وكان عقارب الساعة قد توقفت فجأة ، اتسعت عيونهم فى ذهول وعدم تصديق وهو يتابع بحزن:

- من ساعة ما فاق وعرف اللى جراه وهو بيصرخ من الحسرة والندم .. ده غير الألم اللى حاسس بيه

ثم التفت إليهم مقرأ بذنوب ولده قائلا:

- كان موسى امه تنقله الأخبار.. ولما قالتله ان مريم تعبت ويوسف خادها البيت لوحدهم ..  
سبقنا على هناك وعمل الى عمله .. لا وطلع علشان يسرقنى كمان  
اقترب منه حسين وأمسك كتفه قائلا:

- انت راجل مؤمن يا ابراهيم .. وان شاء الله ابنك يقوم منها .. أصبر وأحتسب

\*\*\*

فى الصباح حضر وكيل النيابة ليأخذ أقواله قائلا:

- أنت شفت اللى ضربك يا يوسف؟

نظر له يوسف بصمت ثم قال بحسم وهو يهز رأسه نفيا:

- لاء... الدنيا كانت ضلمة مشوفتش حد

خرج وكيل النيابة من غرفته ودخل الجميع إليه متسائلين ، قال حسين:

- قلت ايه يا يوسف

أبتسم يوسف وهو يقول:

- هقول ايه يا بابا ..هو انا شفت حد علشان اقول عليه

أبتسم والده وهو يربت على كتفه قائلا باعتزاز:

- راجل يابنى ..

حاول يوسف أن يحرك ذراعه الأخرى ليمسك يد أبيه ويقبلها ولكن جرحه آلمه ، قال حسين  
وهو ينظر إليهم :

- يالا يا جماعة الحمد لله اننا اطمنا عليه

ثم نظر إلى عبد الرحمن وياهاب قائلا:

- يالا روحوا ده محدش فيكم نام من امبارح .. أنا هقعد معاه

قال عبد الرحمن على الفور:

- معلى حضرتك يا بابا.. روحهم انت وانا هستنى

تدخلت عفاف قائلة:

- محدش هيفضل مع ابنى غيرى .. روحوا انتوا

قاطعهم يوسف بأشارة منه وقال مبتسما :

- يا جماعة روحوا كلوكوا .. أنا لو احتاجت حاجة هبقى انده على الممرضة

ألتفتت مريم إليه لتتكلم أخيراً قائلة :

- وتنده على ممرضة ليه.. أنا هفضل معاك

خفق قلبه مع ابتسامته فلم يعلم أيهما سبقت الأخرى ، كل ما كان يدركه هو الدهشة فلم يكن يتوقع أن تفصح عن رغبتها فى البقاء معه، بل لم يكن يحلم وهو يلوح الغيرة فى عينيها من امرأة أخرى

قالت عفاف بارهاق:

- يا بنتى روحى انت.. شكلك تعبانة أوى ..

قاطعها حسين بابتسامة لامعة:

- لا يا عفاف .. مريم معاها حق ..هى اللى المفروض تقعد معاها .. يالا احنا نروح البيت نريح شوية ونشوف هنعمل ايه ونبقى نرجلهم تانى

ودعه الجميع بعد أن اطمنوا عليه أما هو فقد نام طويلاً بعد تناوله الدواء وعندما استيقظ وجدها تغفو على مقعدها بجوار فراشه الأبيض ، ألتفت إليها وناداه بلهفة وعندما استيقظت قال بهدوء:

- قربى الكرسي بتاعك من السرير

نهضت واقفة وتمطت بتكاسل ثم وضعت مقعدها بجواره وجلست فقال وهو ينظر لعينيها بعمق :

- مروحتيش ليه

تجنبت النظر إليه وهى تقول:

- المفروض انى اكون معاك

قال على الفور:

- الكلام ده لو لسه مراتى.. لكن انتِ اللى صممتى على الطلاق

نظرت له بتحدى قائلة:

- وانت مصدقت وطلقتنى

أبتسم من طريقتها الطفولية فى الحديث نظرتها قائلاً:

- أنا كنت متمسك بيك لآخر لحظة ومقدرش الومك.. واهو ربنا خدك حقك .. وفنفس

الظروف .. يوم فرح .. وبالليل والدنيا ضلمة

تنهد فى ارتياح وقال:

- الحمد لله ان ربنا خلص منى فى الدنيا .. مش ناقص غير حاجة واحدة بس...

لمس يدها وهو يقول:

- أنك تسامحينى من قلبك

رفعت رأسها إليه قائلة بتلعثم :

- أنا سامحتك من قلبى فعلاً

قبض على يدها بضعف وهو يتأملها وقال ببطء:

- مريم.. لو رديتك .. هتحسى انى رجعتك غصب عنك؟

حاولت سحب يدها ولكنه تمسك بها وقال برجاء:

- أنا مش قادر اضغط .. متسحبيش ايدك ...كده هتتعبينى

قالت بصوت يسمعه بالكاد:

- طيب سيب أيدى

تمسك بها أكثر قائلاً بحب:

- لما تردى عليا الأول.. انتِ عندك استعداد تكملى حياتك معايا وتنسى اللى فات؟

صمتت ولم تجبه ، كانت تشعر بأن قلبها سيقفز من صدرها من فرط الإنفعال والإضطراب والخجل ، حاولت أن تهرب من حصار عينيه ولكنها لم تستطع ، كانت نظراته تحيط بها من كل اتجاه ، تحتويها بل وتفصلها عن حولها

قاطعتهم طرقات خفيفة على الباب، يتبعه دخول الطبيب الذى أخذ يفحص يوسف الذى لم يرفع بصره عن مريم، وبعد أن انتهى الفحص وخرج الطبيب ، توجهت مريم إلى ركن من أركان الغرفة لتصلى

تعمدت أن لا تنظر إليه وهى تتوجه إلى الفراش المقابل له ، صعدت إليه واسندت بظهرها وهى تغمض عينيها بأرهاق يبدو على ملامحها بشكل واضح فقال يوسف :

- شكلك مرهق أوى.. نامى انتِ ارتاحى شوية

قالت وهى تسحب الغطاء وتتدثر به جيداً:

- هنام ساعة بس .. لو احتاجت حاجة صحنى بسرعة متترددش

قال مداعبا وهو لا ينظر إليها:

- لالا نامى انتِ ولو احتجت حاجة هبقى اقول للممرضة

أعدلت لتجلس مرة أخرى فقال وهو يشير لها أن تعود كما كانت:

- بهزر والله .. نامى .. أنا كمان محتاج ارتاح شوية

\*\*\*

فى اليوم التالى صباحا كان حسين هو أول من طرق باب غرفة وليد فى المشفى ودخل بعد سماع الأذن بالدخول ، لم يكن هناك أحد بالغرفة سوى وليد المسجى على الفراش ووالدته تجلس بجواره تبكيه ، فقال بحرج:

- السلام عليكم

فتح وليد عينيه على صوت عمه فلم يستطع مواجهته ، كانت آلامه رهيبة ولكن رؤيته لعمه جعلته يشعر وكأن الهواء انقطع من الغرفة فجأة ، وأخيرا تكلم حسين قائلاً بجمود:

- حمد لله على السلامة

وقفت فاطمة فى حرج وهى تتمتم :

- الله يسلمك يا حاج حسين ..أفضل

قال بهدوء:

- لا متشكر مفيش داعى .. أنا جيت بس أطمئن على وليد واقله ان ابن عمه قال فى التحقيق انه ماشفش اللى ضربيه وكان هيموته.. ياريت لو حد سألکوا تقولوا نفس الكلام سواء من النيابة ولا من غيرها...

أطرت فاطمة برأسها ولم ترد فقال حسين:

- حمد لله على السلامة مرة ثانية.. سلام عليكم

خرج حسين من الغرفة وقبل أن يصل للمصعد وجد إبراهيم مقبل عليه من بعيد فوقف ينتظره ، سبقتة عينيه ونظراته المتسائلة قبل أن يصل إليه بجسده ، وما إن وقف أمام أخيه قال:

- انت كنت بتزور وليد ؟

أوما حسين برأسه قائلا:

- ده واجب مهما كان .. وبرضة كنت باعرفه يوسف قال أيه فى التحقيق.. علشان تحت أى ظرف يبقى عارف انه مش متوجهله أى تهمة

زفر إبراهيم بارتياح وقال بامتنان:

- أنا مش عارف اقولك ايه يا حسين.. بس انت عارف ان يوسف احسن عندى من ابنى

ربت حسين على يده قائلا:

- المهم دلوقتى أخبار فريق العمال اللى جاين علشان الأسانسير أيه.. وصلوا للسبب؟

قال إبراهيم بحيرة:

- هما خلاص بيخلصوا ومعاهم كمان ناس من الحكومة بيطلعوا على التقارير النهائية

قال حسين فى قلق:

- والنتيجة ايه؟

قال إبراهيم وقد خلا وجهه من كل تعبير:

- قضاء وقدر

نظر له حسين بتمعن وقال بدهشة:

- معقول؟.. يعنى مفيش سبب معين

حرك إبراهيم رأسه نفيا وقال:

- بكرة المحرك فلتت من غير أى سبب واضح .. ومنقدرش نتهم الشركة بأى حاجة لأن مفيش أى عيب يخص الصيانة أو التركيب

ثم نظر إلى أخيه نظرات مضطربة حزينة فقال حسين :

- عاوز تقول حاجة يا ابراهيم

فقال على الفور بانكسار:

- سامح وليد يا حسين .. اللى وصله ده غلطتى انا وامه مش غلطته هو لوحده .. سامحه وخلقى يوسف يسامحه... يوسف راجل وكفاية انه قال انه ميعرفش مين اللى ضربه

وضع حسين يده على كتف أخيه قائلا:

- ربنا يسامحنا كلنا يا ابراهيم.. احنا محتاجين نسامح بعض علشان ربنا يسامحنا.. يلا استأذن انا بقى علشان اروح أطل عليه.. سلام عليكم

ذهب حسين بينما دخل إبراهيم حجرة وليد فوجد الطبيب يتم فحصه وعندما انتهى سألته فى رجاء:

- أيه الأخبار يا دكتور.. هيقدر يمشى تانى ولا لا؟

أوما الطبيب برأسه وهو يدون ملاحظاته عن حالة وليد وقال:

- يا حاج انت بتسأل عن حاجة لسه بعيدة أوى احنا لسه يدوب فى البداية .. والحالات اللى زى دى بتاخذ وقت طويل لحد الشفا الكامل وده محتاج جهد وصبر واستعانه بالله

خفض إبراهيم رأسه وهو يقول :

- ونعم بالله يا دكتور..

ربت الطبيب على كتفه وخرج من الحجرة وتركهم، جلس إبراهيم بجوار زوجته وهو ينظر لولده الممدد أمامه على فراش المرض ، حالته غير مستقرة، آلامه متواصلة ، قلبه يعتصره الألم حزنا وندما، فلم يكن له الأب الناصح المربي الحنون ، وإنما انشغل وتركه هو وأخته وتصور أن جمع المال هو أقصى جهد يمكن بذله من أجلهم، نسي دوره الأصلي ، حتى زوجته لم يعاملها كما يجب ليصلح أخطائها وعيوبها، وإنما كان يتركها ويهرب منغمسا في عمله ، شعر أنه المسؤول الأول والرئيسي عن ما وصلوا إليه جميعا ، أخذ يستغفر ويسترجع ويدعو الله أن يساعده ويقويه في طريق إصلاح ما تركه يفسد طيلة السنوات الماضية

\*\*\*

طرق حسين باب حجرة ولده في المشفى ودخل إليه مبتسما ، أقرب من فراشه وقال بابتسامة حانية:

- أزيك النهاردة يا يوسف

حاول يوسف النهوض أو الاعتدال في فراشه ولكن والده ساعده في العودة كما كان في وضع الاستلقاء وهو يقول:

- خليك يابنى متتعيش نفسك

قال يوسف بسعادة لرؤية أبيه:

- الله يسلمك يا بابا ..انا بخير طول ما حضرتك راضى عنى

وضع المقعد بجوار فراشه وجلس عليه وهو يقول:

- ربنا يرضى عنك وعنا يابنى ...

ثم قال وهو ينظر إلى الفراش الآخر:

- مريم فين؟

قال يوسف بابتسامة:

- فى الحمام بتتوضا



- وهى عاملة ايه دلوقتى كان شكلها تعبان أوى امبارح

خرجت مريم من الحمام وهى تجفف يدها من أثر ماء الوضوء ، أبتسمت وهى تنظر إلى عمها وذهبت إليه تصافحه فقبل جبينها وهو يقول:

- عاملة أيه النهاردة.. شكك اتحسننى عن امبارح كثير الحمد لله  
قالت بابتسامة رضا:

- الحمد لله يا عمى .. كنت مرهقة بس مش أكثر

قبلها على رأسها مجدداً وهو يهمس لها بخفوت :

- قولتيله ؟

حركت رأسها نفيا بينما قال يوسف:

- انتوا ساببنى هنا وواقفين تتكلموا.. المفروض ان انا المريض على فكرة

قال حسين وهو يتجه إلى مقعده مرة أخرى ويجلس عليه:

- متستعجلش دلوقتى تلاقى اخواتك وامك طابين عليك

ذهبت مريم إلى ركنها الذى اتخذته مصلى فى الحجرة ووقفت تصلى ، فنظر يوسف لأبيه وقال بصوت منخفض بعض الشيء:

- بابا لو سمحت انا عاوز ارد مريم بس مش عاوز يبقى غصب عنها ومش عارف اعمل أيه  
تفحصه أبيه وقال بنفس النبرة الخفيفة:

- ومسألتهاش ليه

مط يوسف شفتيه فى تبرم قائلا:

- سألتها مردتش عليا.. مرضتش أحاول معاها كثير علشان متحسش انى بضغط عليها  
بتعبى واللى حصل ده..

وأستدرك قائلا برجاء خجل:

- ممكن حضرتك تكلمها وتحاول تقنعها

حسين:

- أنا رأيى انك تستنى لما ربنا يتم شفاك وتخرج من المستشفى وترجع البيت .. ساعتها تكلم معاها تانى وهيبقى ليها وقتها حرية الرفض أو الموافقة.. لكن انا لو كلمتها هتفتكر ان دى رغبتى وممكن توافق علشان متزعلىش

أنتهت مريم من صلاتها وجلست تتلو الأذكار، طرق الباب ودخلت عفاف مسرعة إلى ولدها جلست جواره تتحسسه بلهفة:

- عامل ايه يا حبيبى النهاردة.. أنا كنت هموت واجيلك من بدرى بس ابوك منعنى أخذ يد أمه وقبلها قائلا:

- الحمد لله يا ماما متقلقيش انا بقيت زى الحصان

أطل إيهاب برأسه إلى الداخل قائلا بابتسامة مرحة:

- صباح الخير يا مطعون

ضحك يوسف وهو يتحسس جرحه قائلا:

- بطل تضحكنى يا جدع انت حرام عليك .. الجرح بيألمنى لما بضحك

تبعته فرحة التى لحقت بأمها بجواره تطمئن عليه وقالت:

- ايمان وعبد الرحمن بره ومعاهم وفاء وجوزها

نظر حسين إلى إيهاب قائلا:

- خليه يدخلوا يابنى

وقفت وفاء أمامه بعينين دامعتين وقالت بخجل:

- حمد لله على السلامة يا يوسف ربنا يقومك بالسلامة

قال بابتسامة صافية:

- الحمد لله يا وفاء انا كويس ..

بينما قال عماد بدهشة :

- أنا مش عارف ايه اللي حصلكوا ده .. انت ووليد فى يوم واحد حاجة غريبة فعلا  
قال عبد الرحمن مقاطعا:

- قدر الله وماشاء فعل ربنا يقومهم بالسلامة هما الاتنين  
واستدرك قائلا:

- تعال معايا نجيب للجماعة دول حاجة يشربوها بدل ما يدعوا علينا ولا حاجة  
نهضت وفاء قائلة:

- لا مفيش داعى يا عبد الرحمن احنا ماشين على طول  
قال عبد الرحمن بتصميم :

- لا مينفعش .. يالا يا أستاذ عماد

خرج عماد وعبد الرحمن وأغلق الأخير الباب خلفه فقالت وفاء:

- أنا عرفت اللي عملته مع وليد فى التحقيق يا يوسف .. حقيقى انت راجل أوى .. وطول  
عمرى شهم ... وانا عارفة انى موقفى صعب لأنى أخته لكن انت عارفنى كويس ..  
ولم تستطع أن تتحدث أكثر وبدأت دموعها فى الحديث عنها فقالت عفاف:

- متعيطيش يابنتى .. انت طول عمرى قريبة مننا وعارفينك كويس واخوكى ربنا يسامحه  
ويسامحنا كلنا

قال يوسف مستكملا لحديث والدته:

- متعيطيش يا وفاء دموعك غالية عندي .. وانت عارفة مكانتك عندي كويس مش محتاجة  
تتكلمى الكلام ده ..

نظرت له مريم نظرة ذات معنى وجلست بعيداً وهى تشعر بالحنق من كلماته لها بينما قالت  
إيمان:

- الحمد لله الدكتور طمنا قبل ما ندخلك وقالنا بالكثير يومين تلاتة وتخرج بالسلامة

ذهبت وفاء وزوجها وانصرف الجميع عند انتهاء الأوقات الرسمية للزيارة وبقيت مريم  
مرافقة له ، جلست على الفراش الآخر بجواره وفتحت المصحف وبدأت بالقراءة فى همس

جعل ينظر إليها وهي تقرأ وكلما واتته الفرصة ليقاطعها ويطلب منها العودة تخونه شجاعته  
ويصمت في تردد حتى انتهت ووضعت المصحف وقامت لصلاة العشاء وبعد أن انتهت من  
أذكار الصلاة ونهضت متجهة إلى فراشها مرة أخرى قال سريعاً:

- مريم..

ألتفتت له فقال:

- ممكن تحطيلي المخذة ورا ظهري ..عاوز اتعدل علشان اصلى انا كمان

ترددت لحظات فقال:

- خلاص لو مضايقتك...

قالت متلعثمة :

- لا.. مفيش مضايقة ولا حاجة

كان لابد أن تتخذ وضعاً معيناً لكي تستطيع أن تساعد على الإتكاء قليلاً لتضع الوسادة خلف  
ظهره فابتعدت مرة أخرى مترددة في ارتباك وخجل فقال لها :

- طيب خلاص ارفعي السرير مش لازم مخدة

وعندما انتهى من صلاته التفتت إليه وقالت :

- تحب انزلك السرير شوية

أبتسم وهو يحرك رأسه نفياً قائلاً:

- لا متشكر.. انا اصلى مش جايلى نوم دلوقتى

تتحننت في حرج وهي تقول بارتباك:

- طبعا انت مش زعلان من وفاء .. صح

نظر إليها قائلاً:

- وهزعل منها ليه وهي ذنبها أيه.. وفاء طول عمرها بنت كويسة أوى

شعرت بالحنق مرة أخرى وظهر ذلك على نبرة صوتها وهي تقول:

- اه ما انت قتلها كده

ونظرت له نظرة جانبية وهى تستدرك قائلة:

- وأكثر من كده كمان

راوده أحساس بالسعادة عندما لمح الغيرة فى صوتها ونظر إليها بعمق يتأملها ويتفحص معالم وجهها المضطرب وقال بخفوت:

- قتلها أيه مش فاكـر

قالت باندفاع وهى تلوح بضجر:

- قتلها دموعك غالية عليا أوى وانتِ عارفة مكانتك عندى كويس

منع الأبتسامة التى كانت تريد القفز على شفـتيه حتى لا يقطع عليها استرسالها الحائق على كلماته لوفاء وقال بهدوء:

- ماهى فعلا طول عمرها ليها مكانة عندى

لم تلحظ استدراكه لها فقالت بضيق:

- ومتجوزتهاش ليه بقى لما بتحبها أوى كده

لم تستطع الأبتسامة الصبر أكثر من هذا ، خدعته وقفزت على شفـتيه رغما عنه وهو يقول:

- أنا قلت برضة أنى بحبها.. جبـتى الكلام ده منين

رأت ابتسامته وشعرت بمراوغته فى الحديث فأشاحت بوجهها بعيداً ولم تجبه ، فأردف قائلاً وهو يتفحصها بابتسامته العذبة:

- أنا محبتش غير واحدة بس ... وبدعى ربنا فى كل وقت انها تسامحنى وترضى ترجعلى  
تانى

سحبت غطاءها وهى تنظر بعيداً عنه وقالت باقتضاب:

- تصبح على خير

قال ببراعة مصطنعة :

- يعنى هتسببى متعلق كده .. طب نزليلى السرير الأول كده ظهري هيوجنى

نهضت مرة أخرى واتجهت إلى فراشه فقال مشاكساً:

- طب ممكن تظبطيلى المخدة دى تحت راسى.. مش مرتاح خالص

قالت وهى ترفع رأسه بيد وتحرك الوسادة باليد الأخرى :

- أنت شكلك بتدلع على فكرة

أمسك يدها وجذبها إليه برفق فشعرت بأنفاسه تلفح وجهها وهى تحاول الاعتدال ولكنه لم يسمح لها واستنشق عبيرها وقال بصوت رخيم:

- أنا رجعتك لعصمتى يا مريم

ثم فك أسر يدها فاعتدلت وقد شعرت بسخونة تسرى فى اوصالها اقشعر لها بدننها وكأن نبضات قلبها أخذت تبطئ شيئاً فشيئاً مما أشعرها بالدوار ، لكنها لم تغضب ولم تستنكر ما قاله ، خطت نحو فراشها وصعدت بصعوبة وتدثرت ، جملة واحدة منه جعلتها تذوب بعضها فى بعضها ونامت فى ثوان معدودة كأنها غابت عن الوعي

\*\*\*

فى اليوم التالى فحصه الطبيب وقال بابتسامة :

- والله أنت بطل يا يوسف .. ماشاء الله عليك

قال يوسف على الفور:

- هخرج أمتى طيب يا دكتور

أبتسم الطبيب وقال:

- مستعجل أوى كده ليه

قال يوسف بشغف:

- الله يخالك يا دكتور أنا أصلى بكره القاعدة الطويلة دى وعاوز ارواح بيتنا بقى

دون الطبيب ملاحظاته قائلا:

- خلاص خالك النهاردة بس وروح بكره الصبح لو عايز.. وقوم اتمشى لو الراقدة مزهقاك  
اوى كده

زم شفتيه تبرما ثم قال:

- طب مينفعش اروح اتمشى فى بيتنا .. أنا والله حاسس انى بقيت كويس  
زفر الطبيب بنفاد صبر ثم ابتسم له قائلا:

- أنت ملكش حل بجد.. لكن عموما هكتبلك على خروج اخر النهار ...  
حاول يوسف الكلام ولكنه قاطعه قائلا:

- ومفيش خروج قبل كده... فاهم

ثم نظر إلى مريم وقال:

- تعالى يا مدام لو سمحتى علشان افهمك هتتعاملى مع الجرح ازاي بعد ما يخرج وربنا  
يقدرك عليه... بصراحة جوزك ده لا يُحتمل

أبتسم يوسف وشعر بالبهجة ، أخيرا سيعود لمنزله بصحبة زوجته ليبدأ معها حياة جديدة لن  
يشوبها إلا ما حدث فى الماضى ، فهل من الممكن أن يرأب هذا الصدع فى يوم من الأيام؟!

وفى المساء كان يخطو خطواته الواهنة بعض الشيء داخل بيته وعبد الرحمن يساعده إلى  
الصعود إلى فراشه والجميع ملتف حوله فى سعادة مرحبين بعودته لمنزله سليماً معافى.

بعد أن اطمأنت مريم لأستغراقه فى النوم، فتحت خزانها بهدوء وأخذت ملابسها وأغلقتها  
بهدوء ، دخلت الحمام واغتسلت وبدلت ملابسها وخرجت وهى تجفف شعرها بالمنشفة،  
فوجئت به يجلس على طرف الفراش ينتظرها ، تعثرت قليلاً فى خطواتها ثم استعادت  
توازنها بسرعة واتجهت إلى المرأة لتمشط شعرها ، فقال وهو ينظر لصورتها المنعكسة فى  
المرآة:

- مريم .. لو سمحتى تعالى غيرىلى على الجرح

ألفت إليه بدهشة وقالت :

- الدكتور لسه مغيرك عليه الصبح!

قال بعناد مشاكساً:

- لا مش مرتاح ، حاسس ان فى حاجة مش طبيعية.. لو سمحتى تعالى شيليه ، حاسس ان فى نملة بتقرصنى

تنهدت بتعجب قائلة:

- نملة !! ..أظهر الدكتور كان عنده حق لما قالى ربنا يصبرك عليه

وضعت المنشفة وأحضرت الأدوات الطبية ، وضعتها بجوارها على طاولة صغيرة بجوار الفراش وقالت :

- طيب فك زراير القميص لو سمحت

تصنع الألم وهو يقول:

- مش قادر يا مريم .. ممكن تفكيهاالى انتِ

ونظر لها برجاء وقال:

- من فضلك

جلست أمامه وشرعت فى فك الأزرار بارتباك، حاولت أن تسرع ولكن سرعتها جعلتها ترتبك أكثر وتتعثّر ، كان فى قمة سعادته من قربها منه إلى هذه الدرجة ، وأخذ يتأمل شعرها الندى الذى مازال تعلق به قطرات الماء ود لو أنها تعثرت أكثر لتبقى ، قال بعث ليربكها أكثر وهو يتأملها :

- كل ده بتفكى كام زرار

قالت بارتباك وقد أحمرت وجنتاها :

- أهو خلاص خلصت

أنتهت وقامت بمساعدته فى خلع قميصه فى حرج شديد وجلست تزيل آثار اللاصق الذى وضعه الطبيب ، حاولت أن تنتهى سريعاً كما علمها الطبيب ، تهرب من نظراته المخترقة لها وكأنه يغوص بداخلها من عمق النظرات المتفحصة محتفظاً بابتسامته العذبة الحانية، مرت اللحظات القليلة عليها وكأنها ساعات طويلة وأخيراً انتهت وهى تقول بتلعثم:



- يعنى لا كان فى نملة ولا حاجة

تتبعها ببصره وهى تلملم أشياءها وتضعها فى صيدلية صغيرة فى الغرفة ،أتممت تمشيظ شعرها وعقصته للخلف بطوق بنفس لون ملابسها وقالت وهى تخرج من الغرفة:

- أنا هروح انام بقى تصبح على خير

فقال ببطء وهو ينهض متجهاً إليها بخطوات ضعيفة:

- مريم... أنتِ لسه بتخافى منى؟

أشاحت بوجهها وهى تستدير لتصرف قائلة بخفوت:

- مش وقته الكلام ده .. أنا مرهقة وعاوزة انام

وضع يده أمامها ليمنعها من المرور وقال بحزن:

- أنتِ لسه مسامحتنيش يا مريم.. مش كده؟

قالت دون أن تنظر إليه :

- أنا قلتك قبل كده انى مسامحك

قال بتلكأ:

- طب انا راجعتك غصب عنك ؟ .. يعنى مكنتيش عايزة ترجعيلى؟

تابعت وهى مازالت تنظر بعيداً عنه:

- ده حقك اللى ربنا ادهولك... أنت ممكن ترجعنى لعصمتك حتى من غير ما تقولى

حرك رأسه نفياً قائلاً:

- بس انا مش عايزك تعملى حاجة غصب عنك ... أنا راجعتك تانى علشان حسيت انك

بتحبينى وبتغيرى عليا .. لكن لو الأحساس ده غلط وانتِ مش عايزانى قوليلى

لم تستطع أن تجبه، أما اكتفت بنظرة لوم وعتاب طويلة ودفعت يده بلطف ومرت من أمامه للخارج ثم إلى غرفتها الأخرى لتنام بها، جلس على طرف فراشه وهويشعر بالحيرة، أهذه النظرة المعاتبة من أجل كلماتى ، أم من أجل أنى راجعتها رغماً عنها، أم ماذا ؟! ، لكن

أحساسى يقول غير ذلك ، أشعر بنبض قلبها لا أخطئ هذه النظرة أبداً ، أستجيبى حبيبتى ..أستجيبى .. فأنا وإن كنت شتاء ، ففى قلبى ربيع نابض لكِ بالأزهار .

دخلت فراشها وتدفرت جيداً وكالعادة عندما تواجهها أزمة ، وضعت الوسادة فوق رأسها وحاولت أن تنام، لكن هيهات ، تشعر بالضجر الشديد:

- لماذا لا يشعر بى ، لماذا يعتقد أنى عدت إليه رغما عنى ، لماذا لا يتمسك بى أكثر من هذا، لا تجعل ترددك سكيناً يمزق قلبى فيصبح حافراً لقبر حبى.

غلبهما النوم ، وفى الصباح كانت والدته أول من تطرق بابهم ، أبتمت لها مريم مرحبة بها قالت عفاف:

- هو يوسف لسه نايم

مريم :

- ثوانى اشوفه لحضرتك

طرقت الباب ولم يأتيها رد فعلت أنه مازال نائماً، ترددت فى الدخول ولكن لابد وأن تدخل ، لم يكن الباب مغلقاً بشكل كامل فدفعته بهدوء ودخلت ، ذهبت إليه فى فراشه لتوقظه ، كان ما يزال على نفس هيئته السابقة عندما تركته بالأمس، شعرت بالخجل الشديد وهى تلمس يده لتوقظه ونادته بهدوء حتى استيقظ ونظر لها قائلاً بتكاسل:

- صباح الخير

قالت على الفور وكأنها تدفع تهمة وجودها فى غرفته:

- صباح النور.. مامتك بره يلا قوم

وقبل أن تستدير لتغادر أمسك يدها قائلاً:

- أستنى طيب قومينى

نظرت له وقالت بعناد:

- أنت بقيت كويس.. بلاش دلح يلا قوم بقى

تصنع يوسف الضعف وهو يقول:

- بطلی ظلم بقى يا مفترية حرام عليكى تعالى ساعدینى

تسائلت مريم بضجر:

- أساعدك ازای یعنی

قال ببراءة مصطنعة :

- أمسكى أیدی بس

أستدارت مندهشة وقالت:

- افندم

ترك يده تسقط على الفراش بضعف قائلاً:

- حرام عليكى انا تعبان قومینى بقى زمان ماما مضايقة بره

زمت شفاتها بحنق وقالت رافضة:

- طيب خالك بقى وانا هروح أنه مامتك تقومك بطريقتها

وخرجت سريعاً وهو يهتف متوسلاً:

- لا بلاش ماما الله يخالكى يا مريم.. معندهاش هزار فى الصحيان

وفى اليوم التالي وبعد يوم طويل ، دخلت مريم الشرفة ووضعت أكواب الشاي أمام يوسف على الطاولة الصغيرة وجلست بجواره وقد بدى الإرهاق على وجهها وهى تقول:

- أنت فعلا بتدلع أوى.. مع انك بقيت كويس معنى ماشاء الله

نظر لها وداعبها قائلاً:

- هو أنا عملتك حاجة.. ده أنا غلبان

قالت بحنق:

- اه غلبان أوى ..عاوزنى أقومك واقعدك وافصصلك واحطلك الأكل فى بؤك واغسلك إيدك وانشفها

قال بحزن مصطنع:

- زهقتى منى قوام كده .. ده انا مريض

قالت ساخرة:

- اه مريض اوى .. شكك كده هتخف وانا هرقد مكانك

قال بنظرة حانية:

- بعد الشر عليكى يا حبيبتي .. خلاص مش هتعبك تانى.. أنا فعلا بدلع بس ببقى مبسوط  
وانت مهتمة بيا كده .. وبعدين الأكل ليه طعم تانى من أيدك

بدأت مريم بارتشاف بعضا من الشاى وهى تنظر إليه نظرة جانبية وقد بدا أنه سيهم بقول  
شئ ما ولكنه يقاوم التردد بصعوبة ، لحظات صامته منه و مترقبة منها حتى قال ببطء:

- مريم انا عاوز اسألك سؤال كده بس متردد

واستدرك قائلا:

- وبصى لو ضايقت خلاص مش مهم

أومات برأسها موافقة فقال:

- هو احنا لما كنا فى الجراج ... والدنيا ضلمة .. مكنتيش خايفة منى؟

حركت كتفيها للأعلى وقالت بلامبالاة:

- واخاف منك ليه

أردف قائلا وهو يبتلع ريقه بشرود:

- يعنى بقيتى تحسى بالأمان معايا؟

نظرت له بجانب عينيها وقالت:

- أنت ليه مهتم اوى بالسؤال ده .. سألتهولى أكثر من مرة

زفر بحزن قائلا:

- لما كنا مسافرين قولتيلي وانت بتعيطى انك لما سمعتى صوتى فى الضلمة حسيتى  
بالأمان...

ثم التفت إليها متابعًا:

- نفسى ترجعى تحسى بالأمان معايا تانى

أجابته بخفوت وهى تضع عينيها فى الكوب الذى بين يديها:

- لو مكنتش حسيت معاك بالأمان مكنتش فضلت ماسكة فيك واحنا فى الجراج والدنيا ضلمة ومفيش حد غيرنا زى ما كنا فاكرين

تنهد بارتياح وهو ينظر إلى الحديقة قائلاً:

- الحمد لله ... دى أقصى حاجة كنت بتمناها

سمعت صوت رنين هاتفها فقالت:

- هروح اشوف مين

أخذت الهاتف وابتعدت عنه لتتحدث إلى عمها دون أن يسمعها ، فتحت الاتصال واستمعت إليه ثم أجابته قائلة:

- النهاردة أحسن كتير الحمد لله

قال باهتمام:

- هو جانبك دلوقتى

- لا فى البلكونة

- قولتيله ولا لسه؟

أبتسمت ابتسامة خفيفة وقالت:

- لاء لسه .. بصراحة يا عمى عاوزه اربييه شوية

ضحك بسعادة قائلاً:

- يبقى ردك لعصمته تانى مش كده ؟

قالت مريم بحرج :

- أيوه ردى قبل ما يخرج من المستشفى

ضحك مرة أخرى وقال:

- خلاص ربيه براحتك انا موافق

دخل يوسف من الشرفة إلى الغرفة التي تتحدث بها فوجدها تغلق الهاتف وتضعه مكانه فقال  
وابتسامة مشاكسة مازالت عالقة بشفتيها:

- كنت بتكلمى مين ؟

قالت بعدم اهتمام:

- ده عمى حسين .. كان بيظمن عليك

كادت أن تتركه وتخرج من الغرفة لولا أن وقف أمامها يسد عليها الطريق ، تلاقت عينيها  
فقال بهمس:

- بحبك

كان يتوقع أن تشيح بوجهها وتتركه وتذهب كالعادة كلما قالها ، ولكن هذه المرة وقفت تنظر  
إليه ثم قالت بنظرة لم يفهم معناها:

- من أمتى؟

تفاجأ بالسؤال فقال:

- يعنى أيه؟

تابعت :

- يعنى بتحببنى من أمتى .. أحنا من ساعة ما اتقابلنا واحنا بنتخانق زى القط والفار

قال يوسف بخفوت:

- والله ما انا عارف من أمتى.. أنا فجأة كده لقيتنى بغير عليكى من كل حاجة وكان نفسى  
أوى تسمعى كلامى وتغيرى تصرفاتك

بدت على وجهها ملامح ساخرة وهى تقول:

- ليه مكلمتينش بود وقولتلى انك مش راضى عن تصرفاتى بدل ما كنت بتتخانق وتزعق  
وتتريق أحياناً

أرسل تنهيدة حارة وقال بوجوم:

- زى ما قتلتك واحنا فى نوبيع.. أنا عمرى ما حببت قبلك.. ومكنتش عارف أعمل ايه.. كل اللى كنت بحس بيه انك لازم تسمعى كلامى ومجاش على بالى ساعتها طريقة نصحى ليكى خالص .. كل اللى كنت بفكر فيه انك مبتسمعيش الكلام وبتعاندى وخالص

أستعاد نظرتة العذبة وهو يتابع :

- وبعدين يا مريم انا كنت حاسس انك حاسة بيا.. وكنت متوقع انك لما تحسى بمشاعرى وتلاقينى بغير هتحترمى ده وهتسمعى كلامى من أول مرة.. لكن انا لقيتك بتعاندى أكثر من الأول مش عارف ليه

نظرت له نظرة طويلة وقالت بهدوء:

- مكنتش متأكدة .. وتصرفاتك العصبية كانت مشككانى .. لو كنت اتعاملت بطريقة مختلفة ونصحتنى بهدوء ولمحتلى انك غيران من كلامى مع وليد مكنتش عمرك هتشوفنى بكلمه .. لو كنت فى الفرحة جيت قتلنى مين اللى واقفة معاها دول ومتقفيش معاها كنت هاسمع كلامك.. لو كنت لما مشيت ورايا بالعربية نزلت وشدتنى قدام الناس غصب عنى علشان مطلعش مع سلمى كنت هسمع كلامك .. صدقتى كنت هسمع كلامك.. وكنت هتأكد من اللى كنت بعمل كل ده علشان أتأكد منه.. أنك بتغير

لكن انت كنت دايما تكتم فى نفسك .. وتكتفى بالتصرفات العصبية.. وحتى لما كنت بتكلمنى كنت بتحسسنى انك بتأمرنى لمجرد أنى بنت عمك وبس

لمعت دموع فى عينيها فمسحها بأنامله وقال بحب:

- كنت غلطان سامحيني.. أنا كنت سىء الظن لأبعد الحدود معاكى .. لكن عاوزك تعرفى انى مكنتش مبسوط يعنى وانا بكتم فى نفسى كده.. أنا كنت بتعذب يا مريم .. وعذابى وصل للمنتهى ولأبعد حد فى يوم الحادثة .. لدرجة انى أخذت الحبوب والسجاير من غير تفكير وكأنى منوم وفاقد للسيطرة على نفسى.. لغيت عقلى .. سامحيني يا حبيبتي

نظرت له مرة أخرى بنفس النظرة المبهمة قائلة:

- فاكرا لما سألتك فى العربية واحنا راجعين من فرح وفاء وانت اضايقت من سؤالى وقتلتلى أنى باستفرك .. أنا عاوزة اسألك نفس السؤال تانى ولو سمحت جاوبنى

أشاح بوجهه بعيداً وأغمض عينيه وهو لا يريد التذكر وقال ببطء وقد شعر بغصة فى حلقه :  
- صدقيني لو قُلتك انى مش فاكِر حاجة خالص .. كل اللى فاكِرهُ أنى حُضنتك وقُلتك الكلام  
الى قُلتهُ وانتِ بتقاومينى .. وفجأة لقيتك اتخبطى فى الحيطه ووقعتى على الأرض  
صمت وهو يضغَط عينيه بقوة كرها لما تذكره فى هذه اللحظة فقالت :

- وبعدين أيه اللى حصل؟

مسح وجهه بيديه وقال لها :

- أنا مش عاوزك تفكرى التفاصيل دى .. انا ماصدقتك انك بقيتى كويسة معايا

فتابعت وكأنها لم تسمعه:

- وبعدين يا يوسف حصل أيه

رضخ لرغبتها وقال بشرود:

- صدقيني مش فاكِر .. كل اللى فاكِرهُ ساعتها لما وقعتى على الأرض وانا قربت منك ..

بدأ جبينه يتعرق وهو يستحضر تلك اللحظات بصعوبة شديدة وهو يقول:

- كنت بحاول اشيل عنك الهدوم وانا دماغى بتلف .. وبعدين بدأت اشيل هدومى وفجأة  
حسيت أنى صنم .. عقلى أتجمد وقلبى ابتدى ينبض ببطء شديد .. حاولت بعدها افكر أى  
تفاصيل ما فتكرتش حاجة أبداً .. مش فاكِر غير أبويا وهو بيشدنى يقومنى من جنبك وأديه  
بتنزل على وشى وشفتك فى حضنه ورجليك كلها دم فتوقعت انا عملت أيه .. صدقيني ده كل  
اللى فاكِرهُ

تركها وخرج من الغرفة إلى حجرة المعيشة، هوى إلى الأريكة وبدأت دموعه تنهمر بصمت  
وهو يتصور كل مشهد مر أمام عينيه وهو يعصى الله فيها ، وهو يتذكر كلماتها وهى تصرخ  
فيه "فوق يا يوسف انا مريم"

خرجت إليه ورأته يدفن رأسه بين كفيه ويبكى وشهقاته تعلو وهو يستغفر الله، أطرقت  
برأسها ولم تعد تتحمل كتمان الأمر أكثر من هذا فهو يتعذب بما لم يفعله يوماً بعد يوم ويأكله  
الندم ويلوكة بين فكيه بكل قوة ، شعرت أن عقلها ينبض فى قلبها ويحثها على أخباره بما  
حدث فهو قد تربى بما فيه الكفاية ، لم تتردد أكثر من هذا وقالت وهى تجلس بجواره:



- مصداقك يا يوسف .. عارف ليه .. لأنك ملمستنيش .. معملتليش حاجة أبداً بعد كده

توقفت الدموع فجأة وكأن الدنيا قد توقفت فجأة عن الدوران وسكت الكون ، ألتفت إليها  
بذهول وقطب جبينه قائلاً:

- يعنى ايه ؟

أفلتت دمعيتين من عينيها وقالت:

- فاكّر لما ودتني لدكتورة النسا لما أغمى عليا والدكتورة طلعتك بره

أوماً برأسه وهو ينظر إليها بصمت مخلوطاً بذهول فقالت:

- الدكتورة فوقتني وسألتني عليك وقتلتها انك جوزى .. قالتلى طب احتمال يكون القىء  
والدوخة بسبب الحمل نتأكد .. طبعا انا كنت هموت .. وافقت على طول وبعد الفحص بصتلى  
باستغراب وقالتلى أومال بتقولى عليه جوزك أزاى ووافقتى أعمل فحوصاتى ليه لما انت  
لسه بنت بنوت ! ..

ساعتها روجت فى دنيا تانية .. مبقتش عارفة أضحك ولا اعيط .. أصرخ ولا اعمل أيه مش  
عارفة .. لقيت دموعى نازلة زى المطر.. ولما خرجت من عندها والبنت الممرضة شافتنى  
بعيط سألتنى مالك لقيت نفسى بقولها الدكتورة كانت فاكراى حامل .. طبعا هى افكرت  
ساعتها انى بعيط علشان مطلعتش حامل وفضلت تواسينى.

توقفت الساعات والعقارب حتى أنه شعر بأن الهواء أيضاً توقف، فلا يستطيع التنفس ولا  
الحركة، وكأن قلبه رفض نبضه وكأن عقله تمرد عليه ورفض التصديق، لا يستطيع شيئاً  
سوى الذهول ... الذهول وفقط ، فقال فى هذيان :

- يعنى ايه .. والدم .. أومال ده حصل أزاى .. أزاى ..!؟

قالت من بين دموعها:

- أكيد أغمى عليك .. وإلا مكانش عمى لما دخل بعد الفجر لقاك جمبى .. وطبعا كانت رجلى  
غرقانة دم علشان لما وقعت على الأزاز اتجرحت جامد والموقف مكنش يحتمل تفسير تانى

قفز المشهد فى عقله مرة أخرى بقوة ، لقد تذكر فجأة لحظة سقوطه وكأنها حلم بعيد من  
مشهد قديم ، نعم لقد سقط وهو ينزع ملابسه ، عندها كان يترنح بقوة ، لابد وأنه قد سقط  
غائبا عن الوعي بعدها

أستدار إليها بجسده كله دفعة واحدة ، وكأن روحه التى غادرت سقطت فجأة بداخل جسده من جديد وهتف بها:

- ومقولتيش ليه من ساعتها .. ليه يا مريم

ثم وقف ناهضاً وقال بعينين زائغتين مشدوهتين :

- يعنى ايه ؟ يعنى انا مش زانى ؟... يعنى ... يعنى انا لسه يوسف .. أنا مضعتش من نفسى .. أنا ربنا حصنى وحمانى من الجريمة دى

نهضت لتقف أمامه وقالت ودمعها تنهمر كالشلال وتمد أناملها تمسح الدموع عن وجهه وتقول:

- وأنا لسه مريم .. أنا كمان لسه مريم يا يوسف .. لسه بعفتى وطهارتى وربنا حمانى وحصنى رغم كل الافترا اللي اتقال عنى

نسي ألمه وجرحه الذى لم يندمل بعد وحملها بين ذراعيه وطاف بها وهو يهتف تارة ويصرخ تارة أخرى ويبكى بضحكات ويضحك بدموع واختلطت دموعه بدمعها وهو مازال يهتف:

- مش مصدق .. مش مصدق يا مريم.. مش مصدق

أنزلها إلى الأرض فجأة هاتفاً بسعادة:

- بابا .. بابا لازم يعرف

عقدت ذراعيها أمام صدرها وقالت بمكر:

- وانت فاكر انه لسه مايعرفش .. أنا قتلته وانت فى العمليات .. وهو كمان مكنش مصدق زيك كده

أحتضن وجهها بكفيه بقوة قائلا:

- ومقولتيش ليه من ساعتها

قالت وهى تنظر لعينييه وتمسك بقبضتيه:

- كنت عاوزه اربيك شوية

تأمل وجهها لفترة طويلة وقد عادت روحه تلمع فى عينيه مجدداً واحتضنها بين يديه للحظات ثم أبعد وجهها مرة أخرى ونظر إليها يتفحص عينيها ثم قال بشغف و تحدى:

- تصدق بى ده انا اللى هربيكى

قرأتها فى عينيه فابتعدت وهرولت سريعاً إلى غرفتها وأغلقتها من الداخل ، لحق بها و طرق الباب بقوة هاتفاً :

- أفتحى يا مريم احسنالك

وقفت خلف الباب وقلبها يخفق بشدة هاتفة :

- مش هفتح

طرقه مرة أخرى صائحاً :

- بقولك افتحى بدل ما اكسر الباب

بادلته الصياح من خلف الباب وهى تضع يدها على صدرها اضطراباً وسعادة :

- بقولك مش هفتح مهما عملت .. مش هفتح يعنى مش هفتح

وبعد مرور شهرين وفى يوم الجمعة تحديداً كان موعد اللقاء الأسرى المعتاد حول مائدة الطعام الكبيرة ، جلس حسين على رأس المائدة كالعادة وهو يقول :

- أومال يوسف ومريم منزلوش ليه لحد دلوقتى

قالت عفاف بنفاد صبر :

- والله زهقت يا حاج .. بقالى ساعة كل شويه اتصل ويقولوا نازلين ومفيش فايذة

ضحك حسين ضحكات جعلت الجميع يبتسم ثم قال:

- وباقى البنات فين .. إيمان وفرحة ووفاء مش كانوا هنا من شوية

تدخل عبد الرحمن قائلا:

- أصل يا بابا إيمان عملت حركة تمرد عليك وقالت الستات لوحدها والرجالة لوحدها .. طبعا حضرتك عارف انا جاى اهدى النفوس مش أكثر

ضحك والده مرة أخرى وقال:

- خلاص طالما هي حابة كده والبنات موافقين خاليهم على راحتهم

طرق يوسف ومريم الباب ففتح إيهاب باب المنزل وهو يمسك معدته قائلا:

- حرام عليكموا موتنا من الجوع

دخل يوسف وهو يلف كتف مريم بذراعه ويقول:

- معلىش يابنى انا عارف ان اختى مجوعاك .. قدرك ونصيبك بقى

خرجت فرحة قائلة بشغف:

- أنا سامعة حد بيحب سيرتى

تلقاها يوسف بذراعين مفتحتين قائلا بمرح:

- أهلا يا ام العيال وحشانا يا غالية

ضربت يده وهى تقول هاتفة باعتراض:

- أم العيال فى عينك .. ده انا لسه يدوب فى الشهور الأولى.. سابقة إيمان بشهر واحد .

نهض عبد الرحمن واقفا وهو يقول باعتراض:

- لا بقولك أيه.. ولا سابقاها ولا حاجة.. دى الحكاية كلها فرق التوقيت مش أكثر

علت الضحكات بينهم مجدداً وقالت مريم :

- طب ادخل انا بقى للبنات قبل ما حد فيكوا يصطادنى

ربت يوسف على كتفها وقال مشجعا :

- أدخلى يا حبيبتي بس على مهلك ..

ثم نادها برجاء :

- الله يخليكى يا مريم كفاية ترجيع بقى.. كده على ما تيجى تولدى مش هنلاقى حاجة جوه

أصلا

وأثناء الغداء ألتفت عبد الرحمن إلى والده قائلا:

- عمى مجاش النهاردة ليه يا بابا

- بيحضروا أنفسهم علشان هيسافروا يعرضوا وليد على دكتور بره مصر

ألتفت إليه يوسف قائلا:

- هو أبندى يتحرك ولا لسه

تدخل إيهاب قائلا:

- على كرسى متحرك كده جوى البيت

تمتم يوسف قائلا بعدم اهتمام:

- ربنا يشفيه

ربت والده على يده قائلا:

- لا يابنى أدعيه من قلبك إن ربنا يشفيه.. وليد عرف غلطته وندم على اللى عمله وعرف

ان اللى هو فيه ده عقاب من ربنا

تدخلت عفاف قائلة :

- ومش هو وبس والله يا حاج .. دى فاطمة كمان كأنها اتبدلت لواحدة تانية خالص.. الحزن

على ابنها كسر ها أوى وخلها فى دنيا تانية.. ربنا يرفع عنهم ويسامحهم

\*\*\*

- يوسف

- نعم يا حبيبتى

- ناولنى البسكوت المملح اللى جانبك ده

- مريم.. مكنش حمل ده.. كل شوية بسكوت بسكوت .. أنتِ حامل فى عيل فى الحضانة ولا

أيه

- كده يا يوسف .. مش كفاية امبارح زعلتنى ومرضتتش تشيلنى

- أولدى انتِ بالسلامة يا حبيبتي وانا اشيك زى ما انتِ عايزة.. أصل بصراحة مغديش غير عمود فقرى واحد

- قصدك أيه.. أنا تخنت يعنى

- لا يا حبيبتي هو انا أجرو اقول كده

- طب هات البسكوت بقى

- بقولك أيه يا مريم

- نعم يا حبيبى

- عبد الرحمن كان بيحكلى على سياحة جديدة كده.. أسمها السياحة الزوجية

- يعنى أيه.. الناس بتسافر مجوز؟

- مجوز!

- مجوز ايه بس هو انا بكلمك على جوز حمام

- طب فهمنى انت

- طب تعالى جوه.. الدنيا برد هنا

- طب شيلنى

- ليه ؟!

- علشان تحكىلى جوه على السياحة !

- سياحة أيه؟

- السياحة الزوجية اللى عبد الرحمن قالك عليها !

- عبد الرحمن مين؟

- أخوك !!

- أخويا مين انا ماليش أخوات ... قال شيلنى قاال !

\*\*\*

تمت بحمد الله

إلى اللقاء مع رواية " مع وقف التنفيذ "